

*Ex Tempore Oct. Fr. Erem. Virginal. S. P.  
Augustini ad d. Josephum Fabio.*

# TOPOGRAPHIA GERMANIÆ AUSTRIACÆ

CONSCRIPTA

A

CAROLO GRANELLI.

SOC. JESU SACERDOTE,  
NOVIS ACCESSIONIBUS LOCUPLETATA

MARIAE THERESIÆ  
AUGUSTÆ  
HONORIBUS DICATA

A

MAURITIO L. B. DE BRABECK,

DUM IDEM

IN COLLEGIO REGIO THERESIANO S. J.

TENTAMEN PUBLICUM

EX

DISCIPLINIS PHILOSOPHICIS  
ATQUE HISTORICIS

SUBIBAT

ANNO SAL. M. DCC. LIX. MENSE SEPTEMBRI.



---

VINDOBONÆ,

TYPOGRAPHIA JOANNIS THOMÆ TRATTNER, CÆS.

REG. AULÆ TYPOGRAPHI ET BIBLIOPOLÆ.

---

M. DCC. LIX.

This image shows a severely damaged and aged manuscript page. The paper is a light beige or cream color, showing significant water damage, discoloration, and staining. Faint, illegible text impressions are visible through the paper's surface, suggesting a multi-page document. The top portion of the page features large, dark, decorative initials in a stylized Gothic script. Below these, several lines of text are visible, though they cannot be read accurately due to the damage. The overall appearance is that of an old, well-preserved historical document.

AUGUSTISSIMÆ  
INVICTISSIMÆ, AC GLORIOSISSIMÆ  
ROMANORUM  
IMPERATRICI  
MARIE THERESIAE  
HUNGARIÆ ET BOHEMIAE  
REGI  
APOSTOLICÆ,  
ARCHIDUCIAUSTRIAЕ,  
DUCI

BURGUNDIAE, BRABANTIAE, MEDOLANI, STYRIAЕ,  
CARINTHIAЕ, CARNOLIAE, LUXENBURGI, WURTENBERGI,  
UTRIUSQUE SILESIÆ,

PRINCIPI SUEVIAE  
MARCHIONI,

S. R. I. BURGOVIAE, MORAVIAE, UTRIUSQUE LUSATIAE,

COMITI  
HABSPURGI, FLANDRIAЕ, TYROLIS, &c.

PRINCIPI  
AC  
DOMINÆ, DOMINÆ  
CLEMENTISSIMÆ.

АУМЛРДГУСЧА

БІЛІВІСЯЛОДА ГІМІСІАДА  
МІЛІЯМОДА

ДІЛІДА ЯНЧМД  
ДІЛІЯСІПДА ГІЯЛМ

# AUGUSTISSIMA IMPERATRIX!



*agna profecto semper habita laus  
est , quæ a resuscitatis propa-  
gatisque scientiis Principibus  
accessit , hanc Imperiorum fun-  
datores Augusti , hanc Cæsares bello & vi-  
ctoriis inclyti gloria sua quantumvis magna  
non credidere inferiorem : ex quibus omnibus  
nemo unquam tanto illam meruit jure quam  
TU AUGUSTISSIMA , quæ non uno conatu ,  
non legibus tantum prudentissimis , non insti-  
tutis solum optimis huic Republicæ parti con-  
sulisti*

AUGUSTA  
EX LIBRIS

fuluisti, sed quæ præmiis etiam propositis, collatis honoribus constanter illud indefessa age-re pergis.

Atque ipse ego hodie rursus, gloriosum  
bujus TUÆ sedulitatis documentum sio, utpote  
cui, tanto a TÈ licet mea tenuitas sejungat  
intervallo, tantis et si TU obruta sis negotiis,  
ad TE ipsam tamen aditum præbes, proposito-  
que TUO nomine, progressuum a me in litteris  
factorum publicum dare ut possim experimentum  
concedis: non satis TIBI erat, fratribus id  
meis

*meis hoc quondam in Collegio TUO degenti-  
bus id concessisse : Tertio beneficium repetis ,  
nec TE dando fatigari posse ostendis , quamdiu  
merendo nos non fatigaremur : frustra ego hic  
gratitudinem pollicear ! quid enim ad felici-  
tem optimæ Principi deesse potest ! quid ad  
magnitudinem invictæ THERESIÆ conferam  
ego ? Dicam tamen & TE non invita , imo  
annuente dicam : beneficiis etiam TUIS cumulate  
responderi posse credis : si beneficia non in imme-  
ritum collata videantur : id igitur præstabo ut  
divin-*

*divinissimo TIBI animo, constanti in scien-  
tias affectu, perpetuo in patriam studio, tanto  
TUO favore non indignum me fuisse exhibeam.*

*TU interim AUGUSTISSIMA patere ,  
ut dum sub TUIS pugno auspiciis, MAIESTA-  
TI TUÆ offeram Topographiam Germaniæ :  
banc olim avi TUI consecratam gloriæ , nihil  
pudet , orbi iterum TUO illustratam nomine  
producere , nihil enim amori in TE nostro con-  
gruum magis esse arbitratus sum.*

*Jam*

*Jam pridem indignabamur tanta quibus  
TU regnum TUUM illustrasti miracula iis  
vix non tantum nota quibus prosunt, non om-  
nium circumferri linguis : metropolim quidem  
TUAM Imperiique Sedem lætabamur avidis  
advenarum omnium oculis , TUAM loqui ma-  
gnificentiam ; dolebamus in remotioribus oppi-  
dis obscura latere, non pauciora hic a TE po-  
sita seu benignitatis seu Magnitudinis TUÆ  
monumenta. Topographiam hanc idcirco edi-  
dimus, novisque quæ sub MAJESTATE TUA*

( )

acces-

accesserunt incrementis locupletavimus , ut in  
ea , quasi in unum collectam fascem gloriam  
**TUAM** videat lector stupensque fateatur , nul-  
lam esse tam remotam regni TUI plagam quam  
maternæ **TUÆ** sollicitudinis non pervasit af-  
fectus & quæ non suam MAIESTATI **TUÆ**  
celebritatem felicitatemque debeat : admirabi-  
tur profecto orbis universus , aureum hoc quod  
Provinciis his attulisti sæculum : admirabitur  
a TE sola , hæc erecta institutaque fuisse , quæ  
non dicam Atavorum **TUORUM** omnium glo-

riam

*riam longe superant, quæ sæculorum, quæ MARIA  
RIAM THERESIAM antecesserunt, omnium  
suo splendore famam obscurant, sed quæ tam  
brevi temporis intervallo vix humanis perfici  
potuisse manibus posteritas fatebitur: frende-  
bunt adversarii felicitatis nostræ invidi, vota  
homines quotquot in terris sapiunt omnes jun-  
gent nobiscum, ut naturæ prodigium AUGU-  
STAM THERESIAM, orbis delicias, Pa-  
triæ Parentem, piam, felicem sospitent superi,  
in generis humani ornamentum ad seram usque  
ætatem*

*ætatem conservent : hæc mihi votorum summa :  
in eo solo repositam incolumentem meam æter-  
num existimabo ut sim*

## MAJESTATIS TUÆ

*Clientum infimus*

MAURITIUS L. B. DE BRAECK.

P R A E F A T I O  
E D I T O R I S.

**P**rodit iterum Topographia Germaniae Austriacæ, quam eruditissimus Vir Carolus Granelli S.J. in sua quondam ediderat juventute, & qua famæ illi quam sibi in Republica Litteraria, postmodum peperit, prolusisse videbatur.

Non pauca erant, quæ novam hanc Editionem exigere videbantur: operius ipsius præstantia, utpote quod luculentam affundit lucem Historiæ Patriæ, in qua cæcutire in tanto hodie eruendæ antiquitatis studio, indignum foret; tum operis ejusdem raritas, quod scilicet, avidis Lectorum manibus undique coëmptum, plurium hodie expectebatur, votis; accedit, quod, cum recentia juxta antiqua urbium ornamenta complectatur, aliqua sui parte mancum effet; cum ab eo, à quo prima hujus operis facta est editio, tot tantaque Provinciis his accesserint ut, si antiqua cum præsentibus comparentur, novas munifico Superorum dono hic creatas regiones diceres.

Hæc ergo omnia impulerunt ut, dum nova editione  
Litteratorum votis fieret satis, non omittentur illa, quæ  
illustrandis his Provinciis accesserant: hunc in finem corro-  
gata fuere undique instituta nova Litteraria, Oeconomica,  
Religiosa: factum inde ut ducentis facile locis vel aucta,  
vel immutata Topographia hæc prodeat: nec tamen asse-  
rere auderem omissum nihil: id unum asseverare possum,  
diligentiæ solertiæque impensum esse quam plurimum: ast  
negligentiores fuere quidam, quorum per varias Provincias  
in id opus petita fuerat opera; id ipsus facile Lector con-  
jicet, dum Provinciarum quarundam multo cæteris ex-  
actiorem descriptionem offendet; inter eas eminet Tyro-  
lis, idque attribuendum industriæ Clarissimi Viri JOSEPHI  
SPERGESII DE PALENS, Secretioris Archivii Status Cu-  
stodis, cui debemus vix non omne quod hic reperietur no-  
vi: mappas non addendas judicavimus, tum quod passim  
hæ nostro tempore omnium circumferantur manibus, tum  
quod eæ quibus ex limitum immutatione, quædam acce-  
fere, ab ordinibus Provinciarum editæ necdum fue-  
rint: Tu interim Lector qualicumque nostra  
opera utere & vale.

TOPO.



# TOPOGRAPHIA ARCHIDUCATUS AUSTRIÆ.



Ustria, Germanici Orbis Gemma, quæ modo ab Ortu Hungariorum, ab Occasu Bavariam, ab Austro Styriam, & ab Arcto Bohemiam, Moraviamque respicit, Romanæ Reipublicæ, & primorum Cæsarum tempore in tres discissa partes amplioribus Provinciis insertas, totidem simul nomina sortiebatur: nam ad interfluentis Danubii dextram, quod ab Oeno fluvio ad Cetium montem extenditur, Ripensi Norico, reliquum Superiori Pannoniæ, Græcis Pœoniæ, adhærebat; sola vero ea pars, quæ fluvii lœvam occupat, Germania tunc audiebat, a Quadiis & Marcomannis, aliisque

Topogr. Austr. P. I.

deinceps populis habitata. Quæ ante hæc tempora inibi fuerit rerum facies, ob sincerorum annarium defectum, quod & plerisque totius mundi nationibus contigit, prorsus intercidit: apage enim inania somnia, quæ a Matthæo quodam nimis credule desumta Henricus Gundelfingius anno millesimo quadringentesimo septuagesimo sexto in Austriacos fastos invexit; prium scilicet Austriæ Marchionem, nescio quem Abrahamum fuisse, trecentis annis, si Superis placet, ante Patriarcham Abraham ex Terra admirationis in transmarinis partibus fita, a Domino Sathan expulsum, & cum uxore Susanna in hanc oram jam prius ab aliquo Judæo Judæifaptam diætam adver-

A

so

so Istro advectum; huic vero subrogatum primogenitum Achaym cum conjuge Namyaym, Comitis Hungariæ filia, dein alios partim Ethnicos, partim Judæos, nempe Raban, Leptan, Nynter, Lynal, Peyna, Zavan, &c. Supervacaneum equidem est, hujusmodi nugas pluribus refellere, cum temporum, locorum, ac personarum ratio memram esse imposturam luce meridiana clarius evincat: merito proinde tanquam absurdas fabulas Lambecius Cæfareæ Bibliothecæ Præfectus, (a) cæterique omnes eruditæ Austræ scriptores cariosam hanc antiquitatem explodunt, ita ut ejusdem authorem Cuspinianus

(a) Com-  
ment. de  
bibl. lib.  
2. c. 6.

(b) Descr.  
Austr.

(b) nugatorem perditissimum, Æneas Sylvius, Friderici Imperatoris a secretis, dein Summus Pontifex Pius II. ineptissimum Sycophantam nuncupare non dubitarent. Hisce figmentis ansam præbuuisse videntur quatuor vetusta monumenta, hebraicis literis exarata (ubi nulla tamen sit illius pseundo-Abrahami mentio) Guntendorffii, ut fertur, inventa, & a Lazio in suo de gentium migrationibus opere exhibita, de quibus prolixa nimis dissertatio foret contexenda, quare hoc tantum interim observasse sufficiat, characteres iis esse incisos, prout Esdras Nehemias secundum D. Hieronymi sententiam illos innovavit; annum autem in uno lapide expressum certo, in alio probabiliter Esdræ ætatem prævenire.

Pannoniam Romanorum primus armis adoptus est anno ante Christianam epocham 171. P. Licinii Crassi tunc Consulis Legatus susceppta in Illyricum expeditione; hujus quippe Provinciæ latius sumta pars, teste Strabone, (c) etiam Pannonia censebatur, ad cujus usque urbem Carnuntem T. Livius (d) diserte afferit, Legatum cum exercitu penetrasse. Eandem rurus tentavit Octavianus Augustus anno ante Christi nativitatem circa 30., ac quadriennio post de ea triumphum egit; sed hoc, de quo sermo est, Danubii littus attingisse nunquam videtur. Cessit id postmodum Tiberio neandum Imperatori, qui anno a partu Virginis septimo in hac Austræ ora hypernavit, bellum sub Octaviani auspiciis Marobodu Marcomannorum Duci illatus. Excussere quidem saepius Romanorum jugum Pannones, verum iterum debellati, anno 12. aut ad summum 25. in Romanam Provinciam sunt redacti. Parem quoque fortunam, & eodem prope tempore expertum est Ripense Noricum a Claudio Druso, aliisque Ducibus, Vandeli, Rhætici, ac Pannonici belli occasione subjugatum. Transdanubiana autem Austræ pars communis Germaniæ felicitate fructa, & fortitudinem æmulata Romanæ potentiae nunquam succubuit, sed hostilibus duntaxat incursionibus interdum patebat.

Ro-

(c) De situ  
Orbis 1. 7.

(d) Lib.  
42. c. 1.

Romana Castra Romana quoque Christi fides in has regiones comitata est: Diocletiano quidem imperante S. Quirinus Siscianus Episcopus Illyricum ingressus, a Prætore Maximo ad Galerium Superioris Pannoniæ Præsidem, & ab hoc ad Amantium Judicem catenis vincitus raptabatur; unde factum, ut adjacentes Danubio Urbes, Evangelii semina ubique spargens per agrarit, anno demum 308. gloriosam martyrii palmam consecutus. Feliciores Norici, quibus jam sexto a Christi morte lustro D. Laurentium primum Laureacensem Præfulem ejusdem legem annunciasse, ex Passavienibus, aliisque annalibus edocemur. Hujus vestigia pressere Syrus, & Juventius S. Hermagoræ discipuli; sed omnium maximam in agro Domini segetem ab anno 453. demessuit celebris Noricorum Apostolus S. Severinus. Neque adeo fero reliquæ ultra Danubium Austriae fidei lumen affulsi; anno enim 396. narrat coævus author D. Paulinus, Fritigilem Marcomannorum Reginam ab Ambrosio Mediolanensi Antistite divinis mysteriis per epistolas imbutam, marito & subditis eadem communicasse.

Imperio Romano nimia sua mole jam tandem fatiscente, varii Teutonici Populi, Boii videlicet, Suevi, Marcomanni, Gepidæ, Gothi, Longobardi, aliquique plures in Noricum, ac Vindeliciam effusi, quidquid a

Danubio ad Alpes porrigitur, Germaniæ albo inscripsere. Interea Avares quoque, Hunni, five Hungari, & Slavi Scythiam suam in has usque plagas progressi sunt; sed Franci & ipsi Teutones Duce Carolo Magno Imperatore, Bavaris uniti, relata anno 791. ad Anisum fluvium, qui hos tunc a Barbaris dirimebat, celebri victoria, illos strenue repulerunt, Orientali limite longius promoto. Hic itaque terræ tractus Teutonicæ virtutis præmium, & gloriæ testis, vernaculae Oosttryck, five Oesterreich, & latino flexu Austria, vel etiam Marchia Orientalis dici cœpit, præerantque illi Comites, seu Præfeti germanice Marggraffen (unde & latinum Marchionum nomen defluxit) qui adversus Slavos & Hungaros excubantes Bavariae Ducibus primo obtemperabant, postea Germaniæ Regibus, vel Imperatoribus immediate subjiciebantur. Quam dignitatem hæreditario in posteros jure primus omnium adeptus unanimiter fertur Leopoldus I. ex illustri Comitum Babenbergium stirpe, qui adhuc adolescens, cum Henricum Aucupem Germaniæ Regem venandi studio per avia abruptum solus insequeretur, Principis in feram collimantis arcui re pente disrupto suum adeo celeriter substituit, ut ille desperata jam præda adhuc potiretur. Ita arrisit juvenis gratia Henrico, ut Provinciam proxime vacaturam in

præmium pollicitus, decedente anno 928. Rudingero de Pechlarn Orientali Marchiæ Præfecto, hanc ei in perpetuum familiae feudum contulerit. Marchionatus terminos ab Aniso fluvio non adeo ultra Cetium montem eo tempore extensos S. Leopoldus Austriae Marchio, qui obiit anno 1136. post geminas clades Stephano II. Hungariæ Regi fines suos infestanti inflictas, ad hodiernam amplitudinem in Ortum produxit. Quod vero ad Occasum inter Anisum, & Oenum intercipitur, non nisi anno 1156. Bavariæ ademtum, Austriae accessit, consentiente Friderico I. Imperatore, qui ut Henricum II. tum Austriae Marchionem ad reliquam Bavariam, quam ejus frater, & prædecessor Leopoldus Largus a Conrado III. Cæfare obtinuerat, facilius deserendam alliceret, Austriae insignibus privilegiis auctam, Cor, ac clypeum Imperii eam in diplomate appellans, eodem anno in Ducatum erexit. Quandonam autem Austria Archiducatus titulo cæteris Europæ Ducatis præminere cœperit, sub judice lis est; non illi enim a Friderico IV., alii ab Alberto I. Imperatoribus eam prærogativam exordiuntur: Cuspinianus (a) a Friderico II. Babenbergico initium sumere videtur, dum ait Fridericu II. Cæsarem, ut Fridericu Austriae Ducem, qui ab avo suo Friderico I. Imperatore fertu-

niceo, five corona rostrata, & ab ejusdem filio Henrico Rege dia-demate, & circulo aureo fuerat exornatus, amplius condecoraret, crucem auream, qualem Cæsares suis in coronis gestant, prioribus insignibus adjecisse, quo ipsum patrem regiæ dignitati efficeret, ut inter reliquos Imperii Duces, veluti Archidux eniteret; Altius ad-huc illius originem indagat Fug-gerus (b) mentem reflectens tum ad ea verba, quæ Henricus IV. Imperator in suo diplomate signato anno 1058. ita usurpat: *Nos preces præclarissimi, & nobilissimi Principis Domini Ernesti Marggravii Austriae, S. R. Imperii PRIORIS &c.* tum ad alia quibus Fridericus I. in memorato jam anni 1156. diplomate ita de-cernit: *Si quibusvis Imperii Curiis pu-blicis Dux Austriae præsens fuerit, unus de Palatinis ARCHIDUCIBUS censem-dus est.* Ego itaque in re obscura ne veritati obsim, Babenbergicos Austriae Principes Ducis, Habsburgicos vero Archiducis nomine di-stinctionis ergo, ubi opus fuerit, indicabo.

Friderico II. Babenbergorum Ducum postremo anno 1246. sine liberis extinto, magni motus Austriae tenuere, pluribus Princi-pibus in spem erectis, & pulcher-rimam Provinciam sibi certatim depositentibus, inter quos præva-luit prius Hermañus Badenfis uxori-jure fatus, quæ erat Gertru-dis Friderici ex Fratre neptis, post-

(a) Descri.  
Austr.

(b) Spe-cul. Con-lib. 3. c. 5.

postmodum Ottocarus Bohemiæ Rex, suæ itidem conjugis Margarethæ Friderici Sororis jura prætexens, quam cum ille ob senium repudiatam paulo post veneno sustulisset, ad secundas nuptias transitus, & nihilominus, Austriæ dominatum, Imperio, cuius intererat id ratum habere, prorsus abnuente, contra fas retineret; imo gloriofissimi æque, ac piissimi Imperatoris Rudolphi I. electionem contumeliis excipiens eum colere detrectaret, in Imperialibus Comitiis anno 1275. Augustæ convocatis rogati sententiam Principes Ottocaro veluti Imperii hosti bellum jure merito indicunt. Quare Cæsar biennio post in Austriam movens, unico illam anno in sui potestate rededit, Rege post firmatam pacem in Bohemiam remeante: at cum is convitiis Kunegundis adactus ignaviam conjugi exprobrantis bellum redintegraret, a Cæsare profligatus miserrime interiit. Exinde Austria in Comitiis anno 1282. Augustæ similiter habitis ex communi Principum, & Ordinum consensu, orantibus ejusdem Provinciæ Legatis, Alberto Rudolphi filio postea Imperii beneficio concessa. Porro Alberto anno 1308. ab Archiduce Joanne confosso, Imperium adiit Henricus Lucemburgius, cui iniqior erat in illius filios animus nihil non agenti, ut Austriæ professione eos dejiceret, adeo ut Ar-

chiduci Friderico jus suum more majorum Spiræ ab eo repetenti renuntiarit, ob unum Austriæ Ducatum quinque Reges interemtos, satis utique causæ suppeteret, ut rerum in ea Provincia ordo mutetur: Ea voce iætus Fridericus id duntaxat reposuit, Cæsarem, si in sententia perfistat, fieri sextum posse, qua dicendi libertate Henricum a proposito deduxit. Hinc Austria sub clementissimo Habsburgicæ Domus regimine hactenus felicissime perennavit.

Jacet Austria in climate secundum veterem Strabonis calculum septimo, secundum recentiores octavo: geographica ejus longitudo ab Insula Palma computata intra gradum 36. cum 15. minutis, & 40. cum 50. minutis: latitudo vero inter gradum 47. cum 26. minutis, & gradum 48. cum 56. minutis continetur. Solo gaudet amœno, fluviis irriguo, & partim in planitiem æquato, partim in colles, montesque assurgente, atque omnis generis frugum præsertim vini admodum feraci. Quod unum deerat fertilissimæ huic regioni, opportunitatem nempe ampliorem quaqua versum commodioribus devehendi viis, quidquid natura loci, & incolarum industria dignitur, amplissime procuravit augustinus Carolus VI. structis undaque ab an. 1725. ex lapide viis amplissimis, per complanatos montes, æquatatas valles, substructis pon-

tibus, omnibus demum hoc collatis, quæ Romanorum hic Majestatem, soliditatemque prope æquarent; e quibus in Austria binæ singularē fui memoriam merentur, altera per sylvam Viennensem confragrosam admodum hodie plana mire, atque commoda; altera prodigiosa per montem Semering ad Neapolim, qui Austria a Styria dividit, & qua mons arduus incredibili labore facilis viatori redditus fuit. Dividitur Austria in Inferiorem, & Superiorem, hæc ad Occidentem, illa ad Orientem vergit: communem utriusque terminum ex Australi Danubii parte constituit fluvius Anisus, aliis Onasus, aut Anassus, ex Boreali autem linea, quæ facto a Danubio paulo supra Ipsum initio ad Bohemiam usque, trans Urbem Weitram ducta concipiatur. Inferior

(a) Descr.  
Austr.

quadrifariam a Cuspiniano, (a) & quidem dupli ratione subdividitur, primum per campos; quorum duo cis Danubium Steinfeld, & Tulnerfeld, ac totidem trans Danubium Marchfeld, & Gensfeld, vulgo efferuntur. Secunda divisio maxime in usu est, cum Provinciæ Status coguntur, & tum una cis Danubium pars infra nemus Viennense, altera supra nemus Viennense, ultra Danubium vero una sub monte Meinhardi, altera supra montem Meinhardi appellatur: hæc eadem divisio, in nova Provinciæ administratione, de qua

infra, servata est; mutato tantum nomine quatuor hi destrictus, qui quadrantes ab ordinibus dicuntur, mutuato a Bohemorum divisione nomine, circuli dicti sunt, quibus præfecti vulgo Capitanei sunt præpositi. Hæc de Austria universim sumta; nunc autem ad singularia ejus ornamenta descendens a metropoli exordiar, reliquas dein Urbes, & Oppida memoratu digniora, servato literarum initia- lium ordine, prosecuturus.

## VIENNA.

**V**ienna, vel (ut ante tria secula etiam latine scribebatur) Wienna, vulgo Germanis Wien, Gallis Vienne, Hispanis, Italisque Vienna, Polonis Wieden, Turcis Beetz, Urbs Orbi clarissima, juxta Australe Danubii brachium subditur latitudinis gradui 48. cum 22. minutis, longitudinis vero gradui 40.: abest itaque Roma, Summi Pontificis Sede, secundum directam, & genuinam distantiam, miliari- bus germanicis 105., Madrito Regis Hispaniæ 260.; Ulyssipone Regis Lusitaniæ 335., Parisiis Regis Galliæ 154. Londino Regis Angliæ 175., Hafnia Regis Daniæ 116., Stockolmia Regis Sueciæ 165., Cracovia Regis Poloniæ 40., Mo- scua Czari Moscoviaæ 248., & Con- stantinopoli Turcici Sultani 173., In quarum distantiarum calculo assumta sunt quidem de more pro quo-

quovis gradu æquatoris 15. millaria germanica, sed ut mensura accurate percipiatur, talia intelligenda sunt, quæ 5400. passus, quinque geometricis pedibus constantes singillatim adæquent.

Prima Urbium commendatio ab antiquitate plerumque petitur; quare ne & hæc Viennæ desideratur, an, & sub quo lafitans nomine apud Romanos ea olim florerit, sedulo disceptatur: varii varia obsoleta Civitatum nomina e latebris in lucem revocant; non nulli vero ingeniosa potius, quam probata unius in alterum derivatione integrum eorum catalogum fane liberaliter admittunt. Ponderatis igitur ubique rationum momentis, & exploratis meliorum opinionum fontibus, verosimillimum videtur, præsentem Urbis Vienensis situm veteri Vindobonæ, corrupte Vindomonæ (unde Vindomana, Vindomina, & Vindoniana in MSS. prodiit) adjudicari posse: eam autem eandem esse,

(a) Geogr. quam apud (a) Ptolomæum modo l. 2. c. 15. sub Viliobonæ, modo sub Julibonæ nomine, depravato, ut ple- rique autumant, textu legimus, inde luculente patet, quod hæc post Cetium montem Orientem versus prima secus Danubium ab eo collocetur. Sententiam hanc comprobat Peutingerianum Hodope- ricon a Velsero excusum, ubi ab Arabone fluvio vulgo Rab in Noricum proficiscentibus Vindobona

6. passuum millibus ante Cetium occurrit. Mentionem quoque illius facit Itinerarium Antonino Augusto attributum; nec obest, eandem ibi a Cetio longius removeri, cum omnibus in comperto sit, pluribus præfertim circa numeros mendis illud scatere. Consonat Jornandes, (b) qui sub Ju- (b) Rer. stiniano I. Imperatore vixit, dum Vindobonam ad extimam Panno- niae plagam Norico conterminam relegat. Adstipulantur denique opinioni nostræ vetusta momen- ta Viennæ effossa, & a Grutero, & Lazio, (c) in lucem edita, ex (c) Chron. quibus, atque ex Ptolomæo, aliis- Vien. lib. que insuper colligitur, in Vindo- bonensi Romanorum Municipio Legionem decimam Geminam, & Fabianam cohortem resedisse; (d) Apud additque Notitia utriusque Imperii sub Theodosio Juniore compo- sita, Præfecturam Danubianæ claf- sis Carnunto Vindobonam fuisse translatam. Verum non modo di- gnitatibus, sed & præsentia sua hanc urbem cohonestarunt antiqui Cæsares; nam præter Tiberium, de quo dictum est supra, M. Au- relium Antoninum Philosophum Vindobonæ mortuum testatur sex- tus Aurelius Victor, (e) & Anto- (e) Orig. ninum Caracallam Pannoniam ob- gent. Roma. euntem, venando, & aurigando ibidem se oblectasse tradit ex He- rodiano Lambecius, (f) quod ex (f) Lib. 4. numismate anno 1662. Viennæ in regiæ aulæ Fundamentis reperto quam

quam optime confirmatur. Quibus ob Carnuntinæ Urbis propinquitatem ii omnes Imperatores facile adjungi poterunt, quos in illa aliquando moratos suo loco diceimus. Quod si etiam Vindobonæ etymologiam altius rimari libuerit, a vero ab ludere minime vide-

(a) Lib. 2. bitur Lambecii sensus, (a) qui eam c. 2. vocem ex Vindone amne, nunc vulgo Wien dicto, & ex verbo Bahn, quod viam sonat, coaluisse opinatur, quasi sic denotaretur, caput isthic esse viæ militaris, quæ a Vindone amne, & Legionis decimæ Geminæ stativis in Italiam ducebat: vel forsitan ea vox confurgit ex Vindone, & Wohn, quasi diceretur habitatio ad Vindonem; nullatenus autem admitten-

(b) Lib. 1. da est Lazii conjectura, (b) qui a c. 3. Vendo, vel Venedis populis eandem oriri putat, cum hi certe eo tempore nondum has terras incoluerint, & apud veteres Scriptores Vindobona non Vendobona constantius legatur. Quæ cum ita fint, manifeste elucet, Viennam nostram Vindobonæ successisse, in cuius rei assertionem Cluverius, Lazius, plurimique recentiores unanimi suffragio conspirant, in hoc solum discordes, quod aliqui adhuc alia nomina agglomerent, eamque cum distinctis alias Civitatibus confundant: quapropter, ne meo muneri defim, illorum etiam opiniones breviter discutiam.

In primis itaque indubitatum mi-

hi est, Viennam non fuisse Strabonis Vendum, cum hoc ille ad Japodes Adriatici maris accolias spectasse scribat, (c) eosque a Pann-

(c) Lib. 4.  
& 7.

nibus diserte se jungat; non Plinii,

(d) Lib. 3.

(d) aut Ptolomæi (e) Vianam, nam eam hic Rhætiæ, ille Norico, neu-

c. 24.  
(e) Lib. 2.

ter Pannoniæ tribuit; non item (f) Ptolomæi Aras Flavianas, (f) aut

(f) Lib. 2.

Plinii Flavium, (g) quia hoc No-

c. 11.  
rico similiter ab authore adscribi-

(g) Lib. 3.  
tur, illas vero Ptolomæus inter

c. 24.

Germaniæ Urbes in Septentrionali Danubii latere sitas recenset.

Una adhuc supereft observatione digna sententia, quæ post Ottudem

Frisingensem S. Leopoldi filium ob facilem in Viennæ vocabulum inflexionem quam plurimis placuit,

Viennam nimirum Flavianam, aut Fabianam fuisse antiquitus appellatam.

Præcipuum ejus fundamen-

tum innititur vita S. Severini ab

Eugippio conscripta, & apud Vel-

ferum, & Bollandum reperienda,

idque per citata superius monu-

menta firmiter solidari illius pa-

tronni arbitrantur. Attamen omnibus rite perpenfis neque hoc af-

ferendum existimo; nam quantum ad inscriptiones attinet, et si in iis

Ala Flaviana, aut Fabiana cohors,

eiusque Præfectus Titus Ampius

Flavianus saepius memoretur, qui inde inferri potest Vindobonam ob

eius nominis legionem ibi commo-

ratam in Flavianam transiisse?

quod tamen veluti inexpugnabile

(h) Chron.  
Vien. l. I.

Lazius (h) asseverat; Imo opposi-

tum c. 4.

(a) Hist.  
1. 2.

tum longe vero similius contendō, sub praefectura scilicet Titi Flavianī, qui uti ex Tacito (a) apparet, Galba Imperante in Pannonia versabatur, praetensam nominis mutationem accidere nequivisse, cum prout supra vidimus, etiam apud posterioris ævi Scriptores non aliter quam Vindobona nuncupetur. Verum nec ex S. Severini Vita conjicere licet, Flavianam vel Fabianam ibi indicatam Viennensi solo convenire, illius enim & præmissæ Praefationis contextus innuere videtur, S. Severinū post suum ex Oriente adventum in Norico semper substituisse, quare in occidua potius Cetii montis declivitate antiquæ Flavianæ sedes foret inquirenda, praesertim cum Paschasius Diaconus Roma-

(b) Ep. vi-  
tae præfixa. Beati Severini fuitimas Pannonicorum Provincias non Pannoniam incolentis meminerit, & Paulus Warnefridus Diaconus Aquilejensis S. Severini Cœnobium, quod Urbi Flavianæ Vitæ author connectit, intra Noricorum fines non obscure reponnat. Qui plura expetit, Lambe-  
(c) Bibl. 1.  
2. c. i. cium consulat, (c) hæc fusius deducentem, sentiatque inde, quod libuerit, namque ego interim me conferam ad certiora.

Cum Divus Leopoldus Austriæ Marchio promotis, ut jam monuimus, ad Orientem finibus, Aulam suam Cetii montis vertici imposuisset, coepit Viennense solum primo

*Topogr. Austr. P. I.*

venatoriis mapalibus, dein nobilioribus ædibus illustrari; jacebat enim ante 500. circiter annos deleta a barbaris Vindobona, nee ullum sui vestigium posteris reliquerat, sed solæ betulæ aliæque sylvestres arbores incultam terram obumbrabant: unde non aliud erat loco nomen, quam Perkhoff seu Birkhoff, cui concordi calamo subscribunt & ii, qui perpetuam alibi nominum *Flaviana*, *Fabiana*, *Biana*, *Viana*, *Vienna* successionem invehere conantur, assertionis suæ constantiam parvi pendentes. Hæc itaque fuere grandævæ jam Vienæ incunabula a præterfluente amne Wienn, sicut prius Vindobona a Vindone nomen mutuata, quæ ea dein fecit incrementa, ut brevi justæ Civitatis speciem præfe tulerit, atque Henricum II. tum Austriæ Ducem ad Aulam suam in eo foro, quod adhuc Hoff vulgo dicitur, anno 1156. extruendam loci opportunitas invitaverit. Ducalem Urbem novis ædificiis auctam paulo post circa annum videlicet 1192. lateritio muro turribus immixto, cujus vestigia apud rubræ turris, ut vocant, portam etiamnum supersunt, Leopoldus VII. cognomine Virtuosus circumdedit, impenso in id lytro Richardi Angliæ Regis, quem ob injuriā Accone, seu Ptolemaide in Syria ab eo sibi illatam, ad sua revertentem in carcerem concrebat; in illius siquidem Urbis ex-

B

pu-

pugnatione, cum Leopoldus superato ante omnes muro ad turrim elutatus, suum in ea vexillum explicuisset, Rex inde deturbari, & conteri perquam inique juss erat. Quinque alaudas Austriacorum tunc insigne vexillum ostentabat; at cum in eo ipso assultu candida Ducas vestis hostili cruore consperfa ubique rubesceret, solo spatio, quo baltheus medium hominem cingebat, adhuc albente, in rei memoriam clypeum rubrum alba intersectum linea, quod insigne haec tenus in usu est, a Cæfare obtinuit: licet alii Austriae ipsam Danubio per medium se etiam ab illo ob oculos ponи interpretentur. Leopoldi VII. filius Leopoldus VIII. cognomine Gloriosus post Friderici fratris natu majoris mortem ab anno 1198. Austriae Dux deserta priori Aula multo splendidiorem in eo loco erexit, in quo Augustissimorum Cæsarum Sedes per terna pene saecula perseverat, quorum occasione in eam, quam modo admiramus, Civium opulentiam, & Palatiorum splendorem successu temporis floridissima hæc Civitas evasit, latis insuper mœnibus, amplisque propugnaculis ab anno 1540., & peculiariter anno 1636. ad hostium invidiam probe communita; sed nec præalatis aggeribus coerceri potuit Vienensis Urbis Majestas, quin se foras effunderet, utpote Suburbis magnas Civitates adæquantibus un-

dique septa, quæ olim fossis adjectabant, ab anno vero 1683. statuto spatio ab iisdem remota augustis nitent Palatiis, totque horitorum affluunt deliciis, ut Æmonia Tempe hoc dices commigrasse.

Sexies obessa Vienna ter restitit, ter cessit. Restitit primo anno 1477. Matthiae Corvino Hungariæ Regi ob submissas a Friderico Imperatore copias hinc recedenti: secundo anno 1529. Solimano Turcarum Sultano, Urbem moderante Philippo Comite Palatino Rheni, muros autem propugnantibus ad Carinthiacam portam, ubi majus periculum imminebat, Hispanis, inde ad Stubensem, & aliam a rubra turri cognominatam Ernesto a Brandenstein cum auxiliaribus Imperii cohortibus & duobus Bohemorum milibus, item Wilhelmo a Wartenburg, & Comite Joanne ab Hardeck Equitum Ductoribus, ab his ad Judæorum turrim, vulgo im Ellend, prope novam portam cum Austriae Reiprechto ab Eberstorff; hinc ad Scotensem, & Aulicam cum suis militibus Maximiliano Leisser, & præterea cum Civibus Joanne a Greisneck, & Joanne Haufer, Aulam ipsam Leonhardo a Velfis: ab ea ad Augustinianorum Cœnobium cum Styris Abello ab Holeneck, inde rursus ad Carinthiacam portam Eckio a Reischach tribus peditum millibus stipato, ac insu-

per

per cum Carinthia Joanne Caccianer: ita synchronus author, Ferdinandi I. Ephorum Praeceptor: (a) tertio demum gloriofissime restituit anno 1483. Primo Turcarum Visilio Mustapha Cara, a S. R. I. Comite Rudigero Ernesto a Starrenberg strenuo defensa, & a Joanne III. Polonorum Rege, ævi que nostri Annibale Carolo V. Lotharingiae Duce Cæfarei Exercitus Archistratego, nec non aliis Imperii Electoribus ac Principibus in auxilium advolantibus, post celeberrimam de Turcis victoriam liberata. Cessit econtra primo anno 1241. Friderico II. Austriæ Duci, quem quadriennio prius Viennenles expulerant, invitato atque in urbem admisso Friderico II. Cæsare, qui nova Viennæ insignia præfigens, Aquilam scilicet auream in campo nigro, eam liberam, atque Imperiale declaravit: secundo Rudolpho I. Imperatori Habsburgico anno 1277. ab iniquo Ottocari Bohemiæ Regis dominio eam vindicanti: tertio denique anno 1485. Hungarorum Regi Matthiæ, qui cum Viennæ maximos inter cruciatus anno 1490. vivere desisset, illico Cives adventantem cum equitibus Maximilianum Friderici IV. tunc imperantis filium undecimo Calendas Septembbris gratulabundi recepere. Parergi loco veniunt irrita tentamenta Henrici Comitis Mathefi a Thurn Bohemorum Ducis, qui an-

(a) Apud  
Schardium

no 1619. aulicam, novamque portam bellicis tormentis laceffere præsumfit, & Suecorum, qui ad majorem Danubii pontem Urbi incubantes continuis trajiciendi mortificationibus eam fatigarunt. Anno dein 1741. novus obsidionis subeundæ terror Viennam invasit: Gallis, Bavarisque in Austria in fieriorem atque ad fanum usque S. Hyppoliti hostiliter graffantibus, quæ licet expeditio, versis in Bohemiam hostium armis, inter solum metum steterit, manifestum tamen hic documentum fidelitatis, devotique in Principes suos animi dederunt incolæ, cum summi, infimique sacri, & profani manus admoverint laboribus, paratosque se obtulerint, qui in periculi, mortisque adeo ipsius societatem cum militibus in Urbis tutelam venirent: ipsa quoque urbs mutationem quamquam subiit, nam populi frequentia, longaque pax non tantum pomærium, sed ipsum murorum ambitum atque adeo interius munitionis vallum, domibus, hortisque compleverant, exquis quidem illis, sed situ, locique amoenitate conspicuis, quæ omnia instante hoste diruta, folique fuerunt æquata: ita ut & robur munitionibus majus, aer urbi patentior, publicoque accesserint, toto urbis ambitu non inamœna ambulacra: ipsis quoque operibus externis, dirigente primum Comite a Khevenhüller, deinde Comite a

Daun utroque urbi , cum militari potestate præfecto , munitiones adjectæ sunt aliæ , veteres emendatæ ampliatæque sunt : deinde Stubensem inter & rubram portam , ducta per minus quodpiam interjacensque propugnaculum via , nova constructa est porta quæ Theresiana dicta est.

Singularia Viennæ decora jam subnexurus , a sacris auspicabor . Primus Urbi Parochus præesse jesus est Eberhardus anno 1140. , vel potius ejusdem seculi 57. a Passavensi Antistite Remberto . Successorum nomina longa ævi vetustas oblitteravit : ab hac tamen temporis edacitate Petrum Magistri etiā titulo clarum exemit Provinciale Concilium anno 1267. sub eo Viennæ celebratum , cui præsedit Guido ex ordine Cisterciensi , S. Laurentii in Lucina Cardinalis Presbyter , & Apostolicæ Sedis Legatus ; interfuerere , prout (a) recenset Henricus Stero , qui sub Rudolpho I. floruit , Joannes Pragensis , Petrus Patavensis , Bruno Brixinenis , Cunradus Frisingensis , Leo Ratisbonensis , Amulricus Lavadinensis Episcopi , & alii quamplures Diaconibus Prælati , Archidiaconi , & Decani . Lazius (b) multo recentior author omisso Lavantino addit Patriarcham Aquilejensem , Archiepiscopum Salisburgensem , Episcopos insuper Tridentinum , Olomucensem , & Uratslavensem , quod de primis tribus verosimile non est ,

coœvus quippe scriptor anonymous apud Lambecium (c) duntaxat refert , Guidonem convocasse Episcopos in Salisburgensi Episcopio constitutos , & testatur ad eundem annum Ste- (c) Bibl. 1. 2. c. 4.  
ro Uladislaum in Salisburgensem Archiepiscopum consecratum primo fuisse festo Sanctissimæ Trinitatis , hoc est 12. Junii , post absolu-  
lutm jam Sede vacante concilium , quod a sexto Idus Maji non nisi triduo teste anonymo duraverat . Anno dein 1364. Parochiam Vien-  
nensem in Præposituram , Wern-  
hero ad novam dignitatem assum-  
to , erigi curavit Rudolphus IV. Archidux Austriae , subjectis illi  
circumfisis Parœciis , adjunctisque  
24. Canonicis , qui purpurea mi-  
cantes veste auream in pectore  
crucem portarent , & cum suppli-  
cationes ducendæ forent , duode-  
cim ex iis , Religiosos Carmeli af-  
feclias præcederent , totidem subse-  
querentur ; ut sic gentilitium Au-  
striae insigne repræsentarent : quæ  
consuetudo una cum rubea Cano-  
nicorum toga postea obsolevit , his  
etiam ad quatuordecim solummo-  
do redactis . Demum anno 1480.  
obtenta ante decennium a Paulo II. summo Pontifice facultate , Fri-  
dericus IV. Imperator Episcopatu-  
m , nulli Archiepiscopo subjectum  
Viennæ fundavit , ad quem primus  
evectus est Leo a Spaur patria Ty-  
rolensis ; hunc exceperunt 13. alii  
ante Melchiorem Clefeliū S. R. E. Cardinalem , cujus anno 1630.  
vita

(a) Histor.  
Alemann.

(b) Chron.  
Vien. 1. 2.  
c. 4.

vida functi successor Antonius Cremanensis Abbas, omnium primus Principis dignitate fulsit a Ferdinando II. Cælare collata: ad preces dein augustissimi Caroli VI. anno 1721. ab Innocentio XIII. Pontifice maximo Viennensis Cathedra Archiepiscopali dignitate insignita fuit, Neostadiensis Episcopus Viennensi Suffraganeus, ut adjunt, datus est; primus Viennæ Archiepiscopus fuit Sigismundus Comes a Kollonitz anno dein 1727. a Benedicto XIII. purpuratos inter Patres adlectus.

Cathedrale Templum substitutum est alteri, quod a Remberto Passaviensi Praefule omnium Sanctorum honori consecratum posuerat anno 1140. Henricus II. neandum Marchio, vel, ut probabilius videtur, anno 1157. jam Austriæ Dux. Jecit amplæ hujus Basilicæ, quam hodie spectamus, fundamenta Archidux Albertus II. cognomento Sapiens, qui alias etiam Contractus dicitur, eamque S. Protomartyri Stephano Albertus Episcopus Passaviensis anno 1340. Dominica in albis, hoc est 23. Aprilis, sacris ritibus de more dicavit; ad supremam vero coronidem perduxit anno 1364. Archidux Rudolphus IV. inchoata superiori anno nobilissima turri, quam Albertus III. Templi tecto æquavit, ac demum Albertus IV. anno 1400. ad 460. pedum altitudinem promotam absolvit: opus non modo tri-

bus, quibus jam stat, sed infinitis seculis dignissimum, quod cum aliquando inspexissent Bosnienium Legati, teste Ænea Sylvio postea Pio II. Papa, in eam ivere sententiam, ut turrim illam pluris constitisse dicerent, quam regnum Bosniæ venundari posset. Commandant præterea Ecclesiam tum plurium Lipsanorum gazophylacium, tum Rudolphi IV., Alberti III., IV., & VI., item Wilhelmi, & Leopoldi Superbi Archiducum tumbæ, atque multo marmore dives Friderici IV. Imperatoris Mausolæum; minorem turrim æs campanum supra 200. centenarios grave, & cœmiterium lapidea Cathedra, ex qua S. Joannes Capistranus latino idiomate etiam a plebe divinitus percepto concionem exhortabatur.

Episcopali Basilicæ undecim Religiosorum Tempa, quæ Urbem non parum condecorant, paucis subjiciam. Scotenium Benedictinorum Abbatia fastos suos orditurn ab Henrico II. Austriæ Duce ibidem sepulto, qui anno 1158. eam in honorem Dei, & laudem sive Genitricis glorioissimæ Virginis, denique in commemorationem Beati Gregorii in prædio proprio fundavit; prout sonant dati hac super re diplomatis verba; simulque præter Parœciam hospitalitatem instituit erga Peregrinos in Terram Sanctam commean tes exercendam, inter quos cum frequentiores viderentur Scotti, Scotorum, vel Scotenium nomen

(a) Descri. Cœnobio adhæsit: Cuspinianus (a)  
Austr. tamen ab ipsis Religiosis ex Sco-  
tia accitis illud derivat. Venu-  
stum, quod hodie visitur Templum  
ab anno 1590. assurgere cœpit,  
quo scilicet antiquum ab horribili  
terræ motu totam Civitatem im-  
maniter quatiente jacuerat prostra-  
tum. Carmeli Viennensis funda-  
tionem (in quem a Carmelitis de-  
sertum Societas Jesu per Ferdinan-  
dum I. Romanorum Regem anno  
1554. introducta est) Leopoldo  
Glorioso Austræ Duci sub seculi  
decimi tertii initium vetustiorem  
suam Aulam iis donanti attribuit  
(b) Spec.  
hon. 1. 2.  
c. 3.  
(c) Descri.  
Austr.  
(d) Chron.  
Vien. 1. 3.  
c. 3.  
(e) Annal.  
Austr. 1. 3.

Fuggerus, (b) & Cuspinianus; (c)  
eandem vero Lazius (d) differt us-  
que Rudolphum IV. Austræ Ar-  
chiducem; sed litem opportune  
dirimit Gerardus de Roo (e) asse-  
rens Rudolphum plura elargitum  
Carmelitis fuisse, sicque promeriti-  
tum, ut Fundatoris titulo ab iis-  
dem insigniretur: inter munera  
autem conjicere fas est, numeran-  
dam quoque esse novi Templi stru-  
cturam, quam Lazius in Beatissimæ  
Virginis honorem tunc factam  
docet, cum ea non tantam often-  
tet ætatem, ut quinque seculorum  
intervallum assequatur, est enim  
illud, quod Professorum Domui  
contiguum in foro vulgo Hoff di-  
cto specioso inititur vestibulo. No-  
bile etiam Templum ad S. Mariam  
Rotundam sub Ferdinando II. Cæ-  
fare primo constructum, veteris  
infilit ruderibus, quod anno 1190.

a Leopoldo Virtuoso erectum, alias  
Leopoldus Austræ Archidux anno  
1325. deletis jam ante 18. annos  
Templariis primis illius posseflo-  
ribus, sacro Prædicatorum Ordini  
tradiderat. Adnexa huic est am-  
pla Bibliotheca a Fundatore Wind-  
hagiana dicta publico usui statutis  
horis exposita. Seraphico Ordini  
Fridericus II. Austræ Dux, qui  
ab anno 1227. gubernare cœpit,  
facellum, ædesque assignaverat;  
sed Ottocarus Bohemiae Rex am-  
pliori Templo, quod S. Crucis dic-  
atum voluit, initium dedit; Blan-  
ca Philippi Pulchri Galliae Regis  
filia, & Rudolphi III. Archiducis  
uxor illud profecuta est; tandem  
Elisabetha Aragonia Friderici III.  
Imperatoris conjux perfecit, a Mi-  
noribus Conventualibus modo de-  
core exornatum. Parochiale S.  
Michaëlis Templum, diruto alio  
angusto, quod antea ibidem exta-  
bat, a Rudolpho III., & Ottone  
Archiducibus ædificatum, Clerici  
Regulares S. Pauli anno 1626. a  
Ferdinando II. obtinuere, secula-  
ribus Sacerdotibus Parochiæ mu-  
nia prius administrantibus substitu-  
ti. S. Annæ Templum anno 1320.  
pro peregrinis exstructum prima  
fuit Societatis Jesu Sedes a Ferdi-  
nando I. anno 1551. Viennam ad-  
vocatæ, sed paulo post ea ad  
hodiernam Professorum Domum  
transmigrante Equestri S. Stephani  
Ordini commodatum est, & rursus  
anno 1626. eidem Societati, Tyro-  
cinii

cinii excitandi gratia restitutum. Anno 1748. Templum illud cum adsita turri, fulmine conflagravit, aet eodem adhuc anno e cineribus surrexit magnificentius. Aulica S. Augustini Ecclesia cum adjuncto Coenobio ortum suum duxit ab Ottone Archiduce anno 1338., vel sequenti, vita functo, celsitque Eremitis S. Augustini; nunc vero ab Augustinianis, quos discalceatos vocant, incolitur, & illustratur. Templo S. Dorotheæ sacro, quod ab Alberto II. Archiduce inchoatum, a Rudolpho IV. completum, & secularium Presbyterorum curæ traditum fertur, Regularium Canonorum S. Augustini Collegium adnexuit anno 1414. Andreas Blanck, vel Planckner Parochus in Gars, dein Alberti V. Archiducis Præceptor, & Cancellarius. Minores Observantes, qui S. Theobaldi Monasterium in Suburbio quondam inhabitabant, eo ob Turcarum metum solo æquato, in Urbe admitti, tandem circa annum 1589. ad D. Hieronymi Templum invitati sunt, quod Conradus Holzerus Civitatis Viennensis saepius Judex, ac Consul poenitentibus fœminis horas Canonicas Germanico idiomate quotidie concinentibus, decimo quinto seculo ineunte fundaverat. Academicum Societatis Jesu Collegium, ejus, quo modo fruitur, Templi Mœcenatem Ferdinandum II. Cæsarem ab anno 1628. veneratur. Denique S. Fran-

cisci ad novum forum Ecclesia cum crypta Austriacis Principibus destinato, & Capucinorum Asceterio, cui locuples sacrarum Reliquiarum thesaurus magnam famam conciliat, erigi quidem cœpit a Matthia Cæsare, & Anna ejusdem consorte, sed anno duntaxat 1631. coronidem adepta. Principum exuvias destinata crypta cum plures non caperet, novum sibi posterisque suis Sacellum funebre Augustissima Theresia, e solido erexit marmore, in hujus medio Mausoleum surgit, artificis manu superbum, Augustorum aliquando urnas excepturum: victoriæ, memorabilia que iis regnantibus facta flanno affabre coelata opus vestiunt; circumquaque minora sunt receptacula, meatusque, quibus cœlo recepta illustris Familia mortalis corporis reliquias deponet: hic altiore animo solet Augusta, humani fastigii vanitatem contemplari, dumque longas hic horas, proavorum manibus parentat, mortis, quam hic præsentem contemplatur, terrorem deponere, & integra adhuc vita mori, rara in Principibus fortitudine disicit.

Tot Religiosorum pietatem æmulantur sacræ Deo Virgines per septem Urbis Parthenones distributæ. Antiquitate præflat S. Jacobi Templum, quod nonnulli a Leopoldo Largo Austriæ Marchione anno 1113. ædificatum volunt, ansam ei, ut ferunt, porridente S.

Ja.

Jacobi, imagine quæ torrentis Vienæ aquis innatans ad ejusdem ripam spatianti occurserat; alii vero cum Lazio (a) sub Duce Leopoldo Vir-  
 (a) Chron. Vien. l. 2. tuoso anno 1190. illius exor-  
 e. 2. dia autumant contigisse: Acceslere postmodum Matronæ quædam ex Carinthia huc profectæ, & D. Augustini regulam amplexæ. S. Claræ Monasterium ad cœli portam vulgo Himmelport dictum, cui Catharina Alberti II. Archiducis filia aliquando præfuit, anno 1267. a M. Gerardo Viennensi Parocho S. Norberti Monialibus erectum, ampliavit anno 1331. Agnes Austriaca Andreæ Hungariæ Regis uxor, incolatu vero suo nobilitavit Anna Friderici III. Imperatoris filia, & Poloniæ Regis Vidua; verum iis admodum imminutis Cardinalis Cleselius S. Augustini Canonicas suffecit. S. Laurentii Templum, ac Cœnobium Archidux Otto anno 1337. quorundam Monialium habitationi addixerat, quarum deficientium vices expléverunt aliæ D. Augustini legibus obnoxiae e suburbano saltu, quem vulgo Prater dicimus, huc translatæ. Ad S. Nicolai Ferdinandus II. Imperator suadente piissima conjuge Anna Eleonora Sanctimoniales ex Ordine D. Claræ Posonio adductas collocavit, monastério dein anno 1651. amplius dilatato: extiterat ibidem prius pauperum studiosorum Collegium, cui Joannes Fabri Viennensis Episco-

pus Bibliothecam his terminis legavit. Donamus Collegio nostro apud S. Nicolau, ordinamusque, ut in perpetuum studentibus usui sit juxta statuta & præscripta nostra. Actum Viennæ I. Septembris anno 1540. Regium ad S. Angelos Cœnobium ab Elisabetha Austriaca Caroli IX. Galliæ Regis vidua, Caroli Antonii Archiducis Aula in eum usum coempta, anno 1583. fundatum ingressæ sunt Moniales Ordinis S. Claræ Monachio ab eadem accitæ. S. Josephi Monasterium Fundatricem agnoscit Eleonoram Ferdinandi II. Cæsarist consortem, quæ illud sacris Carmeli Virginibus una cum suis exuviis concredidit. Demum Ursulinæ ab Eleonora Ferdinandi III. Imperatoris conjuge Viennam invitatae, anno 1675. Templum, & Monasterium sibi erexere.

Supersunt omissis tenuioribus Sacellis vetustate sua celebria Tempa S. Petri, & S. Ruperti, nec non S. Joannis Baptiste, & S. Elisabethæ, quorum hoc ad Teutonicos Equites, illud ad Melitenses pertinet; at dum majorem eis ætatem, quam temporum, locorumque ratio patiatur, plures Lazium (b) seuti arrogare contendunt, veram illorum originem assequi neglexerunt. Certe eruditissimus Lambecius (c) anile commentum, & prolixiori refutatione indignum vocat Meriani sententiam arbitrantis Viennense S. Petri Templum a Carolo Magno fuisse eo in loco ex-

(b) Chron.  
Vien. l. 2.

(c) Bibl. 1.  
2. c. 1.

citatum, in quo olim super Flavianas Aras Domitiano Cæsari li-  
tabatur: hujus interim opinionis  
infirmitas, uti & alterius hariolan-  
tis, reliqua tria prædicta Templa  
S. Severini opus esse, facile elici-  
potest ex iis, quæ de Viennæ or-  
tu, veterique nomine, quantum  
præscripta brevitas finit, superius  
differimus. Magnam quoque an-  
tiquitatem sibi vendicat Templum  
Deiparæ sacrum, quod cum addi-  
ta Parœcia a quodam Paffayensi  
Antistite, cuius Dicecesi etiamnum  
subest, ædificatum, olim a littore,  
am Gestadt, modo vero a gradibus  
cognomen suum mutuatur. Tem-  
plis subneeto bina Augustissimæ  
pietatis monumenta, æneam scili-  
cet Immaculatæ Virginis statuam  
super editam columnam in anti-  
quatæ Aulæ foro ab Imperatore  
Leopoldo Magno anno 1667. ere-  
ctam, & parem Ægyptiacis obe-  
liscum ab eodem Augustissimo Cæ-  
sare solemini primi lapidis positio-  
ne in herbario foro anno 1682. in-  
choatum, & decennio post solem-  
niori adhuc ritu tanquam sopiti  
epidemici morbi, qui anno 1679.  
in Urbem fævierat, anathema San-  
ctissimæ Triadi consecratum. Ter-  
tius in foro alto accessit Co-  
lossus, quem Josephinum vocant;  
voverat hunc D. Leopoldus Aug.  
S. Josepho Virginis Matri Despon-  
fato, si filium Josephum Romano-  
rum Regem, quem anno 1702. ad  
Landavii expugnationem mittebat,  
*Topogr. Austr. P. I.*

reciperet: voti reum mors & Leo-  
poldum, & Josephum, quo minus  
solverent, prohibuit; Carolus VI.  
pari cum duobus aliis magnificen-  
tia opus absolvit, dedicavitque  
anno 1730. Eodem foro uti & duo-  
bus aliis, commodis usibusque pu-  
blicis perpetui fontes manare cœ-  
pere: canales receptaculaque, sta-  
tuis ornatunque alio instructa mi-  
ram quantam civitati attulerunt  
magnificentiam.

Neque desunt sacra Suburbii  
Pallatia; complectitur enim Leo-  
poldina Civitas Danubianæ Insulæ  
ad Boreale Viennæ latus insidens,  
Parœciam D. Leopoldo sacram a  
Leopoldo Magno anno 1670., pul-  
sis inde Judæis restauratam; Dis-  
calceatorum Carmelum a Ferdi-  
nando II. Cæsare exstructum; &  
Fratrum S. Joannis Dei Nosoco-  
mium cum S. Joannis Baptiste Tem-  
plo a Matthia Imperatore primum  
erectum, dein post anni 1652. in-  
cendium a Ferdinando III. in me-  
liorem formam redactum, & ab  
Augustissimo Leopoldo Sancti eo-  
rum Patriarchæ brachio ex Hispa-  
nia submissio ditatum.

Extra Hungaricam seu Stuben-  
sem portam in viæ regiæ aditu ege-  
norum Domicilium conspicitur,  
vastum illud magnificumque, quod  
a D. Joanne Nepomuceno, cuius  
honoribus in pauperum sustenta-  
tionem æs mœcenates contulere,  
agnomen obtinuit. Primum anno  
1723. Domus aliqua conducta est,

in qua egeni complures liberalitate privata, corrogataque stipe alebantur, donec D. Alberti Kaufman a Mansegg pia donatione an. 1724. census annuus alendis pauperibus quatuordecim, destinatus fuisset: accessere subinde alii, ut adeo 50. hodie viribus atque opibus destituti, ex perpetua, plures alii ex corrogata indies Eleemosyna sustententur: quorum in numerum puellæ orphanæ 24. veniunt anno 1729. cæteris adjunctæ, quæ idoneis sexui artibus, ac laboribus informantur, ut sibi dein ipsis honesto questu alimenta procurare valeant: hi omnes cum angustæ alibi essent egenorum numero ædes, in Principis Hannoverani hortum, ubi nunc degunt, Mœcenatum ære comparatum, instrutumque anno 1727. translati sunt. In ipsa via regia, ædes occurrit sacra cum Sanctimonialium a Sancta Elisabetha Parthenone: Asceterii alumnae incredibili Charitate, delatis ad se sexus sui ægris ministrant; locum hunc, annuosque reditus Serenissimæ Archiducis Elisabethæ Belgii olim Gubernatrix pietati, in acceptis referunt, quæ anno sæculi labentis nono fabricam utramque condere cœpit, atque ad eum, quo nunc visitur statum perduxit integrum, magno indigentium præsidio; eadem via visitur insigne Templum cum Di vi Augustini Eremo in SS. Sebastiani, & Rochi honorem anno

1542. a Ferdinando III. condi cœptum, sed post atroces anni 1656. flammas, & Turcarum Viennam ultimo obsidentium barbariem his proximis annis longe splendidius renovatum.

In via ut vocant cursoria (Mennweg) Divæ Matri visitanti sacramum est templum, cuius & ascetæ rii lapidem primum Wilhelmina Amalia Augusta, 1717. jecit, anno, dein 1719. Moniales instituti a S. Francisco Salesio cepti e Belgio Cæsareo evocatas, ipsa Augustissima sub instructo supplicantum ordine hue deduxit: Templum vero cum Asceterio anno 1730. ad Cæsaream vere magnificentiam perduxit: hæc templi moles, externa specie ad omnem Majestatem magnifice exstructa est, fulcraque super circumstructa tectum in hemisphærium coiens sustentat. Non procul inde: ad Suburbii aditum quod *Widen* dicimus, Templum jacet D. Carolo Sacrum, Augustæ Magnificentiae opus, cui vix per totam Germaniam par quidquam est cernere. Devotum id fuit ab Augustissimo Carolo VI. anno sæculi labentis XIII. quo dira Pestilenta grassabatur: biennio post primus lapis ab eodem jactus est, atque in exstremo, ornandoque eo primi pictores & Architecti Italiæ desudarunt, suæque præbuere scientiæ specimen; tota Basilica in rotundæ formam constructa est; anteriorem ædificii partem præter

appositam utrimque turrim raræ pulchritudinis , ornant columnæ altissimæ duæ Cochleatæ ; interius ædificium pario marmore multi- que pretii pictura superbis conditoris sui majestatem loquitur. Templi Cura Presbyteris commis- sa est Crucigeris , qui rubea Stella insigniti sunt.

Ab Austro Urbem coronant Templum cum Monasterio Min- morum D. Francisci de Paula, qui anno 1624. ex consensu , & munifcentia Ferdinandi II. ibidem Se- dem fixerunt ; S. Josephi Templum cum antiquorum Carmelitarum Cenobio , qui post absentiam se- culo diuturniorem anno 1661. Viennam regressi sunt. Paucis abhinc annis in illa Suburbii parte , quam Neuwidens dicunt, novum surrexit Collegium PP. Piarum Scholarum , qui ex pri- vatorum liberalitate , annuente Augusta Theresia , suis ibidem Tyrocinium erexerunt , adjectum est Templum non inelegans Di- væ Theclæ sacrum : apertus est literarius ludus , in quo summo viciniæ commodo , ars scribendi, numerandique juventuti traditur. Aliud vero amplius Collegium ii- dem Patres obtinent in Suburbio quod a Josepho Augusto Josephi- num dicitur, huic lapidem primum jecit idem Imperator anno 1698. Romanorum tum rex : Ecclesia anno 1718. Deo in honorem Vir- ginis fidelis dicata est magnifico

opere , dignoque, quod amplissimo Suburbio celebritatem adjiceret: anno sæculi hujus 19. pars ipsa Sub- urbii Parœcialibus curis excolen- da his Patribus concessa; apertæ quoque Scholæ sunt, in quibus fructuoso labore primis Elemen- tis juventus excolitur ; adjacet va- stissima Domus educationi nobi- lium destinata quæ a Fundatore suo Comite Lœwenburgio , Lœ- wenburgica, dicitur ubi partim suo ære partim e Fundatoris libera- litate , nobilium quam plurimi scientiis virtuteque ab iisdem Pa- tribus Piaristis instituuntur. Non procul hinc ipsa B. Matris Auxili- atricis Ecclesia tam celebris ja- get, ut suum ipsi Suburbio nomen dederit; ab anno 1669. prioris sæ- culi, ad hæc usque tempora cultu semper , & magnificantia crevit: Principum nostrorum peculiari devotione, in cultus liberalitatis que imitationem non paucos alli- ciente; ara major , cui prodigiis clara icon imposita est, et si olim non invenusta, in ampliore magnificantiam tum ipsa materie, tum artis pretio a biennio surrexit. Regularibus S. Pauli Clericis Ec- clesiæ Cura commissa est.

Ad Occasum deflectentibus oc- currit S. Udalrici Parœcia, Capu- cinorum Asceterium; Monasteria item Benedictinorum de Reforma- tione , & Patrum Sanctissimæ Tri- nitatis de Redemtione Captivo- rum, qui huc ex Hispania trans- mi-

migrarunt; & hi quidem, patrocinante iis Augustissimo Leopoldo; illi vero anno 1633. Ferdinandu II. Fundatore. Totum denique Urbis ambitum non procul a Danubio claudit Servorum Beatae Virginis, qui jam ab anno 1639. se inibi collocarant, Templum, & Cœnobium ab Octavio Piccolomini Amalphitano Duce anno 1651. a fundamentis excitatum.

Addere adhuc liceat ædificia duo Charitati Christianæ non minus quam cultui Divino sacra: in Alsrhenano vico primum est; grande scilicet Xenodochium humili alias nomine pauperum Domus dicta, inter præcipua Viennæ monumenta, atque in eam proiecta magnitudinem, ut toto orbe amplitudine cedat nulli. Levibus quondam sub Leopoldo crevit initii, ubi in summa rerum inopia collectis septingentis pauperibus, novem indies cruciferi viris, seni fæminis, pueris terni distributi sunt, habita pro reliquis eorum cura, quos vel senium vel excepta bello, casuive vulnera inhabiles fecerant: donec plurium charitas accederet, quos Baro de Thavonat superavit, qui ultimis tabulis tantum domui huic æs legavit, ut 600. veterani milites ex eo largiter ali possent, unde & areae in tam vasta domo alteri, Thavonatianæ nomen hæsit, ut ita apud posteros Benefactoris memoria ad gratitudinem pauperes ad ex-

emplum divites traheret. In vico Waringo aliud est Nosodochium Hispanicum a Carolo VI. fundatum in eorum subsidium, qui Principem relicta Patria, secuti fuerant. 2. Augusti 1722. primum lapidem posuit Augustissimus ipse Monarcha, Templum aris, cætero que cultu elegantissimum una cum ipsa Domo amplissimis redditibus locupletavit, atque non Hispanis solum, sed & Belgis, Mediolanensis busque patere voluit, ampliata nuper Domus, & Fundationes alias, minus commode locatas alibi, exceptit.

A Cœlestis Monarchæ Ædibus ad terrestris Aulam descendere luet: Hanc a Duce Leopoldo Glorioso, uti diximus, illi, quo modo gaudet, solo primum impositam magnificentius innovavit, vel ut contra plerosque scribit Laziüs, (a) primus ibi eandem erexit Ottocarus Bohemiæ Rex, eam nimi- (a) Chron. Vien. l. 3. rum partem, quæ ab Augustissimo c. 2. Cæfare hodie incolitur; reliquum enim est proxime elapsi seculi aditamentum ab anno 62. inchoatum. Hippodromum adjacentesque partes exstrui jussit Carolus VI. partes futuras novæ aliquando Principum Aulæ, cuius prototypon e ligno affabre factum, visitur hodie in Suburbano horto, qui Cæfareus dicitur, quodque si melioribus aliquando temporibus executioni detur, jure gloriari Vienna poterit nec toto orbe præ suis

potentiores esse Principes, nec augustinioribus alibi posse ædibus excipi. Magna interim majestas aulæ accessit hoc sæculo, ædificata ala magnificentissime una, qua receptum est supremum, ut vocant, imperii Concilium Aulicum: super vero regnantes Principes nostri, qui non desierunt hactenus tum interiorem tum etiam splendorem habitationi suæ exteriorem addere, ædificato ambulacro majori, eam conjunxere amplissimo huic ædificio, quod ad mœnium prope PP. Augustinianos Conscensum, Cancellaria Belgica dicebatur, quod hunc in finem an. 1748. magno urbis ornamento extrectum esset, cum autem Senatus hic anno 1757. esset abolitus, Domus hæc in partem Aulæ assumpta est, & Serenissimo Duci Carolo Belgarum Gubernatori habitatio ibidem decreta.

Illustrant Cæsaream Aulam ditissimus thesaurus ob singularem gemmarum copiam simul & raritatem Europæorum facile primus; excellentium pictorum labores ab Archiduce Leopoldo Guilielmo plurimum collecti, atque in variis appensi conclavibus, quæ uno Galleria, seu Kunst-Kammer nomine vulgo indicantur. Nobilissimæ quoque Bibliothecæ mentio præ-primis facienda, quæ ultra centum tum Manuscriptorum tum Voluminum millia numerat, librariam tanto Voluminum numero pretio-

que dignam Carolus VI. eo quo olim loco celebre Theatrum extitisse ferunt, ædificavit: moles hæc ædificantis Majestatem imitatur: medius Tholus rara arte in fornicem arcuatus peritissimo Graneti Penicillo expictus est: novæ literariæ merces accessere, additis hoc sæculo librariis Principis Eugenii de Sabaudia, Hohendorfiana, & Episcopi de Valentia cum selectissima parte Bibliothecæ illius, quam vir Clarissimus Pius Nicolaus Garelli Caroli VI. quondam Protomedicus collegiat, Filius autem ejus Joannes Baptista publico legarat. Nec minus celebre illud est, quod Museum Domini de Baillou nuncupant, & quod vir solertissimus hic naturæ Scrutator, partim longo annorum spatio mira industria toto collegit orbe, partim ab aliis, qui rei huic pari solertia olim vacarant, redemit: rara, stupendaque rerum ipsarum exhibitione visitur hic, tota lapidum Historia, eorumque mira a Natura formatio ab ipsis maritimis herbis orditur, quibus prima lapidis rudimenta insunt, & in durissimum definit adamantem; tanta est variarum rerum copia, ut selectissimæ licet sint singulæ, vel toti dies obiter percurrendis non sufficiant. Mirum hunc Thesaurem, qua in res eruditas nobili est Studio Augustissimus noster, vix viderat, cum Cæsare dignum judicavit, magnoque redemit ære.

atque in contiguo Bibliothecæ Cæsareæ Conclavi reponi jussit, cura eum & disponendi, & augendi penes doctissimum Collectorem relicta. Superfluum foret de alio hic Thesauro mentionem facere, rei nempe numariæ, cuius tantum tamque pretiosum possidet Augustissimus acervum, ut Cæsare ut Francisco I. scientiarum Augustissimo cultore solus omnium judicio habetur dignus; satis enim impresa hunc docent volumina, quorum unum, rariores Augustissimæ exhibet numos antiquos, aliud vero partem Collectionis continet rarissimæ imperialium, monetæque majoris, Germaniæ Principum: utrumque Typis hic Viennæ hisce annis editum est. Magno simili ter decori Urbi sunt instituta ad ministrandæ Reipublicæ Dicasteria, quorum præcipua præter Vienensis, & Passaviensis Dioecesis, atque Universitatis Confistoria, decem recensentur, videlicet Consilium Imperiale Aulicum, in quo Romano-Germanici Imperii causæ discutiuntur; Tribunal Aulæ Mareschalli, quod aulicis Ministris, & Officialibus, atque Consilium bellicum, quod militibus moderatur; item Regimen; Camera, in qua fisci rationes procurantur; Provinciæ Comitia, quæ eternis Prælatorum, scilicet, Dominorum, & Equitum Statibus coalescunt; Cancellaria Aulica, Bohemica, & Ungariça; Civicus de-

nique Senatus, cui Cives omnes, & reliqui nullo privilegio exempti subduntur. Sed cum diversa Tribunalia hæc, memorabilem paucis ab annis subierint mutationem, fuis aliquantis per consequendam hanc duxi, uno ut conspectu Civile pateat Hæreditariarum Provinciarum regimen. Cum Augustissima Imperatrix conspiceret variis Tribunalibus non secretas satis esse fori sui materias, indeque vel imperii conflictum inter Senatus diversos oriri, vel sententias nimis saepe cum litigantium damno protelari, vel Principis Imperium lentius quam Reipublicæ expedit, executioni dari, anno 1749. edictum solemne dedit, quo Tribunal supremum erexit, quod res internas Civiles publicasque omnes in Hæreditariis suis dirigeret Provinciis, inde Directorium nuncupatum: huic duo ubivis alia subjecit Tribunalia vel ex uno potius quod Regiminis dicebatur, formavit duo: unum, cui nomen effet Senatus regiminis in publicis, qui & Camera, & Repræsentatio dein vocatus est: alterum autem nuncupatum fuit, Senatus Regiminis in judicialibus: huic demandatum, causas omnes dirimere, quæ inter privatos ortæ contentiosæ dici solent, quoctunque tandem ori rentur ex fonte: omnis huic relicta cura exequendi Cives inter, quæ legibus, æquitateque naturali constituta, jura postulant, in-

jun.

junctumque, ut si vel a lege quādam onerosa, immunitas peteretur a Principe, vel munus meritorum ve merces, hujus Magistratus foret, de precum æquitate certiorē reddere Principem. Multo amplior nobiliorque authoritatis pars Regimini publico seu Repræsentationi concessa est, hæc enim Principi propior, felicitatem, quietemque publicam latius curat, omniaque quocunque demum huc veniant nomine inspicit: telonia dirigit, Domus institutaque publica tuetur, de annona providet, vicis, oppidisque Magistratus præficit, rem Ærarium ut exacte geratur, bona Principis ut colantur, attendit; Privilegia, immunitatesque ex Principis Imperio largitur, omnia demum tractat ea, quæ ipsum proprius concernunt Principem, ita tamen ut in Provinciis omnibus hic Senatus dependeat a supremo Viennæ Directorio, per quem Senatum, Princeps summum ubivis in Civilibus Imperium exercet; variæ dein Provinciæ, in Circulos, Austria inferior in quatuor, divisæ sunt; singulis præpositi sunt Capitanei, per quos sua Mandata ubique exequitur Repræsentatio: tum supremum institutum est Viennæ in Causis Criminalibus judicium, ad quod Capitalium provocatio spectat. Eodem quo hæc instituebantur edicto, limitata est potestas Tribunalis Aulæ Mareschali, qui enim illi ex

Aulæ Officialibus parebant, subiecti sunt regimini in judicialibus, cui cessit contentiosa omnia, præterquam si hæc concernant eos, qui vel Aulico adhærent Imperii Consilio, vel in obsequiis sunt eorum, qui Principum externorum legatos agunt: ut etiam breviori via, quæ publico utilior plerumq; conspicitur, omnia tractarentur, varia, quæ a variis solebant agi Senatibus sub eundem supremum revocata sunt Præsidem, ita Directorio conjunctum est, quidquid olim Camera, ut vocabant, regia, in hæreditariis provinciis curabat, huic tamen relicta sunt ea, quæ Principis Ærarium in Hungaria Transsylvaniaque concernunt; res etiam monetaria, quæ proprio suo parebat præfidi, cui etiam suprema fodinarum erat administratio anno 1756. exeunte, Directorio subjecta est, ut & quidquid quæstores exercituum supremi, quod Commissariatum vocabant militarem, si in Hæreditariis Provinciis exercitus sint, curabant: ita tamen hæc omnia iidem parent Tribunali, singulis ut partibus deputati Assessores invigilent, suum etiam quædam proprium habeant Præsidem, uni, qui magnus Cancellarius in publicis internisque dicitur, subjectum; ut pulcherrimo ordine, quem etiam ipsa in operibus suis natura docet, a variis Reipublicæ partibus ad unum devolvantur omnia; perque hunc ad Principem; singulis ita curas im-

per.

pertinentem suas ut adsit omnibus, deficit nulli.

Sedebant adhuc Viennæ supremi Senatus duo alii, unus Belgarum, Italorum alter res curabat; sed pari viæ compendiosioris studio, uterque an. 1757. abolitus est: harumque rerum omnium inspectio suprema, magnō Aulæ in externis negotiis Cancellario delata est. Non minor quoque sollicitudo fuit Augustissimæ, ut Senatus a se vel instituti, vel formati congruis habitarent Sedibus, ut orbis pateret non magnificentiæ minus quam justitiæ, æQUITATISQUE studiosam nos nactos Principem: magnificentissime ergo an. 1754. ad Pompam, & Majestatem exstratum est palatium, quo supremus in Civilibus Senatus federet, & ex eo hodie Directorium vocatur: erat olim hic Cancellaria Bohemica; conjunctis autem ab Augustissima tum Austriæ, tum Bohemiæ Senatibus, una habitatio destinata est, ampliataque coëmtis Civium vicinorum ædibus; occupat illa quadrati oblongioris spatium, in foro quod Judæorum appellatur, e quatuor partibus libero exposita est aeri, ornatissima statuis, figurisque queis Themidis munia, abundantiaque publicæ exhibentur decora: sua hic magno Cancellario sedes, sua etiam Officialibus habitatio est: hic quoque tamquam in Sacerrimo deposito conservantur quæcunque inferio-

res Magistratus concernunt acta, pupillorum etiam, piarumque causarum pecuniæ & instrumenta; atque hæc pars vocatur *Universal-Depositen-Amt*. Tandem quidquid ex publico pro Officiis Stipendii datur, quidquid publico a Civibus, vel penditur, vel in necessitate mutuum datur, hic solvit: locusque huic destinatus das K. K. Universal - Cammer - Zahl - Haus, dicitur. Ad Franciscanos Patres aliud novum an. 1754. erectum est palatium, quod Præfidi negotiationum pecuniæque publicæ, quæ banco dicitur, incolendum cessit: huic addita est Domus alia non minor, quam a Nosocomio a SS. Trinitate dicto coëmerunt, & in eam an. 1757. translati sunt ii, qui Thesauro huic præpositi, cenus annuos exsolvunt, quique hæcenus in Domo Civica degerant. Non exiguum etiam rei monetariæ splendorem nova attulit habitatio; cum enim illa olim exercita fuisset in platea, quæ Wolzeil dicitur, anno 1754. ab ipsa Augustissima in amplissimas has ædes deducta est, quas olim sibi exstruxerat se & nominis famæque suæ magnitudine dignas Eugenius Sabaudiae Princeps, & dein ab ejus hærede Victoria Sabaudiae Princepe Imperatrix emerat: palatium illud in ingentem longitudinem porrectum, totam illam plateam ornat, quæ a cœnobio portæ cæli descendit: triplici Augusto patet aditu

aditu quorum ille, qui ad sinistram jacet, ad Officinas varias deducit, quibus metallum per varios ignes, variasque laborantium artes in eam formam conflatur, quæ usibus nostris sit accommoda: nil, seu instrumenta, quibus imago Principum imprimitur, seu furnorum dispositionem spectes, ad perfectionem artis desideres: in contabulatione superiori sedes est, quæ Academia dicitur, ubi Tyriones sub præstantissimis artificibus artem cælandi docentur eo successu, ut toto hodie orbe, atque in ipsa adeo Asia Moneta Austriaca in perfectissimis habeatur, & exteri etiam populi satis mirari nequeant, quantum celeberrimus artifex D. de Donner non pridem vita functus monetæ nostræ splendoris attulerit. Ædes illæ ubi olim monetaria res fuerat, eodem tempore, novis usibus accommodatae, Senatus supremi bellici sedes factæ sunt. Memoratu quoque digna sunt bina Armamentaria, Cæsareum unum, Civicum alterum, omni militari apparatus apprime instructa; sed ne justo prolixior sim, a pyrio pulvere ad scholasticum divertam.

Fridericus II. Imperator Viennam, uti supra retuli, ingressus in diplomate dato anno 1237. volens commodo studio provideri, per quod prudentia docetur in populis, & rudis ætas instruitur parvorum, aperiendæ scholæ facultatem Viennensis

Topogr. Austr. P. I.

impertiit, sed quæ, prout ex Academicis Alberti III. privilegiis, præsertim ex Rubrica 38., aliisque infra dicendis colligitur, ultra humaniores literas, & Philosophicas ad summum disciplinas se nequaquam extenderet. Erecta autem fuit hujusmodi schola apud primariam S. Stephani Ecclesiam, cuius curæ, & dispositioni scholæ aliae minores apud S. Michaëlem, & in Xenodochio subjacebant, quæ omnes in præcitatissimis privilegiis antiquæ, respectu nimirum Universitatis, vocari consueverunt. Et enim hujus primam institutionem luculente exhibit Urbani V. Summi Pontificis diploma datum Avenione 19. Junii anno 1365. ex Cæsarea Bibliotheca a Lambecio (a) Bibl. erutum, publicique juris factum, cuius verba, omissis pluribus interjectis ad rem nostram non pertinentibus, ita sonant: Cum itaque sicut nuper ex parte dilecti filii Nobilis Viri Rudolphi Ducis Austriae fuit propositum in Consistorio coram nobis, ipse Dux in Villa sua Viennensi Patavienensis Diœcesis plurimum desideret fieri, & ordinari per Sedem Apostolicam studium Generale in qualibet licita facultate, Nos authoritate Apostolica statuimus, & etiam ordinamus, ut in dicta Villa de cætero sit Studium Generale, tam in Juris Canonici, & Civilis, quam in alia qualibet Scientia, præterquam Theologica Facultate. Fuit is Rudolphus hujus nominis quartus anno 1365. 31. Julii Mediolani defunctus, a quo exorienti

D

rienti Universitati præter antiquas scholas in pristinis stationibus tunc perseverantes, assignatum fuit amplum in Urbe spatiū, quod aliqui penes S. Augustini Aedem, alii secus alterum Aulæ latus versus Scotorum portam describunt. Statuit præterea idem Rudolpus, ut Canonicorum ad S. Stephanum Præpositus Academicī Cancellarii munere constanter fungeretur; unde liquet Wernherum omnium primum utramque dignitatem obtinuisse. Rudolphi successor, & frater Albertus III. cognomine cum trica, etiam Theologicam Facultatem una cum priorum confirmatione ab Urbano VI. Summo Pontifice impetravit, uti manifesto patet ex hujus diplomate dato Neapoli anno 1384, die 20. Februario, quo itidem anno idem Albertus Universitatis statuta, & privilegia pene ad verbum ex Parisiensibus defumta condidit, atque advertens publica studia aulico strepitu interpellari, Academiam transtulit ad pacatiorem locum Prædicatorum Cœnobio proximum, comparatis ad hoc vastissimis ædibus, quas olim Templarii incoluerant, prout refert in Rectorum catalogo Georgius Eder & ipse Magnificus Rector per pri-  
 (a) Spe. ho. 1. 3. c. 8. (b) Chron. Vien. 1. 3. c. 2. mū anni 1559. semestre; estque id longe verosimilius Fuggeri, (a) Laziique (b) opinione attribuentium Academiæ translationem Rudolpho IV., ejus vero apud Au-

lam erectionem Alberto II., ut pote cum reliquis certissimis actis nullatenus cohærente. Quod autem prima genuinæ Universitatis fundatio Archiducibus Rudolpho IV., & Alberto III. debeatur, non Friderico II. Imperatori, ut prætendere videtur cum suis affeclis (c) Lazius (d) licet ex hucusque adductis abunde constet, stabiliri (c) Fug. spe. hon. 1. 8. c. 8. (e) (d) Chron. & Austriaca Gerardī de Roo (f) Vien. 1. 3. historia accuratissime contexta, c. 2. quam ex privilegiorum procēmio, (e) Defor. in quo Albertus III. ita præfatur. (f) L. 4 Sancti Spiritus admonitione in memoriam Annal. revocato, quod dudum alias in annis mi- Austr. noribus constituti, una cum Serenissimo quondam Principe Germano nostro dilectissimo, Domino Rudolpho celebris memoriæ Duce Austriae, &c. de gratia quoque, concessione, & indulto Sanctissimi in Christo Patris, & Domini nostri Urbani Quinti felici auspicio ereximus, & dotavimus rite, & legitime publicas, & privilegiatas scholas, & studium Generale in Oppido, seu Villa nostra Wiennen-si, indignum arbitramur, &c. item ex ipsorum privilegiorum rubrica, cui hic præfigitur titulus: Conclusio Duci Alberti Fundatoris; quam conclusionem excipiunt statutorum, ac privilegiorum approbationes a Leopoldo Probo Alberti fratre, Pilgrino Archiepiscopo Salisburgenſi, Joanne Passavensi Antistite, Austriae Proceribus, Civibusque Viennensis factæ, in quibus Universitatis fundatio, & erectio

Alberto III. expresse adjudicatur. Illius porro dignitates cumulavit Fridericus IV. Imperator decreta præstantioribus Poëtis laurea, qua omnium primus Conradus Celtes redimitus est. Fundata sic Academia accurrere magno affluxu longinquæ etiam nationes per septem Burrias, seu studentium domicilia distributæ, quæ, ut suorum commoditati confulerent, Viennenses, Austriaci, Styri cum Salisburgenfibus, Suevi cum Wirtembergicis, Silesitæ, Carinthi, atque Hungari intra Urbem comparaverant: ad quatuor tamen solummodo Nationes, in quas tota discriminatur Universitas, nempe Austriacam, Rhenanam, Hungaricam, & Saxoniam tum ii, tum cæteri omnes referuntur. Hujus itaque Antiquissimæ, ac Celeberrimæ Universitatis primus Rector a prælaudato Eder statuitur ad annum 1377. Joannes de Randegg Constantiensis, & Augustanæ Ecclesiæ Canonicus, cui subnectuntur reliqui usque ad annum 1628. semestres, deinceps annui. Interea autem anno 1622. sub Magnifico Domino Rectore Guilielmo Rechperger, jubente Ferdinando II. Cæiare, Collegium Archiducale, Schola Provincialis, Pauperum Contubernium, five Aureus Mons, Domus Facultatis Philosophicæ, & quinque Bursæ Societati Jesu sunt tradita, ut hæc eorum spatio ad Collegium cum scholis, Templo-

que fibi erendum uteretur. Bursarum loco censeri modo possunt quatuor studiosorum Collegia, seu Seminaria, hoc est Convictus ad S. Barbaram ab Apostolici Nuntii domo ad Lycei viciniam translatus una cum Clericis Gregorii XIII. Papæ alumnis: hanc Foundationem uti hic, ita tota Germania abolevit Benedictus XIV. quem nuper fibi erectum luget orbis; cum enim fatis provisum videret hisce partibus florente in tantum religione, atque copiosa incolarum hunc in finem collata munificentia, redditus hos urgentioribus Ecclesiæ necessitatibus applicandos judicavit. Collegium Pazmanianum a Petro Pazmany e Societate Jesu S. R. E. Cardinali, & Strigoniensi Archiepiscopo, Episcopis item Jaurinensi, & Nitriensi pro suarum Dicecesium Clero erectum: Seminarium SS. Ignatii, & Pancratii ex variis quoque veterum Bursarum fundationibus conflatum: Collegium Croaticum a Venerabili Zagrabensi Capitulo pro suis Clericis institutum: quæ omnia, ultimo excepto, Societatis Jesu curæ, atque administrationi subjiciuntur. Novum Universitati splendorem attulere elapsi recenter anni, nec enim curis id suis indignum judicavit omnibus reipublicæ commodis intentissima Imperatrix, atque adeo an. 1757. pluribus legibus, qui in Scholas taciti irrepierant, Squalores abster-

fit; Juribus, Medicinæ, Anatomiæ, Botanicæque docendis, Clarissimos tota Germania magnis Stipendiis conquisivit Magistros, Philosopham Naturæ, Experientiæque præsidio fultam amœniorem simul utilioremque reddidit: Matheſim, Eloquentiam, Historiam, politiores artes omniaque, quæ mores temperant, ingenia formant, deinceps, ut loco honoratiori eſſent, ſancivit: novos quoque Magistratus Directorum nomine Academiæ præposuit, & ut cultiores muſæ auguftiores quoque ædes incolerent, ſuo ære emtiſ inter utramque pitorum plateam, variis domibus, magnificam erexit Bafiliacam oblongiori forma, cujus anterior facies fontibus, ſtatuis Sapientiæ Symbolis instructa Academico Societatis Collegio obversa eſt. In Palatio hoc ſuæ Professo-ribus habitationes positæ ſunt, ſua variis Scientiis Lycea: ſpectabilis maxime eſt aula concertationibus Scholasticis decreta, quæ in eximiā altitudinem fornicato ope- re educ̄ta celeberrimorumque pitōrum artificio ornata, merito Scientiarum matris nomen Auguſtæ peperit: ſuperstructa eſt ædi- ficio turris edita astris obſervan- dis opportuna, in qua & Profef- forem hæc qui ſpeculetur, ſuo ære conſtituit; instrumenta vero illi ne- cessaria confeſſa ſunt illa, quæ doctissimus quondam vir Jacobus Marinoni ſuis uſibus comparata

moriens reliquerat: ſua etiam hie eſt aula in qua Anatomiæ curioſis corporis humani fabrica, diſiectis membris proponitur; eſt & alia ubi naturæ ſtudioſis mira ejus proponuntur opera variis instru- mentis quorum partem Eminen- tiſſimus Card. a Trautſohn, Archi- episcopus nobis non ita pridem ereptus, moriens legavit, partem ſuo ære Augufta comparavit. Hic quoque Dominicis diebus ne ulli opportunitas diſcendi deſit varia mechanicæ adjumenta a peritiffimo viro artificibus exponuntur. Li- ceat tandem & hicce loci mentio- nem facere muſæ alicujus cele- brioris, cum Universitate Scho- lisque publicis non quidem con- juncti, ſed quod non minorem litt- eratæ Reipublicæ utilitatem ad- fert: illud eſt Aula experientiis ut ajunt Physicis deſtinata; hæc in Academico Societatis Collegio jam ab anno hujus ſæculi 1715. inſtrui coepit, curatorum induſtria Mecenatumque ære tantopere cre- verat, ut nec apparatus nec in- ſtrumenta locus caperet; anno ergo 1754. ſupra Scholarum atrium, ubi Collegii olim theatrum fuerat, aula parata eſt, in qua, ſeu locum ipsum, ſeu loci ſtructuram, ſeu varia in Mathematicos æque ac Phyſicos uſus instrumenta, ſeu rerum omnium naturalium collec- tionem ſpectes, facile dices nec in celeberrimis Europæ urbibus parem reperiri ne dum ſuperiorem.

Nec

Nec pauca de ædificiis, queis ornantur Suburbia, profanis, dicenda supereffent; ab eo enim tempore, quo vallo per ingentem circuitum ducto suis muris ingens illud spatium cinctum fuit, in magnas venustissimasque urbes pagi abierunt, quibus & privatæ Ci-vium ædes, & sacra Deo templæ, & horti nobilium, & palatia amœnitatem Majestatemque vix alibi visam conciliant; longus sim, si enumerarem singula, copia ea est, quæ libros posceret; decem duodecimque solum spectantur a triginta annis erectæ vel Principum ære, vel auspiciis domus, ubi quidquid ad necessitatem, ad luxum etiam humana invenit industria, ab evocatis undique artificibus dexterime paratur. Splendida Nobilium conficiuntur hic ornandas Palatiis Aulæa, Damascena Bombyx, multitum simplex juxta & duplicatum, attalica vestis, seu illa quæ ex auro, argentoque, seu quæ ex bombyce auro intertexta; tæniæ ac fimbriæ omnis generis, Hosolericum: item Strophia ferica, & eodem e filo tibialia: Metallum in tenuissimas bracteas ac folia subtilissima variis usibus apta extunditur: nihil tandem desideratur amplius eorum, quibus tamdiu gentes aliæ se supra nos efferre superbius consueverant; ast parum foret æquasse, nisi superasse etiam gloriari possemus: una ergo e fabricis, id

quaæ præstítit, memoranda est: ea scilicet, in qua Porcellania seu Murrhina vaſa e candida fæcibusque omnino purgata argilla ad toreuticæ artis leges elegantissime formantur; ejus initium factum est anno 1722. a D. Claudio du Parqueur, ejus artis longe scientifimo; hujus conatus, etiæ ab invidiis, ut sit, varie exagitati brevi tamen magnam sunt adepti celebritatem: magnumque in Rossaviæ Suburbio excitatum est arti huic exercendæ ædificium: hodie que merces olim quæfitas trans æquora, domi tolerabili naſci pretio gaudemus; rerumque periti fatentur vaſa Viennensia, materiæ puritate, candoreque & figulino artificio nihil Saxonice concedere: picturæ vero encausticæ præstantia longe antecellere, neque alibi uspiam reperiri terram, quæ igni etiam ferventissimo reficit tantum. Inter ædificia autem reliqua, delibare tantum juvat ea, quæ Augustissimis vel sumtibus vel auspiciis surrexere, nimiæque sunt celebritatis quam ut, cum de Vienna sermo est, prætereantur. In Suburbio, quod a via curfuria dicitur, regiæ ædes jacent, quæ, quod in edito sitæ amœnitimo prospectu gaudeant, Belvedere hodie vocantur; exstruxerat has regia prorsus magnificentia quondam Princeps Eugenius a Sabaudia Viridariumque hoc habuerat Suburbanum; ultimisque tabulis

cognatae suæ & hæredi Principi Victoriæ scripserat, a qua cum in Italiam abiret, id Augustissimi Principes redemerunt, palatum hoc, quod auctorem virum virtute rebusque super reliquos ita elevatum habuerat, augustissimo incolatu non indignum esse rati: duplex est ædificium, majus unum ampliusque, alterum minus, utrumque horto, qui in fastigium leni, longoque consurgit tractu, divisum: utrumque, ab architectorum ingeniosis magnam sortitum est magnificentiam, fastuosaque simulariorum serie cumulatum potius quam ornatum est; utriusque Conclavia tum præstantissimorum pictorum manus ornarunt, tum pretiosissima supellex vestit, recentia æque ac vetera oculos perstringunt; hæc conditoris animum ingentem, illa eorum, ad quos domus transiit, magnificentiam loquuntur: ædificio huic adjacet hortus, quem Botanicum nuncupant, qui que studiorum, & Universitatis quasi appendix est: ne Subsidium aliquod deesset perficiendæ Medicinæ, quæ, ubi certa est, humanitati tantum proficit, ubi incerta, non minus nocet, hoc ære suo spatum coemit Augustissima, instruxitque, in quo medicætoto orbe conquisitæ ingenti industria herbæ a peritissimo Viro colerentur, earumque cognitio, virtusque, statis diebus impertiretur Medicinæ Candidatis; eaque, quæ

in recentissima jam institutione conspiciuntur, animo ingerunt spes ingentes, quas Respublica & Scientiæ ex saluberrimo hoc instituto, ubi adoleverit amplius, ali quando capient.

Nec silendum est de Collegio nobilium educationi destinato, quod & suis erigi Augustissima auspiciis, honorificaque nominis sui appellatione Theresianum dici voluit; huic cessit æstiva quondam Cæsarum habitatio, *nova Favorita* nuncupata: hic, cum extremum diem obiisset Carolus VI. pientissima Filia locum, qui perpetuo tristissimi casus revocaret memoriā, relaxando animo nequaquam congruum judicans, misis eum sacrare voluit, ut illustrata tot Cæsarum vestigiis domus ad virtutum æmulationem juventutem traheret: hunc in finem an. 1747. Societatis Jesu Patres huc transmigrarunt, nobilesque hic omnscientiarum genere imbuendos suscepereunt, quorum numerus Augustissimæ favoribus studiisque ita crevit, ut nova, alæ uni contabulatio superimponenda fuerit, adjungendaque paris amplitudinis altera, atque ita domus, quæ modestiæ magis, quam Majestati Cæsarum olim erat conformis, amplissimi nunc Palatii formam præfert. Disciplina Domus ex Cælberrimis Europæ petita Academiis, moribus, genioque patrio accommodata fuit: ab infimis Ele-

men-

mentis scientiæ docentur hac in Domo a Professoribus omnes, artes a Magistris illæ, quæ nobilis & ad magna natum hominem decent: eo successu, ut exiguo quo stetit tempore plurimos variis reipublicæ partibus collaborantes Patriæ, Alumnos emiserit, atque hoc bello in castris numeraverit ultra quinquaginta, qui stipendia ficerent hic exculti, e quibus aliqui probatæ virtutis præmia altiores jam in militia gradus consecuti fuerunt. Nec immerito gloriatur hæc Domus Fundatrice Augustissima, quæ non solis tantum auspiciis profuit, sed & collatis in Professores alendos censibus, magnisque in Nobiles, natalibus qui magis quam opibus conspicui sunt, stipendiis nascentem hanc Domum in eam quam conspicimur, erexit amplitudinem; inter varia beneficia, quæ commemo rare gratitudo exigeret, sed operis vetat brevitas, non minimum est amplissimæ hic positæ Bibliothecæ donum: Clarissimus scientiis muniisque vir Pius Nicolaus Garelli, Caroli VI. quondam Archiater hanc collegerat, Filiusque ejus Joannes Baptista sine prolibus obiens legaverat publico; hanc Imperatrix cognomini sibi Collegio adscripsit, tantaque est, ut etsi magna hujus pars Cæsareæ inserta sit librariæ, residui tamen libri selectissimum omni condiscendæ scientiæ Thesaurum contineant.

Anno dein 1755. cum numerus nobilium augeretur indies, juris studiosos separavit Augustissima ab aliis, diversaque disciplina in recenter exstructa ædificii parte educari seorsim voluit.

Qua ex Carinthiaca porta ad Suburbium itur, quod ab argilla CEO solo nomen accepit, & Laimgruben dicitur, equile jacet Cæsareum, tum a magnificèntia tum ab amplitudine memoria dignissimum, frontem Suburbii an. 1723. ad hunc statum perfectum, occupat, centum quinquaginta duos supra mille pedes longitudine, protenditur, dupli fenestrarum serie in altum attollitur: infera parte equos aulæ obsequiis destinatos, quos ante per Civium Domos distribui necesse erat, suas per stationes ordinatos longa serie continet, superior, mediæ altiorisque fortunæ Cæsarei equilis Curatoribus præfectisque domicilia servit, uti etiam prætorianis Helvetis, qui regnante Augustissimo Francisco I. ex Hetruria huc adlecti, corporis Custodia honorati fuere.

In ipso Suburbio, viaque, qua ad D. Virginem Auxiliatricem itur, quæque hoc sæculo ædificiorum longe pulcherrimorum continua serie, in justam crevit Civitatem jacebant olim ædes, in quibus ex munifica liberalitate Domini de Richthausen, Baronis de Chaos, magnus juvenum honestissimorum

numerus, liberalibus enutriebantur artibus; hic anno 1752. suis sumtibus alendos constituerat Imperatrix centum vel patricios, vel veterano rum filios, militari educatione formandos, quod cum partitis in varios curis minus recte fieret, quam cuperet optima Princeps, commodorum publicorum studiosissima, vastissimum emit spatium, traductisque alio, qui e pio Domini de Chaos ære vivebant, novis usibus amplissimum erexit ædificium, atque rebus omnibus finitis anno 1754. prima Novembris ducenti huc introduceti sunt minoris ætatis juvenes, qui vestitu militari inspiciente viro in militia conspicuo, a minoribus præfectis, ab ipsis quasi incunabulis ad bellicos enutriuntur labores; hinc Neostadiensibus centuriis Supplementa leguntur, nec nisi hic aliquantis per probati ad ampliorem Neostadii Domum Militarem migrant; quare & hæædes militare Seminarium dicuntur; dein una ædificii pars, ea nempe, quæ plateam respicit, duplique contabulatione magnificam formam præfert, adultioribus destinata est iis, qui natalibus illustres, militiam professuri suo vel ære, vel Principis liberalitate scientias bello necessarias condiscere cupiunt; aperta hæc prium est Academia anno 1755. atque ita effectum, nullum ut sit in Republica vitæ genus, nullus

ordo, quem sollicitudine sua non fit complexa Imperatrix, cuique omnia, quæ virtutibus, scientiis que hauriendis obstatabant, non aperuerit; adjacet utrique huic ædificio vastum, amplumque aliud, venustate & augusta etiam quadam pulchritudine conspicuum, quod ingenti ære erexit, ample quoque donavit reditu, paucis ab annis Therezia Anna Felicitas Princeps a Lichtenstein, Thomæ Emmauelis, Sabaudiæ quondam Principis, vidua: hic juventuti nobili sub Patrum Piaristarum Cura aperuit Academiam, quæ vel Sabaudica vel Emmanuelistica compellatur, quam a biennio Fundatrix Augustissimæ transcripsit, cujus hodie auspicis gloriatur. Lustrata Metropoli per amoenissimos Austriae campos tandem calamus exspatietur.

### AGGSPACENSIS CARTHUSIA.

**A**ggspacensem Carthusiam, quam cognominis rivus Danubio paulo post hauftus non multum infra Melicum fundasse fertur anno 1386. Hadericus de Messau Austriae Mareschallus, illique Portæ S. Mariæ nomen inditum fuisse testatur Petrus Dorlandus, qui ducentis abhinc annis scripsit, mox subjungens futuram hujus Ecclesiæ erectionem, antequam fundator eam meditaretur, Matronæ cui-

cuidam divinitus manifestatam, quæ etiam sibi videbatur campanam inibi pulsando confregisse. Hujus rei consummato jam ædificio certior factus Hadericus Matronam ad tentandum campanæ pulsum acciri voluit, quæ illico diffiliens præ sagium eventu comprobavit.

## ALTBURGENSE COENOBIVM.

**A**ltburgense Ordinis S. Benedicti Cœnobium non procul a Kampo fluvio, quem ad Moraviam accedens ab Austro relinquit, extruxere anno 1144. Hildeburgis de Rebigau Gebhardi Comitis de Buige consors ejusque filius Hermannus de Buige itidem Comes.

## A N I S I A.

**A**NISIA five Anafum, aut Anasianum vulgo Ensis elegans Urbs, & Superioris Austriae Archiducalis, lævo Anisi fluvii lateri non procul ab ejus ostio insidens, & ternis milliaribus Lincio in Ortum recedens, exiguum dun taxat vestigium est celeberrimæ Urbis duo passuum millia in diametro extensæ, cuius nomen Laureacum (vel potius Lauriacum, uti plura monumenta exprimunt) a literis laureatis dimanare, licet in Theodosii Codice repererit, ex Topogr. Austr. P. I.

plodit Velserus, (a) & post eum (a) Rer. Cluverius, (b) aliique: credidit boi. l. 3. tamen Lazius, (c) quasi eas vi. (b) Opus & ctoiaæ nuncias accepisset Imperator M. Aurelius Antoninus, dum (c) Chron. Marcomannicum bellum gerens Vien. l. 2. ibidem commemoraretur, ubi evi- c. 3. denter is author fallitur, Carnuntum cum Laureaco ineptissime confundens, non minus, quam cum ob unicam inscriptionem perperam descriptam Urbem hanc ab eodem Cæfare primo conditam arbitratur: eam enim antea floruisse ex mox dicendis manifeste elucescat. Tolerabilior est Cuspi niani opinio, (d) vocem Laurea- (d) Deser. cum a S. Laurentio primo illius Austr. Episcopo deducentis, quamvis & huic annuere nequeam, cum sic nulla urgente ratione erroris, vel focordiae arguantur vetusti annales, qui S. Laurentium Laureacum a S. Marco ablegatum referunt; aliud siquidem Urbi nomen tunc fuisse oporteret. Tertiam init viam, & quidem meo judicio veritati proximam Lambecius (e) Bibl. 1. Cluverium fecutus, dum Laureaci etymon a torrente Laurone derivat, qui medium olim Civitatem dissecuit, nunc vulgo Laurbach, vel Lorbach dictus penes pagum, cui Lorch nomen Danubio miscetur, illamque ab indigenis Laurich, vel Lorich antiquitus appellatam fuscipatur; quare adventantes Romani patria inflexione Laureacum enunciaverint,

rint, prout in Juliaco, Vitellia-  
co, Abudiaco, aliisque complu-  
ribus fecisse deprehenduntur. Com-  
pertum porro est Romanorum  
Coloniam olim Laureaci extitisse,  
& quidem sub Octaviani Augusti  
Imperio eo deductam, quod ex  
erutis inscriptionibus dilucide ha-  
betur; in his quippe Colonia Lau-  
reacensis Aug. id est Augusta co-  
gnominatur, ut Janus Gruterus  
legit, non Aur. id est Aurelianen-  
sis, ut Lazio, & nonnullis aliis  
videtur. Cæterum præcipuum in-  
ter Norici Urbes locum eam ob-  
tinuisse suadet tum Danubianæ  
Clasis, ac legionis secundæ, non  
tertiæ Italicae Præfectorum Sedes,  
tum Archiflaminum Metropolis,  
unde fusis late accolis sacrum jus  
dicebant, ibidem instituta; quo-  
rum primum ex utriusque Imperi-  
ii Notitia, atque ex lapideis in-  
scriptionibus duce Dione Cassio

(a) Lib. 55.

(b) Appar.  
ad Ann.  
Hung.

(a) melius elucubratis didicimus;  
alterum vero Melchior Inchoffer  
(b) iisdem pene terminis asseverat.  
Demum veterem Urbis splendo-  
rem, ac majestatem loquuntur tot  
cælata marmora, atque incisa mo-  
numenta a temporis ingluvie, &  
barbarorum saevitia diutissime sub-  
ducta, quæ ante centum, & plu-  
res annos se inspexisse Pighius af-  
firmat, modo vero vel ædificiis  
inserta, vel alio fato, non levi  
eruditio dispendio evanuerunt.  
Supersunt tamen etiamnum plura  
antiquitatis testimonia, quæ in ef-

(c) Bibl. l. 2. c. 8.

fodienda humo sæpius offendun-  
tur, ita ut Lambecius (c) septem  
ab hinc lustris una tantum die su-  
pra centum antiqua numismata  
partim argentea, partim ænea se  
ab agricolis redemisse fateatur.  
Verumtamen longe clarius Lau-  
reacensis Urbis gloria inde emi-  
cat, quod ab ipsis Ecclesiæ incu-  
nabulis Orthodoxæ fidei lacte per  
primos Apostolorum affecias in-  
stillato fuerit enutrita; confono  
enim tum veterum, tum plurium  
recentiorum suffragio certo con-  
stat, S. Petri Apostolorum Prin-  
cipis jussu, ac authoritate a S.  
Marco Evangelista Aquileiæ resi-  
dente, vel ad summum a S. Her-  
magora ejus discipulo, quem sibi  
ibidem substituit, Laurentium  
quemdam ad id muneric missum  
esse Laureacum, ubi primus illius  
Episcopus a multis fertur initia-  
tus: Quod sub annum Christi 60.  
contigerit necesse est, integro vi-  
delicet seculo, antequam Marcus  
Aurelius Antoninus Imperium ad-  
iret; unde quæ de Lazii laurea-  
tis literis, & Colonia Augusta po-  
tius, quam Aurelianensi superius  
attulimus, solidissime roborantur.  
Laurentio inter Cœlites relato  
Laureacenses beneficii memores  
Templum posuere, extra Anisiæ  
muros cum annexa Parœcia ad-  
huc hodie superstes. Plantatæ ita-  
que Ecclesiæ alii deinceps præ-  
rant Antistites, ordinis tamen ra-  
tione tenebris involuta. Inter hos  
fan-

sanc*titate eminebant Maximilianus, & Quirinus, quem Philippi Senioris primi inter Cæsares Catholici filium quidam existimant, & cum Siscien*s Episcopo confundunt. Peculiari quoque memoria dignus est Jerardus, ad cuius tempora pertinet, quod in vetusto, & hactenus inedito Archiepiscoporum Lauriacensium catalogo se legisse narrat Lambecius (a) his verbis conceptum : Anno Domini CCL. Philippus cum Philippo filio suo regnat. Is Philippus Cæsar Pannonicæ Superioris, & Inferioris, ac etiam Mæsiarum fuit Dominus, qui Archiepiscopum Laureacensem, qui usque ad sua tempora pauper fuerat, divitiis, & opibus exaltavit. Attamen tenuia hæc fidei germina Martyrum sanguine fuerunt irriganda, ut radicibus altius defixis, etiam latius efflorescerent ; etenim refert ex Burschio Inchoffer 40. S. Quirini socios sacrarum literarum studio Laureaci vacantes, fame eo in loco enecatos, quem Minorum Cœnobio inclusum Romanorum carcerem appellant, Evangelii veritatem gloriofa morte obsignasse ; quam historiam paululum variat**

(b) Rer. boi. lib. 4. Brunnerus, (b) dum ait, circa annum 297. 40. laureas nihilo inferiores iis, quæ cœlo lapsæ 40. Sebastesos Martyres coronarunt, Laureacensem agrum 40. militibus imposuisse : quorum generoso exemplo impulsus D. Florianus Aquilino Norici Ripensis Præfidi in

hac Urbe degenti ultro se obtulit Christiani nomen palam professus ; quare fustibus semel, iterumque acceptus, & scapulas ferro confractus, Aniso flumine submersus est, feruntque lictorem, qui suspenso de cervice saxo Martyrem in aquas præcipitavit, illico oculis orbatum, facrum vero corpus neque mole sua, neque molaris pondere depresso, fluctibus etiam post mortem innataffe, donec a religiosa quadam fœmina fuerit tumulo illatum. Florentem post-hac sub Christianis Imperatoribus Laureacensem Ecclesiam Scythicus turbo anno circiter 450. fœde prostravit, Urbe scilicet ab Hunnis funditus eversa ; sed paulo post revirentem metropolitica dignitate, concesso pallii usu, decoravit Symmachus Papa anno 498. ad Pontificatum erectus, uti in ejusdem Pontificis epistola ad Theodorum Archiepiscopum data videre est : sœva tamen rursum procella ab ethnicis hostibus suscitata sub annum 570. Laureacum oppressit ; quapropter & Christi fides languebat, donec anno 616. a ferventi S. Ruperti zelo, plerisque a vana Deorum superstitione revocatis, teste Velsero (c) fuerit pristino vigori restituta, Philone vel tunc, vel non multo tardius Archiepiscopalem hujus Urbis Cathedram obtinente. Orta dein inter Gerardum Laureacensem, & Heroldum Salisburgen-

sem Antistitem de finibus controversia , summus Pontifex Agapitus II. anno 946. Ecclesiæ clavo admotus in data ad primum epistola illam his verbis diremit: *Constat quidem, quod Canonice singulis provinciis singuli ordinantur Metropolitanus, proinde distribuere, atque ordinare ita vobis parochias, bonum, & pacificum estimamus, ut divisis duabus Noricæ regionis provinciis, Heroldo Archiepiscopo occidentalis Pannionæ cura committatur, & custodia; tibi autem, successoribusque tuis propter emeritam antiquitatem sanctæ Laureacensis Ecclesiæ, cui jure juniorum reverentia assurgit, in benedictionis & sedis ordine Prælatis, atque Præpositis providentiam orientalis Pannionæ, regionemque Avarorum, atque Maraharorum, sed & Slavorum, qua modo Christiani, vel adhuc per baptismum Christo lucrandi sunt, circumquaque manentium credimus, nostramque Apostolicam vicem in illis partibus prædicandi, & pro arbitrio vestro, ubi opus est Episcopos constitueri, omniaque disponere, atque ordinare tali autoritate, atque potestate delegamus, ac si ipsi præsentes affuisemus. Quod si jam dicitur Heroldus Archiepiscopus deinceps, suorumque quispiam Successorum minime diffinito limite contentus, sed interdictam, atque a sua potestate separatam Diœcensem repetere pervicaciter conatur, nec a prohibitæ contentionis schismate per istas nostras Apostolicas traditiones, atque determinationes compescitur, ipse etiam pie concessa dignitatis munificentia penitus privetur, atque secundum jus pristinum*

*Superior Pannonia continuetur Inferiori, atque tuæ, tuorumque Successorum ambae perpetualiter subjaceant ditioni. Repullulante rursus dissidio, jurium suorum confirmationem a Piligrino Laureacensi Archiepiscopo, & ferventissimo Hunnorum Apostolo imploratam Benedictus VII. , qui anno 975. D. Petri Cathedram conscedit, non tantum illi est impertitus, verum etiam ejusdem Archidiœcesim Ottoni II. Imperatori, omnibus Germaniæ Archiepiscopis, Ducique Bavariæ Henrico speciali epistola commendavit, quam tanti fecit Otto, ut novis prædiis, & fundis illius Ecclesiæ patrimonium continuo cumularit. Memoratas hactenus epistolas commentariis suis inseruere Lambecius, (a) Inchoffer, Lazius, (a) Bibl. l. 2. c. 8. aliique, ad quos recurrere lector poterit fufiorem horum notitiam hausturus. Quod autem ad præsentis Urbis statum attinet, fertur ea in primis originem suam ducre ab anno circiter 900. quo Ludovicus Rex, Arnulphi Cæsaris filius arcem, cui Ensburg nomen, ibidem struxerat; additque ex Lazio Merianus, (b) eandem ad Dominos ab Ens, & Spilberg quondam spectantem ab eorum postremo Eberhardo Rudolphum I. Imperatorem 600. argenti pondo comparasse, quibusdam Florianensis Præpositi prætensionibus simul extinctis, & permisso Passaviensibus Episcopis jure Anisiensem Archi-*

(a) Ann.  
Austr. l. i.

chidiaconatum conferendi : interim extra controversiam tamen est apud Gerardum de Roo,(a) Urbem hanc primam fuisse, quæ eundem Rudolphum ad subigendam Austriae cum exercitu progredientem, referatis a Sumeruno illius Praefecto foribus, prono animo excepit. Experta quoque est Anisia Hunnorum loco, qui Laureacum deleverant, furentium Rusticorum vesaniam, qui in eam anno 1626. astu dicuntur irrupisse. Denique silentio prætereunda non est alta fori turris, in qua inscriptio prostat his versibus comprehensa.

Aspicis exiguum, nec magni nominis Urbem,  
Quam tamen æternus curat,  
amatque Deus.

Hæc de Laureaco reliqua est:  
his Marcus in oris,  
Cum Luca Christi dogma  
professus erat.

## B A D E N A.

**B**Adena vulgo Baden Civitas est Archiducalis, 4. milliaribus secus montium radices Vienna in Meridiem recedens, quam Cluvenius (b) non vane autumat eandem esse cum Pannoniis Aquis in & Nor. c. 5. ter Vindebonam, & Scarabantiam ab Antonino collocatis. Nomen a thermis mutuatur frequenti ad-

ventantium affluxui perpetuo patentibus ; quarum aqua modice alumine, plus sale, maxime vero sulphure imbuta plurimis ægrotis opitulatur.

## C A M P I L I L I U M.

**C**AMPILILUM vulgo Lilienfeld opulentissimum Cisterciensis Ordinis Monasterium denominat, 8. Vienna milliaribus in Zephyronotum distans, quod a quodam Salisburgensi Praefule S. Andreæ solemniter dicatum, datis amplis proventibus anno 1206. fundarunt Leopoldus Gloriosus Austræ Dux, ejusque consors Theodora Emmauelis Comeni Constantinopolitani Cæsarialis filia, ut Wichardus de Polhaim Archiepiscopus Salisburgensis anno 1315. vita functus apud Lambecium (c) testatur, non tantum consanguinea, quod multo posterior author Cuspinianus (d) contendit. Leopoldi ossa ex Apulia, ubi fato cessit, intestinis in monte Cassino sepultis, huc adiecta in monumento, quod in Ecclesiæ choro eminet, conduntur.

## C E L L A.

**C**ELLA duplex est Austræ Cœnobium; unum Inferioris Cellula Mariæ appellatum, & sacro Benedictinorum Ordini ab Henrico, & Rapoldo de Schwarzenberg anno 1336. erectum : alte-

(c) Diar.  
Itin. Cell.  
Seg. 22.  
(d) Defcr.  
Austr.

rum Superioris, quod 4. infra Passavium milliaribus præterfluens Danubius dextrorsum relinquit, Angelorum Cella, vulgo Engelhartszell dictum, & a Bernardo Prambachio Passaviensi Antistite an. 1293. Cisterciensibus fundatum.

## CETIUS MONS.

**C**etius, non Cesius, nec Cæsius, mons est veteribus celebris, qui juxta Ptolomæum Pannoniam a Norico ea ætate diffecabat; quapropter hoc nomine non primum tantum ejus jugum indicatur, quod a dextro Danubii littore surgens vulgo Kalenberg audit; verum etiam tota ea montium catena, quæ inde ad Savum usque per 50. circiter millaria protenditur; sub eadem proinde appellatione veniunt Caumberg, Annæberg, Sau-russel, Teufelstaig, Golach, Schne-berg, Simmering, & quidquid de-mum usque ad descriptum terminum interjacet, quem etiam a Ger-manis Kalenberg nuncupari pere-ruditus Schönleben, attestatur. Veruntamen assentiri cogimur, Ceti verticem ad Danubium prominentem reliquos omnes celebritatis suæ fulgore offuscare; namque Romanis hisce Regionibus primum potiss, is maxime idoneus visus est, ex quo veluti ex specula tum navibus ex Norico in Pannoniam defluentibus, tum ma-xime Germanis hostibus in adver-

sa ora degentibus invigilarent; quare munimentum ei prius super-structum subsecuta est Colonia Aelia Cetiensis P. Aelii Hadriani Imperatoris jussu ad subiectum clivum, ubi modo Pagus Kalen situs est, a Romanis deducta, cui ad ejusdem Cæsaris honorem ad-adoptivus ejus filius, ac successor Antoninus Pius Aelianum Flam-i nem cum Aelianis sodalibus adje-cit, quod effossa monumenta a Ja-no Grutero, & Lazio excusa po-steris prodidere: & quidem Urbem Cetium, seu Cetiam ibidem vigui-fse luculente declarant non tam S. Floriani acta, ex quibus etiam certiores sumus S. Martyrem Tri-buni, seu Centurionis munus in ea administraffe, quam Peutingeria-næ Tabulæ, in quibus Vindobo-na in Occafum proficiscentes post 6. passuum millia, hoc est Germanicum sesquiilliare illam obviam habuerunt; unde patet veritati mi-nus consentaneam esse Lazii sen-tentiam, Cetiam, ubi nunc Zeisl-maur, quod longius abest, collo-cantis, & mera qualicunque vocis affinitate more suo persuasi. His vero prærogativis temporis vetu-state expunctis, novum monti Ce-tio accessit decus, quando S. Leo-poldus Austriae Marchio ad Ori-en-talem terræ tractum a se primo subjugatum contra Hungaros pro-pius tuendum, nobili arce illius apicem coronavit, ubi nimirum Sacellum eidem Sancto dicatum ad

ad perpetuam rei memoriam hodie cernitur, quod una cum propinqua Camaldulensem Eremo non levem huic monti celebritatem etiamnum adsciscunt. Atque haec fuere decora, quæ Cetii in Pannoniam se demittentis latus illustrarant; si enim superato jugo per Occiduam ejus declivitatem, in Ripense Noricum descendamus, obviabit in eo districtu, quantum Eugippii indicia nos conjicere finunt, antiqua Flaviana, sive Faviana cum Plinii Flavio fortassis coincidens, pro qua Episcopos

(a) Chron. Vien. 1. 2. c 4.

undique emendicat Laziüs, (a) & quam Comagenis evocatus S. Severinus dira fame, qua vexabatur, plurimis ex Rhætia ratibus commeatu onustis insperate appellentibus, divinitus liberavit, deinde in remotiorem locum, qui ad vineas vocabatur, sedens, exiguum incoluit cellulam, ex qua Flavianam divina revelatione regredi compulsus, prope Civitatem Monasterium construxit, quod primum omnium in Austria erectorum tuto asseremus, a Friderico Favæ Rugorum Regis fratre post Sancti obitum barbare direptum. Verum qui Eugippii Favianam eandem cum Vindobona Urbem opinantur, pago Siefering Viennæ propinquuo illius Monasterii situm adscribunt, nominis consonantia procul dubio allecti. Templum in Cetio monte D. Leopoldo sacrum, cum Turcæ Viennam obsi-

dione cingerent, a barbaris omnia late populantibus dirutum fuerat; se restauraturum Imperator Leopoldus voverat, quod & eo loco prima facta fuissest ad memorabilem victoriam via: (b) pium Principem destituit vita priusquam gravibus semper implicitus bellis rem perficeret: patrium votum, erecta ibi augustiore æde sacra, Carolus VI. anno 1730. exsolvit.

(a) Hist.  
Leop. 1. 5.

## CREMBSIUM.

**C**rembsium vulgo Krembs Urbs est Archiducalis, Boreali Danubii lateri in clivum elevatō ad Cremſæ amnis ostium imposita, 10. Vienna milliaribus in Occasum diffisa, & duplicibus quovis anno nundinis frequentata. Quatuor in ea furgunt Templa, quorum primum S. Viti cum notabili turri ab anno 1464. erecta Urbis Parochus, alterum sacer Prædicatorum Ordo administrat, tertium vero Societatis Jesu Collegio a Michael Adolpho Comite ab Althan fundato, & quartum DD. Philippo, & Jacobo sacrum Nosocomio adhaeret. Anno 1723. Anglicæ Virgines, ex fano Sancti Hippolyti hic etiam introductæ sunt, dependens que ab ibidem loci constituto, Collegium erexerunt, admittente potissimum, suasque & curas, & opes conferente Maria Anna Kriebbaum, de qua in descriptione fani S. Hippoliti pluribus agemus

mus infra. Bohemos anno 1619. Duce Carpizano hanc Civitatem aggressos, fortiter ea quidem repulit, sed anno 1645. Torstenfonio Suecorum Archistratego succubuit, unico tamen elapso anno, ad pristinum dominum postlimino reverfa.

## CREMIFANUM.

**C**Remifanum vulgo Kremsmünster Superioris Austriae Oppidum ob splendidissimum Ordinis S. Benedicti Cœnobium maxime illustre, juxta sinistram alias Cremsæ amnis ripam, 4. Lincio milliaribus in Austrum recedit. Auspicatus illud est in S. Salvatoris honorem anno 777., deducta ex Inferiore Altachio Religiosorum Colonia sub Faterico primo ejus Abate, Bavariae Dux Thafilo hujus nominis secundus, Templo plumque adjecit per Valdericum Laureacensem, seu Passavensem, Virgilium Salisburgensem, & Siquidem Reginoburgensem, seu Ratissonensem Antistitem consecratum, ad id se cœlitus commonefieri persuasus, cum filio suo Gunthero ab apro in venatione interemto idoneum in ea, quæ tunc hic erat, sylvestri solitudine tumulum delecturus, intempestæ noctis silentio cervum e nemore prodeuntem vidit, qui in cornibus faces accensas gestaret, nec a loco, cui institerat, divelli posset. Quæ

præter Velserum, (a) ac Brunnerum, (b) ex antiquis monasterii tabulis uberiori calamo extraxit Simon Rettenpacher, (c) paulo post subjugens Caroli Magni, Ludovici Pii & Lotharii Cæsarum, Carlomanni & Arnulphi Regum integra diplomata, queis amplæ Thassilonis donationes confirmantur, novisque latifundiis augentur. Adeo floridum Cœnobium circa noni, & decimi sæculi confinia, præmissa 50. inquilineorum cæde, ab Hungaris direptum centum ad minimum annis suis in ruinis sepultum jacuit; donec undecimo seculo ineunte D. Henricus Imperator, S. Gothardo Altachii Inferioris Abbatे potissimum horante, illius instauratiōnem exorsus est, Templo ab Engelberto Passavensi Episcopo post annum 1050. rursus consecrato. Verum non multo post, eo cum Monasterio flammis absumto, fuit tertio erectum, & a Passavensi pariter Præfule B. Altmanno, Salvatori mundi, Sanctisque Agapito, & Blasio anno 1082. solemnī ritu dicatum. Tot calamitatibus preffo suppetias interim tulere, ultro datis, aut restitutis prædiis Henricus IV., & Fridericus I. Imperator, Bavariae Dux Welfo, aliquique Principes, quos dein imitati Rudolphus I. Cæsar, Ottocarus Bohemiae Rex, atque Austriae Archidux Otto novis illud privilegiis, & gratiis prosecuti sunt; alter-

(a) Rer. Boic. l. 5.  
(b) Ann. Boic. l. 5.  
(c) Ann. Cremif. l. 1. 2. & 5.

ternante tamen iterum fortuna, & prospera adversis permiscente; sub annum siquidem 1480. Oppidum majori ex parte conflagravit, & cætera Monasterii bona, quod & plerisque evenit, Austria tunc hostium, ac perduellum tumultibus plurimum agitata, ferro & igne vastabantur. Sedatis hisce procellis plures Abbates splendida ædificia diversis usibus destinata sensim adjicientes, apertis etiam a Gregorio Lechnero, qui anno 1558. decepsit, externæ juventuti scholis, augustam, quæ hodie eminet molem ad fastigium evexere. Conditæ hic coluntur sacræ S. Agapiti Martyris exuviae ab Hadriano I. Papa Roma transmissæ, S. Wisintonis Monachi ejusdem Monasterii incolæ, qui ante annum 1080. florebat, & S. Candidæ Martyris ab A. R. P. Emerico ex Venerabili Capucinorum Ordine postea Episcopo Viennensi liberaliter donatae. Paucis ab annis impetrata a Principe licentia, hic erecta est nobili juventuti Academia, laudabili religiosorum zelo, nullam qui prætermittant opportunitatem, quamdem qualiter demum adferendi patriæ utilitatem.

### S. CRUCIS COE. NOBIUM.

**S.** Crucis illustre Ordinis Cisterciensis Cœnobium, quod  
*Topogr. Austr. P. I.*

peramœni colles, saltusque ambient, & Vienna milliaribus abest. Conditorem suum ab anno 1136. veneratur S. Leopoldum Austriæ Marchionem, cui pii hujus operis author fuerat ejusdem filius Otto Cisterciensium legibus in Morimundano Burgundiæ Monasterio eo tempore obstrictus. Alium autem natu minimum D. Leopoldi filium Conradum, Abbatis munus ad S. Crucem obiisse, Lambecius (a) docet, antequam anno 1148. ad Passavensem, & anno 1146. ad Salisburgensem Infulam condignis (a) Diar. iti. Cell. leg. 73. viam meritis sibi stravisset. Communem mortalium anaftasim operiuntur hic glorioi multorum Principum cineres: prævivit illis Ernestus IV. Conditoris itidem filius, quem pone secuti sunt, fratres duo Leopoldus Largus, & Henricus Austriacorum Ducum primipilus S. Parentis sui in exædificando Monasterio, & novis prædiis ditando munifici æmulatores: Accefferunt præterea Leopoldus Virtuosus, Fridericus I., & II. Babenbergium Austriæ Ducum postremus honoratori sarcophago donatus.

### DROSENDORFFIUM.

**D**rosendorffum vulgo Drosendorff, speciosum cum arce Oppidum, quod Teia fluvius Moraviae, Austriæque limes alluit, anno quidem 1278. Ottocaro Bo-

hemis Regi se submisit, sed anno 1620. diurnam Christiani Anhaltini Bohemorum Ducis obsidionem generosius elusit, Suburbis tantum igne vastatis, quod tamen damnum abunde repararunt Urbes Horna, Retza, & Eggenburgum interim a Bohemis amissæ.

## DUCUMBURGUM.

**D**ucumburgum vulgo Herzogenburg ad lœvam Traisenæ fluvii, qui vernacule Trafam, antiquitus vero apud Latinos Trigisamus vocabatur, inter Fanum S. Hippoliti, & Danubium medio ferre itinere occurrens, in dotis partem venerat, quam Leopoldus IV. Austriæ Marchio filiæ Elisabethæ Ottocaro IV. Styriæ Marchioni nuptæ decrevit, sed una cum Styria ad Austriacos Princes deinde regressum. Traditione fertur vetustius loco nomen Trasamburgum fuisse, quo obliterate hodiernum invalescere cœpit a geminis Ducibus desumtum, quos cujusdam Austriæ Ducis conjux pertransiens uno partu fuerat enixa. Adjacet illi celebre, & pervetustum Canonicorum Regularium Collegium illius loco substitutum, quod ab Ulrico ex Comitibus Cileæ Episcopo Passavensi anno 1112. non procul Hollenburgo in D. Georgii honorem fundatum, exundantis Danubii æstus labefactarat. In dextro Trigisami

littore huic Oppido ferme e regione opponitur aliud ibidem Canonicorum Regularium S. Augustini Collegium D. Andreæ a quodam Anglo Principe Henrico, Ottonis III. Imperatoris nomine anno 998. excitatum.

## EBENFURTUM.

**E**Benfurtum Oppidum cum arce juxta Laytam fluvium, muro, fossisque cinctum Vienna sex miliaribus distatum, & a Templariis primo extructum, D. Udalrici lancea in Parochiali ejusdem Sancti Ecclesia religiose custodita plurimum gloriatur, ea quippe armatus S. Präful teste Meriano (a) fer-  
(a) Topog.  
tur Ethnicos Hunnos hoc in distri-  
Austr. etu profligasse.

## EBERSBERGA.

**E**Bersbergæ Superioris Austriæ Oppido prope Lincium in dextra Trauni ripa, quæ longo ibidem ponte cum lœva jungitur, ædificato venusta imminet arx a Comite Sichardo Santha, alias Sempta, regnante in Germania Ludovico IV. Arnulphi filio, 10. ni-  
mirum seculo ineunte primitus erecta, ut ab iteratis Hungarorum insultibus Provinciam tutaretur: cumque idem Comes Bavaram quoque Ebersbergam possideret, consonum & huic arcii nomen indi-  
præcepit: nostra autem ætate ea Passavensi Antistiti obedit.

EBERS-

## EBERSDORFFIUM.

**E**Bersdorffium splendidissimum Cæfarum Palatium autumnalibus feriis destinatum uno post Viennam milliari inter amœnam nemorum coronam Meridionale Danubii latus illustrat. Ejus situs plurimum coincidit cum Antonini Ala Nova Equitum Dalmatarum Romanis merentium statione, & Villa Caji Peutingerianæ Mappæ inscripta. Adjunctum Oppidum cum anno 1485. Matthias Hungariorum Rex moræ, quæ in Viennensi obsidione trahebatur, impatiens cum Prætoriano milite castris egressus capere moliretur, manifestum vitæ discriimen illum adiisse testatur Gerardus de Roo, (a) dum enim in humili quodam tugurio cum familiaribus accumberet, ferreus globus inde evibratus disjecto pariete penes Regem decidit, qui hinc animo jam commotior Oppidum summa vi aggreditus, in illud perrupit. Totum hoc ædificium Augustissima, cui patriæ ci-viumque salus, suis antehabetur longe commodis, publico cessit, atque anno 1745. hicce loci utriusque sexus homines quos privata inopia ad mendicitatem redegerat, ali voluit, debitisque laboribus a periculofo vita otio præservari; sed his in vicina minora loca dispersis, anno 1756. nova ædificio ala, contabulatione duplici instructa erigi cœpit, qua perfecta, puel-

(a) Annal.  
Austr. 1.  
10.

læ iniquiori fortuna pressæ hic collocatae sunt, quæ sub sui sexus inspectoribus, quæ conditionis sunt suæ, docentur omnia: virtutis Christianæ elementa, primum hic locum habent, dein & legere, & scribere discunt, omnesque labores illos, qui providam matrem familias decent; non procul ab hoc loco ædificium illud, quod nova Fabrica dicebatur, olimque receptaculum erat, quo feræ, peregrinaque Animalia oblectationi Principum reservabantur, in usus militares conversum est, variorumque, quæ belli necessitas postulant, receptaculum est: adeo sibi Patriam potiorem esse Theresia exhibet, unicam hanc sibi voluptatem feligens, ut se communem civium castrorumque matrem profiteri queat.

## EGENBURGUM.

**E**Genburgum vetus, ac Archiducalis Civitas famoso Mainhardi monti adjacet, anno 1407. in Civili Austriæ bello ab Archiduce Leopoldo IV., & 1485. a Matthia Hungarorum Rege occupata.

## FANUM S. FLORIANI.

**F**anum S. Floriani Superioris Austriæ Oppidum duobus miliaribus Lincio in Austrum rece-dens a nobilissimo Canonicorum

Regularium Collegio nomen suum defumit. Fuerat hic olim ex Raderi mente non multo post S. Floriani Martyrium, illius memoriae conditum illustre Templum, & adjectis posteris seculis Cœnobium a D. Benedicti Sodalibus possesum, quod cum Hungari delevissent, ab Engelberto Passaviensi Antifite, qui ab anno 1045. per 4. lustra sedit, postea instauratum, & Canonicis D. Augustini disciplinam profitentibus traditum, idem author, atque Hundius fastis commiserunt. Demum illud ex modicis initis circa annum 1080. in majorem extulit splendorem ejusdem Urbis Præful B. Altmannus; cui fundationi cooperati quoque dicuntur Quintinus, Lotharius, & Conradinus Austriae Dynastæ. Nostris vero temporibus Reverendissimi Præpositi studio augustum sane Templum raro marmore affatim emicans, paucisque invidens assurrexit. Suspicatur hic admodum apte Henschenius (a) Benedictinos Patres ad declinandas Hungarorum infestationes in Italiam confugientes S. Floriani Martyris ossa prius hic honorifice affervata Romam asportasse, cum ex Cromero, & Cæsario ab ipso allegatis constet, inde Lucium III. Summum Pontificem, qui ab anno 1181. Ecclesiæ præfuit, ea per Aegidium Mutinensem Episcopum Cracoviam, regnante Casimiro transmisisse.

(a) In act.  
S. ad  
diem 4.  
Maii.

Memorabilis etiam est huic Collegio proximus fons, qui ab ægris haustus, pluribus saluti fuit; eundem enim esse ex pervetustis Sancti actis docemur, qui ad cujusdam piæ foeminæ, nomine Valeriae, preces prodigiose erupit, ut jumenta currui juncta, quo illa S. Martyris Floriani corpus ad designatum sibi divinitus tumulum clam Ethnicis avehebat, nimio solis æstu laffata, pro ulteriori via reficerentur.

## FANUM S. HIPPOLYTI.

**F**ANUM S. Hippolyti vulgo Sancti Pölten Archiducalis Urbs ab adjacente Canonicorum Regularium S. Augustini Collegio denominatur: jacet ea ad lœvam Trigisami fluvii a Danubio tribus miliaribus ad Meridiem, Vienna vero sex ad Occidentem remota. Ejus exordia ex Privilegiorum diplomatis Monasterio Tegernseensi ab Ottone II., Henrico VI., & Friderico II. datis, & apud Wiguleum Hundium extantibus sic fere describit Lambecius: (b) Cum (b) Bibl. I.  
2. c. 8. Pipini Francorum Regis duo limitanei Comites, fratresque germani Adalbertus, & Otgarius, five Ottocarus ex Bavariae Principum stirpe Oriundi Sancto Zachariæ Papæ, qui obiit anno 752. in Italia contra Saracenos strenuam navassent operam, & inter præmia, Sanctorum Quirini, & Hippolyti cor-

corpora ab eo accepissent, bina in eorum cultum fundarunt Cœnobia; unum scilicet juxta Tegaratum Superioris Bavariæ lacum vulgo Tegernsee, quod S. Quirini lipsianis donarunt, ipseque Adalbertus primum Abbas rexit; alterum vero in eo, de quo agimus situ, sacris S. Hippolyti exuviiis ditatum, ubi cum tam incolæ, quam ædificia forsan religionis ergo indies accrescerent, non obstantibus damnis ab Hungarorum incursionibus sæpius illatis, utpote quæ Passavientes Præfules semper repararant, anno demum 1276. Petrus ejusdem loci Episcopus ab Imperatore Rudolpho I. frequentes jam inibi ædes in Civitatis formam redigendi, muriisque, ac fossis pro libitu muniendi licentiam impetravit. Præter universale Austriæ a Matthia Rege oppressæ infortunium, aliud sibi peculiare hæc Civitas tulit, obsidionem videlicet a circumjacentibus Rusticis duce farto re quodam Georgio Brunner anno 1397. tentatam, quam tamen capti aliquot ex illis a Tribuno Kolonisch prius inde abactis, sequenti mox anno fune solverunt. Inter monumenta sacra nec exigua, nec communia, quibus hæc urbs ornata est, memorandum venit Collegium hujuscæ fæculi anno 1706. hic eretum, habitatumque ab Anglicanis Virginibus illustribus, quo compellantur nomine illæ, quæ no-

vum institutum S. Mariæ sequuntur, qui ordo religiosus cum hisce ultimis temporibus postliminio quasi Austriae rediverit, non abs re opinor esse illius utpote pluribus ignoti ampliorem mentionem facere: Fundatricem venerantur Virginem natalibus non minus, quam virtutibus illustrem, Mariam de Wart ex antiquo genere apud Eboracenses in Britannia natam: anno 1585. a Parentibus Catholicam nacta fidem, mores conformes fidei, infans etiam prætulit, vix ipsam egressa infantiam ad opulentas sæpe nuptias vocata non sine parentum tædio constanter eas aspernata est. Jam tum Deo unice deinceps vivere decreverat; nec minorem prætulit constantiam in acerbissimis persecutionibus, queis cum parentibus ob Catholica, quæ sequebantur, sacra tum sæpius affligi cœpit; Ex Anglia provolavit Audomarum in Belgium, inter Virgines Deo sacras ut viveret, atque ut voti sui compos fieret, non renuit nobilitate quantumvis inclita, inter Laicas ut ajunt, Sorores apud Sanctæ Claræ Moniales adoptari; sed cum alio vocaret Deus, tantis animi angustiis identidem cruciata est, ut semel atque iterum deferenda vita Religiosa fuerit: tota dein zelo conversionis animalium abrepta, in Angliam rediit, tantoque profectu huic incubuit operi; ut plurimis atque hos in-

ter etiam, duobus ministellis ad faniora reductis sacra, fama illius celeberrima fieret, collectis hic illustroribus Virginibus aliquot, rediit in Belgium, quodque im pellente Deo, illius animo injectum prudentissimi, queis se regendam commiserat, judicarant, institutum ausplicata est: suis alumnis regulas scripsit, ab ipso Societatis Iesu Fundatore Ignatio, quantum sui sexus pateretur conditio, mutuatas penitus. Ordinario loci subjectas, votisque duntaxat ligatas simplicibus suæ proximorumque saluti unice intentas voluit; post varias difficultates ab æmulis suscitatas, anno tandem 1617. adnitente potissimum Jacobo Blasio Audomarense Episcopo, a Paulo V. Pontifice maximo regulæ probatæ sunt, hoc successu læta Patriæ se statim reddidit Maria, primum ut illa operis fructum sentiret, cuius præcipue utilitatem erat exorsa: variis hic locis, instituti sedes fixit, cui operi gloriose vix non fuisset immortua, ab hæreticis sæpius ad martyrium quæsita; sed gravioribus reservabatur a Deo laboribus: tertio in Belgium redux, cum jam late virginum suarum spargeretur fama, certatim urbes sibi tam felix educationi puellarum expetebant præsidium; Leodium ergo in Treviros, & Ubios ducendæ fuerunt Coloniæ; in Italiam deinde ipsa Fundatrix ivit, solemnem ordinis

sui confirmationem petitura: spe, illam adversariorum molimina de jecerunt, Scholas tamen ubivis aperiendi facultatem amplissimam a Gregorio XV. adepta est, inde Neapoli, Perusiæ, in ipsa quoque Sicilia novus ordo sedit; sub idem tempus Monachium ab Elisabetha Lotharingica Maximiliani I. Ele toris Conjugé invitata novum hic, amplissimumque excitavit domicilium; Viennæ a Ferdinando II. admissa, & hic, & Posonii, & Pragæ suum intulit institutum. Læta tam initia calamitatum longa series exceptit: et si vitam Maria cum suis duceret adeo ab omnis nævi suspicione remotam, ut illibatam omnes testarentur, Urbano tamen VIII. Pontifici Maximo adversariorum querelæ gravissimas de crescente indies instituto, curas injecerant; Virgines natalibus, forma illustres, ætate teneras, toto libere vagari orbe periculofsum videbatur aliquibus; increpabant institutum alii, utpote ab reliquis discrepans, Claustræ impatientes, non esse tolerandas, fæmineam virtutem, ni cinctæ sit repagulis, male tutam, imo nullam esse criminati: accedebant aliæ, fundatri ci ipsi, impactæ calumniæ: jussu ergo Pontificis Monachii in Cæreres conjecta est. Domicilia ejus lege Pontificis suppressa sunt; & quamquam favens Electricis animus, a communi ruina Monachiensem præservaverit sedem, alibi

ta-

tamen atque etiam in Austria corruerunt ; seu quod recentes nimis , minus essent perfectæ , ac firmæ , seu quod accusatio alibi vero haberetur propior , ex ipso tamen carcere prodivit Maria illustrior , innocentiaque ejus manifeste patuit ; quare ipsa Romam ivit , se & institutum suum plenissime Pontifici purgavit , qui etsi pauca ex illo immutarit quæpiam , ea tamen ipsa , quæ fundamenta instituti erant , probavit , amplissimamque prosequendi operis tam pii facultatem præbuit : tardiora a vulnere hoc incrementa habuit , nec omnes , quæ periverant , rediere domus , in Angliam , quo fama Carceris pervaferat , redire voluit Maria , ne virtus illius suspecta maneret illuc , ubi institutum a se fundatum , tam necessarium erat Religioni præsidium : apud Henricam Caroli I. uxorem admissa , magnam iniit gratiam ; sed ingruentibus paulo post civilibus furoribus fugere coacta an. 1645. Hevarthi apud Eboracenses febribus exusta inter suarum complorantium amplexus pie ut vixerat , obiit 3<sup>o</sup>. Januarii. Sanctitatis eximiæ , zeli supra sexum , constantiæ non fæmineæ famam naœta , virtutibus etiam supra humanam conditionem conspicua : sublata fundatrice , quo animabatur divinæ gloriæ ardor , filiabus transmisit , his tamen dudum cum adversa fortuna luctandum ; ast su-

peratis demum , quæ veræ virtutis fors est , obstaculis , florentiores resurrexere ; tandemque anno sæculi hujus tertio a Clemente XI. regulas , institutumque suum confirmari viderunt . Monachii interim constanter floruerant , atque hinc annuente Imperatore Josepho ad fanum Sancti Hippolyti anno 1706. commigrarunt ducente illas nobilissima Virgine Maria Anna Kriechbaum , quæ ejusdem instituti alumna , Collegio novo prima præfuit , atque acceptam a fratre suo hæreditatem pinguissimam illius Fundationi transcripsit , non sine ingenti Austriae commodo in Virginibus hisce tam luculenta virtutum exempla mirantis , tam proficuum educationi puellarum præsidium possidentis . Antiquior , & meritis non inferior Religiosarum ordo huc etiam paucis ab annis invectus est , scilicet alumnarum Sanctæ Theresiæ , quas Carmelitas vocant , a defuncta Principe de Montecuculi fundatae ; & ut juventuti potioris sexus consulum etiam esset , a quadriennio priorum liberalitate , aperuerunt hic Patres Piarum Scholarum Collegium , & Scholas publicas , in quibus , quæ sui sunt instituti , non sine summo profectu indefesse tradunt ; modo etiam Religiosi Carmelitarum viri , ejusdem ex Principis de Montecuculi Fundatione , in Urbem admissi erigendo vacant sui Ordinis Cœnobio .

FREY.

## FREYSTADIUM.

**F**Reystadiuū vulgo Freystadt Archiducalis Austriæ Superioris Civitas annuis nundinis frequentata 4. Lincio milliaribus Bohemiam versus removetur, commodisque ædibus habitatur, licet magnam a Rusticis cladem, in Arce præsertim, passa, anno nempe 1626., quo in eandem dolo captam extemporanei illi milites iruperunt, mox tamen inde extrusi, & ad stivam relegati. Subjacet huic amplius districtus, quem vulgo Machland dicunt, binas Urbeculas Danubio proximas complectens, scilicet Matthausen, & Greynam, cuius sub Artagrunæ nomine Ludovici I. Cæfaris literas meminisse afferit Lazius, atque complura insuper Oppida, & Arces, qualia sunt Neukirchen, Helmesed, Keffermarckt, Bergen, Windhag, Klam, Klingenberg, Königwisen, Bregarten, Lustenberg, &c. Potiebantur olim illo Comites a Burckhausen, & Machland cognominati, quibus deficien-tibus anno 1186. Imperii beneficio ea Regio Austriae Principibus cessit, a Rudolpho I. Cæsare Ottoni Brandenburgico genero suo in Catharinæ filiæ dotem anno 1280. assignata, sed ad Austriae postmodum rediit in plures privatos Dominos sensim discissa.

## GEMINGA.

**G**eminga Carthusianorum est Eremus ab Alberto II. Archiduce in ea sepulto anno 1332, inchoata, & 1358. ab eodem pau-lo ante obitum absoluta, cui sub-dita est Urbecula, quam vulgo Scheibs vocant, ad amnem Erlap non procul inde sita.

## GEMUNDA.

**G**emundam vulgo Gmunden ve-terum Laciacum ex itinerum ductu, & intervallis interpretatur optime Cluverius; Antonini si-quidem itinerarium concordi tri-um itinerum numero 28. passuum millibus, & Peutingeriana Tabu-la 27. itidem passuum millibus eam Urbem Juvavio, seu Salisburgo separant, Oviliam versus, de qua alibi agemus, procedendo. Est hodie Gemunda Archiducalis Au-striæ Superioris Civitas, Lincio 5. milliaribus in Austrum absce-dens, & cognomini lacui vulgo Gmundersee dicto, quem Tra-nus annis interfluit, ad Boream adjacens, quæ a proximis salis fodinis, ejusque commercio magnam sibi nominis claritatem mercatur. Prima illarum inventionis gloria Elisabethæ Meinhardi Comitis Ty-rolensis filiæ, & Alberti I. tum Austriae Archiducis, dein Impera-toris conjugi omnium scriptorum calculo adjudicatur, sed circa an-num

num unice discrepantium , cum  
 (a) Spec. Fuggerus (a) 1303. statuat , & Ge-  
 ho. 1. 2. c. 8. rardus de Roo , (b) quem accura-  
 (b) Ann. tiorem judico , eum 12. annis præ-  
 Austr. 1. 2. (c) Mun. vertat . Descriptionem vero a P.  
 subt. 1. 10. Joanne Eiffert (c) subtilissimo na-  
 sec. 4. c. 11. turæ a secretis Kirchero transmis-  
 sam , ab hoc contractius desumptam  
 exhibeo . Aqua itaque adhuc ex-  
 trinsece dulcis data opera intra  
 concamerata fodinarum salis re-  
 ceptacula , quas stantias vocant ,  
 deducitur , ubi ex Salinæ mineræ  
 dilutione tota in aquam falsam  
 convertitur , & ubi jam sale satis  
 fuerit imbuta , quod per lignei in-  
 strumenti immersionem aquæ pon-  
 dus explorando dignoscunt , rota  
 fitulis , haustrisque instructa e fos-  
 sis extrahitur , & in canales effusa  
 ad lebetes coquenda emittitur ,  
 longo tamen itinere interim emen-  
 so , cum montis Halburg aqua ad  
 lebetem penes lacum positum 4.  
 millaria Germanica inde remo-  
 tum per 24000. canalium sibi in-  
 vicem innexorum , quorum quivis  
 10. Geometricos pedes continet ,  
 derivetur : ejus autem lebetis , qui  
 in ovalem figuram inflexus ex tri-  
 bus aliis maximus est , latitudo  
 30. passus , duplum longitudo ad-  
 æquat , sed profunditas non nisi  
 ad sesquipedem descendit . Du-  
 ples hic salis genus effoditur ,  
 prius solidum , purum , & instar  
 crystalli nitidissimum est , verum-  
 que fal gemmæ dicitur ; alterum  
 varie coloratum , & nunc subru-  
 Topogr. Austr. P. I.

brum , nunc violaceum , nunc ali-  
 um obscurum colorem imitatur ,  
 quod tamen uti viscosum est , &  
 sulphureum odorem prodit , ita  
 passim relinquitur . Observatum  
 quoque fuit a fossoribus sub certo  
 annorum curriculo fodinas novo  
 sale repleri , de cuius rei veritate  
 minime dubitandum esse prælauda-  
 tus author physico ratiocinio de-  
 monstrat . Coronant præterea Ge-  
 mundensem lacum altissima rupes ,  
 quam Traufstein vocant ; per amœ-  
 na Arx , vulgo Ort dicta in insula  
 solo ponte continentij juncta ; &  
 Traunkirchium Oppidum cum So-  
 cietas Jesu Residentia Paffavien-  
 fi Collegio subordinata , ubi nimi-  
 rum olim floruerat Sanctimonia-  
 lium Monasterium D. Benedicti  
 regulam sectantium , cuius funda-  
 menta jecit anno 900. Marchio Ot-  
 tocarus Agilofinus in memoriam  
 victoriae , quam una cum Luitpal-  
 do , five Leutholdo Bavarо ibidem  
 de Hunnis retulerat ; illius vero  
 filius Albertus cœptum opus feli-  
 citer perfecit , uti refert ex Bu-  
 celino Zeillerus .

## GERASSENSE MONASTERIUM.

**G**erasense Ordinis Præmon-  
 stratensis Monasterium Mo-  
 raviae propinquum fundavit Ego-  
 bertus , Cuspiniano (d) Ecwardus (d) Deser.  
 Comes a Perneck ex Austriacorum Austr.

confirmasse vero fertur anno 1188. Dipoldus Passaviensis Episcopus. Eundem Comitem conditorem agnoscit quoque Pernecense prædicti Ordinis Monasterium a Moravia in Austrum remotius.

### GLUNICENSE COENOBIUM.

**G**lunicense Benedictinorum Cœnobium, quod ad Superiorum Austriam pertinet, inchoasse dicitur Arnaldus, sive Arnhalmus Dominus de Gluinck anno 1120. vita functus, ejusque filius Bruno-rius absolvisse.

### GOTWICUM.

**G**otwicum vulgo Gottwich vel Götwein percelebre Monasterium editæ rupi Cremsensi Urbi adversæ non procul Danubio 10. supra Viennam milliaribus, infistit. Moliri illud cœpit sub annum 1076. (Brunnerum sequor) B. Altmannus Passaviensis Episcopus inductisque Canonicis secularibus in communitate viventibus Deiparæ honori ea occasione dicavit, quod Patronum loco quærenti ejusdem Divæ icon græci operis oblata fuerit, Ducas Bohemiæ donum. Verum Beato Fundatore anno 1091. in Zeismurano Vico febris extinto, & a S. Thyemone Salisburgensi Archiepiscopo in Gottwicensi Ecclesia

terræ mandato, flaccescebat reliquias disciplinæ viror; quod ab ipsa Beatorum Sede respiciens Altmannus Joannem insignis probatatis virum gente Scotum, quem vivens olim tuguriolo ad sacram Ædem affixo receperat, ore, vocaque, quibus agnosci posset, hortatus est, ut torpentes excitaret, & pristinum monti suo virtutum redderet nitorem. Hæc cum ille Canonicis aperuisset, optimum factu visum fuit, ut ex D. Benedicti præscripto vita imposterum institueretur, quod per Hartmannum ex alio S. Blasii Cœnobia accitum executioni datum, idque divinum Joanni Spiritum suggeſſisse evenitus felicitas comprobavit. Monasterii fundationem pluribus seculis fertur hoc in monte præcessisse vetustum Castrum a quodam Gotefrido aliquando possessum, qui Idolum Martis, a Gothis Wick vocati, ibidem venerabatur, unde primum montis nomen Gothwick creditur emanasse. Adiectum virorum Monasterio postmodum fuit aliud Sanctimonialibus destinatum, quarum numerus anno 1388. ad 24. ascenderat, sed anno 1557. ad 7. duntaxat redactæ, Ferdinando I. Cæſare id curante, alio commigrarunt. Prope montis autem radicem memorabilis est fons hacenus perennans, ubi, cum tres adolescentes Parisiis alias literarum studio vacantes convenissent, cœpit quivis joci gratia Episcopalem In-

Infulam sibi ominari , qua impe-  
trata Cœnobium aliquod esset con-  
diturus : ex his unus fuerat præ-  
laudatus Altmannus , qui Passa-  
viensem sibi delegit , eandem post-  
ea consecutus ; alter Gebhardus ,  
qui Salisburgensem optaverat , vo-  
tisque compos factus Admontense  
in Styria Cœnobium erexit ; ter-  
tius Adalbero Herbipolensis , uti  
sibi tunc augurabatur , Antistes ,  
& Lambacensis Monasterii funda-  
tor. Inter reliqua huic inclyto  
Cœnobia ornamenta accedit con-  
spicuum illud trinum chronogra-  
phicon inscriptum parieti illius cu-  
biculi , quod anno 1677. Augustif-  
simis Neo sponsis Leopoldo Cæsari ,  
& Eleonoræ Passavio ex nuptiis  
Viennam redeuntibus thalamum  
hospitalem instruxit , tanto pro  
æterna memoria cedro dignius ,  
quanto pretiosius ab ingenio , &  
propria manu Augustissimi chro-  
nologistæ compositum extat , &  
exaratum ; textus autem illorum  
est iste :

LeopoLDVs IMperator , & eLeo-  
nora eIVs VXor ,  
peractIs passaVII nVptIIs LætI  
VIennaM reDeVntes ,  
In GottVICensi AsCeterIo DIVI  
beneDICTi reLIGIonI faCro hoC  
sCriPferVnt.

### GREIFFENSTEINA.

G Reiffensteinæ Vicus est , uti  
recentissima Fischeri Tabula

indicat , in Danubii ripa Stockera-  
viæ ferme oppositus cum vetusta  
Arce editæ rupi insidente ; ubi ce-  
lebris olim vigebat Urbs Comage-  
na , seu Castra Comagena statio-  
nis Equitum Promotorum , & Lan-  
ceariorum Comagenenium , qui  
in utriusque Imperii Notitia me-  
morantur. Claro ad id nobis in-  
dicio est sæpius dilaudatum Peu-  
tingeri Hodœporicon eandem fer-  
me intercedinem , quæ hodie in-  
terjacet , Vindobonam inter , &  
Comagena dimetiens , quorum men-  
tionem facit quoque in suo Itine-  
rario Antoninus , sed inverso or-  
dine ea Cetio perperam præponit.  
Non me quidem latet , Cluverium  
Comagenorum Urbem apud Vi-  
cum , cui Langenleber nomen ,  
statuisse ; verum hic longius Vin-  
dobona dissitus cum signatis apud  
veteres distantiis minime concor-  
dat ; unde opinor eximium hunc  
authorem a paulo antiquioribus  
Mappis fuisse seductum , quæ præ-  
dictum Langenleber Stockeraviæ  
falso oppoluerunt. Hæc prima  
fuit D. Severini Noricum subeun-  
tis sedes , ad cujus adventum ge-  
mebat , sub nescio quibus barba-  
ris , Civitas. Hortatur itaque San-  
ctus vir incolas ad expiandas spon-  
taneis pœnis conscientiæ labes , si  
grave illud jugum excutere lu-  
beat : hi primum tergiversari , dein  
percepto Asturenium excidio ,  
quod Severinus surdis prædixe-  
rat , ad jejunia , & vota recurre-  
re ,

re, quæ in tertium diem continua-  
ta Cœlum, terramque exorarunt; hæc enim insveto fragore concus-  
sa tantum pavoris barbaris injecit, ut Urbe dilapsi, & mente moti  
mutuis semet vulneribus concide-  
rint. Hoc primum Caroli Magni  
de Hunnis trophæum post victori-  
am, cuius alibi memini, ultra  
Arrabonem fluvium abactis, si-  
quidem ii in indicata superius ru-  
pe ad sui defensionem Arcem singu-  
lariter tunc studio nequidquam ad-  
ornarant; cum ad primum Francorum  
conspicuum fugam continuo capeſſiverint.

## HAMBURGUM.

**H**amburgum Archiducalis Urbs  
cum Arce celsiori colli in-  
ſidente, in dextra Danubii ripa  
Moravi fluvii ostio opposita, octo  
infra Viennam milliaribus Hunga-  
riæ fines attingit. Hanc famo-  
fissimi Carnunti mœniis olim in-  
clusam erudite autumat Lambec-  
cius (a) ſpondens in peculiari di-  
ſertatione veterum testimoniiſ ſe  
id ſolide conſirmaturum; triparti-  
tam quippe Carnuntinam Urbem  
fuiffe ex certifimis indiciis colli-  
gere ſibi videtur, primamque ejus  
partem, quæ Carnuntum vetus con-  
tinebat ab ipſis Pannonibus aliquot  
ante Christum ſeculis conditum,  
una cum ſua Acropoli ſolo  
Hamburgensi adſtruit; ſecundam  
vero, ubi Pannonica hyberna

fuerant legionis decimæ quartæ.  
Geminæ una cum Palatio Impera-  
torio, & Thermis, Germano-Altenburgo respondiffe putat; ter-  
tiā demum, ad quam ſplendidis  
aedificiis exornatam, Auguſto im-  
perante, deducta fuit a Romanis  
Colonia, uſque ad S. Petronellæ  
Vicum extendit. Deleto Carnun-  
to, de quo uberius infra diſlere-  
tur, non adeo longa temporis in-  
tercapedo uſque ad præſentis Ci-  
vitatis erectionem potuit effluxiſ-  
ſe, cum anno 1080. in Norimber-  
genſi Conventu decretum emanaf-  
ſe ſcribat Merianus, (b) ut Ham-  
burgum ob bellum, quod intra  
Henricum III. Germaniæ Regem,  
& Hungaros exarferat, incendiis  
fœdatum priftino ſplendori reſti-  
tueretur, quo adimplete, nobile  
ibidem Emporium reſloruit a Du-  
ce Leopoldo Virtuoſo ſub annum  
1200. Viennam translatum, & de-  
cem hinc luſtris elapsis Margare-  
tha Ducis Friderici II. foror, di-  
viſo cum Gertrude Hermanni Ba-  
deniſis vidua Austriae dominio,  
Aulam ſibi Hamburgi delegit. Pri-  
ma hæc deinde ex Austriaſ Ur-  
biſ anno 1482. Matthei Corvi-  
ni Austriae inhiantis impetum ex-  
cepit, fed non niſi poſt 200. flo-  
renorum millia in ea obſidione a  
Rege expenſa, cogente annonæ  
defectu, illi fores reclusit, repara-  
ta tamen a Maximiliani legioni-  
bus poſt octennium jactura.

(b) Topog.  
Austr.

## HIEZINGA.

**H**iezingense Deiparæ Sacra-  
rium Claustro - Neoburgen-  
fis Collegii administratione subdi-  
tum , & tertio ab Urbe Viennensi  
lapide remotum natales suos re-  
colit ab anno 1529. , quando Soli-  
mano arcta obsidione Austriæ Me-  
tropolim premente Christiani qua-  
tuor a Turcis capti , arborique  
alligati , cum nullum aliud decre-  
tae necis suppeteret effugium , Bea-  
tissimæ Virginis opem eo affectus  
ardore implorarunt , ut hæc sub  
suæ iconis in prædicta arbore tunc  
latentis forma miro circumfusa  
splendore se iis noctu spectandam  
exhibuerit , hæc verba ingeminans  
Hiets euch , Hiets euch , eosque  
solutis prodigiose vinculis in opta-  
tam afferuit libertatem . Quæ cum  
illi jurejurando firmata , postea  
aliis aperuissent , erectum est ibi-  
dem Partheniis honoribus Tem-  
plum , ad quod veluti ad cœle-  
stium gratiarum emporium vicini  
populi miraculorum , quæ subse-  
cuta sunt , fama acciti , supplices  
advolabant ad annum usque 1604. ,  
quo sacra Ædes ab Hungarorum  
Duce Stephano Bozgay accensa  
in cineres abiit ; sed ea sequenti  
mox anno reparata novum patuit  
ac currentibus asylum ; donec an-  
no 1683. secundam passa a Turcis  
cladem , iterata indiquerit restau-  
ratione ; qua præsentem nitoris  
elegantiam consecuta magnum pio-

rum attrahit affluxum , benignissi-  
ma Deiparæ manu favores suos  
etiamnum liberaliter dispensante.  
Hujus Odæi viciniam condecorat  
splendidissimum Palatum a pul-  
chro fonte nomen sumens , & ma-  
gnificam undequaque spirans Ma-  
jestatem , quod Augusti Romano-  
rum , Hungariæque Regis Josephi  
auspiciis , olim inchoatum , no-  
stris modo temporibus celebrita-  
tem adeptum est ; vix turbis queis  
sub imperii sui exordia se oppref-  
sam viderat , Dei beneficio , &  
sua constantia evaserat , Augustif-  
sima , cum ornandæ patriæ adje-  
cit animum , primasque convertit  
curas , ut Majestate Austriaca di-  
gnam erigeret sedem , quod proa-  
vis defuisse tacite omnes ingemue-  
rant : arx in Schönbrunn a Jose-  
pho ædificata , delecta est ; quod  
amænissimo loco sita , parum Vien-  
na abefset , atque adeo puriori sem-  
per , liberiorique aere frui lice-  
ret , nec tamen publica interrum-  
pentur , absente Principe , nego-  
tia : an. 1744 , prima manus operi  
apposita est ; retenta ædificii par-  
te , duæ utrinque alæ , paris ma-  
gnificentiae , & amplitudinis adjun-  
ctæ sunt ; continuoque ædificio-  
rum ordine , spatiofissima ante ar-  
cem area cincta est : hic iis , qui  
a Principum obsequiis eorum sem-  
per lateri adhærere debent , da-  
ta habitatio est : hic militibus  
Contubernia posita sunt ; maxi-  
mum vero hæc ædes ornamentum

areae præbent, & quo ipsæ sunt servato ordine minores, eo maiorem ædificio principi speciem faciunt; nil ipso ingressu magnificientius, longo per Viennam adiutur ponte, obelisci duo aquilis coronati, portam circumstant, fontes in areae medio profluiunt, omnia intranti testantur terrarum Dominos hic sedem figere debuisse; nil tamen est ipso magnificientius horto, qui licet circuitu suo muris cincto, Viennam ipsam superare dicatur, exiguis videtur; adeo multa sunt, quæ artificiosa varietate euntis levent fastidium; omnia recensere quantumvis commemoratu sint dignissima, prolixum foret: duo felicimus, quæ Augustissimo Imperatori suam celebritatem debent; vivarium nempe, in quo bestiæ remotissimis ab oris allatæ suis singulæ domiciliis, atrisque arbore confitis aluntur; nil hic elucet magis, quam altilia, avesque peregrinæ, quæ raram naturæ fæcunditatem prodigiosa hic specierum diversitate exhibent: non procul inde hortus est quem Hollandicum ab ejus, qui eum colit, gente vocant; in quo toto anni tempore fructus varii domita per artem natura florent; et si perpetuo multorum manus ornandæ, ampliandæque huic domui insident, anno tamen 1749. ad eum, quem hodie miramur, statum fuit educta, atque ab eo

tempore æstivæ Principum habitationi servit; via regia, qua in Austria inferiorem Vienna itur, huc quoque dicit, perpetuaque quamdiu principes foris commorantur, lampadum serie ingruentibus tenebris in commigrantum commodum illustratur. Dispositis etiam per intervalla militum stationibus, Augustissimorum in columitati juxta ac Majestati consultum est.

## HOLLENBURGUM.

**H**ollenburgum Oppidum, quod uno infra Cremblum miliiari Danubius pertransit, Lazio inepte videtur antiquis Comagenis Cetio propioribus successisse. Ejus Arcem anno 1710. a Bertholdo Frisingensi Episcopo, cuius Ecclesiæ subdebatur, majori ex parte ædificatam afferit ex Hundio Merianus. (a) Verum paulo <sup>(a)</sup> Topog. post, sedente Joanne IV., in Fri- Austr. derici IV. Cæiaris potestatem Oppidum concessit, donec a Sixto ejusdem loci Praefule ante annum 1495. pretio 1500. Rhenensium fuerit redemptum.

## HORNA.

**H**orna Urbs est Arce instructa had amnem Teffer in Kampum fluvium mox influentem sita, quæ 9. Vienna milliaribus distans ad

Mo-

Moraviam accedit, a Bohemis aliquando occupata, sed anno 1620. per Cæsareum militem ab iis rursum recepta.

## H O S P I T A L E C O L L E G I U M .

**H**ospitale vulgo Spital nobile est in Superiori Austria Canonorum Secularium in communitate viventium Collegium, quod non procul a Styriæ finibus prope montem, cui Pirn nomen, illis erexit Fridericus ab Auffses trigesimus secundus Bambergæ Episcopus, qui anno 1440. e vivis sublatus in eo Templo jacet, uti & quadragesimus nonus ejusdem Urbis Antistes Joannes Georgius Fuchs a Dornheim anno 1633. ibidem defunctus.

## I P S I U M .

**I**psium, seu Ibisa vulgo Ips Archeducalis, sed tenuis Civitas ad Ipsii amnis Danubio illabentis ostium, a quibusdam Ptolomæi Geßodunum, quod Australius fuit, perperam existimatur: quare iis Cluverium (a) præfero, qui Ipsium cum Ponte Isis in Peutingeriana Tabula annotato quam optime conciliat; mire enim concordat non tam nominis affinitas, quam hodierna Viennensis distantia cum 60. passuum millibus inter Vindobonam, & Pontem Isis, seu Isipon-

tum, vitiate Ponteises ibi numeratis. In altero autem, id est Bo-reali Danubii littore, ubi amnis vulgo Uspen dictus eundem subit, stetisse olim Ptolomæi (b) Usbium (c) l. 2. c. ex Germanica ejusdem Tabula li- 11. quido colligitur. Fuit hoc mu-nicipium Romanorum absolutum anno 370., quem produnt Consules coævo fundationis monumen-to a posteris eruto inscripti; sic vero illud se habet, prout Lambecius (c) ex Grutero, & Pighio castigatum exponit: D. D. D. N. N. N. Valentianii, Valentis & Gratiani Perennium Augustorum saluberrima jussione hunc Burgum a fundamentis, ordinante viro Clarissimo Equilio Comite, & utriusque militiae Magistro, insistente etiam Leontio P. P. Milites auxiliares Laureacenses curæ ejus commissi, Consulatu eorundem Dominorum tertio, ad summam manum perduxerunt perfectio-nis. Perseverat fortassis Usbium in Oppido, & Arce Pösenpoigo ibidem sitis, & vulpo Posenbeug, vel Persenpeug vocatis, quæ una cum Ipsienfi Civitate anno circiter 1045. Adalbero Ebersbergæ Dynasta, qui hic ad quatuor mil-liaria secus Danubium dominaba-tur, Ebersbergenfi Bavariæ Cœnobio legarat; sed vidua Richil-dis, teste Brunnero, (d) Pösen-pogum D. Sebastiano ejus Cœnobii Patrono mariti voto destina-tum transferre in Welfonem fra-tris filium iniquissime avebat, Altmanno Abbe Ebersbergenfi haud

(c) Bibl.  
l. 2. c. 8.

(d) Ann.  
Boi. l. 10.

(a) Opus.  
de Vin. &  
Nor. c. 5.

refragante, Regeque Germaniae Henrico III., qui cum Brunone Herbipolitano Episcopo Hungariam petens ibi fortuito hospitabatur, ad id exorato, ut munus ratum esse vellet; jamque is elata manu vocem ex formula erat emis-  
furus testem suæ authoritatis, cum triclinium repente concidit, convivasque gravi casu allisit. Rex et si imus voveretur, effusique super ejus caput complures magno ei pondere incumberent, incolmis tamen evasit, non nisi brachii summa cute perstricta: Episcopus, Abbas, & Richildis semianimes sublati post dies paucos expirarunt, neque ulli dubium fuit, iratum Numen has avaritiæ in D. Sebastiani opes grassantis pœnas exegisse, involutis eadem ruina omnibus, ad quos mali consilii noxa pertinuit. Traditus itaque est uterque locus Monasterio, a quo postmodum Austriaci Duces facta cum aliis bonis commutatio-  
ne utrumque pariter redemerunt.

### L A H A.

**L**AHA, sive Lava vulgo Laa, aut Lab Archiducalis Urbs 8. milliaribus Vienna absens dextro Teiæ fluvii lateri insidet; modica quidem, sed ob frequentes bellorum casus magnam sui famam per annales late diffudit. Hac enim imprimis Dux Fridericus II. tota pene Austria a Friderico II.

Cæsare viduatus Wenceslaum Bohemiæ Regem donavit, ut promtas ab eo suppetias ad potentem adeo æmulum repellendum mercaretur; sed Duce in integrum restituto, ipsa Civitas ejectis Bohemis ad Austriacos Principes refugit, quæ res ingentem belli flamam inter utroque succendit, novis Hymenæi ignibus deinde sopitam, relata tamen prius a Friderico insigni de Bohemis victoria. Bina itidem prælia Urbishujus pomcerium fastis memorabile fecerunt: primum incidit in annum 1260., quo Ottocarus Bohemiæ Rex Belam Regem cum Stephano filio innumera pene militum caterva stipatum immanni clade cecidit: ducenta equitum, totidem peditum millia Belæ meruisse, vixque quartam ex iis partem necem evitasse exaggerat apud Balbinum Cuthenus: sane non modo Hungaros, sed Russos, Valachos, Moldavos, Cumanos, & Tartaros in ejus exercitum confluxisse, & 14. eorum millia solo flumine absorpta plures memoriæ tradiderunt. Alterum longe celeberrimum, quod inclytæ Hapsburgicæ Profapiæ partam paulo ante Austriae integre firmavit, ad annum 1278. referri debet, quando scilicet inter Rudolphum I., & Ottocarum fuit acriter dimicatum. Eleganter illud describit Gerardus de Roo, (a) ex cuius sententia Cæsarem tuebantur præter Austria-

(a) Ann.  
Austr. I. I.

striaeos, & Suevos, quorum maximus numerus, Archiepiscopus Salisburgensis cum 300. equitibus, Basileensis Praesul, Burggravius Norimbergensis, & Henricus Marchio Hachbergicus cum 1400.: Albertus Comes Goritiensis 150. equites, Meinhardus trecentos, totidem Fridericus, & Albertus Ortemburgici ducebant: Udalricus Hainburgicus Carnus cum ducentis, Henricus Pfannebergenis Styrus cum 100. aderant: mille præterea Styris communi Provinciæ nomine conscriptis præerant Fridericus Petovienis, Otto Liechtenstainius, & Colo a Seldenhoven: diviso in 4. ordines exercitu, duos fere Suevi, tertium Austriaci, reliqui quartum ipso Rudolpho Ductore conflabant: accessere cum Ladislao Stephani Hungariae Regis filio 20. Cum annorum millia, gens nondum Christo adjecta, & bello acerrima. Qui a Rege stabant, sex ordines compleverant: primus ex Bohemis, ex Moravis alter constabat, tertius Misnienium, & Thuringorum erat, duos conficiebat Poloni, sextum, ubi Saxones, & Bavarri, sibi Ottocarus delegerat. Conferta pugna res strenue utrinque agebatur, donec inclinante in Cæarem victoria, Styri duo fratres Merenbergici Regem toto agmine perquisitum adorti, fortiter pugnantem equo dejiciunt, & 18. vulneribus confodunt, cu-

*Topogr. Auyr. P. I.*

jus vulgata morte Regius exercitus fugam capessivit. Verumtamen Lahensis Urbs non otiosa semper cladium spectatrix fuit, sed etiam hujusmodi calamitatum saepius compars, uti anno 1620. evenit, quo a Moravis, ejusdem seculi 45., quo a Suecis fuit occupata.

## L A M B A C U M.

**L** Ambacum vulgo Lambach Superioris Austriae ad Traunum fluvium Oppidum antiquatae Urbis rudera, quam Antoninus Tegolapem nominat, premere putant Cluverius, (a) & Lambecius (a) Op. de Vind. & (b) cum Ovilabi, seu Welsio & Laciaco, seu Gemundæ in ejus No. c. 5. Itinerario interseratur, & Peutingeriana milliarium intervalla eximie concordent: iique veritatem propius assecuti mihi omnino videntur, quam Lazius Ovilabim Lambaco adstruens, reliquis circumstantiis neglectis, quæ lic minime consistunt: at quæcunque olim fuerit Oppido gloria, parum interest, cum illi modo plurimum adferat ornamenti nobilissimum Monasterium, cuius haec narrantur a Brunnero (c) primordia. (c) Ann. Arnoldus Comes a Lambach, cui Boi. l. 11. Schardinga, Neoburgum, Varnbachium, Welsium, & Buttinium itidem suberant, Lambacense Castrum in Templum converterat: hoc cum adjecto etiam Cœnobio

H

sa-

sacro Benedictinorum Ordini in-  
colendum tradidit illius filius  
Adalbero Herbipolitanus Antistes  
biennio ante obitum, quem in an-  
num 1090. incidisse compertum  
est; verum anticipanda necessario  
est aliquot annis fundatio (quam  
ipsi Arnoldo, ejusque consorti Re-  
gillæ Bruschius attribuit) si fidem  
Paulo Langio habemus apud Lam-  
becium hæc referenti. (a) Anno  
1078. Imperator Henricus Adalberonem  
Episcopum Civitatis Wirtzburg propter  
adhesionem Papæ, & Rudolphi novi Re-  
gis expulsum, suum ad Monasterium  
Lambach redire coëgit: ubi exul e  
vivis decessit sanctitate illuſtris,  
quam crebra post mortem miracu-  
la manifestarunt, prout fidem fa-  
cit Epitaphium ejusdem tumulo  
affixum, quem in Ecclesiæ medi-  
tullio post plura secula Placidus  
Abbas aliquot a solo pedes ele-  
vavit.

## LAXEMBURGUM.

**L**Axemburgum amoenissimum  
Cæsarum Palatum duobus  
Vienna milliaribus ad Meridiem  
recedit, & jucundioribus veris  
deliciis reservatur. Illud una  
cum refertissimo ferarum vivario  
opus est Alberti III., qui anno  
1390. ibidem mortem oppetiit.  
Est hic idem ille Albertus, qui  
cognominatur cum trica, vel quod  
in hujusmodi scirpum inflexos ge-  
staverit capillos, ac barbam, vel

prout refert Albermannus, (b) In not.  
quod dum anno 1385. redux ex ad 2. c. l. 3.  
peregrinatione Hierosolymitana Chron.  
Laz. in eodem hoc Castro Beatricem  
conjugem tunc balneo insidentem  
colligatis in tricam capillis inve-  
nisset, eam in lætitia signum ab-  
sciderit. Quamvis alia longe ve-  
tustissima sit traditio; nempe præ-  
dictam Beatricem ob inopinatum  
Alberti sui, quem perditum jam  
credebat, adventum, gaudio su-  
perabundanter obrutam, in bal-  
neo animam egisse. Quo forte  
collimat imposita ibidem turri sta-  
tua etiamnum superstes, ac matro-  
nam quandam balnearibus linteis  
indutam referens, sive in unius,  
sive alterius testimonium facti, de  
quo tamen satis, nisi sola constan-  
ti fama, non constat.

## LEYTHÆPONTUM.

**L**Eythæpontum, vulgo Bruck an  
der Leytha, Urbs est cum Ar-  
ce juxta Leytham fluvium Hunga-  
riæ, Austrïæque limitem 4. mil-  
liaribus Vienna in Ortum remota,  
quam non nisi longa & diffici  
obsidione cinctam, uti Gerardus  
de Roo testatur, Matthias Rex  
anno 1483. expugnavit; sed dum  
ejus jam vita functi Præfetus Jo-  
annes Tarcianus quadam die ex  
Arce ad Templum descendisset,  
Cives advocatis clam Maximiliani  
copiis Hungaros ejecere, qui sub  
Gabriele Bethlen anno 1619. il-  
lam,

(a) Epift.  
Ger. c. 9.

lam, non multo post tamen redditam, iterato occuparunt.

## L I N C I U M.

**L**Incium vulgo Lintz amoenissima, & nobilis Urbs, Superioris Austriæ Metropolis; ambiguum valde est, an & quo nomine sub Romanorum dominio clauerit. Aurelianum, seu Aurelianam Coloniam ibidem extitisse ex quibusdam monumentis minus recte examinatis conjicit Lazius: alii Gesodunum, sed prorsus inepte, cum hoc a Danubio remo-

(a) Lib. 2. veat Ptolomæus, (a) alii Aredatem autumant, sed hæc eadem esse cum Arelape infra aliter explananda omnino videtur. Cluverio

(b) De (b) Urbem Lentiam, cuius in  
Vin. & utriusque Imperii Notitia mentio  
Nor. c. 8. fit, istic statuenti tum situs, tum  
vocis similitudo maxime suffragantur.  
Jacet modo Lincium in Australi Danubii littore 24. supra  
Viennam milliaribus Occasui proprius.  
Celebrem hanc Civitatem reddunt bini Principum Conven-  
tus in ea coacti, quorum primum conflagrunt anno 1289. arbitri pa-  
cis inter Albertum Austriæ Archiducem, & Salisburgensem Ar-  
chiepiscopum constituti, videlicet duo Bavariæ Principes, tres  
Episcopi Arnoldus Bambergensis,  
Enicho Frisingensis, Henricus  
Ratisponensis, duoque Comites  
Udalricus Emburgicus, & Fride-

ricus Ortemburgicus, sed re infecta abiere. Alteri autem quadriennio post ad pacem pariter inter eundem Albertum, & Bohemiæ Regem, aliosque contermi- nos Duces firmandam feliciori exitu convocato, interfuerere præter Archiducem Ludovicus Co- mes Palatinus Rheni, Otto Ba- variæ, Meinhardus Carinthiæ Du- ces, Conradus Salisburgi, Ber- nardus Passavii, & Henricus Ra- tisponeæ Præfules, quibus etiam Bohemiæ Regem, reliquis silenti- bus, adjicit Aventinus apud Ge- rardum de Roo. (c) Munimento- rum defectum Lacedæmonum mo- re affatim supplevere Civium pe- ctoora, cum Urbs hæc ab Ottone Bavariæ Duce Friderici II. Cæsa- ris tempore, & a seditiosis Rusti- cis anno 1626. irrito semper co- natu fuerit obsessa: imo ex 15. Turcarum millibus, qui anno 1532. Lincium usque excurrere tenta- verant, nullus omnino superfuit, qui acceptæ cladis nuncium ad suos referret. Celebrior evasit Urbs hæc, anno 1741. cum despe- ratis propemodum Austriæ rebus, prima hic benignioris fortunæ lux affulxit. Carolo VI. vivis erepto, Bavari, quorum Princeps specio- so magis quam æquo titulo, opimam Austriæ hæreditatem petebat, Gallorum ingentibus adjuti co- piis, Austriam superiorem inva- ferant, populabundi magis quam victores, quod in Imperio tot in

(c) Anna.  
Austr. l. 2.

Provincias extenso, miles qui invadentum vires infringeret, ad manum non esset: jam ipsi imminebant Viennæ, qua Aula nobilesque fugam ceperant, cum aviditate Coronæ Regiique nominis, abruptus Bavarus, vel quod superi fortunæ Austriacorum propitii in transversum agerent, exercitum in Bohemiam Pragamque convertit, relictis sub Segurio Comite Lincii præfidiariorum veteranorum decem facile millibus: statim collectis tyronum Hungarorumque decem & octo millibus Franciscus I. magnus tum Hetruriæ Dux, Inferiorem hostibus purgavit primum Austriam, dein ipsi Lincio oppugnationem admovit, & fortitudine sua animato milite, tam impigre paucos intra dies opus promovit, ut indecoris de non militando per reliquum anni tempus pactis, Segurium cum suis Urbe excedere compulerit: læta dein secuta sunt omnia: Austria tota hostili erepta jugo: Bavaria armis occupata nostris, hostes ipsi qui de inferendo bello, evertendaque superis gratissima Domo, hactenus cogitarant, de salute sua laborare compulsi: magnum hinc in fastis Austriacis, Lincii nomen: majus Lotharingicæ fortitudinis fortunæque, decus: atque ita, quam avo, Cæsarlis nostri, Vienna salutem debebat, Francisco Primo, novo se titulo debere fatetur & aeternum testabitur Austria. Hac

expeditione plus gloriæ quam damni Lincio accessit: cui grave olim detrimentum attulerat fortuitum incendium anno 1542. longe tamen majori restitutum decori ut præsens testatur domorum splendor. Annus 1749. ornatum Civitati non exiguum peperit; erectum enim ibi est tribunal novum, quod Repræsentatio dicitur, aliud quod regimen in judicialibus compellatur additum: primo incumbit suprema Austriæ totius Superioris, in civilibus cura: alterum lites decidit omnes, justitiæque vigorem conservat. Sacra inter ædificia eminet Parochiale Templum, aliudque D. Ignatio sacrum cum annexo Societatis Jesu Collegio ab Imperatore Mattha condito, atque insigni Gymnasio, in quo præter Philosophicas disciplinas, Jus Canonicum, & Moralis Theologia publice præleguntur: paucis quoque ab annis nitidiori hic cultu, prodivere musæ: & licet non amplio Universitatis nomine gaudeant, nihilo tamen fecius hodierno eruditiois ornamen to su perbiunt: Matheeos præsertim Naturæque arcana comparatis ad hunc finem instrumentis, instru & toque museo, & tradi & oculis exhiberi cœpta. Exornant insuper Civitatem Cæfarea Arx eximiæ magnitudinis in adjacenti cli vo exstructa; Provincialis Domus, in qua Superioris Austriæ Status comitia sua celebrant; at que

que peramplum forum ab una ad aliam Urbis portam fere extensem, & famosis nundinis bis quot annis frequentatum: in hoc ab anno 1717. usque ad 1724. ab inclytis Provinciæ proceribus, colossum opere pretioque insignis albo ex marmore erectus est, & Sanctissimæ Triadi matrique interemeratae inscriptus, in perenne ut epigraphe testatur, gratitudinis monumentum, ob pestem, ignes, bella amota, sopitaque.

Nihil tamen æque Civitatem hanc ornat, ejusque civium imo & Provinciæ totius utilitati confert quam pannorum omnis generis fabrica, domusque amplissima, qua hæc exercetur: jam ab anno prioris sæculi septuagesimo secundo, annuente ordinum precibus Leopoldo Imperatore, a privatis Civibus, hæc erecta, exercitaque fuerat, ad annum hujuscæ sæculi 1715. quo Viennense Xenodochium magnum, venditionis jure sibi illam propriam fecit: anno dein 1724. in orientalem mercatorum Societatem transmigravit, qua dilapsa, ad Augustissimorum Principum jus transivit: hoc intervallo crevit semper, & a novis semper aucta Dominis ingentem celebritatem acquisivit; a Societate orientali anno 1727. domus hæc vastissima, qua exercetur hodie, centenis quindecies florenorum millibus exstructa est. Amoenissimo ad alluentem Danubium situ, in qua-

drum producitur atque præter spatiosa præfectorum, artificumque conclavia, tot instructa est promtuariis tamque amplis, ut centies & amplius mille centenarii lanæ filorumque commode in iis reposantur; machinis instrumentisque multiplicibus queis tempus simul & labor minuitur, & utilitas augetur, instructissima est. Hydraulicis machinis varios in usus quaqua versum ducitur aqua; in media domus area, vento siccata fila, brevissimo temporis intervallo, mirabili quadam rotatili in machina (filatorium dicunt) certas in classes convolvuntur, tanto compendio ut horæ spatio, unius industria, diurnus plurimum labor exequetur: quantumvis vasta appareat domus, tanta tamen amplitudine opus erat, maximo illi operarum numero recipiendo, quem qui in calculum subduxit 327. homines hic quotidiano labore distineri affirmat. Hoc assecuti sunt, providi Provinciæ ordines ut auctis commerciis, homines in tota Provincia circumfisisque pagis plurimi, a turpi illa mendicitate, Civibus non raro molesta ac pernicioса avocati fuerint: ferunt enim 4739. netrices, textores, præter eos qui in domo ipsa, 354. domus hujus ære annis totis vicitare, hyemali etiam tempore Rusticorum multa millia utili hoc occupari labore magno certe suo adjumento, civium quiete,

Patriæ commodo, quæ jam omnis generis pannos, seu laneos, seu sericos, seu ex serico & camelorum crinibus mixtos, obvios vulgaresque non fecus ac peregrinos, pretio parabili, domi habet, quos aliunde repeteret haec tenus magna sua molestia cogebatur. Neque defunt foris cum Capucinorum Cœnobia anno 1606. erigi cepto spatiosa Suburbia pluribus Nobilium ædificiis referta. Parvo autem itineris intervallo contra Danubii fluxum emenso, obviat Hilariente Ordinis Cisterciensium Monasterium ab Ulrico, & Calone de Wilhering anno 1146. fundatum. Opponitur huic in altera Danubii ripa Oppidum Ottensheimum ab Ottone Archiduce Austriæ ibidem nato sic dictum, & ab eodem, uti & successoribus suis in hujus memoriam multis privilegiis donatum.

### M A N S E E.

**M**ansee Superioris Austriæ Oppidum cognomini lacui adiacet, qui per rivum Ag in alium multo majorem vulgo Attersee dicatum exoneratur. Diverfa illi quondam fuerant nomina, id est Menen, & Lunelach; unde factum, ut & illustre, quod ibi adhuc floret, Benedictinorum Cœnobium Lunelacense in antiquis codicibus interdum audierit. Prima hujus fundamenta posuit jam

ab anno 748. Utilo II. Bavariæ Dux plurium aliorum parens, id maxime promovente S. Pirminio Episcopo ex Gallia in Germaniam fidei propagandæ causa profecto, qui tum etiam ejusdem Ecclesiam SS. Petri, & Michaëlis cultui consecravit. Munificam Utilonis pietatem pone sectatus Thassilo II. itidem Dux largis muneribus Manseensem Monasterium anno 771. locupletavit. Bavariae alias Regioni, cuius fines attingit, Oppidum addicebatur, sed bellum, quod inter Maximilianum I. Imperatorem, & Ducem Albertum effuberat, secuta pax, ut bellicis sumtibus fieret satis, illud Cæfari detulit; a quo ad Leonardum Salzburgensem Archiepiscopum, hinc ad Superioris Austriæ Status persoluto semper pretio devolutum est. Non procul inde tertius expanditur lacus, quem Abernsee vulgus indigitat, vel a S. Wolfgango denominat; cuius ibi aliquando degentis honori erecta est in ea crepidine Præpositura a Manseenibus Monachis administrata.

### MARCHECKUM.

**M**archeck, seu Mareck Oppidum, quod ab Hungariae ora solo Moravo fluvio absconditur, natales suos debet Ottocaro Bohemiae Regi, qui dum Austriæ imperaret, ut Hungaros ab infestis

ftis velitationibus cohiberet, illud anno 1268. excitavit.

## MAURBACENSIS CARTHUSIA.

**M**aurbacensis Carthusia magnifico ædificii nitore commendanda tribus Vienna milliaribus dissita, undique cingitur Vindonensi, seu Viennensi sylva ab amne Vindone, five Vienna ibidem ex oriente nomen mutuata. Condidit eam Fridericus III. Imperator cognomento Pulcher, qui cum anno 1330. ex hac vita migrasset, in eadem tumulatus conquescit.

## M E D L I N G A.

**M**edlinga nobile Oppidum 2. Vienna milliaribus in Meridiem abscedens, ob plurium Austriae Principum ex Babenpergica stirpe ibi saepius inhabitantium Aulam jam antiquitus inclauerat. Templariorum hic quoque Sedem fuisse traditio fert, ubi Parochiale hodie Templum rarae in hujusmodi locis amplitudinis ex subiecta planicie late prospicitur.

## M E L I C I U M.

**M**elicium vulgo Melck Urbecula est Vienna in Occasum 12. milliaribus absens, cui magnam parit famæ nobilitatem amplissimum, ac natura probe mu-

nitum Ordinis S. Benedicti Cœnobium in præcelsa rupe Danubio imminentि ita firmatum, ut anni 1619. obsidionem, qua Superioris Austriae Heterodoxi Bohemis fœderati menstruo spatio illud prefferant, feliciter eluserit. Vetus ejus historia a Monacho anonymo conscripta nullam asserti sui allegans autoritatem apud Lambecium (a) tradit nomen Melck, seu Medilich ex latina voce *Mea dilecta* derivari, qua Cajus Julius Cæsar (qui vix hic unquam comparuisse ostendetur) stationi huic ad blandiri consueverat. Lazii opinio quam levissimo fulcit fundamento, est, Urbem Melissam ibi olim extitisse, cujus nominis Castrum in Neapolitano Regno haberi quidem novimus, Noricarum autem Urbium catalogo nemō ante illum inseruit: quidam alii cum Ptolomæi Claudio, vel Claudinionario Melicum componunt; satius tamen erit Cluverio

(b) De Vin. & Nor. c. 5. (c) Bibl. I. 2. c. 8.  
subscribere, qui Nomale, vel prout in nonnullis exemplaribus alteratur, Nomare eidem responderet aptius conjecturat, cum locus ille a Peutingeriano Hodœporico Danubio admoveatur, & additæ ab exploratis jam Urbibus distantiæ utcunque convenient. Admodum verosimile interim est ob loci opportunitatem aliquod munimentum a veteribus Romanis in eo scopulo fuisse excitatum, quod Lambecius (c) ulterius sua- det

det ex attrito lapide, cui imago Lupæ cum Romulo, & Remo insculpta est, in exteriori Ecclesiæ pariete, a se ibidem observato; ubi quoque monet in MSS. & hanc tenus ineditis Cæsareæ Bibliothecæ codicibus modo Medlicum, modo Medlicham Melici loco subrogari. Super hanc itaque rupem, prout ex præcitata Cœnobii historia didici, anno 928. fortissimæ Arci dominabatur quidam potens Dynasta nomine Giso, qui a Lazio Stillo vocatur, & a Fug-

(a) Spe.ho. gero (a) cum Geisa Hungariæ Du-  
l. 2. c. 8. ce confunditur. Nomen Arci

(b) Descr. Castrum ferreum fuisse author est  
Aufr. Melicensis Abbatis Meriano (b)  
Topogra. transmissa illam in tres partes dis-  
Aufr. crimina, quarum una Medelick, altera turris fortissima, tertium Castrum ferreum dicebatur. Gi-  
fone armis extruso Leopoldus I. cognomine illustris Orientali Marchia tum ab Imperatore donatus, munitiones diruit, Arcemque in 12. Canonicorum Collegium con-  
vertit, Aula quoque sibi, & successoribus non procul inde constituta. Alter dein Leopoldus co-  
gnomento Pulcher juxta Fuggeri calculum hujus nominis IV., jux-  
ta alios, qui Leopoldi I. filium omittunt, III. rejectis anno 1089. Canonicis, horum vices supplere Benedictinos jussit, quibus primus Abbatis dignitate præfuit Sigibodus. Demum S. Leopoldus hujus

nominis V. Leopoldi IV. filius, re-  
novato a se Monasterio, nova lar-  
gitus prædia, sex insuper Paro-  
chiales subjicit Ecclesiæ, quæ fue-  
runt Medling, Drässkirchen, Wei-  
ckendorff, Lauchsee, Wulder-  
storff, & Rauelsbach, anno vide-  
licet 1113. die 13. Octobris, quan-  
do & solemnem illius consecra-  
tionem ab Udalrico Passavieni  
Antistite in SS. Petri & Pauli ho-  
norem peractam memoratus ano-  
nymus consignat; eam autem Cu-  
(c) Descr. spinianus, (c) & Fuggerus, (d) Aufr.  
nescio quo duce ad annum 1122. (d) Spe.ho.  
differunt, & Calisto II. Summo l. 2. c. 2.  
Pontifici adstruunt, quem Ponti-  
ficia Tiara jam redimitum Eccle-  
siæ aliquas in Viennensi Galliæ  
Provincia, cujus fuerat Archie-  
piscopus, anno 1119. dedicasse,  
ex Baronio quidem percepí, at  
nec ii, nec Ciacconius, nec Pla-  
tina eum in Germaniam pedem  
unquam intulisse meminerunt, præ-  
tentio præsertim anno, quo Oecu-  
menico Lateranensi Concilio Ro-  
mæ præsedit. Deposita hic jacent  
pretiosa pignora nempe S. Colo-  
manni, & B. Gothalmi corpora,  
quorum primum miraculorum fa-  
ma permotus Austriae Marchio  
Henricus I., biennio post ejus mar-  
tyrium infra narrandum, Stocker-  
avia Melicum transferri voluit,  
ibique honorifice sepeliri per  
Meinhardum Halberstadiensem E-  
piscopum, quem adducit Fugge-  
(e) Spe.ho.  
rus, (e) vel, quod probabilius l. 2. c. 2.  
est,

(a) Bibl.  
I. 2. c. 8.

est, per Meingaudum Aichstetensem, in quem præter anonymi historiam duo MSS. chronica Zwethalense, & Cremifanense a Lambecio (a) allegata conspirant. Pergit porro referre anonymous, quæliter Trevirensis Archiepiscopus Poppo Petri Hungarorum Regis, & D. Stephani successoris partim precibus, partim minis circumventus a fratre suo Henrico S. Colmanni corpus pro illius Regno impetravit, quod dum pestis, & famæ, aliaque infortunia fuissent in Hungariam comitata, territi indigenæ Melicum revexere; sed cum constet, Henricum I. anno 1023., & D. Stephanum anno 1038. mortem oppetiisse, aliqua saltem hujus eventus circumstantia a veritate aliena convincitur. S. Colomanni domesticus fuerat B. Gothalmus, qui peregrinum dominum quæsitus Austriam petuit, & in proxima hujus Cœnobii villa Maur dicta e vivis sublatus, multis post mortem miraculis coruscavit; quare defuncti cadaver honoratori sarcophago illatum; quo Rudolphus IV. Archidux Austriae anno 1362. clam recluso, cum Abbatे, & Bernardo Monacho postremæ hujus narrationis authore, Beati ossa pie veneratus inspexit. Quiescunt hic præterea quinque Marchionum cineres, nimirum Leopoldi I., & IV. fundatorum, Henrici I., qui S. Colomanni lipsanis, Adalberti Victo-

Topogr. Austr. P. I.

riosi, qui Dominicæ Crucis particula magnis prodigiis fulgente, atque Ernesti Strenui, qui S. Mauritii lancea, D. Udalrici patera Templi gazophylacium locupletavit.

## N E A P O L I S.

**N**eapolis, seu Neostadium vulgo Neustadt nobilis, probeque munita Urbs Maximiliani I. Imperatoris patria, 8. milliarium itinere Vienna in Meridiem recedit, atque ab Hungariæ limite vix duobus divellitur; in palustri solo a Leopoldo Glorioso Austriae Duce ad reprimendas Hungarorum incursionses circa annum 1200. primum ædificata; cumque illorum Rex Emericus Leopoldum prævertere meditans alterum in proximo loco munimentum erigere adornasset, ut dissidiis obviam iretur, paëtum ambo iniere, ut qui prius Civitatem absolveret, victor censeretur, eamque servaret, alter vero suspenso opere loco decederet; stetitque pro Duce victoria, utpote qui velocius suam Neapolim vallavit, Rege cum decore inde remeante: subiungit hic Cuspinianus (b) discerni adhuc Austr. sua ætate non proœul Neostadio potuisse aream illam Hungaricæ Urbi destinatam post Platonis annum primo condendæ. Fuit hæc Civitas unicum pene refugium Friderici II. Austriae Ducis anno

1237. Viennapulsi, & a Friderico II. Cæfare reliqua Provincia spoliati. Verum majorem adhuc sibi gloriam comparavit, imperatorem Fridericum IV. contra Udalricum Eitzingerum & Udalricum Cileæ Comitem cum suis popularibus, & quinque Viennensium millibus Urbem arcte obsidentes anno 1452. strenue propugnando; ubi novi Horatii Coclitis Andreæ Paumkircheri virtus enituit, qui egressis Civibus, & intra muros repulsis, hostium impetum portam una cum fugientibus subire tentantium pene solus gladio sustinuit, donec Civium aliquot tandem reversis eos inde omnino removerit, soluta non multo post obsidione. Anno autem 1485. non nisi post 7. mensium molimina Matthias Hungariæ Rex, deficiente demum annona Urbem hanc ad deditioñem compulit, post quinquennium Maximiliano Friderici Cæsarisi filio restitutam. Idem hic Fridericus IV. nova dignitate, nimirum Episcopali, ejus institutione a Paulo II. Summo Pontifice impetrata, anno 1470. Neapolim nobilitavit, ubi jam ab anno 1444. novum SS. Trinitatis Cœnobium Ordini Cisterciensi erexerat. Extat ibidem quoque præter Cathedralem Ecclesiam, & Capucinorum Ascetarium, Sanctimonialium Carmelus a Comite Maria Euphrosyna Se-redezgin anno 1665. erectus, nec non Societatis Jesu Collegium ab

Archiduce Leopoldo Guilielmo fundatum, cuius Ecclesiam sacro D. Martyris Venantii corpore Augusta Imperatricis Eleonoræ Magdalena munificentia locupletavit. In eo, quo Vienna aditur Suburbio, nova Societati Sedes posita est, non justi Collegii sed Residentiae ut loquimur. Hanc fundavit D. Franciscus L. B. de Zunckenberg piæ ut parentis sui satisfaceret voluntati: fuerat hic natione & secta Mahummedanus Urbis & Arcis Budensis, cum haec a Cæsarianis elapsa sæculo caperetur Vicepræfetus: in captivitatem Neapolim ductus est; atque non procul ab urbe prima animum cogitatio subiit meliora Christi sacra amplectendi: locus, quo tam pia mens primo esse cœperat, animo hæsit, eumque lustralibus postea a Societatis Patribus undis ablutus, religionis monumento quopiam decorare statuit: morte impeditus cum foret, filius in quem beneficiū quoque pars migraverat, in partem gratitudinis venire voluit, atque cum e vita fine prolibus excederet pecuniæ summam in id opus Societati legavit, sed quia procul ab urbe deferto in loco Societatis munis stetisset domus inutilis, annuente Augustissimo Carolo VI. in Suburbio delecta sedes, sanctoque dicata Leopoldo: quatuor ibi Societatis Patribus decreta habitatio: templum satis elegans ere-

ctum

Etum, & quinque instructum aris totidem inscriptis sanctis, quos peculiari coluerat Fundator devotione. Totum ædificium ad culmen perductum est, novosque primum accepit incolas anno 1747.

Magnifica demum Neapoli emicat Cæsarum Aula a Leopoldo Archiduce Alberti Sapientis filio extorta, & a Ferdinando I. Imperatore splendidius restaurata, cuius foribus præfixum quinque vocalium literarum A, E, I, O, U. symbolum complurium Oediporum ingenia contorsit, qui in 40. saltem diversæ interpretationis sententias abiere ; sed quid opus est Oedipo ? quando ipse earum author, adeoque optimus interpres Fridericus IV. Imperator in suæmet vitæ diario propria manu exarato, & a Lambecio diligenter perlecto tum Romano, tum Germanico idiomate illud his terminis evolvit.

Austriæ Est Imperare Orbi  
Universo.

Alles Erdreich Ist Oesterreich  
Unterthan.

Hanc Aulam anno 1752. Augusta Theresia militaris Academiæ usibus concessit, quam suis erexit sumtibus, suis auspiciis instituit : degunt hic ducenti ex nobili stirpe aut genere militari juvenes qui sub militiæ præfectis probataque fortitudinis, virtutisque vi-

ris nutriuntur bello : equestris pedestrisque militiæ tyrocinium hic ponunt in duas divisi centuriæ : qui eminent, decurionum partes agunt reliqui gregariorum disciplinæ subjiciuntur, melius ut imperent, cum parere in juventute didicerint. In statas horas, diviso labore, studiis conjungunt, quidquid labor bellicus secum fert : atque ita sunt disposita omnia, toto ut die in castris agere videantur, scientias tamen quascunque militum vitæ congruas, varias gentium quibuscum vel sociare vel opponere arma debebunt, linguas condiscunt : ubi primum ad ætatem congruam venere, si impigro labore adhibito exculti repe riuntur, legionibus addicuntur quibus veteranam virtutem tyrones adferunt, summo emolumento patriæ quæ ex hoc indigæ nobilitatis asylo nova semper fulcra, nova salutis suæ pignora accipit : sua his abeuntibus supplemen ta semper, Vienna submittit ex militari Seminario ; ita ut ambæ Neo stadii centuriæ justum ducentorum numerum semper expleant : tota hisce usibus destinata domus antiquæ Aulæ interiorem amisit faciem : immutatus tamen mansit facer ille recessus quem solitudinis ad instar Maximilianus I. sub finem vitæ hic Deo animæque vacans erexit : ut hujus intuitu dicseret juventus a viro tanto, totque jactato bellis potissimam in

milite laudem esse, si virtutem religionemque coluerit, illam demum veram esse fortitudinem, quæ pietati in superos conjuncta est. Uno vix non a Neapoli milliari, orientem versus, jacet locus, qui olim pagus Liechtenwirt, dictus modo celebritatem adeptus maiorem, Nadlbourg vocatur: jam sub Augustissimo Carolo VI. coli cœpit hic acuum confiendarum fabrica, sed lento successu; quo ad usque Augustissima Imperatrix nostra, curas hic suas præbuiisset: ab eo enim tempore derivatis huc aquis magna ædificiorum multitudine hic erecta, in splendidissimi oppidi speciem locus crevit: ferrum & æs in fila hic dicitur, limæ calyæ Anglicis pares si non superiores ope machinarum, quas rotæ aquis actæ impellunt, ceduntur: tanta autem acuum copia fabricatur ut non hæreditariis solum terris sed & provinciis diffitis abunde provideri queat: triennio abhinc alias adjectus est labor pari successu: varia ex ære & auricalcho domestica utensilia igne liquata funduntur atque torneato parantur labore: erecta hic S.<sup>z</sup> dicanda Theresia magnifico cultu surgit sacra ædes.

## NEOBURGUM.

**N**eoburgum duplex est Archiducalis Austriæ Civitas, nem-

pe una a Monasterio, seu Claustro Closter-Neuburg, & altera a frumento Korn-Neuburg vulgo indigitata. Ambas duobus supra Viennam milliaribus fibi invicem adversas Danubius alluit: dextram tenet Claustro-Neoburgum Cetio monti subiacens, quod adnexo Canonorum Regularium Collegio vetustate cedit; annosæ siquidem arbores locum opacabant, cum D. Leopoldo, ejusque consorte Agneta Cetiensis Arcis fenestræ innixis, ac de situ ad excitandam Deiparæ Ædem idoneo solicite deliberantibus, hujus flammæolum, seu velum levæ aura ex capite surripiens procul ab oculis in subiectum nemus devexit, quod, cum venationis ergo S. Marchio post novennium lustraret, deperditum olim flammæolum, illæsum adhuc, extensemque pendere ex sambuco offendit. Hoc ille prodivino nutu præmeditatæ tunc Ædis locum indicante interpretatus, augustum illico Templum Cœlorum Reginæ dicandum anno 1114. ibi erigi jussit: cumque illius fundamenta jacienda forent, S. Leopoldus, ut primum poneret lapidem a Proceribus invitabatur; at ille Sacerdotum id esse munus reponens, eum honorem detulit Ottoni primo loci Præposito, quem ejusdem filium fuisse teste Cuspiano, quidam perhibent, sed ipse, & Polzmannus, qui S. vitam plusquam 100. abhinc annis edi-

edidit, secundo inter Neoburgen-  
ses Præpositos loco numerant Ot-  
tonem D. Leopoldi filium, quem  
dein Parisios studiorum caufa ite-  
rato profectum, & Cisterciense  
institutum Morimundi amplexum  
Frisingensem Ecclesiam ultimo re-  
xisse palam est. Templi mole ad  
coronidem ducta, dotem munifi-  
cus fundator privilegio sanxit, &  
Canonicos, quos seculares vocant,  
sacris præesse voluit, quibus fe-  
gnius administrantibus, Religio-  
nos D. Augustini asseclas anno  
1134. coram Conrado Salisbur-  
gensi, Regimaro Passavensi, &  
Romano Gurzeni Antistite sub-  
rogavit. Porro in his omnibus  
recensendis facem mihi prætulit  
præter mox citatos authores ipsa  
Advocati Confistorialis oratio an-  
no 1484. Romæ coram Innocen-  
tio VIII. recitata, quando Leopol-  
di apotheosis ab eo Pontifice fuit  
obtentæ. Hinc sacrum ejus cor-  
pus ex humili ejusdem Templi  
crypta, cui post obitum fuerat  
commisum, anno 1506. Maximi-  
lliano I. Cæsare id curante in ma-  
gna Præfulum, ac Principum fre-  
quentia fuit elatum, & pretiosa  
modo inclusum theca peculiaris  
Sacelli aræ, crebro venerantium  
affluxui expositum, incumbit. Ip-  
sum quoque flammeolum, & sam-  
bucus illustres prodigiose origi-  
nis thesseræ, nostro adhuc tempo-  
re custoditæ adventantibus exhib-  
entur, uti & Archiducalis Au-

striæ pileus, multo auro, & gem-  
mis renitens, quo Archiduces in  
D. Stephani Basilica Viennæ in-  
augurantur, Venerabilis hujus  
Collegii fidei demandatus. Exi-  
mum hoc Leopoldinæ pietatis mo-  
numentum cinxere sensim acce-  
dentium inquilineorum ædes, ita  
ut paulo post in justam excreverint  
Civitatem, quæ appropinquante  
olim Rudolpho I. Cæsare a pluri-  
bus Austriae Urbibus jam sponte  
admisso, suis freta munimentis pri-  
ma vim statuit experiri; verum  
Bavariæ Dux, qui Imperatori mi-  
litabat, certior factus, novum ab  
Ottocaro Rege præsidium per Bru-  
nonem Olomucensem Præfulem  
obsidendi submitti, cum nulla  
ejus inhibendi spes amplius afful-  
geret, quadraginta audacieores ju-  
venes selegit, qui modo bini, mo-  
do quaterni cum Episcopi comi-  
tatu in Urbem subrepserunt: tum  
cædibus, tumultuque omnia ab iis  
intus misceri, donec interim Dux  
cum exercitu advolans tanto Ci-  
ves terrore affecit, ut hi Bohemis  
in carcerem datis se subjecerint  
victori. Alterum Neoburgum, seu  
Korneoburgum, quod in fluminis  
læva spectatur, communi Austriae  
fato subjacuit, quando utraque Ci-  
vitas in Matthiae Regis potestatem  
anno scilicet 1477. devenit, sed  
cum reliqua pariter Provincia a  
Maximiliano recepta. Occupavit  
etiam hoc Neoburgum elapio se-  
culo Torstenonius Suecorum Dux

aggetisque vallis muniverat, sed  
subsequenti statim anno, id est  
1646. a Cæsareis coactus decessit.

## NEOBURGUM AD OENUM.

**N**eoburgum item aliud est ad Oenum fluvium Superioris Austriae Oppidum egregia instru-  
ctum Arce, & Comitatus titulo insigne, quod magnam quondam belligerandi materiam Austriacis, Bavarisque suppeditavit. Moverat, ut ferme scribit Brunnerus anno 1307. in Bavariam Albertus I. Imperator, cui cum exercitu Oenum trajicere penes Neoburgum paranti Nobilitas Boica excitis raptim agrestibus se se oppo-  
suit, quod ubi Cæsari innotuit, copias partitus partem Paffavii transire flumen jubet, partim ipse sub solis ortum propter ora hostium velut triumphans traducit, qui ne unum quidem telum auſi in Cæsareos evibrare, ideoque ingenti pudore suffusi, ut hujus de-  
decoris labem abstergerent, bien-  
nio post longe majori virium apparatu Neoburgum repetunt, ejusque obſidionem adornant, quæ, et-  
si rigente bruma, in quartum men-  
ſem protracta est, donec actis per metallarios sub terra cuniculis, Oppidum subingressi expugnarint: Lambergicus Arcis Præfectus ultra obſistere desperans igne in te-  
cta conjecto alio se recepit. Re-

diit tamen postliminio ad Austria-  
cos, & quidem ante annum 1459., quo Alberto Archiduci permisum est, ut demum acquiescens Au-  
striam fineret a civili in fratrem bello respirare.

## PECHLARNUM.

**P**echlarnum vulgo Pechlarn Ur-  
becula est, quam inter Me-  
licium, & Ipsium Danubius præ-  
terfluit, ubi ab amne Erlaph au-  
getur, & procul dubio illi Urbi  
respondet, cujus Antonini Itine-  
rarium, & utriusque Imperii No-  
titia sub Arlape nomine memine-  
runt fortassis Arae lapideæ a Ro-  
manis primitus appellata: imo ea-  
dem quoque esse omnino videtur  
cum ea, quam Ptolomæus in No-  
rico secus Danubium, & Peutin-  
geriana Tabula Nomale inter &  
Ponteises, 52. passuum millibus, seu  
13. Germanicis supra Vindobonam  
milliaribus collocat, vitiato tamen  
utrobique ab Amanuensibus textu,  
cum hic Arelate ibi vero Aredate  
scriptum reperiatur. Navalem in-  
super Romanorum classem stativa  
sua ibidem aliquando habuisse sub-  
nectit ex Imperii Notitia Cluverius.  
Quæ saltem longe magis  
rationi, ac veterum monumentis  
confona elucent, quam inanis,  
nulloque testimonio firmata Lazii  
opinio, qui Civitates pro libitu  
ædificans, Urbem nomine Præ-  
claram istic claruisse somniat.

De-

Deleto autem ab Avaribus, seu Hunnis Arlape, fertur S. Wolffgangus Ratisponensis Præsul Bavorum Coloniam huc deduxisse ab Ottone II. Cæsare ratihabitam, ipsique Ratisponensi Ecclesiæ, quod & modo perseverat, subjectam.

## PETRONELLA.

**P**etronella Pagus nunc modicus ad dextrum Danubii latus Vienna 7. milliaribus in Ortum distans, ingentis olim fuit Civitatis sedes Carnuntum vocatae, cuius situm istic potius, quam Hamburgi, quod Cluverio (a) placet, statuendum esse vetera ejusdem rudera etiamnum extantia demonstrant; nisi cum Lambecio (b) dicere malis, Urbem hanc Romanos ita ampliasse, ut a Petronellæ Vico Hamburgum usque se extenderet, prout jam superius attigimus. Congruunt jam optime antiquorum testimonia; Peutingerianum enim Hodæporicon, atque Antonini Itinerarium 28. passuum millibus Carnuntum Vindobona ad Orientem juxta Danubium removent: Plinius (c) adversus Mari fluvii, qui nunc Moravus, vel Morava dicitur, ostium fere opponit, atque alio in loco his verbis ejusdem meminit: (d) ioc. c. 3. fere millia passuum a Carnunto Pannonie abest litus id Germaniae, ex quo inventitur succinum percognitum imper: uti in castigatis codicibus legere est,

quædam enim editiones id fæde depravant. Carnus Carnuntis apud Ptolomæum, (e) & T. Livium (f) (e) Lib. 2. audit; eundem quippe locum huic c. 15. ille assignat. Floruit insignis hæc (f) Deca. 5. l. 3. Civitas ad minimum duobus ante Christi nativitatem seculis, utpote quam anno ante eam 171. Licinii Consulis Legatus subactis jam aliis Illyrici, Pannoniæ Urbibus, nec, ut se dederet, compellere, sicut ipse Livius scribit, neque capere potuit obsidendo. Anno tamen post Christum 9. submisit se Tiberio famosam de Dalmatis, & Pannoniis viætoriam sub Augusti auspiciis consecuto. Porro Colonia Civium Romanorum eo deducta, electa simul ea Urbs est in Legionis decimæ quartæ Geminiæ Sedem, & Istricæ classis stationem; neque vane conjicit Lambecius, (g) illum longo ævo exercitum arcum, quem vulgus Das alte heidnische Stadt-Thor appellat, non Carnuntinæ Civitatis portam, uti passim putatur, sed unum ex binis triumphalibus arcibus fuisse, quorum meminit Dio Cassius (h) victori Tiberio ab Augusto in (h) Li 56. Pannonia decretum, quod ex ejusdem situ, & residuis lateralis ornatus indiciis se manifeste judicat intulisse. Ad eam Carnuntum interim excrevit majestatem, ut plurium Cæsarum Aula fieri meruerit. Constat siquidem ex Eutropio, (i) & Orolio (k) M. Au- (i) Li 8. relium Antoninum Philosophum (k) Li. 2. c. 15. jugi

(a) In Vin.  
& Nor. c.  
5.

(b) In add.  
ad li. 2.

(c) Li. 4.  
c. 12.

(d) Li. 37.  
c. 3.

jugi triennio, quo Marcomanicum bellum confecit, hic resedisse; ex Spar-

(a) In vi- tiano (a) L. Septimum Severum  
ta Severi. a Legionibus Germanicis fuisse Imperatorem acclamatum, ex Eusebio Cæsariensi Licinium a Galerio

hic quoque in Cæsarem assumtum, atque ex Ammiano Marcellino,

(b) Li. 30. (b) Valentinianum in hac pariter  
c. 17. Urbe, jam quidem tum pene de-

ferta, & squalida trimestri spatio fuisse commoratum. Præterea Antoninum Caracallam non modo Vindobonæ, sed & Carnunti venerationibus vacasse existimat citatus alias Angelonus. Mentionem denique celeberrimæ hujus Civitatis faciunt vetusti alii scriptores, cujusmodi sunt Author Notitiæ Imperii, Vellejus Paterculus, Zosimus, & Aurelius Victor. Ab ex-  
tracto deinde in Carnunti ruderibus Monasterio S. Petronillæ sa-  
cro hodiernum loci nomen teste

(c) Chron. Lazio dimanavit. (c)  
Vien. I. I.

## PEUERBACHIUM.

**P**euerbachium vulgo Peurbach muro cinctum Superioris Austriae Oppidum cum ampla Arce 6. Lincio milliaribus versus Bavariam dissitum, valde foedavit incendium anno 1626. a Rusticis excitatum, sed illud pristinæ, imo majori venustati jam reddidit incolarum solertia. Schaumburgici olim Comites eo fruebantur, ex quibus Henricus cum Alberto III.

Austriæ Archiduci obsequi detrectans, in libertatem se vindicare, novasque res moliri adniteretur, Peuerbachio expugnato Albertus eum domuit, cumque bello impar Principem suum apud Cæsarem accusasset, causa quoque cecidit; arbitri enim, qui erant Fridericus Norimbergenis, Berchtoldus Magdeburgensis Burggravii, & Babo Abenspergicus, Comitem Henricum aliquot bonis multatum Archiduci subjecere. Addit Michael Bojemus in Vita Alberti Saxoniæ Ducis apud Marianum (d) ab hoc (d)Topoz. Austr.

## PLAGENSE COENOBIUM.

**P**lagense Ordinis Præmonstratensis Cœnobium vulgo Schlegl in Superiori Austria prope Bohemiam situm fundasse dicitur Colthagius de Falckenstein.

## POMARII MONS.

**P**omarii Mons vulgo Baumgartenberg est Cisterciensis Ordinis Monasterium in Machlandia Superioris Austriæ Provincia comprehensum, quod alias ad Montem Pomœrium perperam latine redditur, quodque Comes Otto de Machland sub annum 1143. fertur erexisse.

## RETEZA.

**R**etza vulgo Retz Urbs Archiducalis, sed exigua duobus milliaribus Znoyma Moraviæ Urbe solummodo distans per ameno fruitur districtu, quem tamen saepius depopulati sunt hostes, quibus illa in Hussitico, Hungarico, Bohemico, & Suecico bello in prædam cessit.

## SCHODTWIENNA.

**S**chotwienna vulgo Schotwien vel Schaidwiena quod Lambecius præfert, Schuzwien, amplum est Oppidum ad radices montis Sem. Topogr. Austr. P. I.

meringi Styriæ limitis, quodæneas Sylvius Schadviennam, Bonfinius Scæam Viennam, & Noricorum fauces appellat. Angustant hic rupes aditum, a viatoribus ex Austria in Styriam, & vicissim cœantibus, valde frequentatum. Arx Clam edito faxo imposita locum insuper tuetur; attamen anno 1485. parum obfuit Matthiæ Regi, qui illum occupavit, sed ultra progredi, & præruptum montis jugum non ausus superare.

## SEITENSTOTTENSE COENOBIUM.

**S**eitenstöttense Ordinis S. Benedicti Cœnobium ab Udascalco Comite de Heefft conditum ortum suum dicit ab anno circiter 1112.

## STEINA.

**S**teina vulgo Stein Archiducalis Civitas vix uno supra Cremsium lapide, Danubio ad Boream adjacens, eodem cum ea Urbe utitur Magistratu, ita ut primo triennio Consul Cremsium, & Steinam Judex incolat, altero autem vicissim Cremsii Judex, Consul Steinæ resideat, habitationis ordine sic semper alternato. Tota pene Urbs unica, sed longa definitur platea tribus portis operta, & binis Templis instructa, quorum unum ad S. Nicolaum Parœciæ, alterum Minoribus Conventuali-

bus usui est; bellicos vero even-  
tus eosdem, quos Crembsium ex-  
perta. In media utriusque via ob-  
viat Capucinorum Asceterium pro-  
digiosa Deiparæ iconे clarum.  
Steinam longissimus supra Danu-  
bium pons alteri Urbeculæ, quam  
Mautern vocant, Passavensi An-  
tistiti subditæ conjungit.

### STOCKERAVIA.

**S**Tockeraviam Vicum in lœva  
Danubii ripa situm, & Vienna  
4. milliaribus in Occasum remo-  
tum, Astura fuisse antiquitus ap-  
pellatam indicat Eugippius, ea in  
Norici & Pannoniæ vicinia, Co-  
magenis, quæ Greiffenstein dixi-  
mus, proxima describens; deprava-  
to tamen ab Amanuenibus no-  
mine pro Asturis, modo Austuris,  
modo Casturis in quibusdam co-  
dicibus reperitur. Quadorum hoc  
erat oppidum, sed & Romanis ali-  
quandiu paruisse demonstrat utrius-  
que Imperii Notitia, ubi legitur:  
*Sub dispositione Viri Spectabilis Ducis  
Pannoniæ, & Norici Ripensis fuisse Tri-  
bunum cohortis Asturis.* Ante Astura  
Aureatim inibi fuisse commentitii  
illius Marchionis Abrahami Re-  
giam gratis deblaterant fabularum  
nundinatores: longe æquiori &  
certiori jure glorientur Asturen-  
ses ob primam S. Severini statio-  
nem in has oras ex Oriente pro-  
fecti, donec præviso, quod loco  
proxime imminebat excidio, eo-

que incolis prædicto Comagena de-  
clinavit. Excisis Austris post ali-  
quam temporis intercapelinem suf-  
fектa est Stockeravia S. Coloman-  
ni natione Scotti martyrio pluri-  
mum illustrata; hic siquidem Hie-  
rosolymam peregrinaturus, uti  
Erchenfridus Melicensis Abbas  
coævus author in speciali hujus  
Sancti historia testatur, velut alii  
affirmant, ab ea redux anno 1012.  
huc appulerat, ubi pro hostium  
exploratore captus, post atrocia  
tormenta illi crudeliter inficta,  
a furenti plebe contorto vimine  
aridæ arbori appensus est eo in  
loco, quem Minorum Conventua-  
lium Cœnobium postmodum occu-  
pavit. Verum vimine juxta Er-  
chinfridum, velut Ditmarus Mers-  
burgensis Episcopus pariter coæ-  
vus, (a) sed remotior author re-  
fert: arbore ipsa subinde efflo-  
rescente, & Sancti corpore vivi-  
dum colorem, atque illæsam mem-  
borum compagem per sesquiannum  
jugiter servante, ejusdem demum  
patuit innocentia, decretumque,  
ut cadaver terræ mandaretur, quo  
peracto iteratis prodigiis Viri san-  
ctitas eluxit, quippe cum intu-  
mescens Danubius Cœmiterium  
inundasset, aquis usque ad medium  
Templi altitudinem aggetis, hæ  
tumulum, quo sacrum pignus con-  
debatur, reveritæ, neque super-  
gredi ausæ portentoso eum parie-  
te vallarunt.

(a) Infin.  
1. 7.

## S T Y R A.

**S**TYra vulgo Steyr amœna, & Archiducalis Superioris Austriae Urbs penes Styra amnis in Anisum influentis Ostium 4. milia-  
 (a) Lib. 3. ribus Lincio diffita, Plinii, (a)  
 c. 24.  
 (b) Li. 2. & Ptolomæi (b) Aguntum a qui-  
 busdam censetur; a Lazio autem  
 c. 14. Ptolomæi Gesodunum creditur,  
 (c) Li. 5. sed ex Strabonis (c) textu perpe-  
 ram intellecto illud a Gesatas populis conditum infeliciter divinat, non enim Gesatas, sed Boios tan-  
 tum ad Tauriscos commigrasse scribit præcitatus author. Tertiam  
 (d) Vol. 2. Nauclerus præfert sententiam his  
 genera. 24. verbis expressam. (d) Erat & Ci-  
 vitas in Norico Noris, hodie Styra di-  
 eta, ubi optimi siebant enses, inde dicti  
 Norici enses. Quos nimirum Horatius commendat. (e) Quæ ex his  
 Ode 16. opinionibus prævaleat, incertum; cum nulla solido nitatur fundamen-  
 to, nec ulla falsitatis convinci evidenter possit. Nauclero forsi-  
 tan favere videbitur florens etiam-  
 num ferri commercium e Styria-  
 cis fodinis effossi, quod in cultros, aliaque hujusmodi instrumenta  
 istic affabre elaboratur. Tutius fides adhiberi potest Grünbeckio afferenti Styrensis Arcis exordium  
 deberi Comitibus de Steur circa annum 983., quo in Comitiis ab Henrico Bavariæ Duce, Leopoldo Austriae Marchione, & Christiano Passavensi Episcopo Tulnæ habitis, impertita est omnibus fa-

cultas munitas Arces erigendi, quibus se ab Hungarorum infestationibus tutarentur. Arci adnata Civitas ab illius conditore nomen desumpsit imo in nobilis, amplique Comitatus Metropolim eva-  
 fit; sed hic sub annum 1186. ob pias fundationes, aliisque de cau-  
 fis huc, illuc distractus, usque ad solum, quo nunc Arx gaudet, dominium ultimo defecit, quod a Dietmaro veteris prædictorum Comitum stirpis surculo Austriae Principes anno 1252. sibi compa-  
 rarunt, transacta cum Arce Losen-  
 stein, unde præsens familiæ no-  
 men oritur, compensatione. Sæ-  
 vis deinde procellis agitabatur Sty-  
 ra, dum civile bellum inter Friedericum IV. Cæsarem, & Alber-  
 tum Archiducem ferveret, donec anno 1459. huic tradita fuerit, ut imposterum pacatior fancita semel fœdera haud amplius violaret; at-  
 tamen gravius Styrenibus accide-  
 rit anno 1629. in Rusticorum po-  
 testatem devenisse. Urbis Eccle-  
 siæ præter Parochialem S. Ægi-  
 dii, tres memorantur a sacris Præ-  
 dicatorum, & Capucinorum Or-  
 dinibus, atque Jesu Societate, cui P. Bernardus a Thonhausen Col-  
 legium contulit, administratæ. Non procul hinc Anisi ripam con-  
 decorat splendidum Garstense Mo-  
 nasterium, quod in Deiparæ hono-  
 rem Religiosis S. Benedicti affectis exstruxit Ottocarus Carinthiæ &  
 Styriæ Marchio; sanctitate autem bini

bini ex iis illustrarunt, nempe S. Wirto postea Formpacensis in Bavaria Abbas, & S. Bertholdus e Comitum Haimburgensium pro-sapia anno 1140., ut fertur defunctus, cuius festum 27. Julii ibi quot annis solemniter celebratur.

## TRASMURENSE OPPIDUM.

**T**rasmurense Oppidum vulgo Trafmaur in dextro Trigifami, modo Trasam fluvii littore, Danubio propinquum, antiquum Trigisamum in Peutingeriana Mappa adnotatum esse putant Cluverius, (a) & Lambecius, (b) ex situ, distantia, & vocabuli similitudine id inferentes, sed haec non minus convenientur Ducumburgo, quod Trasamburgum alias vocatum superius docuimus.

## T U L N A.

**T**Ulna pervetus, & Archiducalis Urbs, atque florentissimum quondam Austriae emporium prope Tulnae amnis Danubium lubeuntis ostium sita, anno 1277. Rudolphum I. Cæsarem Austriae ab Ottocaro Rege justis armis exposcentem reclusis ultra foribus longe propensius exceptit, quam Matthiam Hungariæ Regem solo armorum jure Austriae invadentem post bina inde secula ab eo ad ditionem compulsa, aut Ovo-

nem, quem Petri loco Hungari regnare jusserant, anno supra millesimum 44. Saturnalibus feriis ab eo improvise oppressa, atque expilata. In hac Urbe præter Parœciæ Templum, & Capucinorum Asceterium singulare sibi vendicat encomium sacrarum Virginum Cœnobium, quod ad Dominicæ Crucis cultum idem Cæsar Rudolphus auspicatus est, voti reus, quo ante gloriosissimam de Bohemis victoriam ad Laham obtentam se obstrinxerat; in more quippe eum habuisse ferunt, quoties prælium aliquod ineundum immineret, diem Veneris, si integrum sibi foret, præstolari, quæ cum adesset, nuncupato hujusmodi voto Cœlitum cohortes secum in hostes provocabat. Cœptum a parente opus ad fastigium deduxit Hartmannus cum Friderico fratre ibidem humatus. Tulensi pomorio famosum eum conflictum Merrianus (c) adscribit, quo Romanus Provinciæ Præses Macrinus ab Hunnis cum exercitu cæsus interiit, quamquam non inultus, cum illorum etiam 40000., Ducesque Bela, Kame, & Kadicha simul occubuerint.

## TYRENSTEINA.

**T**yrensteinam Oppidum uno supra Steinam milliari Danubius allambit. Pertinebat id quinque abhinc seculis ad Dominos de Chu-

(a) Vin. &  
Nor. c. 5.  
(b) Bibl. l.  
2. c. 8.

(c) Topog.  
Austr.

Chuvering; at Friderico II. Austriae moderante, cum duo ex iis fratres Henricus, & Hadmarus, absente a Provincia Duce Steinam, & Crembsium incendiis defœdatis, reversus Fridericus, illis in criminis pœnam expulsis, Tyrensteinense dominium fisco addixit, ex quo ad Dominos a Zelking, aliosque processu temporis devolutum est. Imposita monti Arx Oppidum despicit, cuius custodiæ Richardus Angliae Rex a Leopoldo Duce, ut alias diximus, captus fuerat demandatus: nunc tamen sola illius extant rudera, venustiori in ejusdem locum Arce inferius subrogata. Accedit Canoniconum Collegium D. Augustini legibus obstrictum, quod jam anno 1395. Joannes de Meissau large fundavit.

### VECLÆPONTUM.

**V**Ecabrige, sive Veclæpontum vulgo Föklabruk Civitas est Archiducalis in Superiori Austria ad præterfluentem rivum Veclam sita, & Lincio 8. milliaribus absens, pulchro foro, commodisque ædibus instructa, quamvis anno 1638. fuerit incendio labefactata. Viciniam coronant Arces Wartenberg; Wagram, Puechenstein, aliæque complures; illustrat vero clades anno 1626. tumultuantibus Rusticis a Papenheimo tertium inficta.

### VISCHAMUNDA.

**V**Ischamundam 4. infra Vienam milliaribus alluit Danubius Vischam amnem ibidem recipiens. Veterum Æquinoctium in Peutingeriano, & Antonini Itinerariis memoratum istic circiter extitisse ex situ, & milliarium interrallis indubitate colligit, & quidem more suo eximie Cluverius.<sup>(a)</sup> Vind. & Nor.c.5.

### WAIDHOVİUM.

**W**Aidhofen duplex est Inferioris Austriae Urbs, una Archiducalis, quam Bohemicam vocant, Arce instructa, & Teyæ fontibus proxima; altera, quam Bavaram dicunt, & fluvius Ipsius irrigat, Frisingensi Episcopo paret, ab Ottone III. Cæsare anno 995., vel sequenti eidem attributa. Hanc Berchtoldus illius Ecclesiæ Præful ad annum 1410. fossa cinxit, atque egregiam Arciturrim adjunxit. Non procul inde memorabile est pratum, quod nigrum, seu Schwarze Wiesen vulgaris nominat; anno siquidem 1529. aliquot Turcarum Turmæ in eo castrametari auseæ, ab incolis ad internacionem cæsæ audaciam suam extremo sanguine luerunt.

## WALDHUSANUM COLLEGIUM.

**W**aldhusanum Canonicorum Regularium Collegium in Superiori Austria extructum fertur a Comite Ottone de Machland, ejusque conjuge Comitissa de Prillnstein.

## W A L S E E.

**W**alsee Oppidum duplex est, aliud superius in Boreali Danubii parte Superiori Austriae insertum, aliud inferius in Australi ad Inferiorem Austriae spectans 6. infra Lincum milliaribus flumini propinquum. Hoc a Cluverio, & Lambecio illud ipsum creditur, quod in Imperii Notitia, & apud Antoninum Lacus felix nuncupatur. Arcem hic quoque cum præcelsa turri in editori rupe ædificarunt antiqui Domini a Walsee cognominati; ex quibus Erhardus anno 1558. Seisensteinense Cœnobium in Inferiori, & Eberhardus anno 1355. Schlierbacense in Superiori Austria dicuntur Cisterciensium Ordini fundasse.

## W E L S I U M.

**W**elsum, vulgo Wels venusta, & Archiducalis Superioris Austriae Civitas 4. Lincio milliaribus secus Traunum flu-

vium abscedit. Cluverius, cui Lambecius, Merianus favent, eam ab antiquissimis Noricis olim Wil-labs appellatam conjicit, idque vocabulum supervenientes Romanos in Ovilaba, vel Ovilava (unde factum Ovilabis, & Ovilatus) commutasse. Situi quippe Welfensi adjudicandam esse eam Civitatem, cuius sub nomine Ovilabis meminit Antonini Itinerarium, recte colligitur ex 20. passuum millium a Lauriacensi Urbe distantia, & Trauni propinquitate, aliisque circumstantiis in illo adnotatis: hanc vero cum Ovilia coincidere, quam Peutingerianum Hodæporicon ibidem collocat, non tam vocis affinitas, quam circumiacentium locorum respectus omnino persuadet. Ad ejusdem dignitatem multum confert Romanorum Colonia ab Imperatore M. Aurelio Antonino huc deducta, cuius mentio sub his terminis *Colonia Aurelia Antoniana Ovil.* diserte legitur vetusto marmori insculpta, quod sub quadam Lambacensis Cœnobii porticu videre est. Imo Episcopali quondam Sede ornatum Welfium docet Inchoffer testans se in probæ fidei fastis Moderatum reperisse Ovilensem in Norico Episcopum Juliani Imperatoris ætate clarum. Lazius teste Lambecio (a) modo (a) Bibl. ab Urbe Falsiana, de qua agit No- 2 c. 8. titia Imperii, cum tamen ibi nunquam Falsiana, sed semper Fasia na lectoribus occurrat, modo ab Anto-

(a) Topog.  
Austr.

Antonini Loco , vel Lacu fœlice , quem Danubio liquet adhæsse , infirma utique conjectura Welsium detorquet. Fide dignius spero fore , quod idem author apud (a) Merianum affert , Welsii nempe dominatum a propriis Comitibus ad Heribipolensem Ecclesiam translatum , & ab hac per Leopoldum Austriæ Duce persoluto pretio postliminio redemptum. Spectantur modo hac in Urbe præter sacram Parœciaæ Ædem , & nobilem Arcem bina Templa , quorum unum Sanctimonialium , alterum Capucinorum Monasterio adnexum est.

## W E Y T R A .

WEYTRA Urbecula est apud amnem Launiz Bohemiæ finibus juncta ad Fürstenbergicos ex Suevia Comites quondam pertinens , anno autem 1619. a Bohemis intercepta , sed statim a Bucquoio Cæsari vindicata.

## Z U E T L A .

(b) Annal.  
Austr.

Zuetla vulgo Zwetl , aut Zwesthal , Urbs est Archiducalis , sed exigua ab ejusdem nominis rivulo , qui paulo infra in fluvium Campum effunditur , irrigata. Hanc anno 1422. , teste Gerardo de Roo (b) Taboritarum agmen e propinqua Bohemia egrellum acriter opugnabat , quare Archidux Albertus cum suis accurrens Bohemos

ad certamen provocavit. Pugnatum est in quartam usque horam dubia victoria , donec Bohemi amissis curribus prælio excesserint , & Albertus castris exutus receptui cecinerit. Adjacens Urbi Clara vallense Cœnobium sub Leopoldo IV. Austriæ Duce Cisterciensibus fundavit Adalberto a Chuvering , cuius uxor Elisabetha cum filio Hadmaro ædificium perfecit , donariis auxit , ac censibus locupletavit , uti loquitur Cuspinianus , (c) cuius relationi apte consonat annus 1139. a Jongelio fundationi assignatus.

c Descrip.  
Austr.

Coronidis instar subjicio illam tum sacris , tum profanis fastis celeberrimam , atque Orthodoxæ fideli gloriosissimam victoriam , quam M. Aurelium Antoninum Philosophum contra Marcomannos adeptum testantur Tertullianus , Eusebius : Orosius , Xiphilinus , GREGORIUS Nyssenus , aliisque complures. Quamvis enim singulare illius spatium indicare arduum fit , vix tamen ambigi potest , quin Austriae campi eandem spectaverint. Siquidem M. Aurelium , dum in Austria degeret , Marcomannicum bellum confecisse supra ostendimus , & Meridionali cis Danubium Austriæ Romanos , Septentrionali vero trans Danubium Austriae Marcomannos tunc dominatos compertum omnino est ; quare seu cis , seu trans fluvium conflixisse illos velis , nunquam Austriae finibus egre-

egredieris. Gentes omnes teste Julio Capitolino, ab Illyrici limite usque in Galliam cum Marcomannis conspiraverant, videlicet Narisci, Hermunduri, Quadi, Suevi, Sarmatæ, Latringes, Buri, Victovali, Sosibes, Sicobotes, Roxolani, Bastarnæ, Alani, Peucini, & Castoboci. Contra hos itaque profectus Imperator, cum exercitus siti laboraret, nec tutum foret eam stationem deserere, Deorum opem fusis precibus implorabat, sed furdis utique canebat; tunc Christiani milites, qui magno numero ei merebant, flexis humi genibus verum Deum adeo efficaciter exorarunt, ut non modo pluviam reficiendis Romanorum copiis, sed & grandinem, & fluminæ, quibus hostes petebantur, extorserint, hinc ea legio fulminatrix dicta, & Imperator publico edicto sanxit, ne quis Christianus ob religionem in judicium amplius vocaretur. Neque invisum lectribus futurum spero, si ipsis Dionis Cassii tum viventis verbis prodigium hoc enucleatus exposuero. Videre licebat, inquit ille, in eodem loco aquam, ignemque de Cælo cadere, atque ob eam causam valere alios; alios exuri, ac prorsus interire. Non attingebat ignis Romanos, aut si forte iis misceretur, extinguebatur subito: neque imber juvabat barbaros, sed eos non sècus inflammabat, atque oleum, ut aquam requirent, plurima perfusi, infligerentque pars sibi vulnera, quo ignem sanguine restinguarent,

*pars confugerent ad Romanos, quasi illis tantummodo aqua salutaris esset.*

Postremo placuit supra memoratum Friderici I. Cæfaris diploma, in quo maxima Austriæ in Ducatum tunc erectæ privilegia continentur, Lectori id, uti spero, benevole admissuro istic exhibere.

*In nomine Sanctæ & individuæ Trinitatis, Amen. Fridericus divina faveente Clementia Romanorum Imperator Augustus, Primus ejus nominis. Quamquam rerum commutatio ex ipso corporali institutione possit firma consistere, nec ea quæ legitime geruntur, ulla possit refrigeratione corrervi: tamen ne causa rei gestæ ulla possit esse dubietas, Imperialis intervenire debet authoritas. Noverit igitur omnium Christi, imperiique nostri fidelium ætas & futuræ posteritas, qualiter Nos, ejus cooperante gratia, a quo cælitus pax missa est hominibus super terram, in generali nostra curia Ratisponæ, in nativitate S. Mariæ celebrata, in praesentia multorum religiosorum, & Catholicon, item, & controversiam, quæ inter charissimum nostrum Henricum Ducem Austriae & inter nepotem nostrum charissimum Henricum Ducem Saxonie, diu agitata exsilit, super Ducatu Bavariae, & super Marchia a superiori fluminis parte Anasi, terminavimus hoc modo: quod Dux Austriae resignavit Nobis Ducatum Bavariae, & dictam Marchiam, quos tenebat. Qua resignatione facta, mox eundem Ducatum Bavariae in beneficium contulimus Duci Saxonie. Prædictus vero Dux Saxonie cessit, & renunciavit omni juri, & actioni, quas habebat*

bat ad dictam Marchiam, cum omnibus suis juribus & beneficiis: Ne autem in hoc facto honor & gloria patrui nostri charissimi aliquatenus minuatur, de consilio & judicio Principum, illustri Uladislao Duce Bohemiae sententiam promulgante, quam ceteri Principes approbabant, Marchionatum Austriae, & dictam Marchiam supra Anasum, commutavimus in ducatum: ejusdemque Ducatum, cum subscriptis juribus, privilegiis, & gratiis omnibus, liberalitate Cæsarea contulimus Heinrico prædicto patruo nostro charissimo, prænibili sue uxori Theodoræ, & liberis eorundem, ob singularem favorem, quo erga dilectissimum patrum nostrum Heinricum Austriae Duce, ejus conthoralem prænobilem Theodoram, & eorum successores, nec non erga terram Austriae, quæ clypeus, & cor Sacri Romani Imperii esse dinoscitur, afficimur. De consilio & assensu Principum Imperii, dictis conjugibus, eorum in eodem Ducatu successoribus, nec non prætæctæ terræ Austriae, subnotatas constitutiones concessionē & indulta, autoritate Imperiali in jura plena & perpetua redatas, donavimus liberaliter vigore præsentium, & donamus: primo quidem, quod Dux Austriae quibusvis subsidiis & servitiis non tenetur, nec debet esse obnoxius sacro Romano Imperio, nec cuiquam alteri, nisi ea de sui arbitrii libertate fecerit: eo excepto duntaxat, quod Imperio servire tenebitur, in Hungariam duodecim viris armatis per mensem unum sub expensis propriis, in ejus rei evidentiā, ut Princeps Imperii agnoscatur. Nec pro conducendis feudis requirere seu accedere debet Imperium extra metas Au-

Topogr. Austr. P. I.

striæ, verum in terra Austriae sibi debentur, sua feuda conferri per Imperium, & locari. Quod si sibi denegaretur, ab Imperio requirat, exigat literarie trinacce: quo facto, juste possidebit sua feuda, sine offensa Imperii, ac si ea corporaliter conduxisset. Dux etiam Austriae non tenetur aliquam curiam accedere, editam per Imperium, seu quemvis alium, nisi ultro de sua fecerit voluntate. Imperium quoque nullum feudum habere debet Austriae in ducatu. Si vero Princeps aliquis, vel alterius status persona nobilis vel ignobilis, cūjuscunque conditionis existat, haberet in dicto Ducatu possessiones ab ipso jure feudali dependentes, has nulli locet seu conferat, nisi eas prius conduixerit a Duce Austriae memorato: cūjus contrarium si fecerit, eadem feuda ad Ducem Austriae devoluta, libere sibi ex tunc jure proprietatis & direcli domini pertinebunt. Principibus Ecclesiasticis, & Monasteriis exceptis duntaxat in hoc casu. Cuncta etiam secularia judicia, bannum sylvestrium & ferinarum, piscinæ & nemora in Ducatu Austriae, debent jure feudali a Duce Austriae dependere. Etiam debet Dux Austriae de nullis oppositionibus vel objectis quibuscumque, nec coram Imperio, nec aliis quibuslibet, cuiquam respondere, nisi id sua propria & spontanea voluerit libertate: sed si voluerit unum locare, poterit de vasallis seu homologiis, & coram illo secundum terminos præfixos parere potest & debet justitiæ complemento. Insuper potest idem Dux Austriae, cum impugnatus fuerit ab aliquo de duello, per unum idoneum, non in enormitatis macula deten-

L

tum,

tum, vices suas prorsus supplere: & illum ipse eadem die seu Princeps vel alias quisquam pro alicujus nota infamiae non potest impetrare, nec debet impugnari. Præterea quicquid Dux Austriæ in terris suis seu districtibus seu fecerit vel statuerit, hoc nec Imperium, nec alia potentia modis seu viis quibuscumque debet alio quoquomodo in posterum commutare. Et si, quod Deus avertat, Dux Austriæ sine herede filio decesserit, idem Ducatus ad seniorem filiam, quam reliquerit, devolvatur. Inter Duces Austriæ qui senior fuerit, dominium habeat dictæ terræ, ad cuius etiam seniorem filium jure hereditario deducatur: ita tamen, quod ab ejusdem sanguinis stipite non recedat, nec Ducatus Austriæ ullo unquam tempore divisionis alicujus recipiat sectionem. Si quis in dicto Ducatu residens, vel in eo possessiones habens, fecerit contra Ducem Austriæ occulte vel publice, est dicto Duci in rebus & corpore sine gratia condemnatus. Imperium dicto Duci Austriæ contra omnes suos injuriatores debet auxiliari & succurrere, quoad justitiam assequatur. Dux Austriæ, principali induitus ueste, supposito pileo ducali, circumdato serto pinito, baculum habens in manibus, equo insidens, & insuper more aliorum Principum Imperii, conducere ab Impe-

rio feuda sua debet. Dicti Ducis institutionibus; & destitutionibus in Ducatu Austriæ suo, est parendum. Et potest in terris suis omnibus tenere Judæos, & usuarios publicos, quos vulgus vocat Ge-werthein, sine Imperii molestia & offensa. Si quibusvis Imperii curiis publicis Dux Austriæ præsens fuerit, unus de Palatinis Archiducibus est censendus. Et nihilominus in confessu, & incessu ad latus dextrum Imperii post Electores Principes obtineat primum locum. Dux Austriæ donandi & deputandi terras suas, cuiuscunque voluerit habere debet potestatem liberam, si, quod absit, sine heredibus liberis decederet: nec in hoc debet per Imperium aliqualiter impediri. Præfatus quoque Ducatus Austriæ habere debet omnia & singula jura, privilegia & indul-ta, quæ obtainere reliqui Principatus Imperii dinguntur. Volumus etiam, ut, si districtus & ditiones dicti Ducatus ampliati fuerint, ex hereditatibus, donationibus, emptionibus, deputationibus, vel quibusvis aliis devolutionum successibus, præfata jura, privilegia, & adulta ad augmentum dicti Dominii Austriæ plenarie referantur. Et ut hæc nostra Imperialis constitutio omni ævo firma & inconvulsa permaneat, præsentes literas scribi & sigilli nostri impressione fecimus insigniri.

# TOPOGRAPHIA DUCATUS STYRIÆ.

**S**TYRIAM, Germanis Steyer, vel Steyermarch, ambiunt ab Oriente Hungaria & Slavonia; ab Occidente Salisburgensis Ditio, & Carinthia; a Meridie Carniola; a Septentrio-ne Austria. Distinguitur in Inferiorem, & Superiorem, hæc montibus horret; illa, et si illis non careat, in planos tamen campos alicubi expanditur. In hac montium asperitatem alternantes miti-gant valles frugibus refertæ; le-niores in illa colles, qua Ortum respicit, generoso superbiunt vi-no. Cæterum agri utrobique fer-tiles, sylvæ multa fera plenæ, acidi fontes, amœna in summis etiam alpibus pascua, & rupes fer-ro, aliisque metallis gravidæ Pro-vinciam celebrant.

Sub Romanorum Imperio Sty-riæ pars Occiduis adjacens regio-nibus ad Noricum mediterraneum pertinebat, reliqua Ortivis con-termina Pannoniæ adscribebatur. Norici Tauriscis ibidem succe-serant, quod Plinius diserte docet,

(a) Li. 3. (a) dum ait: *Juxta Carnos quondam Taurisci appellati, nunc Norici.* Latius tamen, quam ea Styriæ portio Tauriscorum patebat tractus, ut-pote per totum Australre Noricum alpibus proximum ad Rhætiam

usque se extendens; quod itidem ex subunctis Plinii verbis: *His contermini Rhæti, & Vindelici, com-pertum est.* Tauriscis vero adhuc latius habitasse Noricos, ex Stra-bone (b) discimus, cujus hæc sunt (b) Li. 4. verba: *Noricorum sunt etiam Tauri-scæ, uti Cluverius vertit, vel ut in Lugdunensi legi editione: In Noricis & Taurisci sunt.* Ubi clare innuit, hos ad illos velut speciem ad genus referri. Demum quam-vis vacillare videatur Cluverii sententia omnes Alpinos populos Tauriscos appellantis, cum Plinius hos a reliquis alpium incolis manifeste dirimat eos in præcita-to loco ita enumerans: *Incolæ Al-pium multi populi, sed illustres a Pola ad Tergelis regionem Secusses, Subacrimi, Catili, Mænocaleni, juxtaque Carnos quondam Taurisci appellati, &c.* Nihilominus Australiora Cetii in Austria descripti juga, quæ modo Styriæ includuntur, Noricos alias Tau-riscos tenuisse, ratum plurimis est, siquidem omnem ambigendi ansam adimunt tum Strabo (c) & Plinius (c) 1. 3. c. illos Carnis adjicientes, quod hic 2. 3. alibi magis dilucidat, *a tergo Carnorum, & Japidum eosdem statuens, tum alia quoque indicia, quæ mox emergent.*

Inter hæc non leve momentum inest ipsi Styriæ vocabulo, quod a Germanico verbo Stier, hoc est latine Taurus dimanasse primum est; hinc vetustiores aliqui non Steyrmarch, sed Styrmarch scripsisse reperiuntur. Videntur itaque Germanici populi trajecto Danubio in has terras egressi Romanum Taurischorum nomen, quasi hoc a tauris derivaretur, in consonam proprii idiomatis vocem commutasse: unde & taurum olim feruntur in suis insignibus habuisse, cui flammivomam deinceps pantheram subrogarunt. Quod tamen non evertit, uti Schönleben

(a) In Carn.  
Antiq. Ap.  
pa. c. I. §. 4.

(b) De  
Vin. &  
Nor. c. 2.

(a) prætendit, eruditam Cluverii  
(b) conjecturam, quam ille hac ratione deducit. Hoc Taurischorum nomen esse derivatum, non e Galilia allatum, ut antiqui Græcorum crediderunt scriptores, sed hisce in oris natum testantur Noricorum montes, qui inter Dravum, & Salsiacum amneis (vulgo hic est Saltzbach) etiamnum vulgari vocabulo dicuntur Tauri variis cognomentis distincti, ut Krumler tauri, Windisch tauri, Felber tauri, Karn tauri, Kalser tauri, Raussifer tauri, Kastein tauri, Vellacher tauri, &c. A quorum vocabulo haud dubie Celtnco sermone gens accola diæta fuit Thi Taurischen, quod postea Græci, atque Latini fecere Taurisci, quemadmodum thi Theutischen Theutisci Non, inquam, evertit; hæc quippe nominis origo ante Romanorum adventum Celtis istic de gentibus attribuitur, atque hi sal-

tem dialecto ab iis veteris Germaniæ gentibus discrepabant, quæ labente Romanorum potentia Noricum inundarunt. Sub una autem Celtarum voce hodiernam Germaniam, & Galliam, aliasque ad Septentrionem Provincias apud vetustissimos scriptores singularium districtuum adhuc ignaros latuisse, ex eorundem testimonis passim demonstratur. Porro Romanos, cum Imperium ultra Italæ claustra promovissent, usurpata ab indigenis locorum nomina latino more inflexa, plerumque acceptasse, innumera exemplorum serie stabiliri facile potest. Indubitatum enim est has voces Marcomanni, Langobardi, Nortmanni, Hermunduri, Langobriga, Asciburgium, Marcodurum, Teutoburgium, aliasque hujusmodi a latinis illius ætatis authoribus admissas eam originem præseferre. Discussis iis, quæ de Taurischorum ortu, atque etymologia probabili saltem ratione fulciri possunt, postremum locum nunc fabulis demus.

Congerit has Lazijs, & ut tales merito explodit Schönleben; (c) in Car. Teyram scilicet Jovis fratrem post diluvium egressum ex Persia, ubi mons Taurus Taurischorum indicat primordia, per longas viarum ambages in Europam commigrasse, ibique primo secus Pontum Euxinum Tyragetibus populis, & Tyræ fluvio nomina indidisse. Hinc

(c) in Car.  
Anti. App.  
c. I. §. 4.

Hinc ad Istri crepidinem concessit, ubi condito Tauruno, seu Alba Græca ad Carpathum montem progressus Teuriscorum Coloniam eo deduxit; sed fertiliores appetens terras Germaniam petuit, in qua Thuringia Regnum auspiciatus Teuriscos, & Tauriscos in Celticas Alpes propagavit. Verum quid tandem est (ut Velseri (a) verbis utar, quibus in aliud Lazii 24. vite S. Severini. commentum invehitur) quid, inquam, tandem est, si hoc non est, aliorum abuti patientia, neque mentem, neque frontem scribendis libris afferre? Quæ est, quæso, inter Thuringos recentius nomen, & Tauriscos affinitas? cur hic Tyragetes, ibi Taurisci procreantur? Quis adeo accurate tot itineris flexus eo tempore conscripsit? quis demum ille post diluvium Teyras, & quidem Jovis frater? forsitan unus ex iis, quos parens Saturnus adhuc vagientes devoravit?

Altera Styriæ pars, quam minus montibus asperam Pannoniæ adscriptimus, specialius quoque nomen fortita, supra Dravum flumen Valeria, infra eundem Pannonia Savia aliquando dicebatur. Namque illam inter Pannios Danubio, & Dravo diserte claudunt Sextus Rufus, (b) & Jornandes, (c) hanc vero idem Rufus Valeriam inter & Dalmatiam extendit. Rom. (c) De re-gno. fuc. Saviae cognomentum a Savo fluvio, quo a Meridie terminabatur, derivari palam est. Valeriam te-

ste Aurelio Victore (d) ita appellari jussit Galerius Maximianus Imperator in Valeriæ uxoris gratiam Diocletiani filiæ. (d) De Cœ. fa. c. 40.

Romanas aquilas cum Norico, & Pannonia venerata est utraque Styria, sed Tauriscos, & nonnullos alios populos Coss. L. Cornificio, & Sexto Pompejo, id est anno ante Virginis partum 35., ab aliis defecisse, ac tributa pendere detrectasse tradit Dio Cassius (e) quare necesse habuit Cæsar Augustus ex Sicilia, unde in Africam meditabatur, exercitum reducere, quo reprimerentur. Cæterum qui, & quando haec regiones in Romanorum potestatem redactæ sint, præcitatus Sextus Rufus paucis complectitur; unde haud pigrat, eum ita enarrantem audire: Sub Julio, & Oslaviano Cæsaribus per Alpes Julios iter factum est: Alpinis omnibus vicis Noricorum provinciæ accesserunt. Bathone Pannionorum Rege subacto, in ditionem nostram Pannoniæ venerunt. Amantini inter Savum, & Dravum prostratis, regio Savensis, ac secundorum Pannionorum loca obtenta sunt. Marcomanni, & Quadi de locis Valeriæ, quæ sunt inter Danubium, & Dravum pulsæ sunt. & Iimes inter Romanos, & barbaros ab Augusta Vindelicum per Noricum, Pannonias, & Mæsiæas est constitutus. Romanos Styria hac ratione positos, variae a Septentrione gentes infestarunt, donec tandem ejecerint. Post Marcomannos, & Quados, ab anno

Christi 332. reliquis prævissimis videtur Vandali Germanica natio a Vindis, Vendis, seu Venedis omnino distincta, impetrata a Constantino magno sedis in inferiori Pannonia figendæ potestate, cum a Geberico Gothorum Rege non procul a Danubii ostiis, quo ex balthicis oris advenerant, gravi clade cæsi, alio declinare compellerentur: iis vero recedentibus, subingressi sunt Gothi, dein Longobardi ex Germania pariter oriundi; mox secuti Vindi, seu Slavi, Hunni, atque Aares; postremo Franci, cum Carolus Magnus sub annum 790. amplissimos ditionis suæ fines usque ad mare Adriaticum protenderit.

Francorum nomine primum, dein suo, Styriæ imperitarunt Boiorum, seu Bavariæ Duces, quorum erat Marchia, seu limes adversus Slavos, & Hungaros constitutus, Carinthiæ Principibus subinde traditus; donec anno 1030. Conrillus Imperator Styriam ab his avulsam imperiale Marchiam seu Marchionatum creavit, ei præ esse jusso Ottocaro Comite in Muerzthal, & Auelanz, Domino in Eppenstein, Marquardi Carinthiæ Ducis ex fratre nepote; non tamen hæreditario in posteros jure, licet hi ordine successerint; id enim ab Henrico V. Imperatore anno 1120. primo obtinuisse Leopoldum Ottocari III. filium Fugerus testatur; (a) in præmium sci-

licet victoriæ, quam contra Abam Hungariæ Regem prope Petovium retulerat. Nonnulli tamen opinantur apud Merianum, Ottocarum I. non toti, quatenus hodie patet, Styriæ præfuisse, sed dumtaxat Superiori, Styrensi insuper Comitatu Austriae nunc inserto, quem author Anasperg vocat, a Conrado Cæsare donatum. Inferiorem autem, seu Græcene teritorium post Waldonis Comitis Runensis mortem Henrici V. indultu Leopoldo accessisse. Fateri interim necesse est, historiæ hujus veritati densam apud historicos caliginem offundi. Leopoldi porro filius Ottocarus IV. primus Styriæ Dux a Friderico Oenobarbo anno 1165. renunciatus, ducta in conjugem Kunigunde Leopoldi VII. cognomento Virtuosi Austriae Ducis filia, cum nullam ab ea prolem adipisceretur, consentientibus Provinciæ Statibus, Ducatum socero vendidit: hinc Babenbergicis Principibus Styria paruit, quorum successore Hermanno Badensi terris subducto, & Ottocaro Bohemo Austriae occupante, Styri hujus dominatum abhorrentes, Henricum Bavariæ Ducem invitarunt, qui cum Belam Hungariæ Regem, suumque socerum confilii gratia prius adiuvisset, hic re intellecta, conciliatis fibi clam Styrorum animis, atque Henrico confilii, & auxilii inope ad suos remisso, Styria portitus

(a) In spec  
hon. l. 2.  
e. 3.

titus, Ottocarum, qui hanc sibi adimi non patiebatur ad arma concivit, quibus ille Belam ad Provinciam secum dividendam, primo adegit, dein ingenti clade eidem reliquam rursus partem repetenti inficta, universam sibi vendicavit. Tandem Ottocaro a Rudolpho I. Cæfare, uti notum est, profligato, Styriæ Ducatus una cum Austria Adalberto victoris filio non sine motibus cessit, a quo ad nostram usque ætatem sub Habsburgicæ, nunc Austriacæ Prosaapiæ Imperio, invidenda a cunctis populis forte, prospere perseverat. His itaque, quæ ad universam Provinciam spectant de more præmissis, ejusdem prius Metropolim, dein cætera relatu digniora consveto Alphabeti ordine deducam.

## G R A E C I U M.

**G**RÆCUM vulgo Grätz nobilissima Urbs lœvo præterfluentis Muræ littori insidens, solo gaudet per ameno partim in planitiem explicato, partim in montes abietibus confitos se se attollente. Respondet latitudinis gradui 47. cum min. 2., longitudinis vero gradui 39. cum min. 40.; quare 20. Viena milliaribus recta linea in Meridiem abscedit, licet tritum ab ultro citroque commeantibus iter 26. millaria complectatur. Antiquitatis famam illi adstruere nititur

Cluverius, cum Ptolomæi Muroë-læ Græcum successisse arbitretur; at Muroëlam Muræ fluvio quoniam proximam tum vocis similitudo, tum gradus ab authore annexi utcunque persuadent; certum autem ejus situm, cum nulla præluceant indicia, humanæ mentis acies ægerrime assequetur; hinc in diversa abeunt scriptores, cum alii Oppido Mureck 6. infra Græcum milliaribus Muræ adjacenti eandem adscribant. Omnium tamen infelicissime divinat Lazius, qui regiones fusque, deque invertens Savariam istic statuit in Hungaria duntaxat reperiendam, cui errori ut medeatur, novum affigit, alteram Styriæ Savariam in arena ædificando. In vetustis porro codicibus Bavanicum Græcum, seu Bayrisch Grätz ad alias distinctionem, quod Windisch Grätz dicitur, cognominari plurimi ferunt: unde colligit apud Merianum Aventinus, hoc Vendorum, sive Slavorum, illud vero Bojorum confinia defendisse, nominis etymologia a voce Gräniz derivata; alii tamen a Slavico vocabulo grad, quod Castrum sonat, eam oriri contendunt, tolerabili utrumque conjectura.

Urbem fossis, muroque turribus interjecto veterum more cingere primum exorsus est Fridericus IV. Imperator; at crescente industria inter crepundia censabantur, quæ olim non modicum hosti-

hostibus terrorem incusserunt : ideoque sub Carolo Archiduce , ejusque filio Ferdinando aggesta humo visa sunt altius assurgere mœnia , prominere latius propugnacula , fossæ profundius penetrare ; hujusmodi enim munimenta totum ambitum vallant , si unum excipias latus ab alluente fluvio custoditum . Inter hæc quinque panduntur portæ a Mura , saccis , D. Paulo , ferro , & novitate sua nomen sortitæ . Curvatam in Urbem protenditur ab Aquilone excelsa rupes a circumjacentibus montibus prorsus divulsa , cuius verticem coronat fortissima Arx omni bellico apparatu egregie instruēta ; hinc enim eam tuetur in accessus ob præcipitum aditus , inde solida obviant valla gravioribus catapultis onusta ; internum armamentarium æneis abundat fistulis ; aquam amplæ suppeditant cisternæ , & prodigiosus fane puteus per durissimam petram ad usque montis radicem improbo labore deductus : imo & divina adfunt præsidia , centrum quippe ferre tenet sacra D. Thomæ Ædes , quæ Arcis aetatem antevertere fertur , inter saltus collem quondam obsidentes primitus erecta ; adjacent illi turris , in qua appensum æs campanum miræ magnitudinis latissime resonat . Quæ pene omnia providam Archiducis Caroli magnanimitatem jugiter deprædicant ; siquidem is plurima adjecit ,

postquam nobile hoc Castrum facta cum Provinciæ Statibus , ad quos a Dominis Richtscheidl transierat , alterius boni commutatione , Archiducali juri addixisset . Illius tamen obtinendi arduitatem , etiam antequam validiora Caroli additamenta deterrent , experti sunt Turcæ , qui captam anno 1532. Urbem adhuc leviter munitam mox deseruerunt , cum nimis crudis dapibus inurbani hospites exciperentur , nec sat virium , aut animi ad eam aggrediendam , quamvis magno numero adeissent , possent a se ipsis impetrare .

Interiorem jam Civitatis faciem lustraturi a Templis initium sumamus . Præeminet his aulica D. Ægidii Græcensis Tutelaris Basilica a Friderico IV. Imperatore anno 1450. inchoata , & anno 1577. Societati JEsu tradita , in qua marmoreis conduntur sarcophagis sacra DD. Martini , Vincentii , & Maxentiæ Martyrum corpora a Summo Pontifice Paulo V. ad Archiducem Ferdinandum anno 1617. transmissa : accedunt Archiducis Caroli viscera ad dextrum majoris aræ latus marmoreo itidem tumulo donata , atque Archiducum Maximilianii , Ferdinandi Junioris , & Joannis Caroli corda argenteis scyphis inclusa , subterranea in crypta decenter collocata . Circumfitum cœmeterium exornat insignis Ecclesia , quam Mausolæum vocant , D. Catharinæ Parthenon-

Mar.

Martyri sacra anno 1614. deleto  
vetustiori facello, exstrui cœptæ,  
& ab Augustissimo Leopoldo non  
modo perfecta, sed & picturis aliis-  
que ornamentis oppido illustrata;  
ubi præter Mariæ Annæ Ferdinandi II. tunc Regis Bohemiæ conju-  
gis anno 1618. è vivis sublatae, &  
Caroli Joannis ejusdem primogeniti  
subsequenti anno vita functi cine-  
res, quiescunt gloriose ipsius Ferdi-  
nandi II. Cæfaris exuviae, qui præ-  
claræ hujus molis fundamenta jece-  
rat, ut ea in urbe pretiosum sui pi-  
gnus post funera deponeret, a qua  
primam lucis usuram fuerat mutua-  
tus. D. Ægidii Templo jungitur  
Societatis Jesu Collegium, nobile  
ab anno 1573. Archiducis Caroli  
Fundatoris monumentum, quod  
Ferdinandus II. parentis munificen-  
tiæ æmulatus amplioribus pro-  
ventibus liberaliter dotavit. Col-  
legium excipit Universitas Philoso-  
phicis, & Theologicis disciplinis  
præter humaniores musas inclyta,  
a memorato Archiduce anno 1586.  
erecta, atque a Sixto V. Summo  
Pontifice, & Rudolpho II. Impera-  
tore confirmata. Ædificii tamen,  
quod hodie emicat, structura non  
nisi ab anno 1607. assurrexit. No-  
bilitarunt Academicam hanc Palæ-  
stram bini Serenissimi Palladis af-  
fæclæ, nempe Archiduces Maximili-  
anus Ernestus, & Leopoldus, qui  
ejus Scholas palam adire, & Theo-  
dosium Magnum ille, hic D. Am-  
brosum anno 1600. in scena exhibi-

*Topogr. Austr. P. I.*

bere raro exemplo non sunt dedi-  
gnati, ex quibus secundus Philoso-  
phicas insuper theses Rudolphi Cæ-  
fari dicatas gloriofissime propugna-  
vit anno 1754. huic Universitati a  
Reformatis studiis accessit splen-  
dor: introductæ sunt lectiones va-  
riæ novæ, eloquentiæ tum sacræ  
tum profanæ experimentalis Phisicæ,  
Historiæ: isque tradendi in-  
troductus mos, qui præcisissimis inuti-  
libus, ad utiliora Reipublicæ mu-  
nia civium efformet mores: erecta  
etiam magno labore sumptuque spe-  
cula in qua a peritissimo astronomico  
siderum obseruentur motus.

Cætera pientissimæ Urbis Tem-  
pla sunt Parochiale Sanctissimo San-  
guini sacrum, olim a Venerabili  
Prædicatorum Ordine, nunc a Græ-  
censi Parocho, & Inferioris Styriæ  
per partem Voraviensem Archidia-  
cono administratum, cui adnexum  
Cæfareum Xenodochium Ferdinan-  
di I. opus. Templum B. Virginis  
in Cœlos assumptæ anno 1515. Mi-  
noribus Observantibus concessum,  
qui primum ad Suburbia per Fride-  
ricum IV. anno 1463.. dein intra  
ipsam Urbem anno 1495. per Maxi-  
milianum Romanorum Regem fue-  
rant invitati. Horum Cœnobium  
piis suis manibus condecoravit, ut  
ferunt, Rudolphus Sigismundi Ar-  
chiducis filius D. Francisci regu-  
lam in eo professus, atque ibidem  
tumulatus: certum tamen est, ejus  
nomen in genealogicis Austriacæ  
stirpis tabulis nusquam apparere.

M

*Tem.*

Templum D. Pauli Apostoli per de-  
scriptum alias montem aliquantum  
ascendens, quod an. 1619. incep-  
& octennii spatio ad apicem per-  
ductum, alterius vices subit, quod  
post D. Thomæ Ædem Arci inclu-  
sam antiquissimum habebatur. Ad-  
dita huic fuit anno 1558. S. Augu-  
stini Eremus, ob Heterodoxorum  
quidem malignitatē eleemosynas  
subtrahentem anno 1601. a Religio-  
sis deserta, sed non multo post, iis  
Ferdinandi II. authoritate rever-  
sis, venustius restaurata. Tem-  
plum D. Josephi Discalceatorum  
Carmelo adjunctum, ante quod pa-  
tens forum ab inaurata Deiparæ sta-  
tua præaltæ columnæ imposita illu-  
stratur. Templum S. Laurentii cum  
Capucinorum asceterio, quod Fer-  
dinandus II. in eadem area erigi  
voluit, in qua decem hæreticorum  
librorum millia ex tota Urbe col-  
lecta vindicibus flammis antea juf-  
ferat demandari. Templum S. Leo-  
nardi, quod cum adjacente Mono-  
asterio excitatum fertur munificen-  
tia Friderici Pacifici, & quidem  
Jerosolyma reducis, uti subjungit  
recentissimus quidam scriptor ano-  
nymus; quod si ita se habet, in an-  
num 1437. debuit hæc erectio inci-  
disse. Incoluerant prius Cœnobium  
Minores Observantes, sed his ad  
hodiernam stationem anno 1515. re-  
cedentibus successerunt sacræ Deo  
Virgines D. Dominici legibus ob-  
strictæ, quæ ex alio Monasterio ab  
Udalrico a Walsee anno 1313. in

Suburbis condito, & ob incussum  
dein a Matthia Corvino armorum  
metum solo cum iisdem æquato, in  
Urbem se contulerunt. Templum  
omnibus Cœlitibus sacrum eo in lo-  
co situm, quo anno 1568. Styriæ  
Proceres hæresi infecti scholas suis  
Rabulis fundaverant, unde sectæ  
pestiferæ venenum latius effunde-  
rent, verum iis a Ferdinando Ar-  
chiduce anno 1599. fevero edicto  
exterminatis, Maria Ferdinandi  
mater Princeps pietati addictissima  
in expiatas rite ædes D. Claræ San-  
ctimoniales ex Monachienfi S. Ja-  
cobi Monasterio advectas an. 1603.  
solemniter induxit; quibus ipsamet  
postmodum accessit, religiosa vo-  
ta, annuente Apostolico Nuntio,  
paulo ante mortem nuncupans, at-  
que in religiosis indumentis ibidem  
sepulta. Templum parthenio ad-  
junctum Carmelo, ad cuius funda-  
tionem Ferdinandus III. Imperator,  
Maria ejusdem conjux, Eleonora  
Ferdinandi II: vidua, atque Archi-  
dux Leopoldus Guilielmus anno  
1643. concurrere. Templum de-  
nique dicatarum Deo Virginum,  
quas Ursulinas vocant, subministra-  
tis a pia quadam primæ nobilitatis  
Matrona sumptibus, & quidem abs-  
que miraculo, quod nuperus au-  
thor adstruit, recenter erectum,  
postquam illæ partim Vienna, par-  
tim Goritia anno 1686. huc appulit-  
sent. Sacras quoque inter domos  
referri potest pia domus non ita  
pridem erecta, & cui a S. Josepho

nomen datum est , non immerito, quod in eo piorum eleemosynis nutriantur juvenes quidam , quos parentum indigentiae prohiberent a scientiis, atque adeo præstanti præditos ingenio a sacris arcerent ; rei huic initium dedit privati zelus & devotio, cui ab undecim annis non paucos debet respublica ex hac pauperum domo non sine magnis meritis in patriæ egressos emolumen-tum.

Expeditis sacris profana invisi-ri ædificia ab Aula auspicamur , quæ inter reliqua primatum merito sibi vendicat. Hanc a Friderico IV. Imperatore cognomine Pacifico e fundamentis eductam , in constantem sibi sedem delegere bini Archiduces Ferdinandi I. Cæsa-ris filius , & Nepos , Carolus nem-pe , & Ferdinandus , antequam to-tius Imperii clavo admoveretur. Magno tamen decori etiamnum ei sunt suprema quatuor Tribunalia ibidem instituta : videlicet intimum Consilium , quod ceteris omnibus authoritate antecellit ; Regimen cuius author Archidux Carolus ab anno 1565 , caput vero ipse Urbis Locumtenens ; Camera cum pecu-liari suo Præside , atque hæc tria toti interiori Austriae jura dicunt, quo nomine non modo Styria , sed & Carinthia , & Carniola cum Goritiensi Comitatu comprehenduntur ; quartum demum est Consilium bellicum , quod anno 1558. idem Archidux Carolus primo concivit,

ut Turcicis confiniis excubaret. Suppar Aulæ Domus Provincialis ab anno 1563. in magnificam , quæ hodie eminet, molem attolli cœpit, ubi Comitia sua cogunt Provinciæ Status ex quatuor Prælatorum sci-liset , Dominorum Equitum , & Ci-vitatum Ordinibus coalescentes : adjacet huic quoque proprium ar-mamentarium ad patriæ tutelam provide adornatum. Est & sua Ci-vibus Curia , quos lecti ex ipsis Consul , Judex , & Senatus modera-tur. Tenet illa caput oblongi fori binis nundinis quovis anno fre-quentati , cui in altero opponitur Sanctissimæ Trinitatis Colossus ex inaurato ære confectus , & celsæ columnæ plurium Sanctorum sta-tuis circumdatae incumbens. Re-liquis ædificiis quibus Græcum or-natur anno 1757. accessit aliud no-vum reliquis pulchritudine nihil concedens domus scilicet moneta-ria e regione sanctimonialium : Divæ Ursulæ in qua nondum qui-dem rebus non adhuc omnibus per-fectis moneta cuditur , jam tamen ille cui in res metallurgicas inspe-ctio est, hic suum fixit Domicilium.

Lustrata , quantum assumpti ope-ris ratio patitur, Civitate, jam mœ-nibus egressuros D. Pauli , ferrea-que porta ad bina nos Suburbia de-ducunt , unum consecrat S. Joani-s Baptistæ Ecclesia Capucinorum Asceterio adjuncta , alterum vero venustum D. Annæ Templum cum pari Eremitarum S. Augustini, quos

discalceatos vocant, Monasterio, qui anno quidem 1655. sedem Urbis propiorem Joanne Maximiliano Comite ab Herberstein fundatore fixerant, sed ea ob appropinquatum Turcarum metum anno 1666. eversa huc recesserunt: ubi primum novi ædificii lapidem magna solemnitate posuit an. 1673. Augustissimus Imperator Leopoldus I.; Maximum autem Suburbium, & amplitudine sua Urbem superans, Mura fluvius ab eadem sejungit: surgunt hic pariter Tempa non pauca, ex quibus quatuor saltem memoranda censeo, nempe Beatissimæ Virginis Auxiliatrixis prodigiis claræ Sacrarium D. Artemii Martyris corpore à Joanne Antonio Principe ab Eggenberg Roma adducto dñatum, cui adjectum Cœnobium ab anno 1515. Minores Conventuales incolunt; D. Andreæ Ecclesiam a Prædicatorum Ordine administratam, atque duo alia a Religiosis S. Joannis Dei, & D. Elisabethæ Monialibus possessa. Annus proxime elapsus novam Religiosorum coloniam græcio attulit: in eam suburbii partem quæ muræ alveum sequens Gries vocatur, SS. Trinitatis Cœnobitæ ingressi sunt, qui quamvis stabilito necdum Monasterio, recepti vivant, jam tamen ipsa foundationis suæ initia collegerunt atque in tumultuarie eretto facello, sacris cæperunt vace re quoad usque pia Græcensium li-

beralitas ampliori domicilio sti pendium contulerit. Definit hoc Suburbium, qua contra fluvium ascenditur, in rupe quadam supra planum alias solum eminente, quæ ad repræsentandum Calvariæ montem à natura mire aptata, & ab arte electa, ideoque pluribus, ac venustis Sacellis singulos Christi patientis casus exhibentibus inseffa liberalem Græcensium pietatem late ostendat, & deprædicat. Urbis hujus decora augeat secundo ab ea lapide remotum superbissimum Eggenbergense Principum Palati um, Udalrici Crumlovien sis Ducis opus, augusta fane majestate inter circumfitos hortos, & fossæ ambitum forinsecus assurgens, intus vero elegantibus picturis, & gypsatis ornatibus plurimum renidens. Remotius aliquantis per Græcio orientem versus, sacra ædes jacet, frequenti civium accursu hoc sæculo illustrata, templum scilicet B. Matris Consolatrix; extabat hic olim exigua arx Canduziana, in cujus privato facello statua colebatur, quæ prodigiis inclarescere cœpit: ante quadraginta circiter annos hic admissi sunt Patres S. Paulum Eremitam, qui sequuntur; hi multorum eleemosynis adjuti elegans hic exstruxerunt monasterium templumque magnificum pluribus ornatum aris, e ceruleofcente marmore cuius hic loci ingens copia eruitur.

## ADMONTIUM.

**A**dmontium, quod Ad montes alii, vulgus Admont indigit, Superioris Styriæ Oppidum prope Austriam ab Aniso fluvio alluitur, atque ob celeberrimum, quod adjacet, Ordinis S. Benedicti Monasterium sui famam latissime propagat. Fundavit hoc, suadente, atque opitulante Hemma Wilhelmi Comitis Frisacensis vidua, inter editos montes amplam planitiem in crucis formam definientes B. Gebhardus Archiepiscopus Salisburgensis, Comes ab Helfenstein, e vetustissima Agilolfingorum Alemanniæ Ducum familia, prout Bucelinus (a) testatur; inchoato anno 1074. à fundamentis opere, ad quod ille fertur etiam divinitus impulsus, cum enim rei arduitate deterritus, post triduanum jejunium anceps in ea valle hæreret, an id sibi aggrediendum foret, audiit quandam hebetem a nativitate loquela orbatum in hæc verba prodigiose erumpentem. *Tu inchoabis, Deus consummabit.* Quæ primæ ac postremæ tunc hominis voces fuere, donec iterato miraculo post Beati obitum linguæ usum apud ejusdem tumulum obtinuerit. Templum ipse Beatus Præful Sanctissimæ Dei Genitricis, ac D. Blasii Episcopi, & Martyris honori consecravit, ibidem dein ante Apostolorum aram magnifice conditus, postquam anno 1088. in Wervensi

(a) In  
fac. pag. 2.

Castro, quo se contra Henricum Germaniæ Regem munierat, parrem plentissimæ vitæ exitum fuisse fortitus. Primus Abbas præfuit Isingrinus e Salisburgenſi S. Petri Monasterio postulatus, qui successorem habuit B. Gisilbertum apud Corozaim Palæstinæ Urbem, quo cum S Thiemone Archiepisco po Salisburgenſi profectus fuerat, Martyrii laurea anno 1110. coronatum. Sextus Abbas Wolffholdus, qui obiit anno 1137. obtenta a Ciliæ Comite ditissima S. Martini Præpositura prope Græcium sita, priores redditus plurimum ampliavit: verum non tam temporalia, quam spiritualia promovebantur incrementa; sub septimo siquidem Abbatte Godefrido adeo eluxit in hoc Cœnobio regularis disciplina, ut tredecim alia suos inde Prælatos advocaverint. Singularem quoque memoriam meretur Henricus hujus nominis tertius, Abbatum vero juxta Bucelini calculum vigesimus septimus, qui ab Alberto I. Imperatore Vicarius Styriæ Gubernator creatus alienatos Monasterii fundos redemit, Arcem Galenstein, Templumque noviter exstruxit, atque a Gregorio X. Summo Pontifice, qui obiit anno 1226. Infulæ decus primus impetravit. Adjacebat olim huic virorum Cœnobio aliud in Sanctimonialium usum a memorato Wolffholdo sub annum 1120. fundatum, quod professione sua illustrarunt Sophia Be-

læ Hungariæ Regis filia Henrico Conradi Cæsarî filio desponsata, & Admunda Andreæ I. Hungariæ itidem Regis vidua. Quo autem fato, aut ætate defierit, incertum.

## CELLA MARIANA.

**C**ella Mariana, vulgo Maria Cell locus est inter præaltos, arduosque montes à Deiparæ prodigiis clarissimus, & Austriæ finibus admodum propinquus. Natales suos ducit ab anno circiter 1157., quo Religiosus quidam D. Benedicti assecula ex S. Lamberti Cœnobio ad rem œconomicam administrandam, & rudes subditos rerum divinarum notitia imbuendos huc destinatus, secum detulit cubitalem Deiparæ statuam Jesulum brachio sustentantis, quæ tiliæ ligno insculpta Filium Matri pomum, Matrem vero filio pyrum porrigentem repræsentat. Hanc ille lapideæ aræ impo- suit, quam una cum cella, seu ædicula ad duorum amnium Golradi & Salzæ confluentes sibi ædificarat, atque inde datum toti valli nomen, quæ vernacule Cell-Thal etiamnum appellatur. Latuit prodigiosa hæc icon paucis adhuc nota usque ad annum 1286., quo Moraviæ Marchione Henrico, ejusque uxore Agnete gravi morbo per biennium laborantibus, cum subditi suppli- cationem instituissent, ut per B. Virginis, & Provinciæ Patroni D. Wenceslai intercessionem, Princi-

pum salutem a Deo impetrarent; Sanctus hic Tutelaris Henrico per somnium apparuit Marianam Styriæ Cellam digito indicans, atque exhibita, quæ ibi colebatur, Deiparæ imagine, ut reparatam integre valetudinem huic adscriberet, debitasque cum conjugे grates re- penderet, eundem commonefecit. Somno excitus Marchio & sanitati plene restitutus, cum hoc ipsum ea nocte Agneti contigisse percipe- ret, comprobatam gemino mira- culo visionem admiratur: facrum proinde iter aggressus, magnam se- cum traxit populi multitudinem videndæ Cellensis Thaumaturgæ avidissimam, cumque a recta via declinasset, ab Angelo quopiam, vel D. Wenceslao sub peregrini specie, testante id marmorea tabu- la Templi foribus præfixa, fertur ad eandem revocatus. Cupitam tandem metam assecutus, agnitaque, quam in somnio viderat, imagine non modo demississimas sospitæ suæ gratias persolvit: verum etiam pre- tiosa largitus munera, ligneo, quo illa condebatur, Sacello nobilio- rem Ecclesiam a fundamentis edu- ctam pia liberalitate suffecit. Ab eo igitur tempore adeo illustris miraculi fama per circumfitas re- giones longe, lateque diffusa, plu- rimos ægros ad implorandum, non sine uberi fructu, prodigiose Vir- ginis patrocinium excitavit, donec anno 1363. Ludovicus Hungaro- rum Rex Amurathi Turcarum Sul- tanο

tano ex Asia per Hellespontum , & Thraciam cum numerosissimo exercitu in Pannoniæ fines irrum- penti , viginti militum millibus , quos raptim conscriperat , solummodo stipatus obviam processit , sed felicem rei eventum , cuius nulla spes humanitus affulgebat , a Celenensi Thaumaturga præstolabatur , cui se ardentissimis precibus commendarat . His itaque permota Deipara , dormienti Regi spectan- dam se præbuit , certam de hosti- bus victoriam pollicita ; qua glo- riosissime parta Ludovicus victri- cescopias ad Marianam Styriæ Cel- lam deduxit , ubi ensem , & calca- ria , quibus in prælio usus fuerat , coronam item argenteam inaura- tam , gemmisque distinctam cum paludamento regio , aliaque pretio- ſa cimelia invictissimæ Cælorum Reginæ pro anathemate consecra- vit : neque his contentus gratitudini- ſuæ monumentis , deleto veteri Templo , aliud longe magnifi- centius , quod hodieum eminet , ex perpolitis lapidibus condidit , nativo faxo artificiose excavato in- cumbens , & arcuato opertum te- cto , quod decem prægrandibus col- umnis innitur . Longum foret miracula iſtic patrata recensere ; illud tamen non omittendum , quo anno 1529 . Turcæ congregatas ini- bi gazas direpturi partim cœcita- te , partim aliter divinitus puniti recefferunt , dum interim corona splendida in argumentum Cœlestis

tutelæ Templi fastigium ambiret . Assumpti quoque operis brevitas non patitur , sumptuosa munera ad calculum revocari , quibus larga plurium Principum , ac Cæsarum , & nominatim Augustissimi Leopol- di pietas hujus Sacrarii thesaurum tot annorum decursu locupletavit .

## CILEIA.

**C**ileia , vel Cilia , Plinio (a) Ce- (a) Lib 3.  
lia , Ptolomæo (b) Celia vul- c. 22  
go Cilly antiquissima Inferioris (b) Lib. 2.  
Styriæ Urbs ad Saanam amnem non c. 13.  
multo post Savo influentem sita a  
præcitatissimus authoribus Norico ad-  
scribitur , ex quo inferre necesse  
est , exiguum Styriæ partem ad  
Pannoniam olim pertinuisse , cum  
non adeo magnum terræ spatium in-  
ter Civitatem hanc , & Ortiva Pro-  
vinciæ confinia interjaceat . Non  
desunt tamen scriptores , sed recen-  
tiores , qui veteri eam Pannoniæ  
adjudicent , quorum opinio priori  
quidem non repugnat , si ad diver-  
ſa tempora referatur , palam etenim  
est Provinciarum limites longo an-  
norum decursu , belli , aut contra-  
ctus alicujus occasione , vel alio  
simili modo ſæpius permutari . In  
lapideis monumentis apud Velse-  
rum (c) Celeia Claudiæ cognomi-  
ne Insignitur a Claudio Cæſare Ca-  
ligulæ ſuccelfore probabiliter de-  
ſumpto , prout fuadent aliarum Ur-  
bium cognomina ab Imperatoribus  
plerumque derivata . Subjungit ibi-  
dem (c) Ita  
M. oum.  
peregr.

dem Velferus plurima marmora Urbem istam municipium appella-re. unicum vero a Panvinio addu-ctum Coloniæ titulum eidem attri-buere. Quidquid de hoc sit, non tam collata a Romanis dignitas, quam S. Maximilianus Laureacen-sis Episcopus tum natalibus suis, tum glorioſa morte eandem illu-stravit; anno siquidem 284, uti Schönleben autumat, vel 288., uti Megisero placet, Catholicæ fi-dei propagandæ cauſa huc rever-fus, & ab Eulasio Præfecto captus, postquam thura Marti adolere ge-nere detrectasset, capite plexus e terrestri patria ad Cœlestem in-victus Martyr evolavit. Corpus vero a Christianis tumulo illatum eo loci, quo Martyrio affectus fue-rat, videlicet extra Urbem, ubi postmodum Ecclesia ejus nomini erecta etiamnum perseverat; inde tamen à S. Ruperto Salisburgensi Antiflote Laureacum translatum est; hinc demum ab Henrico II. Imperatore Passivium, ubi in Ca-the-drali Basilica honorifice asser-vatur. Ex inquinorum traditio-ne præterea habetur, ubi recisum Sancti caput decidit, aquæ fontem profiliisse, qui hodieque morbis medetur. Episcopali quoque Sede Cileiam olim ab ipso fere Christianæ Ecclesiæ initio fuisse decoratam, author est memoratus Schönleben;

(a) In  
Carn. A.  
ti. appe.  
c. 5. §. 2.

(a) modo autem Parochia Goriti-enſi Archiepiscopo subiecta solum-modo extat, cui subinde Archidia-

conatus annexitur. Eversam dein per Bavarios Urbem primus instau-rasse fertur sub annum 850. quidam Bruno, vel Brino e Moravia ex-pulsus, qui a Ludovico Bavariæ Duce clientelare beneficium agri non modici ad Savum, & Saanam amnem extensi ea tempestate obti-nuerat; quod territorium Comita-tus titulo postea donatum narrat Megiferus, (b) anno nimirum 1339, (b) Ann. quo Ludovicus Bavarus Germaniæ Carin. l. 9. Rex Monachii degens Fridericum c. 8. a Sanneck ejus loci Comitem crea-vit. Hujus successorum seriem, hi-storiāmque idem author usque ad Udalricum contexit, qui anno 1457. cum implacabili odio in Corvinam familiam Ladislauū scilicet, & Matthiam Joannis Hunniadis su-periori anno defuncti filios flagra-ret, ad ficerum suum Georgium Serviæ Despotam litteras dedit, spondens fe, quamprimum Albam Græcam cum Ladislao Hungariæ Rege appulisset, duos illi globu-los pro lusu missurum, quibus duo Corvinorum capita veluti sub æni-gmate innuebat. Interceptis a Ladislai Corvini famulo litteris, domino-que traditis, hic gravissime indi-gnatus D. Martini festo, dum Rex facris interefset, Comiti a Proce-rum cœtu evocato obvius, litteras ostentat, ac proditorem inclamat; tum Comes arrepto gladio obje-ctam ictui manum simul, & caput Ladislai vulnere perstringit, qui educto & ipse gladio lorica tectum fru-

frustra percutit ; sed Hungari milites ad clamorem exciti strenue obluctantem Comitem confecere. Cujus audita cæde Fridericus IV. Imperator, cum nullam Udalricus prolem reliquisset, Cileiam profectus, totum ejus Comitatum ex veteri quadam conventione fibi debitum occupavit, Styriæque adjunxit. In Urbe memorabile etiam est Minorum Cœnobium, in cuius Templo Cileiensium Comitum cineres conduntur ; extra Urbem vero edita eminet Arx, quam Ober-Cilly vulgus nominat. Cæterum multa ibi veterum monstrantur monumenta ; eruta quoque Romanorum numismata, & ingentis molis reperta cadavera, non dubia venerandæ antiquitatis vestigia. Demum addenda ea victoria est, qua Georgius ab Herberstein Turcas Cileiam usque progressos an. 1492. fortiter abegit.

## EISENARTZ.

**E**isenärzt vulgare nomen est ingentis Oppidi, quod 10. circiter milliaribus versus Superiorum Austriam inter præruptos, altissimosque montes Græcio recedit. Famosum illud reddunt celeberrimæ ferri fodinæ, quæ plurimis regionibus necessarium hoc metallum subministrant. Inventæ eæ sunt anno a partu Virginis 712., & quamvis jam per mille ferme annos indefesso labore effodiantur,

*Topogr. Austr. P. I.*

nullum tamen pati videntur defetum, cum uberem semper materiam, aut rursus pariant, aut provida distributione posteris reseruent. Cœlestis sane benedictionis non leve argumentum videtur mira Deiparæ icon, quæ anno 1668, dum ferrea gleba in binas partes fortuito funderetur, sola naturæ utrique impressa comparuit, atque ad Augustissimum Leopoldum delata gazophylacii pretium adauxit. Innumera ibi sudat operarum caterva ; nam primo lapides ferro prægnantes ex dura rupe excidunt, ex his dein ferrum potentissimum liquatum in quasdam informes confluit massas, quæ Vulcanis denuo commissæ, & novo igne excoctæ humanis usibus ultimo adaptantur : multi quoque officiales totum opus dirigunt, quibus præfet Cæsareus Præfectus Cammergraff vulgo appellatus. Emicat in Oppido Parochiale Templum solido muro ad instar Arcis circumbatum, & D. Oswaldi sacrum, post cujus festum splendidæ ibidem nundinæ celebrantur. In altero autem montis latere plures itidem patent cavernæ, ex quibus Vordenbergenses Oppidani ferrum eadem contentione extrahunt, variisque Provinciis similiter dispensant. Quam abundantans subteraneis thesauris hisce sit tota Styria, passim in obviis quorumcumque descriptionibus cernitur : nobis hic appendicis loco notasse sufficiat, paucis ab annis bis

nis Græcio milliaribus ad Pekau colicapiſſe divites plumbi fodinas: in Waldſtein ſimiles repertas, ſed quæ & comixtum plumbo argenteum vehunt: in Berneck vero beym Wenzel qui locus ad Comitem de Rindſmaul ſpectat elegan- tissimum effoditur marmor viride, non abſimile illi quod *verde antiquo* nuncupant quodque politum, tam elegans evadit, ut pretioſiſſimis etiam menſis adhibeat: quotidie novas alibi divitias natura oſtendit, liberalior procul dubio futura, ſi ſolertius illius ſcrutarentur ſinum incolæ.

### FERNICUM.

**F**ernicum vulgo Ferniz Oppidulum eſt ſequi milliari infra Græcium lœvo Muræ littori inſidens, cui celebritatem adſtruit Thaumaturga Deiparæ ſtatua, quæ annis abhinc prope quingentis ex Hauffmanſtettenſi Templo divinitus profuga intra veſpres iſtic conſedit, terque illuc relata, ad delectam ſibi hanc ſtationem totidim vicibus jugi miraculo remeavit, quo permoti Barones a Prang, Sa- cellum ejusdem cultui exſtruxerant, verum hoc exciſo Imperator Fridericus III. cognomento Pulcher magnificum ſane Templum, quod anathematibus refertum ho- die ſpectatur, crebrisque supplica- tionibus conſtanter colitur, anno 1314. a fundamentis excitavit.

### FRIBERGA.

**F**riberga vulgo Friberg tenuis locus eſt ab Hungariæ limite non procul diſſitus, conſuetis ta- men Civitatum privilegiis fruens, quem Lazius (a) Friburgum no- (a) Li. 12. minat, & vetuſtissimam Styriæ Ur- de Rep. Ro. bem arbitratratur, dum eandem cen- ſet. 3.c.8. ſet cum ea, quæ in codice Præfe- cturarum Romanarum Cardobian- ca inſcribitur, eo potiſſimum per- ſuafus argumento, quod Fribur- ga amni Pinck, vel Pynck adja- ceat, quaſi præſens hoc nomen ex decurtata priori voce Bianca de- rivaretur.

### FROMLEYTHA.

**F**romleytha exiguum oppidum quatuor Græcio milliaribus diſſitum; in quo Parochialis Ec- clesiа, a Religiosis B. Virginis Ser- vis admiriftratur: celebrius paucis ab annis evaſit magno accurren- tium numero qui S. Aloysio Gon- zagæ non ita pridem coli hic cæ- pto, vel acceptis beneficiis vota perſolvunt, vel malis ſuis mede- lam quærunt: ante binos annos ipſa Augustiſſima huc migravit, cum Ar- chiduce Maria Anna principum fi- liarum natu maxima, cui poſt per- tinacem, qua vix non confecta fue- rat, febrim, quod redierit fani- tas, Aloysi apud Deum preci- bus, impetratum creditit.

## FÜRSTENFELDIA.

**F**ürstenfeldia vulgo Fürstenfeld Urbs est ad amnium Lauffniz, & Veistriz concursum sita ipsos Hungariæ fines pene attingens. Lazius citatus eam esse putat, cuius sub aquarum nomine in suo Itinerario Antoninus meminit, sed has, utpote Vindobonæ propinquas, Austriae Badenæ alibi melius applicimus. Tolerabilius conjicere videtur Cluverius, cum eandem alteri loco substituit, quem idem Antoninus Sallam vocat, atque inter Sabarium, & Haclitanum, quod Rakelpurgo convenit, fere medium collocat: id ipsum quoque probabiliter intellexit Ptolomæus, (a) Salam inter Superioris Pannoniæ Urbes annumerans.

(a) Lib. 2.  
15.

## GESSACES.

**G**essaces Montis nomen est à Trebellio Polione in Galieni Imperatoris Vita memorati, quem Lazius Geffacum appellans eundem facit cum Styriaco vulgo Schekel dicto, & adfitos prope Græcium montes proceritate sua longe superante; sed Trebellium ipsum inspiciamus ita scribentem. Galienus interea vix excitatus publicis malis, Gotthis vagantibus per Illyricum occurrit, & fortuito plurimos interemit. Quo comperto Scythæ facta caragine per montem

Geffacem fugere sunt conati. Omnes inde Scytha Marcianus varia bellorum fortuna agitavit &c. Ex his itaque infert Lazius Geffacum nusquam aptius reperiri, quam in monte Schekel, quod ut rudioribus facilius persuadeat, Illyrici loco Dalmatiam, multo minus patentem, subrogat, fugamque in Pannonias factam subjungit; verum neque his fulcris opinioni suæ undique vacillanti satis consuluit; valde siquidem hallucinatur, dum veluti indubitatum prætendit, nullum aliud, quam per Styriam ex Dalmatia in Pannonia iter eligi potuisse. Certe ex Ptolomæo alias allegato perspicuum est, montem Schekel veteri Cettio includi, Pannoniam a Norico, non a Dalmatia dirimenti. Ergo ne, obstrepent nonnulli, in dubium revocatur, celeberrimum montem Schekel Latinorum Geffacum esse, quod tamen jam per omnium ora, & calamos impune volitat? omnino: gravius quippe mihi accideret genuinæ veritatis, quam popularis auræ detrimentum. Porro citius apud me fidem inveniet Lazius, dum enarrat multa Romanae vetustatis monumenta in hujus montis dorso, ejusque vicinia offendit, quibus tamen perscrutandis diutius immorari non lubet, ne sagæ, quas magno inibi numero latere, fama est, sævam interim provocent tempestatem.

## GONNAVICUM.

**G**Onnavicum vulgo Gonnawiz Inferioris Styriæ Oppidum 15. milliaribus Meridiem versus Græcio distat; in hujus Arce Meriano (a) Topog. teste (a) rarus scaturit fons, qui in Oppidum defluens nunquam crescit, aut minuitur, sed eadem semper aquarum mensuram defert; sæviente hyeme calidus, ardente e- contra Syrio frigescens. Memorant præterea historiæ anno 1473. Turcas hucusque penetrasse; anno vero 1515. Rusticorum seditionem, quæ & Carinthiam, & Salisburgen- se Dominium tumultibus implevit, ortum suum inde duxisse.

## GÖSSENSE COENOBIUM

**G**össense sacrarum Vírginum D. Benedicti regulam sectantium Cœnobium opulentia, ædificii splendore, atque antiquitate per celebre, in superiori Styria, vix uno ante Leobium lapide, dextro Muræ littori incumbit. Ejus natales ex manuscriptis ipsius Monasterii documentis desumptos sic ferme describit Schonleben: (b) sub annum sci- Carn. part. licet 996. B. Adula Batwini Dynastæ vidua in paterno quodam Castro Comitatus Leobensis una cum filia Kunigunde divinis rebus inten- ta, cum aliquando propinquum col- lem de more confundisset, inter-

num Dei monitum percepit, quo ad opes suas divino cultui per alicujus Cœnobii fundationem impen- dendas stimulabatur; illique confes- tim obtemperans detractum e capi- te velum auræ committit, ut ex ejus casu statuti operis locum desig- gnaret: delapsum ad Muram ve- lum supra fluentes aquas hærebat immotum, quod illa pro cœlesti nutu interpretata, novo alveo ef- fosso fluvium avertit, ibique Mo- nasterii fabricam inchoavit, quod Natæ cœli Reginæ, Divoque Andreæ Apostolo dicari voluit: ejus dotem plurimum auxere Aribus Mo- guntinus Antistes B. Adulæ frater, vel filius, ac D. Henricus Impe- rator integrum vallem, cui Trageff nomen, cum omnibus juribus ei- dem elargitus. Absoluto ædificio Beata Fundatrix nobiles collegit pu- ellas, quas ad religiosam vitam efformavit, & filiæ suæ Kunigundi tanquam primæ loci Abbatissæ sub- jecit, ut reliquis vitæ diebus ex- actius Deo vacaret, post obitum in Parthenonis Templo tumulata, ubi & memoratum superius velum ad perpetuam prodigiæ memoriam adhuc hodie asservatur. Kunigundi vita functæ subrogata est in Ab- batissæ munere Adelheidis pietate illuſtris, cuius cor, tumulo instau- rationis ergo post aliquot secula reſerato, in coralium transiſſe intra reliqui corporis cineres reper- tum est, & Cæſari Maximiliano transmifſum. Subjacet huic Cœno- bio

bio vetustum Sacellum, quod in via Leobium ducente, supra Muræ scopulum obviat, a S. Leone IX Summo Pontifice D. Owaldo, aliisque Cœlitibus consecratum.

## HART BERGA.

**H**artbergam vulgo Hartber g Inferioris Styriæ Civitatem ad amnem Lauffniz sitam Merianus  
 (a) Topog. (a) ex Lazio eandem censet cum  
 Styr. antiqua Urbe Heorte, cuius mentione  
 (b) Lib. 7. apud Strabonem (b) de Scordiscais  
 populis Istri accolis differe ntem  
 his verbis habetur. Quidam etiam  
 Insulas habebant Scordisci; eo autem ma-  
 gnitudinis aucti sunt, ut usque Illiricos,  
 & Pœonicos, & Thracios proiecti sint  
 terminos. Complures igitur jacentes in  
 Istro Insulas occupavere. Ipsi etiam Ur-  
 bes habuere Heortem, & Capedunum. Ex  
 quibus judicet eruditus lector, utrum Lazianæ sententiæ subscriben-  
 dum sit, ego enim hoc unum adjiciam, Lazio videlicet Heortis  
 nomini vocem Mons addere, cuius tamen nullum in Strabone vestigium;  
 eo opinor consilio, ut Hartbergæ vocabulum, cuius secunda pars montem Germanis sonat, inde profluxisse validius suaderet.

## JUDENBURGUM.

**J**udenburgum vulgo Judenburg Superioris Styriæ Urbs, quæ ejusdem Provinciæ Metropolis apud Merianum audit, elevato ad

præterfluentem Muram clivo insi-  
 stit, unde sat amplam despicit pla-  
 nitiem, inter editos undique mon-  
 tes quovis anni mense nivibus  
 albentes fecus fluvium extensem.  
 Hinc Græcio 14. milliaribus distat,  
 si per aquam; 8. vero, si per Al-  
 pes iter suscipiatur. Urbem hanc  
 antiquum Virunum esse a Ptolo-  
 mæo, (c) Plinio, (d) Antonino, (c) Lib. 4.  
 & Peutingeriana Tabula notatum c. 14.  
 conjicit Bilibaldus Pirckeimerus (d) Lib. 3.  
 in Germaniæ explicatione apud c. 24.  
 Schardium excusa: verum non con-  
 sonant itinerum intervalla; longius  
 enim Aquileia abest Judenburgum,  
 quam absit in Antonini Itinerario  
 Virunum. Aliter proinde divinat  
 Schönleben, (e) & ab Iduno, quod  
 Ptolomæus in Norico recenset, Ju-  
 denburgum derivat, cui utcunque  
 favet nominis affinitas, & respectus  
 ad Virunum, seu Frisacum in eo  
 consistens, quod Idunum Boreæ  
 magis ab eo authore admoveatur,  
 & non nisi unica inter has duas Ci-  
 vitas collocetur, quæ tamen omnia  
 sententiam hanc oppido dubiam  
 adhuc relinquunt. Illustrior inte-  
 rea, & antiquior ea origo videtur,  
 quam si a Judæis deducatur, ac si  
 illi hanc Urbem prius inhabita-  
 fent, aut plane condidissent, quod  
 ex sola vulgi traditione constat fa-  
 bulas sæpius, quam historias refe-  
 rente; neque huic multum suffra-  
 gantur Civica insignia, quæ teste  
 præcitatæ Schönleben Judæum re-  
 præsentant, eorum siquidem inven-  
 (e) Car.  
 An. app.  
 c. 5 §. 3.

tio recentioris ævi est, ac post vocabuli mutationem instituta. Unum Urbis latus fere occupat Cæsarea Aula paucis abhinc annis renovata, cui proximi sunt cum suo Cœnobio & Templo Minores Observantes, præter quod, & Parochiale aliud extat D. Augustino sacrum cum annexo Societatis Jesu Collegio, & Tertiæ Probationis Domo à Comite Balthasare, & Comitissa Ursula a Thonhausen fundatis. Extra muros autem in ea declivitate, quæ ad Muram dicit, Sanctimoniales degunt D. Claræ institutum profientes, quarum Monasterium Paradisus appellatur.

## KAPFENBERGA.

**K**apfenberga, vel uti Gerardus de Roo icribit, Cappenberga vulgo Kapfenberg Oppidum est cum editiori Arce 7. milliaribus Græcio dissitum, quod Lazius, antiquitates undique ad nauseam usque corradens, Scordischorum Capedunum putat, sed qua veritatis specie ex supra allato Strabonis textu colligere, eruditis licebit. Inclaruit hoc Oppidum ob acrem pugnam anno 1291. in ejus pomœriis consertam inter Fridericum Stubenbergicum, & Hermannum Landenbergicum, qui Alberti Austriæ Archiducis postea Imperatoris partes tuitus, hostem diu strenue dimicantem, & tandem a propriis militibus desertum ad sui deditiōnem coëgit.

## KNITTELFELDIA.

**K**Nittelfeldia vulgo Knittelfeld Civitas est ad Superiore Styriam pertinens, Muræque fluvio adjacens inter Judenburgum, a quo duobus, & Leobium, a quo 4. milliaribus recedit.

## LAMBERTINUM COENOBIUM.

**L**Ambertinum, seu S. Lamberti Monasterium ædificii amplitudine, ac splendore sane magnificum ad Carinthiæ limites, cui olim accensebatur, quam proxime accedit, atque in edito quidem attollitur situ, sed ab altioribus montium jugis coronato. Religiosis D. Benedicti affeclis illud condidit, si Bucelino credimus, Henricus Carinthiæ Dux, ejusque filius Marquardus: at recentissimus quidam anonymous Hermanno Marquardi filio idipsum adscribit, quorum primo maxime annuere videtur Megiserus, dum ait Marquardum Lambertinam fundationem restaurasse. Circa annum autem, quem 1073. assignat, cum anonymo optimè consonat, Hermanni primi Abbatis mortem ad annum Christi 1109., gubernii vero 36. referente; sed nova de Hermanno consurgit lis; hunc enim anonymous e Prioratu Monasterii S. Blasii in Hercynia sylva ad id muneric evehit, quod

quod verosimilius elucet; Megiserus econtra cum Maruardi filio eundem confundit. Confirmavit hoc eximiæ pietatis opus Conradus Cæsar, Summique Pontifices amplis privilegiis cumularunt. Inter Abbates excelluere Germanus a Trüschen, qui fratris sui Eberhardi II. Salisburgensis Antiftitis patrocinio, Infulæ honorem sibi, suisque successoribus obtinuit, vita functus anno 1260, & Joannes Fridperger, qui ob vindicata Monasterii jura secundi fundatoris nomen promeretur, e vivis sublatus anno 1358. Porro summopere memorabile, si ita res se habet, atque honorificum est, quod præcitatius Bucelinus suis commentariis mandavit, quodque justis de causis ejusdem authoris verbis, prout sequitur, exponam: *Fuit Divi Lamberti Cœnobium absque controversia Archiducatus quondam Carinthiæ Archisterium a Romanis Pontificibus, Cæsariis, Ducibus, & Principibus, ob singularem religionem summo in pretio habitum, & certatim ornatum, ac locupletatum, ita ut maxime etiam Principes Cœnobii tanti feudatarii essent, uti ex archivo illic ipsi exscriptimus: ita in feudum accepit ab Henrico Abbe S. Lamberti Serenissimus Archidux Ernestus Leobii in praesentia Georgii, Abbatis Admontensis, &c. Dominium, & munitionem Tirnstein prope Frisacum, munitionem Newenmarck prope Graßlupp, Judenburgensem Civitatem, munitionem Eppenstein, oppidum Voitsberg, munitionem Bruck, &c. si-*

*militer A. C. 1389. Albertus Archidux præsentibus Hugone Comite Montfortio, &c. prædicta Dominia, Castra, atque Oppida in feudum accepit a Rudolpho de Liechtenegg Abbe (qui etiam Herr, und Fürst appellatur) uti in pergameno fidelissime omnia, atque authenticè consignata reperimus, atque descripsimus. Haec tenus Bucelinus, his subjungens 50. nobilium familiarum nomina, quæ aliquando feuda a splendidissimo hoc Monasterio acceptarunt.*

## LEIBNICIUM.

**L**eibnicium vulgo Leibniz 4. circiter milliaribus Græcio in Austrum abscedens inter munitiores quondam Styriæ Urbes florebat, utpote quod anno 1481. acrem Hungarorum obsidionem, qua a Matthiæ Regis Archistratego, cui nomen Maubitsh, cingebatur, diu elusit, donec ob annonæ defectum sæviente intus fame Civis quidam Christophorus Hammer nuncupatus ea adactus ad obsidentes profugerit, quibus cum abditum, minusque custoditum ad Urbem ingressum prodidisset, eorum aliqui per hunc clam irrepentes propriam portam invadunt, toto interim exercitu ad assultum advolante; quare capta ab Hungaris Civitas, sedeq[ue] vastata non nisi inter Oppida ab eo fere tempore recensetur. Effossam hic subinde veterum pecuniam Merianus testatur, quæ nonnullis antiquariis fam

sam præbuit Ptolomæi Muroëlæ inibi statuendæ. Leibnicio imminet Arx celsiori colli imposita consueta Seccoviensis Episcopi, & S. R. I Principis Sedes.

## LEOBIUM.

**L**eobium vulgo Leoben vetusta Styriæ Superioris Civitas, quam Mura Post brevem flexum secundo alluit, 8. milliaribus, si fecus flumen, 6. vero, si per montes calculus ineatur, Græcio abest Occatui propinquior. Nobilis huic olim suberat Comitatus, cui proprii Comites, ex vetusta Bavariæ corum Comitum ab Hohenwart, & Schrobenhausen prosapia diu dominabantur, donec eorum postremo in Palæstina, quo belli sacri ergo concesserat, a Saracenis intercepto, ad Conradum Frisingensem Præfulem Sigifridi, & Ottonis Comitum ab Hochenwart uterinum fratrem tuerit devolutus. Hic vero accepta a Bernardo Carinthiæ Duce magna pecunia vi, Leobienzen Comitatum anno 1246, eidem vendidit, sive cum Carinthia, & Styria Alberto Austriæ Archiduci postea Imperatori cessit, quamvis haud sine armorum strepitu, cum Otto Bavariæ Dux, & Conradus Salisburgensis Antistes seditionem contra Archiducem in Styria ortam promoturi Leobium anno 1291. junct's viribus occuparint, quæ Austr. l. 2. Gerardus de Roo (a, hanc Urbem

Leubenum vocans uberiorius explanat. Viget istic hodie ferri commercium ex descriptis supra fodiinis advecti. Tempa inter Muros bina, unum nempe ad PP. Dominicanos, alterum vero D. Francisco Xavero sacram ad Jesu Societatem spectans cum adjecto Collegio in antiquatæ Archiducalis Aulæ situ exstructo, & a Ferdinando II Cæsare ante aditum Imperium fundato. Totidem pariter extra muros parochialia, quorum uni Civitas, alteri Suburbium Mura fluvio ab ea divisum subjicitur, in quo PP. Capucinorum Cœnobium paucis abhinc annis exstructum insuper spectatur.

## LUETENBERGA.

**L**uetenbergam vulgo Luetenberg per celebre Inferioris Styriæ Oppidum Mura fluvius non procul ab Hungariæ confiniis irrigat, eique famam conciliat nobilissimum vinum, quod totius Provinciæ, & facile totius Germaniæ fortissimum ex circumfatis collibus legitur, ita ut quidam scribere non ambigant, sua illud præstantia Creticum æmulari.

## MARBURGUM.

**M**arburgum vulgo Marburg, vel Marchburg Inferioris Styriæ Urbs in læva Dravi fluminis ripa amœno circumdatur solo, &

(a) Ann.

& novem Græcio millaribus ver-  
sus Austrum removetur : pro cu-  
jus elogio miram antiquitatum far-  
raginem congregat apud Schönle-  
ben Lazius , cohortem nimirum  
Marianæ degentem , cuius Tribu-  
num sub dispositione Viri Spectabilis Du-  
cis Provinciæ Valeriæ Ripensis Notitia  
Imperii recenset ; Marianam a co-  
dice Romanarum Præfecturarum  
inter Valeriæ municipia conscrip-  
tam ; Jornandis Castrum Marte-  
num Sarmatarum Sedem ; & quæ  
ipse in Ammiano Marcellino sibi  
finxit Marciana Castra : hæc ita-  
que omnia , licet prorsus diversa ,  
ob nominis consonantiam , quam  
ille solus percipit , in unum con-  
flat Marburgum . A suis olim hæc  
Civitas regebatur Comitibus , do-  
nec Ottocarus III. Styriæ Marchio  
a Bernardo Comite eandem com-  
paraverit . Patuit postea , anno sci-  
licet 1532. , Solimanno Turcarum  
Imperatori , qui ea statim derelicta  
Albam Græcam suas rursum copias  
reduxit : venusta admodum urbs  
est populo frequens , amænitate si-  
tus conspicua : pater Paræciale tem-  
plum , Religiosæ S. Francisci Ca-  
miliae duæ , Capucinorum scilicet  
& Minoritarum illam incolunt :  
civium quoque Xenodochium | funda-  
tione instructum habet opima :  
anno etiam superiori Societatis Je-  
su Patres huc accessere : unus e  
Sociis , ex Comitibus de Purgstal  
natus , ultimusque Stirpis suæ hæ-  
res opimam Societati transcriperat

*Topogr. Austr. P. I.*

hæreditatem , erigendo collegio uni ,  
ubi e re Divina magis esse superio-  
ribus visum foret : placuit præ om-  
nibus Marburgum tum quod ab aliis  
domiciliis esset remotissima , tum  
quod vicini agri abundantissimam  
præberent , laboribus Apostolicis  
messim . Agitata diu res fuit , sem-  
per obices unde minime exspecta-  
bantur objecti ; donec consentien-  
te Augustissima , ingenti civium gra-  
tulatione , tandem anno proxime  
elapso ædes in foro amplissimæ ,  
quæ excellentissimi comitis de Khü-  
enburg erant , in Societatis usus coë-  
mptæ , primos accepere hospites ; in  
exstructo tumultuario opere Sacel-  
lo , divinis statim vacari cœptum ;  
scholæ juventuti apertæ ; magno ad  
sacras æque ac litterarias palestras  
concursu ; atque his etiam initiis pa-  
tet , quam prudens fuerit concep-  
ta spes , de abundantissimis fructi-  
bus quibus operariorum labores  
coronabuntur .

## MURÆPONTUM.

**M**Uræpontum vulgo Bruck an  
der Muer commoda Urbs 6.  
milliaribus Græcio diffita a Muræ  
fluvio , cui adjacet ponte , nomen  
desumpfit , atque eadem a pluribus  
censetur cum illa , quæ in Peutin-  
geriana Tabula Ad Pontem indigi-  
tatur . Ad Superiorum , an ad In-  
feriorum referenda sit , litigant Geo-  
graphi . Præter Parochiale Tem-  
plum , cui Archidiaconus præest ,

O

bina

bina alia adfunt a sacris Minorum Observantium, & Capucinorum Ordinibus administrata. Commendanda hic est civium in Principem fidelitas, atque in hostes fortitudo, quam pro Alberto I. Cæsare in strenua Urbis propugnatione contra Ottonem Bavariae Ducem, & Conradum Salisburgensem præstita anno 1291. exhibuerunt. Prope Civitatem illabitur in Muram amnis, cui Merz nomen, postquam amœnam secuit vallem, inde Marziam dictam, & usque ad Austriae terminos pene protensam.

### MURAVIA:

**M**Uravia vulgo Murau Superioris Styriæ Civitas ad Salisburgensem ditionem valde accedens, a Mura fluvio in duas partes discinditur, quæ pluribus super eum ductis pontibus junguntur. De (a) Vind. Norc. c. 5. ex Peutingeri Mappa præcedenti Urbi a cæteris adjudicari retuli, jam olim videlicet floruisse, & Pontis nomine ibidem indicari, hocque ex itinerum ductu satis inferri opinatur; at cum ipsam Mappam vere nobile antiquitatis cimelium consuluerim, nihil reperi, quod unipotius, quam alteri faveat sententiae; Muræ tamen fluvio disputatum locum adhæsisse pronum est. Muraviæ in editiori loco eminent Parochiale Templum, sed adhuc altius ascendit splendida Arx vicino

infedens colli: cui in adverso fluvii latere respondent alterius Arcis rudera Ottocari Bohemiæ Regis jussu prostratae.

### NEOMONTANUM. COENOBIUM.

**N**Eomontanum Cisterciensis Ordinis Monasterium, vulgo Neuberg dictum, & inferiori Austriae fere contiguum, fundatorem suum veneratur Archiducem Ottinem postremum Alberti I. Imperatoris filium, qui cum anno 1339. mortem oppetiisset, in eodem humatus una cum binis consortibus conquiescit.

### OBDACUM.

**O**bdacum vulgo Obdach Oppidum est Superioris Styriæ Arce instructum ad Admontense Coenobium pertinente, in quo vetustam Bedaci Urbem a Ptolomæo (a) in (a) Li. Norico annumeratam etiamnum c. 4. perserverare autumat apud Merianum (b) Lazius, cui vocabuli (b) Topog. affinitas familiaris hujus authoris Styr. Achilles multum quidem suffragatur; sed cum Ptolemæi Bedacum ex situ, aliisque circumstantiis idem omnino videatur cum Peutingerianæ Tabulæ & veteris inscriptionis Bidajo, & alterius inscriptionis Badaco, quod & Cluverio certum est atque in his non nisi 13., vel ad sum-

summum 19. Passuum millibus ab Oeno fluvio separetur; cætera, quæ in definienda veterum locorum statione præ oculis haberi debent, Obdaco non congruunt, utpote a prædicto fluvio longe remotiori.

## PETOVIUM.

**P**Etovium vulgo Petaw Urbs est inferioris Styriæ a Dravo fluviо irrigata, & 12. milliaribus Græcio absens, cui servatum a primordiis nomen hanc parit felicitatem, quod genuina ejusdem antiquitas a nemine in dubium revoctur; a Romanis siquidem aliisque veteribus scriptoribus tenui nominis discrepantia enunciatur: Antonini, & Peutingeri Itineraria Patavionem, vel Poetovionem exprimunt. Tacitus (a) Petovium vo-

(a) Hist. cat, & Legionis decimæ tertiae hiberna ibidem statuit. Ptolomæus  
Li. 3

(b) Li. 2. 1520. editione Petobium inter Pan-  
noniæ Urbes recenset. Episcopali quondam dignitate hanc Urbem

c. 15. (b) denique in Argentoratensi anni 1520. editione Petobium inter Pan-  
noniæ Urbes recenset. Episcopali quondam dignitate hanc Urbem claruisse colligit ex D. Hieronymo

Megiserus (c). Cætera, quæ memo-  
ratu digna isthic evenerunt, pau-  
Car. 1. 3. c. 8.

(c) Ann. ratu digna isthic evenerunt, pau-  
Car. 1. 3. c. 8.

Octavianus Augustus Imperator cum Illyricum bellum gereret, Petovium, quod in Appiano Setovia legitur, valida obfidence circumdedit; quæ magnam adjacentium populorum vim in obfessæ Urbis subfidiū concitatavit; quare Augustus promoto

contra eos exercitu prælium iniit, quo durante lapidis ictu genu sauciis, multis diebus decubuit, donec curato vulnera Romam regredi parans, belli molem una cum Legionibus Statilio Tauro inibi relicto commiserit, cujus tamen gesta prorsus intercidere. Anno autem post Christum 378. gravior calamitas Urbem opprescit, siquidem testatur Schönleben, (d) Valen- (d) Ann.  
Car. p. u. tem Pseudoepiscopum Petoviensem cujus mentio in Actis Concilii A- quileiensis (e) reperitur, a popu- (e) To. 1.  
lo ejectum, ut injuriam ulciscere- Cnc.  
tur, Gothis tum Pannoniam infestantibus, patriam turpiter tradiisse. Quid vero illi deinceps acciderit, in obscurō est usque ad Ottonem II. Cæsarem, qui, Megiserus (f) teste, Friderico Salisbur- (f) Ann.  
gensi Antistiti anno 957. ad eam di- Carin. 1. 6  
gnitatem evecto Petoviensem Ec- q. 94.  
clesiam cum magna Urbis parte contulit; sed cum anno 1480. Mat-  
thias Hungariæ Rex illam occupas-  
set, Fridericus III. Imperator Rege defuncto eandem cum reliqua Pro-  
vincia ad se integre attraxit, Salis-  
burgensis Ecclesiæ juribus sub Ber-  
nardo tunc Præfule legitime extin-  
ctis. Parva quidem nunc Civitas est,  
bina tamen Monasteria præter Pa-  
rochiale Templum complectitur ad  
facros Prædicatorum, & Minorum  
Conventualium Ordines pertinen-  
tia, quibus & PP. Capucinorum  
Asceterium extra muros situm ad-  
jungendum est.

## PÖLLENS E COLLEGIUM.

**P**öllense Canonicorum Regulam D. Augustini Collegium in Inferiori Styria non procul Hartberga fundatum a Joanne L. Barone de Neuberg postremo hujus stirpis surculo, nactum est primum Præpositum Udalricum de Trautmansdorff, qui post octennium in gubernio impensum, anno 1512. mortalem hanc vitam cum æterna commutavit.

## R A I N A.

**R**AINA Urbecula est in Boreali Savi fluminis littore, quam Merianus (a) Inferiori Styriæ adscribit, & ad Salisburgensem Ecclesiam olim spectasse, Megiserus (b) Ann. (b) testatur, funestam cladem sub-Carin. l. 10. c. 20. jiciens ab Achmete Turcarum Duke anno 1475. in ejus conspectu Christianis numero longe inferioribus, & se diu strenue tuentibus illatam.

## RAKELSPURGUM.

**R**Akelspurgum, seu uti aliqui malunt Racospurgum, vulgo Rakespurg, quod 8. circiter infra Græcium milliaribus Mura præterfluit, inter nobiliores Styriæ Urbes censetur, sed vini præstantia reliquas antecellens. Antiquum

Hæclitanum, quod medio fere itinere Sallam inter & Pætovionem ab Antonino statuitur, agnoscit in hac Civitate Cluverius, (c) tam sicut, ac viarum ductu innixus, quam aliqua vocabuli consonantia. Supicatur enim Ræclitanum potius inibi legendum, quam Hæclitanum. Verum posterius argumentum ei minime favere suadet Rationarium Styriæ anno 1267. confectum, & a Lambecio (d) excusum, cui non Rakelspurg inscribitur, sed Ratgersburch, quod quasi Ratgeriburgum apte interpretatur Schönleben; unde evanescit omnis cum Ræclitano convenientia. Antequam Rakelspurgum ad Provinciæ Principem devolveretur, Bildonensis Dominis paruisse narrat Merianus. (e) Commodis hodie habita- (e) Topog. tur ædibus, licet iteratis incendiis Styriæ. sæpius defœ datum, præter quæ aliam sustulit calamitatem anno 1480. a Matthia Hungariæ Rege una cum Petvio occupatum. Felicius tamen in ejus pomœriis contra Turcas pugnatum, anno nimirum 1418. quo Ernestus Austriæ Archidux de iis primo in hanc regionem irrum- pentibus glorioſissimam retulit vi- etoriam, viginti circiter hostium millibus in eo conflictu prostratis.


## RETLSTAINUM.

**R**Etlstainum, vulgo Retlstain, oppidum a rubris quibus vicina terra scatet lapidibus, nomen acce-

accepisse videtur: ad finistrum muræ latus jacet: a Græcio sex miliaribus in septentrionem distans: non alio memorabile titulo, quam, quod vicinis, tota Styria, altissimis montibus nomen dederit, in quibus celeerrima hæc Draconum Serpentumve spelunca cernitur: jacet illa ad oppositum muræ latus: eam anno 1719. ingressus est Heræus anno vero 1752. Pater Franz, cum ex jussu Augustissimæ lustratis Tyrolensibus fodinis, Viennam rediret; ex quorum observationibus hæc habemus collecta a P. Christiano Rieger, ultimi hujus in itinere Socio. Montes sunt, quibus hæc caverna obtegitur, prærupti admodum, altique: paries muræ obversus, licet sextam vix totius montis altitudinem æquet, in 720. pedes eductus est: supra hunc est ostium cavernæ quæ Kugellucke vulgo dicitur, & 2839. passibus a radice montis distat: eminus informe triangulum exhibet, cominus quadratum esse deprehenditur 180. pedes in longum latumque patens: hac plana primum facilique via in ipsam cavernam iter est: focus occurrit primum excoquendo olim nitro destinatus: calcinoso hinc solo, ad deciduum pervenitur fontem; unde filo opus est ulterius penetrare volentibus, ne per implexas, ut sæpius factum est, viarum ambages vera deperdatur semita: interioris hinc cavernæ muri stalactite, seu aqua striarum ad instar in petras

obdurata, vestiuntur. Ad ducentesimum ab ostio passum, ingentes deprehenduntur lapidum cumuli fortuito quasi congesti, licet & immanis illorum moles & mirus sub terram situs rem prodigiosam faciat, hinc in angustias via deflectere incipit fierique horribilior, pendentibus hinc inde abnormibus scopolis, & lubricante ex humiditate vestigio, licet sparfi occurrant copiosi lapides ex cærulecente marmore pulcherrimo venis sanguineis interstincto quod verosimilem facit opinionem eorum qui arbitrantur, marmor lapidesque hic olim erutus: tantas hinc cavernas factas, congestosque passim lapides, effossis avectisque optimis tanquam minus utiles relictos. Ad 1540. passum cavernam lustravit Heræus; nec satis exprimere potuit admirationem qua percussus fuit, cum stupenda hie viderit naturæ opera, areas altitudine fornicatoque opere maximas, lapides qui mirabiliora exhiberent quam quidquid in Gothorum sepulchralibus exhibet antiquitas, miram aëris naturam qua fit ut ad exiguum etiam distantiam vocis sonus excipi nequeat: ulterius autem cum suis pervafit P. Franzius, atque in aliam penetravit cavernam, amplitudine, primæ, parem, structura non minus admirabilem, post quam, calle difficiili æque ac periculoso, in minorem aliam descendens est; in quam jam olim non tantum naturæ scrutatores curiosos,

sed & Principes ipsos penetraffe obſervavit, ex nominibus quæ ru- pi inscripta legit: in dextra enim parte invenit.



addita erant tria alia nomina, sed quæ arte nulla legi potuerunt: aditus erat annus 1515. inscriptum habebatur quoque diligentissimi investigatoris nomen I. R. anno 1750. Sub Rudolfi nomine, ad dextrum magis latus, habebatur distinctius aliud

Fridericus dux Austræ affuit anno 1409. die 3. Junii Alia scuta signaque, in pariete obſervata fuerunt: quod autem in cavernis est mirandum maxime, est ingens ossium copia, ſeu huma- norum ſeu animantium quæ partim in lapides converfa, hic reperiuntur & quorum pulvis comminutus prætentiffimam præbet morbis variis, comitiali præcipue medelam: Unicornium potifimum tantæque magnitudinis humana eruuntur, ut gigantum etiam, caverna hæc, apud vulgus, ſepulchrum audiat: diſputant eruditæ, hæc unde illic in tantum collecta cumulum veniant: plerique autem id tribuendum mutationi illi quam exundantes deluvii tempore aquæ cauſarint: Heraeus exiſtimat. vera non eſſe oſſa, ſed naturæ lufus, atque ex margā formatos partus.

## RO TEN MANIUM.

**R**Otenmanium Vulgo Rotenmann, aut Rotenmon Civitas est Superioris Styriæ in valle, vulgo Paltenthal 14. circiter mil- liaribus Græcio diffita, quam Montanis Caſtris ab Antonino memora- tis ſubſtituit apud Merianum (a) La- (a) Topog. zius, itinerum ratione utcunque ad Styriæ. ſtipulante. Meminit illius Gerar- dus de Roo, (b) ad annum Scili- (b) Germ. cet 1291., quo Otto Bavariæ Dux, Sac. p. 2. atque Conradus Salisburgensis Praef- ful, indicto in Albertum Austræ Archiducem bello, concordibus armis expugnarunt. Nobilitatur Rotenmanium ab eximio Canonico- rum Regularium S. Auguſtini Col- legio, quod condidit anno 1455. Fridericus III. Imperator, Joanne Jung a Dinckbichl in primum Prae- ſtitum inaugurate.

## R U N E N S E. COENOBIUM.

**R**Unense Ciferciensis Ordinis Cœnobium binis milliaribus Græcio absens, cuius fundationem Friderico I. Cæſari cognomine Oenobarbo, Bucelinus adſcribit, piæ Leopoldi Styriæ Marchionis mu- nificentia deberi didici ex recenti quodam anonymo authore, cui hac in parte libentius adhæreo, annum tamen, nempe 129., quo is con- ſummatum a ſuperſtite Leopoldi con-

conforte Sophia ejusque filio Ottocaro opus subnecit, ejusdem primordiis a parente positis mallem assignare, cum ex chronologica Marchionum serie liquidum videatur, prætenso adhuc anno Leopoldum supervixisse, quod ex ipso etiam anonymo colligi fas esset, cum Leopoldi filius Ottocarus idem omnino sit, qui anno primum 1165. Ducali dignitate a Friderico Oenobarbo donatus ab eodem authore refertur. Cœnobii gubernacula primus tractavit Abbas Gulacus de Dinkhenstain natione Franco, ex cuius successoribus binos Episcopales Infulæ fibi vendicarunt, Lavantina scilicet Almericum Graffendorffer, & Neostadiensis Martinum Duelacker, qui jam prius Calipolensis Episcopi honorem cum Abbatis munere copularat, secundi Fundatoris nomen suis meritis insuper adeptus.

## SCHLADMINGA.

**S**chladminga vulgo Schlädming superioris Styriæ Oppidum Salzburgenses fines secus Onasum attingens veteri Antonini Sabatincæ congruere Lazio videtur. Funestissimum est, quod a Michaële Gruber tumultuantum Rusticorum Antefignano anno 1525. istic patratum narrat Megilerus, (b) praecari. l. c. cipuam videlicet Carinthiæ ac Styriæ nobilitatem, quæ prælio infeliciter cum rebellibus conserto in

(b) Ann.  
19.

fugam acta huc confluxerat, inopino sub auroram adventu ab eo oppressam, aut gladio majori ex parte interiisse, post quam enormem lanienam superveniens Nicolaus Comes a Salm, abactis Rusticis Schladmingam incendit, muris, que nudavit. Qua insuper occasione Civitatis jure, quo olim fruebatur, abolito, eam Oppidis tunc primo annumeratam existimat Merianus.

## SECOVIUM.

**S**Ecovium vulgo Seckaw Superioris Styriæ Oppidum gemino gaudet celebris sui nominis argumento: horum unum est nobilissimum Canonicorum Regularium S. Augustini Collegium ab Adalramo Comite de Waldegg anno 1140. fundatum, Werner Geiller in primum loci Præpositum assumpto. Ejus Templum illustrant plurim Austriæ Archiducum sarcophagi, inter quos peculiarem exi-  
gunt mentionem Carolus Styriæ Dux anno Christi 1590., ætatis ve-  
ro 50. vita functus, atque Maxi-  
milianus Ernestus Ordinis Theuto-  
nici Commendator anno 1616.,  
ætatis 33. e vivis sublatus. Alterum  
est Episcopatus ab Eberhardo II. Archiepiscopo Salzburgensi,  
annuente Honorio III. Summo Pon-  
tifice, anno 1220. ibidem institutus,  
cujus cathedralm primus con-  
scendit Carolus Frisacensis Præpo-  
fi-

situs 37. jam noctus successores, qui per maximam Styriæ partem Salisburgensi Archidiœcesi insertam Vicarii Generalis auctoritate pollent, & S. R. I. Principis dignitate his temporibus fulgent.

## S E I Z E N S I S CARTHUSIA.

**S**eizensem Carthusiam in Inferiori Styria Petovium inter, ac Cileiam sitam, non undecimo seculo, quod recens quidam author scriptum reliquit, sed duodecimo extruxit Ottocarus ab anno 1165. primus Styriæ Dux, qui lepra corruptus permisso socero suo Leopoldo Austriæ duci Provinciæ Dominionio, in eandem se contulit, ubi Religiosum amplexus institutum pia morte conquievit. In hujus saltem loci districtu, si non plane hic, quod Cluverio arridet, extitisse veterem Antonini Urbem Ragandonem, quam apud Rohitsch seu Ragatz Schönleben collocat, ex medio ferme inter Cileiam, & Pœtovionem situ probe conjici omnino videtur.

## SLAVOGRÆCIUM.

**S**lavogræciū vulgo Windischgrätz Inferioris Styriæ Urbs à Carinthiæ confiniis non procul abscedit, in qua Merianus (a) Lazi-

(a) Topog.  
Styriæ.  
(b) Lib. 2. c. 15.

Vinundriam se deprehendisse opinatur, sed aliud conjecturæ argumentum adferre oporteret, quam infirmam unius syllabæ consonantiam. Interim vix ambigu potest, quin ea a Vindis seu Venedis populis, quas vulgus hodie Windisch appellat, aliquando fuerit, aut primo erecta, aut instaurata. Turcarum insuper copias anno 1473. hucusque penetrasse præcitatus Merianus affirmat.

## S T A I N Z E N S E COLLEGIUM.

**S**Tainzense Canonicorum Regulare S. Augustini Collegium a Comitibus a Wildan originem suam ducere fertur, quo autem modo, vel anno, me hactenus latet.

## VOITSPERCA.

**V**Oitsperga Urbecula est ad annum Kainach tribus milliariis Græcio dissita, quæ si Meriano (c) credimus Lazio sectanti, (c) Topog. magnam præfert vetustatem, & Styriæ. Styriæ totius antiquissima censeri debet; Provinciæ insuper Metropolis, antequam ad eam dignitatem Græcensis Civitas evehernetur; quinimo Romanorum Viana, cuius Plinius (d) in Norico meminit, (d) Lib. 3. memoratis authoribus videtur. c. 24.

VORA.

# VORAVIENSE COLLEGIUM.

**V**oraviense Collegium non procul Hartberga Inferioris Styriæ Urbe Regularibus D. Augustini Canonis fundasse reperio Ottocarum IV. hujus Provinciæ Marchionem anno 1163., quo in primum loci Præpositum electus est Luitpoldus, 40. successores hactenus fortitus.

Styriam claudimus celebri disceptatione, quæ hanc Provinciam plurimum involvit, inter Geographos exorta: in quanam scilicet Norici, aut Pannoniæ plaga extensa fuerint Bojorum Deserta a Strabone, & Plinio memorata. Primi verba ex Lugdunensi anni 1557. impressione excerpta ita se habent

(a) Desitu (a): Cæterum Tiberius a lacu (de Bri-  
Orb, Li. 7. gantino, seu Constantiensi loqui-  
tur) unius diei progressus iter, Istri fons-  
tes aspexit. Ad eum lacum Rhæti paulu-  
lum adiungit, amplius Helvetii, & Vindeli-  
ci, & deserta Bojorum regio usque ad  
Pannonios. Quibus duntaxat perpen-  
fis, luculentum cuivis videbitur  
controversa hæc Bojorum Deserta  
à Vindelicia, & constantiensi lacu,  
qui hodie Podamicus, & vulgo Bodensee  
dicitur, per Bavariam, Carinthiam,  
Austriam, & Styriam ad Pannoniam usque procurrisse,  
ideoque subscribendum omnino es-  
(b) Rerum fe eruditissimi Velseni (b) judicio,  
Boj. I. 2. quod his terminis expressit: Princi-  
pes Boji monumentum in adversa ripa,  
Topograph. Aust. P. I.

ad ipsum statim Danubii trajectum posuere  
Bojodurum, qua Oenus Vindelicos, &  
Noricos interfuit Germaniæ Magnæ ob-  
iectos utrosque: magnus præterea circa a-  
gri modus, a Vindelicorum quippe finibus  
ad Pannoniæ Norici longitudine fusus,  
genti attributus est, quum ob eas, quæ  
postea rerum varietates consequitæ, Bo-  
jorum Deserta Strabo, & Plinius appel-  
lavere. Velsero ferme consonat a-  
pud Schönleben (c) Lazius sic (c) Carn.  
ibi definiens. Bojorum Deserta, que  
in mediterraneis ab Aniso fluvio usque ad  
Cetium montem excurrebant, &c. Ve-  
rum litem his omnibus movet Plinius  
egregius, & ipse author Straboni circiter coœvus, qui longe  
diversum Bojorum Desertis adstru-  
it situm, extra circumscriptos ab  
adductis hactenus scriptoribus fines  
ea penitus relegans. Noricorum  
enim Provinciam secundum illos  
plurimum occupabant, & cum ea-  
dem Orientem versus in Cetio mon-  
te definebant; sed a Plinio, (d) (d) Hist.  
facto ab hoc ipso Norici limite, nat. I. 3. c.  
initio, ultra Sabariam Pannoniæ 24.  
Urbem liquido explicantur. Pa-  
tebit id procul dubio, si sequens  
authoris textus attentius inspicia-  
tur: Noricis, inquit ille, junguntur  
Lacus Peiso, Deserta Bojorum: jam ta-  
men Colonia Divi Claudi Sabaria, &  
Oppido Sacarbantia Julia habitantur. Si  
itaque hæc Deserta Norico fuerant  
tantummodo contermina, seu illi  
jungebantur, manifesto infertur,  
extra Noricorum terras ea esse a  
Geographis inquirenda. Hinc præ-  
ci-

(a) De Vin. & Nor. c. 5. (a) citatus Schönleben, cui Cluverius favet, secutus vestigia Sabariensis Coloniae, quæ in iis Desertis juxta Plinium incolebatur, in sententiam abiit Velsoro prorsus adversantem, eadem scilicet Bojorum Deserta se deprehendisse arbitratu in eo Pannoniæ tractu, qui ab Ortiva Cetii montis parte Viennam Austriae a Petovio Styriæ divellit; Sabariam enim inter Pannonicas floruisse Urbes, a nemine, nisi in veterum fastis prorsus peregrino, disputatur. At cur aliqui ita Plinium amplectuntur, ut Strabonem excludant; alii autem ita a Strabone pendent, ut Plinium non auscultent? quasi vero nulla concordiae ratio iniri posset, nec ulla reconciliationis spes amplius affulgeret? Quod tandem emolumen pro Deserto digladiari? Si quid minimum uterque adversario cesserit, sublata erunt bella, firmata pax: imo ne id quidem fere necesse habeo ut binos hos authores prima fronte inter se pugnantes, in idem demonstrem unanimiter conspirasse. Dicantur igitur Bojorum Deserta Norici, pannoniæque terminos complexa, ita tamen, ut neutrā exhauserint Provinciam, nūquid tunc verum dixerit Plinius Noricis jungi Deserta? cum adhuc cultam ab iis populis regionem versus Occasum relinquam; neque a vero deviassse putabitur Strabo, dum afferit, Deserta ad Pannionam usque pertigisse, et si per

aliquam hujus partem ulterius promoveantur; idipsum enim Strabonem (b) per ea verba sibi voluis. (b) De si-  
se, ex alio ejusdem authoris loco tu Orbis  
affatim elucescit, ubi haec ait: 1. 5.  
Romani Bojos sedibus ejecerunt, qui, quum ad Istrum commigrasset, apud Tauricos habitarunt, bellum adversus Dacos gerentes, donec tota gens funditus fuit excisa. Agrum vero, qui ad Illyricum pertinebat, Desertum, ac pecoribus paucum vicinis reliquerunt. En Bojorum Deserta ultra Norici fines, ad Illyricum nempe, cuius tunc pars habebatur Pannonia, ab ipso Strabone protracta: neque plus pretendere videtur Plinius, cum allatæ ab eo Urbes modico intervallo a Norico abfuerint. Unum itaque supereft, a quo recedat Strabo, ne videlicet ea Deserta ita Brigantino lacui admoveat, ut alii populi ibidem descripti non intercesserint, ad quod, si reliqua probe conferantur, claro constabit eundem propendere. Demum qua ratione ea regio deserta squaluerit, alibi clarius indicat idem Strabo (c) ita, Cluverio in- (b) De situ rem enarrans: Res Geta- Orbis l. 7.  
rum antiquas mittamus. Nostra etate quæ gesserunt, haec sunt. Barebista natione Geta, quum imperium in gentem suscepisset, eam crebris adflictam bellis refecit, tentumque exercitatione, sobrietate, ac diligentia profecit, ut intra paucos annos magnum constituerit Imperium. Finitima- rum nationum plerasque Getarum genti sub- jiciens, quin ipsi Romanis jam formi- dabilis

dabilis erat, Istrum audacter transiens, Thraciūque ad Mucedoniam usque, & Illyricum populans. Gallos quoque Thraciūbus, & Illyricis permixtos evasit, Eojsque, & Tauriso: qui sub Critasiro erant, prorsus delevit. Et postea eodem libro: partem hujus regionis desertam reddiderunt Daci, debellatis Bojis, atque Tauricis Gallicis gentibus. Quid ego sentiam, amice lector aperui: si mihi assentiris, Styriam

universam in hæc Deserta conjicis: hanc quippe Provinciam ad orienti, & Pannoniæ campos & veteri Cetio communi utriusque meta se demittere jam superius ostendi: si vero alterutra ex prioribus opinonibus magis arridet, eadem de causa faltem aliquam Styriæ partem in iis Desertis reperies; elige, quod lubet.

## TOPOGRAPHIA DUCATUS CARINTHIÆ.

**C**arinthiæ ingredimur Provinciam, sylvarum, aut montium horrore nihil quidem Styriæ cedentem, sed plurimis tamen discissam vallis tritici, aliarumque frugum feracissimis. Altissima montium juga quatuor censemur a S. Udalrici, S. Helenæ, S. Viti, & S. Laurentii nominibus sacrata, quæ etiam adæquat, si non superat proceritate sua, & transfoſſa per medium via celeberrimus Mons Loibl, qui Meridiem versus Carinthiam à Carniolia disternat: neque inferior est alpium catena secus reliquam Meridionalem plagam protensa, & Italiam ab hac regione distinguens. Demum haud minus attolluntur Tirolenium rupium vertices, qui

occidentis Solis jubar Carinthis subducunt. Non ita vero a frigidis defenditur Aquilonibus, ubi cum Salisburgensi ditione, & Superiori Styria conjungitur, quamvis & hic hujusmodi terræ tubera non desiderentur. Enumerata haec tenus Carinthiæ confinia claudit Inferior Styria, a qua Orientale illius latus stipatur. Pecorum quoque armentis, uti & pretiosioribus metallis abundare fertur hæc Provincia, sed hæc in terræ visceribus abdita parum prosunt, cum pauca ex iis hac tempestate effodiuntur. Ferrum tamen, idque probatissimum, pariunt Frisacenses montes, aliisque Liseræ fontibus propinqui, e quibus copiose etiamnum erutum a multiplice in Oppido Ver-

lach defudantium artificum genere  
in varias non tam magnas, quam  
parvas ducitur formas, elegantissime  
elaboratas. De ferri autem,  
quod in his antiqui Norici regio-  
nibus effoditur, duritie, ac boni-  
tate constans semper fuit apud ve-  
tustissimos authores fama, Poëta-  
rum etiam carminibus dilaudata;  
nam præter Horatium, quem alibi  
adduximus, præsto est illud Ovidii.  
Durior & ferro, quod Noricus  
excoquit ignis.

Plumbum præterea hodieque gi-  
gnit Carinthia in Villacensis terri-  
torii monte, quem idcirco Plei-  
bergum dici ab Agricola (a) doce-  
mur. Uberior isthic celebratur pi-  
scium captura, quos partim offre-  
runt Dravus, aliique amnes; par-  
tim lacus plurimis in locis expansi.

Occupat Carinthia veteris Carniæ, Noricique a Tauriscis habi-  
tati partem; namque Noricos, Carnosque populos olim invicem  
conterminos luculente indicat Plinius textus jam a me alibi allegatus:  
juxtaque Carnos, quondam Taurisci ap-  
pellati, nunc Norici. De Norici me-  
diterranei finibus, qui ad alpium  
radices extensi magnum hujus Re-  
gionis tractum necessario comple-  
ctebantur, in Styriæ descriptione  
jam satis differuimus. Unde elu-  
cubranda solummodo est Carnorum  
Sedes, ut sententia nostra so-  
lidis undique rationibus fulciatur.  
Primo itaque infessam suisse à Carni-  
us utramque alpium declivitatem,

non modo ad Meridiem scilicet,  
sed & Boream descendantem, per-  
spicue docet partim Strabo (b) (b) De situ  
dum ait: Quæ trans Padum sunt, Ve- Orbis l. 5.  
neti incolunt, & istri, ad Polam usque:  
supra Venetos sunt Carni; partim Pli-  
nius (c) ita scribens: Savus ex al- (c) Hist.  
pibus Carnicis placidior, &c. siquidem nat. l. 3.  
palam omnibus est, Venetos per c. 25.  
planitem Australi alpium lateri  
subjectam diffundi, & Savum ex  
Borealibus earundem alpium sco-  
pulis emanare. Alpium nomen ex  
albedine deducit Festus Pompejus  
his verbis: Sabini alpum dixerat, quod  
postea latini album; unde alpium nomen:  
ob nivium scilicet candorem, qui-  
bus illæ fere perpetuo teguntur.  
Major fervet de Carnorum origine  
controversia: quidam enim suppo-  
fititio Annii Berofo nimium fidei  
tribuentes a Carno Noëmi post di-  
luvium filio, Tuisconis fratre &  
gentem, & gentis nomen exordiun-  
tur. O effrœne arrogandæ fibi an-  
tiquitatis cacoëthes! Fuggerus (d) Spec.  
a carris, seu curribus, quibus olim hon. l. 3.  
Scythæ, nunc Tartari domorum c. 5.  
loco semper vagantes utuntur, Carniæ vocabulum derivat, existi-  
mans Germanos a Scytharum co-  
loniis hinc expulsos, visis hujus-  
modi curribus, vernacula lingua  
Kärrner appellasse, eamque vo-  
cem a supervenientibus Romanis  
fuisse in Carnis inflexam; verum  
longe prius innotuerant Romanis  
Carni, quam ulla Scytharum in  
has oras irruptio possit demonstra-  
ri.

(a) de vet.  
& nov.  
met. l. 2.

ri. Tertiam fibi fabricatur origi-  
 (a) Carn. nem apud Scöhnleben (a) Pall-  
 Ant. Ap- dius Cranum Thuscorum Regem  
 pa. c. i. §. primum Carnis parentem assignans;  
 8. at nec constat Cranum Thuscis im-  
 perasse, nec ulla elucet ratio, cur  
 a Crano oriantur populi, qui a ve-  
 tustissimis scriptoribus non Crani,  
 sed Carni constanter appellantur.  
 Demum ingeniosa saltem est, si  
 non vera citati Schönleben conje-  
 cturna, quam ipse exercitii causa ad-  
 ductam mox refellit, a Carna ni-  
 mirum Dea Carnos dici potuisse,  
 quam Romani cardinibus præfecce-  
 (b) Fast. 5. rent, juxta illud Ovidii (b) ad ca-  
 lendas Junii ita canentis:

Prima dies tibi Carna datur, Dea  
 Cardinis hæc est;  
 Numine clausa aperit, claudit  
 aperta suo.

Siquidem alpes tanquam Italiæ  
 claustra, & angusti per illas aditus  
 veluti portæ habebantur: unde Ni-  
 (c) Lib. c. 39. cephorus Callistus (c) de Eugenio  
 Tyranno ita scripsit. Maximum pa-  
 ravit exercitum, & Italiæ portas, quas  
 Romani Ætalias alpes vocant, præoccupa-  
 tas præsidio tenuit. Sed sat superque  
 pro questione de nomine dictum est.

Carnis ex Gallorum Colonia,  
 qui in Aquileiensem agrum descen-  
 dentes Urbem sibi moliri cœperant,  
 (d) Annal. emerfisse conjicit Schönleben (d)  
 Carin. p. 2 anno ante Christi ortum 138, quo  
 Galli inde recedere a Romanis jussi  
 in propinqua montana commigra-  
 runt, quodam triumphalium fasto-  
 rum fragmento innixus, in quo hic

titulus extat: *De Galleis Karneis.* Ve-  
 rum diserte utrumque populum di-  
 stinguit Livius, (e) dum eorum (e) Lib.  
 Legatos Romam anno ejusdem æræ 43.

170. profectos recenset: eodem tem-  
 pore, inquit, *de C. Cassio*, qui Consul  
 priore anno fuerat, querelæ ad Senatum  
 delatae sunt: & legati Regis Gallorum Cin-  
 cibili venerunt. Frater ejus verba in Se-  
 natu fecit questus, alpinorum populorum  
 agros sociorum suorum depopulatum *C. Cas-*  
*sium esse*; & inde multa millia hominum in  
 servitutem abripuisse. Sub id tempus Car-  
 norum, Istrorum, & Japidum legati ve-  
 nerunt, duces sibi ab Consule Cassio pri-  
 mum imperatos, qui in Macedonia du-  
 centi exercitum iter monstrarent: pacatum  
 ab se tanquam ad aliud bellum gerendum  
 abiisse: inde ex medio regressum itinere,  
 hostiliter peragrasse fines suos; passim ra-  
 pinasque, & incendia facta, nec se ad id  
 locorum scire, propter quam causam Con-  
 suli pro hostibus fuerint. Et Regulo Gal-  
 lorum absenti, & his populis responsum est:  
 Senatum ea, quæ facta querantur, neque  
 scivisse futura, neque si sint facta, pro-  
 bare. Ubi ex Macedonia rediisset Cassius,  
 tum cognita re Senatum daturum operam,  
 ut satisfat. Cum tamen alpini po-  
 puli, inter quos erant Carni, tan-  
 quam socii Cincibili Regi curæ  
 fuerint, suspicari omnino licet ex  
 eadem Gallorum gente eos aliquan-  
 do processisse non autem pro com-  
 perto haberri potest, cum inter di-  
 versas quoque nationes societas,  
 aut foedus non raro ineatur. Ro-  
 mani amicitiam cum Carnis usque  
 ad annum ante Virginis partum

118. coluerunt, quo Q. Martius eo tempore Consul eosdem expugnasse a Cluverio creditur divinante *Carnos*, non Samos apud Florum legendum esse; quam opinionem ambiguam magis reddit Gronoviana editio, quæ nec *Carnos*. nec *Sarnos*; sed *Stenos* expressit. Favere tamen non inficior Cluverio, quod ipse met adjicit, altero scilicet anno Tauriscos in Romanorum potestatem devenisse; hoc enim non obscure indicat, Carnos, utpote Italiæ propiores, fuisse prius ab iisdem subjugatos, Porro in occasum ruente Romanorum Cæsarum potentia, videntur Carni angustos alpium limites transgressi in propinquam Norici regionem dominium suum, nomenque pretendisse, ubi Carantani primum, dein Carinthi appellati præsentem Carinthiæ Provinciam complexi sunt. Neque audiendus hic est apud Ortelium Rithaymerus, qui ex vetustiori Carinthiæ vocabulo nuspiam reperiendo, quasi perperam inverso, hodiernum Carinthiæ nomen defluere arbitratur. Ridicula autem prorsus est, & ab omnibus sanæ mentis authoribus explosa Theophrasti Paracelsi opinio; Romanos scilicet tanto amore hunc Ducatum prosecutos esse, ut Charitas intima vocaretur, atque à binis his verbis posteriori ævo in unum contractis usitatam hactenus Carinthiæ vocem exoriri.

Carnos Gothorum Regi Theodoro postmodum paruisse docet apud Velerum (a) Procopius, & (a) Rer. ab Attila Aquileiam obsidente, tot- que aliis exteris populis per has alpinas fauces in Italiæ viridaria turmatim irruentibus, multa pas- sos esse, facilius est mente conci- pere, quam calamo adumbrare; co- ævis quippe destituimus monumen- tis, a quibus erudiamur; nec fi- dendum ubique Lazio, aut Megi- sero, qui Ducum seriem, anno- rumque ordinem ex infirmis sane conjecturis adeo imperterritate te- texunt ut suismet oculis ea omnia perlustrasse penitus videantur. In- ter illas autem gentes, quibus in ea rerum perturbatione Cariñthia patuit, imperium suum ibi maxi- me firmavit Slavica; in quod una- nimis authorum sensus propendet, quodque frequenti ejusdem lingua- usu etiamum indicatur: unde Sla- vi prioribus permixti, Slavi Wi- nidi, & Carantani Fredegario apud (b) Diat. Henschenium (b) teste dicebantur, 3. Digob. I. num. 6. ut a reliquis, qui in Bohemiam, & Poloniæ penetraverant, hac forsitan ratione distinguerentur. Non licuit tamen Slavis parta sibi sede tranquille perfungi, saepe enim cum Hunnis invicem collidebantur, qui etiam servitutis jugum illis aliquando imposuisse a Brunnero (c) feruntur, donec anno 623. (c) Anna. quidam nomine Samo natione Fran- Boi. I. 5. cus mercaturæ studio ad prædictos Slavos veteribus Carnis immixtos (quos

(quos deinceps una voce Carinthos dicam) commeare solitus, ducem delendæ tyranidi se præbuit, & egregiæ operæ pretium maximum tulit, ab institoris sorte ad Regis enectus dignitatem, quam per annos 36. gloriose dicitur administrasse: sed eo sub annum 660., evi-vis sublato, an filiorum aliquis folium conscenderit, an Regia potestas abrogata, & in plures Duces partita fuerit, a melioris notæ authoribus ambiguum relinquitur: succedentium enim Principum, seu Ducum nomina ex Vita S. Virgilii Salisburgensis Episcopi, ac ex Historia de conversione Bojorum, & Carantanorum anno circiter 858. conscripta, vel etiam ex domesticis gentis annalibus a Lazio sæpe allegatis colligere quidem conatus est eruditissimus Bollandus; sed densas ubique offendit tenebras, quibus tum ordinis, tum Chronologiæ ratio plurimum obscuratur. Quare eos duntaxat, qui propagandæ fidei Orthodoxæ operam navarunt, hic breviter memorabo.

Evangelii semina jam ab ipso Apostolorum ævo, ex D. Hermagoræ aquileiensis Episcopi, ejusque discipulorum industria per Noricum fuisse sparsa, jam alias minimus, magnamque eorum partem in Carinthiam Aquileiæ solo fere contiguam interim decidisse quis ambigat? Certe uberes inde fructus sequentibus statim seculis in ea adolevisse non modo ex S. Se-

verini Vita, sed etiam ex D. Hieronymo conjicere fas est: Horret animus, inquit iste, temporum nostrorum ruinas persequi. Viginti, & eo amplius anni sunt, quod inter Constantiopolim, & Alpes Julias ( seu Carnicas, quæ Carinthiam, & Carnioliam a Foro Julio dirimunt) quotidie Romanus sanguis effunditur, Scythiam, Thraciam, &c. Gothus, Sarmata, Quadus, Alanus, Hunni, Vandali, Marcomanni vastant, trahunt, rapiunt. Quot Matronæ, quot Virgines, & ingenua, nobiliaque corpora his belluis fure ludibrio! Capti Episcopi interfici Presbyteri, & diversorum officia Clericorum; subversæ Ecclesiae, ad altaria Christi stabulati equi, Martyrum effossæ reliquiae. Sylvescentem hanc ratione Ecclesiam excolare aggressus est anno 633. S. Amandus Wormatiensis Præful, qui accepta Carinthorum, eorumque Regis Samonis notitia, ultra Rhenum, Danubiumque profectus est, magno æstuans desiderio aut gentem hanc ad Christum adducendi, aut Martyrii lauream consequendi; sed tenuem collegisse messem docet in ejus Sancti Vita Baudemundus ita apud Bollandum (a) de eo scribens: Paucis vero ex iis in Christo regeneratis, videns etiam sibi non satis accrescere fructum, & Martyrium, quod semper querebat, nondum se adepturum, ad proprias iterum reversus est oves. Clarius postmodum Carinthis affulsit fidei lumen post Boruthi, seu Baruchi Ducis obitum, quem Samoni Regi statim

(a) Act. SS. ad diem 6. Febr.

(b) Chron. statim substituunt Megiserus, (b)  
 Car. l. 5. & qui hujus epitomen edidit Rei-  
 c. 25. chardus; quasi eos puderet inter-  
 cedentium Principum syllabum  
 ignorasse; id quippe a vero lon-  
 ge aberrare ostendit vetusta S. Vir-  
 gili Vita, ex qua cum clare infe-  
 ratur Boruthum ad Pipini Fran-  
 corum Regis anno 750. inaugura-  
 ti ætatem accessisse, & Samo anno  
 circiter 660., vel, ut ipse Megise-  
 rus afferit, 638. mortem oppetie-  
 rit, ad 90., aut plane 112. annos  
 Boruthi Regnum extendi ea ratio-  
 ne deberet, quod quam absolum  
 sit, nemo non assequitur. Rem  
 totam, uti in citata S. Virgilii  
 Vita refertur, propriis illius ver-  
 bis ob oculos ponam: Non multo  
 post tempore cœperunt Hunni eosdem Qua-  
 rantanos hostili seditione graviter affigere,  
 fuitque Dux tunc eorum Boruth nomine,  
 qui Hunnorum exercitum contra eos videns,  
 interim Bavaris nunciare fecit, rogans  
 eos sibi in auxilium venire. At illi cum ma-  
 gna festinatione venientes expugnaverunt  
 Hunnos, & obfirmaverunt Quarantanos,  
 servitutique eos Regum subjecerunt, si-  
 mul & confines eorum, duxeruntque inde  
 ohsides secum in Bavariam, inter quos  
 erat filius Boruth nomine Karastus, quem  
 pater ejus more Christiano nutririri, &  
 baptizari postulavit, quod ita factum est.  
 Similiter de Chetimaro filio fratri sui fie-  
 ri rogavit. Mortuo autem Boruth jussu  
 Francorum, Bavari Karastum Christianum  
 factum, potentibus eisque Slavis:  
 remisrunt, & illi eum Ducem fecerunt,  
 sed postea ille tertio anno defunctus est.

Iterum autem permissione Pipini Regis po-  
 pulis idem potentibus Chetimarus Christi-  
 anus Ducatum suscepit. Hunc in Ca-  
 rinthiam proficicentem comitatus  
 est Majoranus Presbyter a Virgi-  
 lio Salisburgi initiatu, quem pau-  
 lo post subsequebatur Modestus E-  
 piscopus cum Watone, Reginber-  
 to, Gozario, Latino, aliisque Evan-  
 gelii præconibus, qui munere suo  
 gnave functi, brevi meliorem Pro-  
 vinciæ faciem, incolisque mentem  
 induerunt. Mortuo autem Chetimaro  
 (pergit Vitæ scriptor) & orta ter-  
 tia seditione, aliquot annis nullus Presby-  
 ter ibi erat, usque dum Waltunc Dux eo-  
 rum misit iterum ad Virgiliū Episcopum,  
 & intente postulavit, ut ad confortandum  
 in fide prædictam terram aliquos destina-  
 ret Presbyteros. Annuit S. Præful,  
 novosque submisit Presbyteros,  
 Heimonem, Reginobaldum, Ma-  
 joranum Gozarium, Erchebertum,  
 Augustinum, & Guntarium, qui  
 laboranti ibi Ecclesiæ suppetias  
 venirent, ipseque deinde Virgilius  
 per Karinthiam sensim transeundo ad  
 flues Hunnorū ubi Trabus influit Danu-  
 bium pertransit. Waltunco subro-  
 gatur a pluribus Ingo cuius singu-  
 laris in promovendo re Christia-  
 na enituit industria. Dilaudat hanc  
 apud Bollandum Æneas Sylvius,  
 a quo reliqui accepere: Fama est,  
 inquit, anno DCCXC. post Christi Salva-  
 toris ortum imperante Carolo magno, Du-  
 cem gentis Inguonem nomine, gentis convi-  
 vium provincialibus præparasse, & agres-  
 tibus quidem ad conspectum suum intromissis,

in vasis aureis, atque argenteis; Nobilibus vero, & magnatibus procul ab oculis collocatis, fictilibus ministrari jussisse: interrogatum, cur ita ficeret, respondisse, non tam mundos, qui urbes, & alta palatia, quam qui agros, & humiles casas colerent. Rusticis, qui Christi Evangelium accepissent, baptismatis unda purificatis, candidas, & nitidas esse animas, nobilibus ac potentibus, qui spurcitas idolorum sequerentur, sordidas, ac nigerimas; se vero pro animarum qualitatibus instruxisse convivium; castigatos ea re nobiles catervatim sacri baptismatis undam querentes, brevi tempore sub Virgilio, & Arnone Juvarviensibus Episcopis, universos Christi fidem accepisse. Demum Christianæ legi in Carinthia stabiliendæ supremam, eamque sedulam impendisse operam dicendus est B. Domitianus ejusdem Provinciæ Dux, quem octavo seculo jam ad finem vergente, vel nono jam in eunte Carinthia imperasse Bollandus conjicit, cum in ejus vita nullum temporis appareat vestigium præter tenuerit aliquod, quod suppeditum epitaphium ejusdem sarcophago post plura ab obitu secula detecto incisum; id enim hoc clauditur elogio: *Qui convertit istum populum ad Christianitatem ab infidelitate.*

Prætero cæteros post Domitianum Duces, sive Archiduces, quos longo ordine deduxit Megiserus, eos a memorato Inguone auspiciatus, quem primum Carinthiæ Archiducem a Carolo Magno Francorum Rege anno 772. creatum

*Topogr. Austr. P. I.*

contendit, hoc uno inauditæ eo tempore dignitatis adjecto testimonio (sicut antiquæ annotationes testantur.) Atque ad recentiora calamum converto, utpote tutioribus fundamentis illustrata, ad Marquardum scilicet ex Comitum de Muerztal, & Avelanz prosapia, in quem ob navatam contra Saxones operam Cæsar Henricus IV. a Berchtoldo zaringensi sibi infenso, anno 1073. Carinthiæ transstulit Principatum. Fuit is verus Lambertini in Styria Cœnobii fundator, non tantum instaurator uti Megiserus placuit, cuius pios, ac splendidos conatus prosecutus est Henericus filius (non pater, uti perperam scripsit Buczelinus) & anno 1090. Leopoldi fratris in Ducatu successor. Emandandum hic pariter est quinquaginta faltem annorum sphalma, quod in descriptione Styriæ retuli, a Fuggero commissum, dum ab anno 1030. primi illius Provinciæ Marchionis, Ottocari nempe prædicti Marquardi ex fratre nepotis regimen orditur; cum tamen ipsemet alio in loco (a) reliquis scriptoribus suffragatus nonnisi anno 1073. Ottocari ho. l. 3. patrum Marquardum in Carinthiæ c. 5. <sup>(a) Spec.</sup>

Ducem promoveat, neque mendum intypum irrepsisse dici possit; siquidem Ottocari Marchionatum Conrado II. ab anno 1026. ad annum 1039. imperanti, continuato attribuit errore.

Henerico tertio post Marquardum Duce anno 1127. sine librís

Q

de

defuncto, Erbo Ratisponensis Comes Palatinus a Lothario imperatore ad illius dignitatem evehitur, qua ille duodecim annos potitus fatis cessit relicto Poppone filio, non tamen hærede; hoc quippe ex Conradi III. Cæsaris sententia neglecto, Engelbertus Comes in Spanheim, & Ortenburg anno 1140. vacuum adiit Ducatum, quem sex stirpe sua transmisit posteris; namque horum ultimus Udalricus III. desperata prole, Avunculo suo Ottocaro Bohemiæ Regi Carinthiam transcripsit, magna pecuniarum vi ab eo antea provocatus. Verum cum hæc insalutatis imperii Ordinibus executioni darentur, Rudolphus I. Imperator, exuto ea Provincia Ottocaro, in Augustanis anni 1282. Comitiis ex communi Principum consensu Meinhardum Tirolis & Goritiæ Comitem, cui Udalrici III. vidua nupserat, Carinthiæ Ducem declaravit; hujus filius Henericus cum anno 1335. exterrum suum clausisset diem, Ludovicus Bavarus Imperator solum Tirolensem Comitatum Margarethæ Henrici unigenitæ (quam ob recurvi oris vitium Maultasch vulgus vocabat) adjudicavit, Carinthiam autem Ottoni Austriæ Archiduci contulit, nequidquam obtinente, & Provinciam armis aliquamdiu vastante Maultaschia. Hinc Carinthiæ Ducatus occidere nescia Austriae sydera semper coluit, quorum benignis influxibus adhuc irrotatur.

Perstrictis, quæ ad universum hujus Regionis statum pertinebant, priusquam de more singulas ejusdem Urbes obeamus, prætereunda non est rara inaugandi Ducis consuetudo, ab Ænea Sylvio postea Pio II. Papa, ni fallor, primum vulgata; licet jam plures scriptores suis eam operibus inferuerint, ne quid notatu dignum videar negligisse. Quare aliorum insistens vestigiis, prout illam e fonte Hollandus, Megiserus, cæterique hauferunt, & ego meis lectoribus propinabo: Imperium Carinthiæ Australes obtinent, & Archiducem appellant, cui ea Regio paret. Quoties novus Princeps Reipublicæ gubernationem init, solennitatem misquam alibi auditam observant. Non longe ab Oppido S. Viti, in valle speciosa vetustæ Civitatis reliquæ visuntur, cuius nomen temporis abolevit antiquitas. Fuxta in pratis late patentibus marmoreus lapis erectus est: hunc Rusticus ascendit, cui per successionem stirpis id officium hæreditario jure debetur. Ad dextram bos macer nigri coloris adstat, ad sinistram pari macie deformis equa: frequens circa eum populus, & omnis rusticica turma. Tum Princeps ex adversa pratorum parte procedit, purpurati ejus Proceres ambient. Vexillum ante ipsum, & insignia Principatus: Comes Goritiæ, qui Palatii curam inter duodecim minora vexilla præcurrat: reliqui magistratus sequuntur. Nemo in eo Comitatu non dignus honore videtur, nisi Princeps præ se ipse Rustici speciem ferens: agrestis ei vestis, agrestis pileus, calceusque, & baculus

culus in manu gestatus pastorem ostendit. Quem postquam Rusticis ex lapide venientem conspicatus est sermone Slavico (sunt enim ipsi Carinthi Slavi) Quis hic est, inquit, cuius tam superbum incessum video? Respondent circumstantes; Principem terræ advenire. Tum ille; Iustusne Iudex est, salutem patriæ querens? liberae conditionis, dignus honore? estne Christianæ cultor fidei & defensor? Respondent omnes: est, & erit. Rursum ille, quo me jure ab hac sede dimovet? At Goritiæ Comes, LX. denariis, inquit, locus iste emitur. Tumenta hæc tua erunt, bovem, atque equam ostendens. Vementa quoque Principis, quæ paulo ante exuit, accipies. Eritque domus tua illa libera, & absque tributo. Quibus dictis Rusticus, levi alapa Principi data bonum Iudicem esse jubet, & surgens, jumentaque secum abducens loco cedit. Princeps vero consenso lapide nudum gladium manus vibrans ad omnem se partem convertit, æquum judicium populo promittens. Ferunt & aquam frigidam rustico allatum pileo bibere, tanquam viuisum damnnet. Miræ hujus solemnitatis auctorem prodidit Sylvius, dum epuli narrationem, quod prælau-datus Dux Inguon Christianis Rusticis instruxerat, hoc epiphonemate conclusit: *Hinc honor investiendi Principis rusticitati datus.* Diuque eam viguisse oportet; siquidem Ernestus Archidux Austriæ Friderici IV. Cæfaris parens anno 1414. hasce ceremonias ultimus admisisse a Fuggero perhibetur. Imo ad saxeum illud tribunal Archiducem

Carolum, & Ferdinandum filium postea Imperatorem, inaugaratos quoque fuisse addit Bollandus, prætermisso tamen vili vestium cultu, atque alapa a rustico infligenda, quæ ejus temporis ratio fortasse non patiebatur. Superfunt hodieque lapideæ illius sellæ fragmenta, in quorum uno Domitiani nomen vetustissimis insculptum literis se legisse affirmat Lazius; idque, si a veritate non deviat, maxime fulcit Bollandi conjectaram, B. Domitianum Inguonis, aut filium, aut agnatum memorato Rusticorum convivio ut pote Christianum interfuisse opinantis, quod ne probro esset, sanxerit vel Inguon, vel ipsem, ut ejusmodi ritus solemnitate id ipsum apud posteros celebraretur. Nunc vero consuetum harum descriptio-num cursum prosecuturi ad Carinthiæ Metropolim accedamus.

## CLAGENFURTUM.

**C**Lagenfurtum venusta est, ac nobilis Urbs, cuius vernaculum nomen Clagenfurt ex vetustiori voce Glanfurt detortum videtur juxta verisimillimam Megiseri, aliorumque opinionem, quasi ex Glan amne non procul inde fluente, & verbo furt, quod vadum, seu trajectum Germanis indicat, illud vocabulum coaluisse. In totius Carinthiæ Metropolim hæc Civitas evasit, postquam anno 1518. a Maximiano I. Imperatore Provin-

ciæ Statibus in illustrium facinorum præmium donata, cœpit novis ædificiis ampliari, & circa fæculi decimi sexti finem amplis, editisque moenii, ac propugnaculis figuram quadratam experimentibus communiri. Quatuor in iis portæ, versus totidem mundi plagas, incolis viam pandunt ad per amœnam planitiem circum quaque extensam, quam partim ambiunt nemorosi colles, altiora post se juga suspiciennes, partim dissecat pilosus lacus vulgo Werdtsee dictus, plusquam uno ab Urbe lapide sejunctus, & per duo millaria Germanica in longum effusus. Nomen lacui dedit quædam illius insula, in qua anno 1000. Præposituram, seu Collegiatam, ut vocant, Ecclesiam SS. Primi, & Feliciani honori sacram extruxisse, ac pretiosis eorundem lipisanis dotasse fertur Frisingensis Præfus Abrahamus ex Comitibus Goritiæ, & Carinthiæ Palatinis oriundus; sed ea lapsu temporum splendore suo orbata ad solam Paræciæ dignitatem modo decrevit. Ornamentum vero lacui addit magnifica Arx, quam una cum Lauretana B. V. Æde, Comes Joannes Andreas Rosenbergius in prominenti illius scopulo anno 1652. excitavit. Subjacet Clagenfurtum latitudinis gradui 46. cum 43 minutis, longitudinis vero 38. cum 8 minutis, atque ab inclita Austriae Metropoli communi 42. milliarum itinere in Austrum removetur.

Circa veterem hujus Urbis statum refert Bollandus (a) aliquorum sententiam, qui Adundrinam Civitatem, cuius in S. Virgilii Vita mentio extat, Clagenfurti statuunt, imo & Hydrundinum nomen eidem appingunt, quasi a Græca voce ὑδωρ, vel ab hydra serpente, seu Dracone aquatico, quem Urbs pro insignibus gerit derivatum; sed ingenium laudo, judicium non approbo, utpote in nulla authoritate, aut solida ratione fundatum. Megiferus alias facilis in quibusvis antiquitatibus suæ Carinthiæ adstruendis, primam hujus Urbis originem in obscuro latere ingenue fatetur, quamvis in quodam dubiæ fidei catalogo Duces Provinciæ Norici Mediteranei exhibente repererit, Clagenfurtum, quasi Cladenfurtum Romanorum fuisse Coloniam ab Imperatore Flavio Claudio anno 270. huc deductam, ideoque Forum Claudii primitus appellatam, cuius Plinium sub Claudiæ, & Ptolomæum sub Claudioni, vel Claudivii nomine meminisse non nulli opinantur. Verum speciosos hos natales non tam labefactat Claudii obitus, quem prætenso anno 3. nonas Februarii Sirmii accidisse notant eximii chronologi Ricciolius, & Brietius, quam propinqua, nec nisi uno milliari ab hac Urbe dissipata sublimium ædificiorum vestigia, & Civitatis alicujus Romanorum ævo ibi florentis indicia per Solensem campum vulgo Saal-

(a) A. A.  
SS. ad  
diem 5.  
Febr.

Saalfeldt, seu Zollfeldt disseminata; ægre siquidem mihi persuadeo, Romanos Colonias suas, seu municipia tam modico intervallo disjunxisse. Quare satius existimo omissa Claudia, seu Claudivio, quod Ptolomæus Danubio magis admoveat, aliam Urbem, quantum, fundatis in veterum historia conjecturis, assequi possumus, per Soliensia rudera venari, quod antequam aggrediar, rejicienda est Megiserus (c) Verum cum bona tot (c) Chron. illustrium scriptorum venia scisci- Car. l. 1. c. 4.

(b) Chron. Car. l. 3. c. 9. Urbem a Ptolomæo memoratam in epte istic collocat, cum eam author Pannoniæ non Norico adscribat, & in Antonini Itinerario inter Sabarium, & Heclitanum occurrat, quæ procul a Soliensi agro Salam manifeste relegant; unde reliquorum placita modo expendamus.

In geminas incidi sententias, quæ solidioribus niti rationibus vindicantur: Prima, quæ Plinii (b) Solvense istic fuisse agnoscit, plures fortita est patronos, nempe Laziūm, Ortelium, Megiserum, Lambecium, Bollandum, aliosque, quorum maximum fundamentum in eo fistit, quod locus ille a Plinio Norico inferatur, & magnam præferat nominis affinitatem cum Soliensi campo, qui & intra veteres Norici limites continetur, & in Urbem eum aliquando excrevisse, sparsa illic ostentant monumenta. Cumque neutro genere utatur author, Solvense potius municipium fuisse autumno, quam Coloniam,

uti nonnullis perperam placuit. Episcopos insuper Domingum, Modelhamum, & Modeustum, cuius S. Virgilii Vita, nulla certa sede assignata, mentionem facit, auctoritate sua solvensi præficit Ecclesiæ Megiserus (c) Verum cum bona tot (c) Chron. illustrium scriptorum venia scisci- Car. l. 1. c. 4.

fidem adhibeant, eam Urbem inter Noricas recententi, quam tribus aliis vetustis etiam auctoribus eandem Pannoniæ adjudicantibus? si quidem ipsorum plerique censem, & idem prorsus nomen pene convincit, Solvense illud municipium unam cum Solva Pannoniæ mansione fuisse Civitatem, cuius non solum Antoninus in itinere Acinco Crumerum ducente, & Ptolomæus (d) Lib. 2. in Inferiore Pannonia meminere; verum etiam Antiqua utriusque Imperii Romani Notitia, ubi & hoc diserte adjicitur, stativa sua ibi posuisse Equites Mauros sub dispositione Viri spectabilis Ducus Provinciæ Valeriae Ripensis, & Cuneum Equitum Scutariorum. Certe non unicus hic foret Plinii error, nam & Aemonam Norico inscribit, cum Ptolomæus, & limitum ratio eam inde exclusam in Pannonia relinquunt. Sed neque prætensa nominis affinitas iis admodum suffragatur, præsens enim latina vox Solensis deducta primo videtur ex germanicis Saalfeldt, vel Zollfeldt, quæ tantam, quanta a nonnullis putatur, cum Solva consonantiam minime demonstrant

Amandata itaque ex Soliensi campo Solvensi Civitate, cum aliam inibi statuere ob manifesta indicia necesse sit, ad alteram me converto sententiam eruditissimi Schönleben, Tiburniam indubitam Norici Urbem istic collocantis; quam eandem esse cum Plinii, & Ptolomæi Teurnia non vane quis suscipietur. Magnum huic opinioni pondus addit vel ipse Megiserus,

(a) Chron. Car. I. 3. (a) dum agrum illum Zollfeldt vi- tate etiam Liburniam a vulgo fuisse ætate sua nuncupatum affirmat; quapropter non veretur Tiburniam quoque eidem adstruere, eamque solvensi Urbi mirabili artificio superædificare. Plura suppetent pro parte nostra argumenta, dum veteres Tiburniæ memorias excutiemus. Primam offert Eugippius in S. Severini Noricorum Apostoli

(b) C. 17. Vita apud Velsorum excusa; (b) ubi hæc de eo leguntur: *Pro decimis autem dandis, quibus pauperes alerentur, Norici quoque Presbyteros missis exhortatur epistolis.* Ex qua consuetudine, cum nonnullam ad eum erogandarum vestium copiam direxissent, interrogavit eos, qui venerant, si ex Civitate quoque Tiburnia similis collatio mitteretur. Respondentibus etiam inde protinus adfuturos, vir Dei nequaquam eos venire signavit, sed dilatam eorum oblationem prædictit barbaris offerendam. Itaque non multo post Cives Tiburniæ, vario cum obsidentibus Gothis certamine dimicantes, vix initi fæderis pactione inter cætera etiam largitionem jam in unum collatam, quam

mittere famulo Dei distulerant, hostibus, ut prædixerat, obtulerunt. Episcopali etiam dignitate Tiburniam fulsisse, certiores nos reddit idem author ita scribens: (c) Paulinus quidam ad (c) C. 21. S. Severinum, fama ejus latius procurrente, pervenerat; hic in consortio beati viri diebus aliquot remoratus, cum redire vellet, audivit ab eo: *Venerabilis Presbyter festina, quia scito dilectionem tuam, populorum desideriis, ut credimus, obstantem, dignitas Episcopatus ornabit: Mox remeante ad patriam, sermo in eo prædicentis impletus est.* Nam Cives Tiburniæ, quæ est Metropolis Norici, coegerunt prædicium virum summi Sacerdotii suscipere principatum. Eandem Tiburniensi Urbi prærogativam liquido confirmant Acta Synodi Gradensis anno 580. sub Helia Patriarcha Aquileiensi, qui ea tempestate Patriarchalem Sedem Gradum transtulerat, celebrata; huic enim subscriptum legit Ughellus in uno illius exemplari Leomanum Episcopum S. Ecclesiæ Teboricensis, & in altero ex Barberina Bibliotheca defumpto Leonianum Episcopum Tiburnensem. Decennio post Pseudo-Synodus Marianensis ex Venetiarum, & secundæ Rhætiæ Episcopis conflata in libello, quem Mauritio Orientis Imperatori porrexerant, apud Baronium (d) In ap. reperiendo, conqueritur de Tiburniensis Ecclesiæ ab Aquileiensi Metropolita, cui antea parebat, defectione, quia ibi Galliarum Episcopi constituerant Sacerdotes. Schönleben hic

penit. 8. ad  
an. 590.

hic Galliarum loco Germaniæ nomen substituit; at licet illo ævo Francorum Imperio Noricæ, vici-næque regiones minime subjectæ fuerint, admitti tamen potest, Galliæ Antistites ex zelo apostolico ad illas profectos esse, vel alias Presbyteros submisisse ut a gentiliūm superstitionibus easdem ad Christum revocarent; tot enim barbari, qui ab Odoacris Herulorum Regis tempore Noricum inundabant, idolatriam illue rursus invexerant; unde pluribus videatur Tiburniensis Episcopatus jam sub annum 590. defecisse, nec amplius restauratum inde esse constat, nisi asserere velimus Modeustum Episcopum, quem a S. Virgilio Salisburgensi Præsule Carantanis datum diximus, primariam suam Sedem Tiburniæ collocasse. Hinc si Tiburniensis Ecclesia Aquileiensi Patriarchæ obtemperabat, verosimilium elucet eam in Norici plaga Italiam propiori inquirendam esse, qualis erat Carinthia portio tunc Norico adhærens: faceant igitur, qui non Tiburniam, sed Tiberinam in Eugippio legentes eam Ratisponam esse interpretantur, a Norici finibus, quos secus Oenum fluvium Ptolomæus terminat, longo spatio avulsam: Nec me quidem latet, scriptores quosdam, inter quos Paulus Diaconus, posterioribus seculis Norico nomini adiecisse, quidquid Bojorum ditio complectebatur, eum scilicet in

primis Rhætiæ secundæ tractum, qui inter Oenum, & Lycum extenditur; sed Eugippii ætate eam confuetudinem nondum tenuisse, quin illum Norici appellationem proprie usurpasse, certum fit ex ipsa Sancti Severini Vita, in qua occidua Oeni ripa ad Rhætiæ, non ad Noricum expresse refertur. Demum assertioni nostræ non parum patrocinatur B. Virgo in Sollio, cuius eo nomine grandis ibi assurgit Basilica; ejus quippe origo videtur in præcitatâ S. Virgiliâ Vita describi, ubi de Presbyteris ab eo in Carinthiam missis hæc enarrantur: *Qui venientes Karantanis dedicaverunt ibi Ecclesiam Virginis Gloriosæ in Liburnia ( Bollandus recte corrigit in Tiburnia ) Civitate, & aliam in sua Adundrina Civitate.* Cui opinioni subscripsit ipse Megiserus (a) ad annum 745., sed Liburni (a) Chron. am five Tiburniam cum solva abs-<sup>Car. l. 5.</sup> que fundamento confundens; ad-<sup>c. 48-</sup> ditque alibi hanc eandem esse Ec-  
clesiam, quam tanquam D. Petro sacram memorat *Æneas Sylvius*, dum allatas superius inaugurandi Ducis ceremonias ita prosequitur: *Deinde ad Ecclesiam Solensem pergit, quæ in propinquuo tumulo sita est S. Petri vocabulum habens, & olim Pontificalis fuisse dicitur: ubi peractis sacrificiis Prin- ceps rustica indumenta deponit, paluda- mentumque induit, convivatusque splendi- de cum Proceribus, in prata revertitur, ibique pro tribunalí sedens, jus potentibus dicit, & feuda confert.* Non modo

Epi-

Episcopali Cathedra hoc Templum fuisse condecoratum censet Reichenardus, sed & Præsum syllabum contexit, qui S Modesto primo illius Ecclesiæ, uti conjicitur, Moderatori successere, videlicet Majoranus, Modelhamus, Adalbinus, Madoldus, Warmanus, Theodoricus, Otho, Oswaldus, tandem anno 860. desuisse credit Soliensem, seu Tiburnensem Episcopatum, remanentibus tantum quibusdam Canonicis cum Præpositura, quæ hodieque perserverat. Collecto istic ab accolarum pietate thesauro inhians Maubitius Hungarorum Dux annō 1482. debilem alias locum obsidione premit, sed Radhauptii Canonici reliquos omnes ad strenuam defensionem, qua verbis, qua exemplo stimulantis industria, vel potius invictissimæ Cœlorum Reginae tutela tamdiu repulsus est donec percepto Weissbriachii Ducis, ejusque militum adventu alio commigravit.

Antequam e Soliensi campo discedamus, prætereunda non est celebris illa ex ære statua anno 1502. ab arante Rustico in eo inventa, & Salisburgensi Archiepiscopo Matthæo Langio Salisburgum translata, cujus femori incisa inscriptio ita Megifero profertur. *A. POLLICUS D. L. ANTIOC. TI. BARBIUS. Q. P. L.* Aliam exhibebat in limbo parma simul effossa his notis expressam: *M. GALLICINUS VINDILLE L. L. BARBIUS L. L.*

*PHILOTHERUS PR. CRAXSANTUS BARBI P. S.* Antinoi, qnem Imperator Hadrianus deperibat, simulacrum illud esse conjectit Vianodus Pighius apud Lambecium, sed hic eum merito refellit, cum marmorea Antinoi statua Romæ in Vaticanis hortis erecta; Romanam enim effigiem dices adolescentis glabri, atque inermis, qualis fuit Antinous in primo juventutis flore Nili aquis extinctus; at Soliensis hæc ænea virum exprimit militarem, hirsutum, & parma, securiique bellica armatum; ipse vero Lambecius, ut pene certum sibi potius persuadet, statutam hanc a quinque illis Libertis, quorum nomina in adductis inscriptionibus leguntur ære collato, & communis nomine positam esse in honorem *TIBERII BARBI TITIANI DECURIONIS COLONIÆ AEMONÆ*, qui inscriptus reperitur cuidam monumento Labaci, ut Gruterus refert, asservato. Innumera præterea in hoc campo eruuntur numismata, aliaque antiquæ Urbis opulentiaæ testimonia, sed jam istic longius commorati, Clagenfurtum, unde digressi fuimus, tandem revertamur.

Sex Civitatem hanc coronant Tempa hic breviter enumeranda: Parochiale D. Ægidii honoribus devotum grandevam monstrabat ætatem, sed ante decennium solo æquatum alteri locum cessit, quod juxta novæ architectonices regulas

las ab eo tempore assurrexit, Ma-  
jorem ostentat molem alterum San-  
ctis Apostolorum Principibus Pe-  
tro & Paulo sacrum, cui adjacet  
Societatis JESU Collegium ab Ar-  
chiduce Ferdinando postea Cæfare  
eius nominis secundo anno 1504.  
fundatum, ea præcipue de causa,  
ut Lutherana hæresis, radicitus ex-  
tirparetur, quam quadriennio prius  
jam evellere cœperat Martinus Sec-  
coviensis Antistes; hic enim qua-  
dringentis stipatus militibus anno  
1600. Urbem subiit, atque Hetero-  
doxorum libris publice concre-  
matis omne Augustanæ Confessio-  
nis exercitium interdixit. Postea  
vero copulata est Catholicæ pie-  
tati eruditio, in eximio quippe  
illius Collegii Gymnasio præter  
amœniores Musas, Philosophicæ,  
& Mathematicæ scientiæ, tum Moralis Theologia, & sacri  
Canones frequentibus auditoribus  
traduntur. S. Spiritus Ecclesia  
penes Provincialem Domum, in  
qua scilicet Statuum Comitia con-  
vocantur, paulo ante annum  
1636., quo Urbe universa confla-  
grante immunis evasit, ædificata  
quatuor circiter abhinc lustris, fa-  
cias D. Ursulæ Virginibus tradita  
est, quæ nobilem illic Parthenon-  
em sibi concinnarunt: ejus vero  
loco Carinthiaæ Proceres aliam S.  
Angelo Custodi dicatam extra mœ-  
nia erexere. His accedunt S. Se-  
bastiani Templum ad Civicum No-  
focomium spectans, & bina alia a

*Topograph. Auct. P. I.*

Venerabili Minorum D. Francisci,  
& Capucinorum Ordine possessa,  
quorum primum Paris Lodronius  
Salisburgensis Archiepiscopus an-  
no 1613. consecravit, alterum au-  
tem Provinciæ Status anno 1646.  
excitarunt. Nec modicum adfe-  
runt eidem Urbi ornamentum bi-  
næ marmoreæ statuæ, quarum al-  
tera Sanctissimam Triadem, altera  
Beatissimam Dei Genitricem sine  
labe conceptam repræsentat, ele-  
gantibus basibus insistentes. Fori  
denique centrum obtinet speciosus  
fons, ubi aquam marmoreus dra-  
co, cui marmoreus pariter Hercu-  
les adstat, e faucibus perpetuo  
eructat.

Quæ de hac Urbe ab anno 648.  
usque ad ejusdem seculi 82. Megi-  
serus enarrat Chacanum scilicet  
Hunnorum Regem sexaginta homi-  
num millibus eam tunc cinxisse, &  
prolapsis casu muris irruentem,  
Pleurati Urbis Præfecti suspendio  
furori suo litasse, gratis profecto  
afferit, cum nec ipse, nec morta-  
lium ullus noverit, Clagenfurtum  
ea tempestate in rerum natura ad-  
huc extitisse. Digniora tamen fi-  
de sunt, quæ ad annum 1395. com-  
memorat: Nicolaum nempe Liech-  
tensteinum iusfu Kreigii Provin-  
ciæ, ut vocant, Capitanei, cui Ur-  
bis Senatus morem gerere abnue-  
rat, incensis Suburbis, direptis  
pomœriis, Civibusque, qui inter-  
dum excurrerant, notabili clade  
repulsis, Clagenfurtum arce pres-  
sisse

R

fisse, donec intercedentibus apud Kreigum nonnullis e nobilitate, præfertim Nicolao Dietrichsteinio, soluta fuit obsidio, & in criminis authores duntaxat animadversum. Sævior anno 1473. Clagenfurtenibus minabatur hostis; Turcæ siquidem sex millium numero, traje-  
cto Dravo, circumfitos agros depopulati magnam ibidem stragem ediderunt. Sub Augustissima Maria Theresia Provinciæ toti lux nova affulsi, variisque Rei Publicæ parti-  
bus vigor accessit: pauperibus indi-  
gentibusque provisum est primum,  
& cum Clagenfurthi, pia deesset  
domus qua indigentum proles, pa-  
rentum mortuorum destitutæ sub-  
sidio educarentur, e publico, no-  
vum erectum est orphanotrophium  
in quo tam necessarium Reipubli-  
cæ subfidium erectum est: præter  
privatorum hunc in finem collatam  
liberalitatem publico Provinciæ  
decreto jura quædam monopolia-  
que domui huic, tam pium ut sta-  
biliretur opus, collata sunt. Scien-  
tiis etiam, quæ Societati civili plu-  
rimum profunt, ampliandis provi-  
sum est, & Augustissimæ Imperatri-  
cis auspicio erectum Clagenfurthi  
Collegium cui incumberet humani  
corporis partes figuramque, dissec-  
tis etiam mortuorum membris, ex-  
ponere iis qui medicandis morbi-  
dis vulneratisque student: libros in-  
strumenta suppelleat itemque huic  
arti necessariam, publico ære libera-

litate singulare Augustissima decre-  
vit. Hactenus Clagenfurti viciniæ-  
que aspectus nos recreavit; nunc  
inde abscedamus, reliqua etiam  
Carinthiæ monumenta secundum  
alphabeti seriem contemplaturi.

## ARNOLDISTENA.

**A**rnoldistena vulgo Arnold-  
stein seu Arlstein 4. miliari-  
bus Clagenfurto recedens, rupes  
est nobili Arce quondam coronatas  
quam S. Otho ex Comitibus ab  
Andech, & Dieffen Episcopus Bam-  
bergensis, & Pomeranorum Apo-  
stolus anno 1124., uti Reichardo,  
vel biennio post uti Bucelino pla-  
cket, in egregium S. Benedicti Cœ-  
nobium convertit, Ingramo primi  
Abbatis munere ibi fungi jussi, sub  
cujus nono successore Floriamun-  
do anno circiter 1350. horrendus  
cujusdam propinquai montis lapsus  
multas Arces, pagosque tumulavit.  
Ab hoc vero vigesimus primus Ab-  
bas Nonnosus Ritter ex Bamber-  
genfi Monasterio in priorem postu-  
latus, dein anno 1654. ad Insulam  
ejectus ob præclara merita secun-  
di fundatoris encomio a Reichen-  
do célébratur. Pervetusq; maris  
& fœminæ icones penes Templi fo-  
res muro insertæ Arnoldum Arcis  
conditorem, ejusque conjugem re-  
ferre multorum opinione credun-  
tur.

## DIE TRICHSTEINA.

**D**ietrichsteinam Arcem memorabilem reddunt tum antiquissima Dietrichsteiniæ profapiæ origo Cardinalitia purpura Francisco a Clemente VIII. collata, S R I. Principis dignitate eidem, & posteris a Ferdinando II. impertita, obitis Legationibus, ac summis apud Cæsaream Aulam muneribus splendidissimæ, tum bina obsidia ab ea aliquando exantlata. Primo eam strinxit anno 1324. Margaretha Maultaschia, quæ non tam aperta armorum vi, quam occultis insidiis in Arcem sœvire decreverat; irrepererant enim aliquot illius sacerdii, ut Henricum Dietrichsteinum, & Dietricum Welzium loci propugnatores improviso adorarentur, sed detecti intentatam alii necem ipsi tulerunt: impar nihilominus obsidentium ferociæ præsidium, favente noctis caligine Castrum deseruit a Maultaschianis copiis mox diripiendum. Surrexerat quidem inde magnificentius; sed atrocior anno 1483. in illud ingruit tempestas, quando Hungarorum Dux Marapetruſ, protracta ultra sextum mensem obsidione, Dietrichsteinam afflixit, quam Pancratius Dietrichstein, eluso sœpius hostium impetu, strenue tuebatur. Verum quamvis Marapetruſ in singulari certamine grave in brachio, & fronte vulnus a Pancratio etiam fauciato accepisset, & Provinciæ

Proceres commeatu interim obsessorum vires instaurassent, obstinata tamen Hungarorum constantia fracti Dietrichsteinenses Arcem Marapetro dederunt, ab eo funditus eversam.

## FANUM S. ANDREÆ.

**F**anum S. Andreæ Urbs est in peramcena Valle Lavantina ad cognominem fluvium sita, ubi antiquum Flavium, cuius Præfecturarum Romanarum codex, & Plinius mentionem faciunt, se reperiisse ejactat apud Merianum Laziū; Vallem enim inde Flavianam, postea Lavanam, tandem Lavandam imaginatur, sed quis non miretur, vel potius derideat adeo subtile Lavantinæ etymologiæ ex Flavio deducendæ artificium? Vallem hanc Comitatus titulo quondam illustratam ex Megifero discimus, cuius dominium anno 992. Henricus Carinthiæ Dux Sigefrido ex Comitibus Sponhaimenibus S. Hartvici Salisburgenfis Antistitis fratri, cui Richardam filiam desponderat, dotis nomine concessit. Anno 1480. ad eam usque deprædandam penetraverant Turcæ, sed a Georgio Schaunbergico, qui convocatis ad se Rusticis, & multiplicatis tympanis tenuem suorum militum manipulum hostibus formidabilem reddiderat, noctu impediti, matrata protinus fuga ea etiam spolia, quæ aliunde advexerant, victori-

bus colligenda reliquere. In D. Andreæ Urbe Episcopalem erexit cathedralm Eberhardus II. Archiepiscopus Salisburgensis anno , si  
 a) Anna 13 Brunnerum (a) sequimur 1226, sed biennio tardius , si Steronem , & Richardum sectamur. Primus in ea fedit Udalricus e Domesticis Eberhardi Sacellanis. Decimus hujus Successori Conradus Torer an. 1411. vita functus , aliquod sanctitatis suæ argumentum transmisit posteris , qui ejus corpus in chori supremitate parieti sine tumba inclusum an. 1642. fere incorruptum repererunt : & vigesimus sextus Albertus de Priamis anno 1640. ea dignitate insignitus piæ suæ mificentia monumentum Lauretanam nempe B. V. Ædem extra Urbem excitavit , in quam invitatae ex Marenbergena Parthenone aliquot sacræ Virgines D. Dominici regulas professæ anno ejus seculi 63. commigrarunt. Episcopatus honori alterum adjecit elapso nuper sœculum Imperator, videlicet S. R. I. Principis prærogativam. Sexdecim annis ante Udalrici inaugurationem, Præpositorum Catalogum, qui Collegiatæ , ut vocant, Ecclesiæ istic præfunt , a Friderico orditur Richardus ; at illorum vigesimus sextus Joannes Gambacius Insulæ usum primo adeptus est. In primaria ejusdem Urbis Basilica D. Andreæ dicata, inventa narrat præcitatius Brunnerus sacra Divorum Viti & Modesti lipsana , atque Sa-

lisburgum, Passavensi , & Chymensi Præfule præter Salisburgensem Archiepiscopum pompam comitantibus translata.

## FANUM S. PAULI.

**F**anum S. Pauli Oppidum est Lavantinæ Vallis 6. milliaribus Clagenfurto distitum , & splendidissimo Ordinis S. Benedicti Monasterio decoratum ; quod anno 1091. Comes Engelbertus Templo addidit a Siegfrido , & Richarda Parentibus suis pridem erecto , & gentium Apostoli honoribus devoto ; in pium hoc opus conspirantibus Hadwige Engelberti conjugé , & Hartvico Magdeburgensi Archiepiscopo ejusdem fratre. Nec a liberali patris animo degeneres conditoris filii Bernardus , & Henricus Carinthiæ Duces novas opes , & fundos D. Paulo , & sacræ Benedictinæ Familiae consecrarunt. Hos tamen longe superaverat Engelbertus, cum non amplam modo dotem, sed & seipsum Cœnobio obtulerit : abdicato quippe opulentæ ditionis dominio , se Deo per vota religiosa ibidem mancipavit. Primus hic ad clavum sedet Abbatis titulo insignitus Wezilo a S. Guilielmo Hirsaugensi cum numerofo Monachorum manipulo submissus, quos Urbanus II. Summus Pontifex approbata Engelberti fundatione ab Episcoporum jurisdictione exemit,

foli-

solique Romanæ Ecclesiæ subesse voluit. Quartus dein Abbas Pilgrinus anno 1193. mundo eruptus ab Apostolica Sede Insulæ usum, & a Friderico I. Cæfare illustria obtinuit privilegia, quibus adjicit uberem divitiarum fontem aperta in Eisenibus montibus plumbi, argenteique fodina. Felices hosce progressus interruptus aliquantum vorax flamma, quæ sub annum 1390. Monasterium, & Templum absumpsi; sed illud Conradus II. Abbas, hoc Udalricus IV. itidem Abbas reparavit; graviores tamen intulit clades, & tantum non extremum loco exitium Cileiæ Comes anno circiter 1440 Lavantinam Vallem cum magna Carinthia parte secundo depopulatus. Hujus vestigia relegere non multo post Turcae; sed meliori sorte usus Joannes II. Abbas anno 1455. regimini admotus eos e Cœnobii vallo fortiter repulit. Fatiscentes interim longa ætate ædificii muros e fundamentis rursum eduxit Hieronymus Marchstallen anno 1616. in Abbatem electus, cuius ab anno ejus seculi 38. successor Paulus Meminger impo- sita claustro coronide binas insuper Ecclesiæ priori D. Pauli adstru- xit. Coluntur istic sacri cineres D. Achatii a Joanne III. Abbe ante Annum 1488. Roma impetrati, & B. Theodorici, qui religiosis vir- tutibus, partim in hoc Asceterio, partim apud S. Joannis Baptista Sacellum propinquò colli insistens

resplenduit, unde terræ valedi- cens ad fidera evolavit; quem fe- licem transitum æs campanum edi- to, uti fertur, divinitus sono, la- te evulgavit. Procerum vero hic quiescentium nomina exhibent se- quentes versus in subterraneæ cry- ptæ aditu exarati.

Hic fundatores Comes inclytus Engelbertus,

Hadwigis conjux hic Comitissa jacent.

Hic Magdeburgensis sacer Archi- episcopus Hartwig.

Atque Carinthiacum pars gene- rosa Ducum.

Hic Sponhaimensis Sigfridus, & alma Richarda

Lavantina Comes, & Comitissa cubant.

Hi tibi fundarunt Dux optime, ma- xime Templum,

Hanc & Sancte tibi Paule dede- re domum.

## FANUM S. VITI.

**F**ANUM S. Viti vulgo S. Veit ameno gaudens folo 2. milli- aribus Clagenfurto removetur. Ve- tus hic Sianticum Antonino in Iti- nerariis notum stetisse sibi facile persuadet Lazius, Sianticum in S. Vitum miserabiliter detorquens, quin imo si priscum illud nomen a plebe vitiatum prætendit, in ver- naculam vocem S. Veit inflecten- dum potius erat, quod utique illi difficilius accidisset. Sed vero si-

(a) Chron. Car. 1. 8. c. 44. miliorum Civitatis originem nobis suggerit Megiserus (a) a Nicolao Claudio primo editam quam in hanc sinopsim contraxi. Anno 902. Eberhardus Carinthiæ Dux prælium cum Hunnis propediem conferturus, fusis ad Deum precibus cœlesti subsidium, cum in terris deesset, imploravit, quod ut certius obtineret, voto se obstrinxit, Templi in eo, quo tunc degebat, loco post victoriam extruendi, dein in hostes progressus, palmamque iis fugatis gloriose consecutus promissa exsolvit, sacra Æde inter pinos, & alnos, quibus tunc terra illa sylvescebat, S. Viti cultui dedicata. Hinc S. Veit in Erla locus is a vulgo dici cœpit, & adstructis sensim domibus Civitatis speciem postea præstulit, cuius fitu delectatus Carinthiæ Dux Meinhardus, illam in Aulæ suæ Sedem electam anno 1292. totius Ducatus Metropolim declaravit. Ejus splendorem non parum imminuit incendium sub annum 1337.; vel a cadente e nubibus fulmine, vel a famulis odio in Dominos flagrantibus, & eo ultiōnis genere utentibus excitatum. In hanc Urbem primo movit anno 1307. Conradus Salisburgensis Præful, suscepta ex Alberti Cæsaris jussu in Carinthiam expeditione, & Henrico Duce in Bohemia interim ad coronam aspirante, eam sibi feliciter subjecit. Majorem adhuc eidem intulit labem anno 1359. Archidux Au-

striæ Rudolphus, quando in delicti pœnam, quod in Archiducis copiis e Solienfi campo repellendis Cives commiserant, eam vi superatam militum licentiæ obtulit devastandam. His itaque calamitatibus depressa S. Viti Civitas, & a Vulcano rursus anno 1409. pessime accepta, Clagenfurtensi tandem Urbi Provinciæ cessit Principatum. Notatu hic dignus est superioris fori fons, e quo profilientem aquam excipit ingens crater ex unico albi marmoris frusto constans, & inter Tiburniæ rudera repertus. Extra Urbem florebat olim, Megiserro teste, Sanctimonialium ex Ordine S. Claræ Cœnobium a Friderico Auffensteinio anno 1323. dotatum, sed elanguescente paulatim pristino disciplinæ vigore, in hospitale pauperum senum domum conversum postea esse idem author subnecit.

## FELDKIRCHIUM.

Feldkirchium Oppidum non præcul ab Ossiaciensi lacu distans ob celebrem inclaruit conflictum, qui inter Maultaschiam, & Auffensteinium pro Archiduce Ottone Carinthiam moderantem anno 1334. in ejus territorio exarsit: illi merebat Tyrolensis, & Bohemicus miles, sub hoc vero cum suis cohortibus militabant Comites Ortenburgii, Dietrichsteinii, Liechtensteinii, Stubenbergii, Ungnadii,

dii , Colnizii , Liebenbergii , Glangeggii , aliique complures , quibus Seccoviensis , & Labacensis Episcopi suas quoque copias adjunxerant ; acriter utrinque dimicatum , donec cæsis duobus Carinthorum millibus , & Auffensteinio cum reliquo exercitu ægre Feldkirchium evadente , Maultaschia victoriam obtinuit , qua nimium superbiens in Hafnerbergam Arcem , cæteraque loca deinde graffabatur .

### F R I S A C U M .

**F**RISACUM vulgo Freysach , vel Friesach famosa , antiquaque Urbs , 6. milliaribus Clagenfurto diffusa ad Styriæ fines accedit . Unum illius latus rigat amnis Metniza , ex altero autem præaltus ascendit mons in cuius rupibus multæ Arces , aut Arcium rudera spectantur ; sex vero abhinc seculis ferares aurifodinae excolebantur . VIRUNUM a Ptolemæo , & Plinio Noricis adscriptum , quod Antonini itinerarium III. passuum millibus Aquileia removet , Peutingeri autem Tabula 72. a Cileiensi Urbe sejungit , probabili aliquando conjectura istic cognoscit Lazius ; utcunque enim huic favent viarum ductus ab iis authoribus expressi , & familiare ejusdem argumentum a nominis similitudine emendicatum : siquidem non omnino absurde opinatur ; consveta apud veteres Carantanos vocum

clausula , quam hujusmodi suadent nomina , ut Goriach , Plettriach , Sebriach , Weisbriach , terminatum primo fuisse Virunum , unde factum Virunsach , quod tandem in Vrissach seu Frisach contractum videtur , cum F , & V in hac Germaniæ parte facili negotio confundantur . Quæ saltem majorem præferunt veritatis speciem , quam Paracelsi mens Frisiae populus , nullo veterum præeunte , ad hanc condendam Urbem violente trahentis . Frisacensi ditioni imperitabant olim Zeltechachenenses Comites usque ad eorum ultimum Wilhelnum , cujus consors S. Hemma , marito , & binis filiis Wilhelmo , & Hartvico ab aurifossoribus perfide interemptis orbata , Civitate hac , ejusque territorio Salisburgensem Archiepiscopum sub annum 1080. donavit , uti refert Megiserus , cui refragatur Lazius apud Merianum , eam donationem Henrico II. Imperatori attribuens ; sed conciliari facile possunt , si dicitur Cæsar S. Hemmæ voluntatem confirmasse . Decennio post , seu anno ejus seculi nonagesimo dirum crudelitatis portentum in hujus Urbis conspectu perpetratum Brunneri Annales funestavit . Thiemonem in legitimum Salisburgensis Ecclsiæ Præfulem electum , & ab Altmano Passavensi , Adalberone Heribopolitano , & Meginwardo Frigeni rite initiatum bello persequi cœperat Pseudo - Episcopus Ber-

Bertholdus, qui eandem Salisburgensem Cathedram adhuc prædecessoris Gebhardi tempore temerario invaserat flagitio; quare Thiemo conscripto milite, quem Medlingenses Comites, utpote ejus cognati, subsidiariis auxerant cohortibus, cum hoste infelicitate congressus fugam per Taurum montem in Carinthiam capessivit, ubi a quodam Comite Udalrico Bertholdi fauatore interceptus gravibus ab eo ærumnis premebatur; Frisacensis tamen Civitas egregie munita in ejus fide mansit, eademque constanza obsidionem, qua Thiemo carcerem tulit. Actus ea re in rabiem Udalricus Præfulem alligatum castrorum aggeri, quem obfessi missilibus verberabant, suorum ictibus objecit discerendum, quod facile evenisset, nisi Cives, agnito obsidentium scelere, suas catapultas in aliam protinus partem librassent. Memoratus hic Thiemo ipse omnino est, quem Udalrici vinculis solutum in admontensis Cœnobii descriptione una cum Gisilberto secundo illius Abbatे in Palæstinam profectum, & apud Corozium Urbem anno 1110. Martyrum laurea coronatum retuli, ita a Bucelino, nuperoque Græcenis gloriæ authore edoctus, & horum sedulitatem nimium confidens; nunc vero dum Conradi Abbatis Urspergensis anno 1215. florentis chronicum evollo, cui utpote non nisi uno seculo a Thiemone distanti plus tribu-

endum videtur, alio Ioco, & tempore obtentum ab hoc athleta gloriosum agonisma deprehendo; ad annum siquidem 1101. sacræ illius expeditionis iter a Welfone Bavarо ductæ per Natoliam describens Abbas hæc interferit: Porro exercitus universalis ab Imperatore acceptis, qui legiones apto itinere deducerent, contra Nicomediam vertitur, indeque Romaniam declinans ad aquilonarem plagam contra terram Chorizanam, quæ Turcorum est patria convertitur. Pergit deinde scriptor recensere ærumnas, & Barbarorum insultus, quibus in ea regione premebantur Christianorum copiæ, tandem Salisburgensem Archiepiscopum cum aliis captum subjungit. Ex Asia Frisacum regressi reperiemus interim Comitem amissa obtainendæ Urbis spe inde exercitum abduxisse. Non ita fauste Miloti Ottocaro Bohemiæ Regi merentis, & Alberti Austriaci arma Frisacenses retudere, utpote ab illo anno 1275., ab hoc vero anno ejusdem seculi 89. ex causa patria subjugati. Nec aliter fortuna iisdem favit anno 1481., quo Maubitus sub Matthiæ Hungarorum Regis auspiciis infesta Carinthiæ inferens signa, in Frisacensi campo obviam habuit Vitum Welzium suis copiis Provinciam defensurum; at non prius manus cum hoste conseruit, quam Carinthorum nonnullos, qui fervente pugna cæsum in acie Ducem magnis clamoribus mentirentur, præmii spon-

sponsione corrupisset; qua voce territi fugatique Welzia i milites victoriam, & Civitatem Hungarum permiserunt. Hi post mortem Kralobizii Præfecti, qui eos semper intra muros, ne ad prædas excurrerent, severè cohibuerat, spoliis ac rapinis ita accolarum animos irritarunt, ut anno 1496. non tantum Frisaco, sed etiam ex reliquis, quæ in ea Provincia tenebant, Oppidis faceſſere debuerint, a Carinthia, & Salisburgenſibus extrusi. Præter primarium Civitatis Templum, quod Præpositus cum suis Canonicis administrat, aliaque vel intra, vel extra muros diſpersa, memorandum illud eſt, cui eximium Ordinis Prædicatorum Monasterium adnexuit S. Hyacinthus jam anno 1222., tribus ſcilięt luſtris poſtquam S. Dominicus ſacræ ſuæ familiæ jecerat funda‐menta: hoc poſtea inter alios doctrina, & virtute præſtantes viros, Angelicæ ſuæ ſapientiæ ſplendore, quam ibi ſuis aliquando diſcipulis communicabat, D. Thomas Aquinas dicitur illuſtraffe.

## GENTIFORUM.

**G**entiforum vulgo Völkenmarck Ducalis Urbecula eſt ad Dravum fluvium, ubi antiquam Viruni Urbem, quam nos cum Lazio conjectantes Frisaci posuimus, extitiffe putat Cluverius ( b ) hiſ verbiſ ſuam mentem exponens: *Va-*  
*Topog. Austr. P. I.*

(a) Vind.  
& Nor.  
c. 5.

runum tabulæ rectius ſcribi Virunum ex conſenſu Plini, Antonini, Ptolomæi judico. id interpreter nunc Oppidum Fölkmark ad Dravum anniem, nam Jvema tabulæ ( intelligo Peutingerianæ) ex nomine, & iteneris traclu ſine controverſia eſt Jaunſtein, & ejusdem Tabulæ Saloca primus a Viruno locus in itinere verſus Aquileiam, procul dubio nunc eſt Selch Vicus Superioris Carniolæ. Cumque hæc omnia conjecturis, non solidis rationibus nitantur, nullius ſenſum penitus rejicio, nec ulli mordicus adhæreo. Nobilitat hunc locum Collegiata, ut vocant, Ecclesia a Præpoſito nimirum, & Canonicis poſfeſſa, cui condenda aream largitus eſt Hartvicus S. Pauli in Lavantina Valle Abbas anno 1248. e vivis ſublatus. Uno vero hinc millari Udalricus Carinthiæ Dux, vel ut alii ſentiunt, Achatius Bogenfis Comes anno 1164. Eberdorffense Cœnobium, quod primo candi‐dus Præmonſratensium Ordo, dein Regulares S. Auguſtini Canonici ſubierunt; demum Collegio Clagenfurtenſi ab hujus fundatore in dotem aſſignatum illi etiamnum ſub‐eſt, & veterem ejus magnificen‐tiam prodiſt vasta ædium moles, atque angustum Templum alteri ſubterraneo incumbens.

## G R I F F U M.

**G**riffum vulgo Griffen Oppidum non procul Gentiforo, ſed Clagenfurto 5. Milliaribus in  
S Orien-

Orientem remotum ornat nobilissimum Præmonstratenſis Ordinis Monasterium, quod anno 1233. sub Deiparæ patrocinio Echenbertus Bambergensis Episcopus extruxit, cuius Episcopatus dominium plura in Carinthia Oppida & Urbes agnoscunt. Id postea a Gregorio IX. Summo Pontifice confirmatum Udalricus, & Fridericus Comites Hainburgenſes amplis proventibus ditarunt. Incendio non ita pridem abſumptum multo ſplendidius hodie a fundamentis exſtrui cœptum eſt. Primus eidem präfuit Conrādus ex Vescernensi in Franconia Cœnobio cum aliquot Religiosis accitus; hunc viginti quinque ſubſecuti ſunt uſque ad Joannem IV. anno 1490. electum, cui primo gerendæ Infulæ obtigit prärogativa.

## G U R C U M.

**G**Urcum vulgo Gurck venuſtum Oppidum 6. milliaribus Clagenfurto diſſitum Gurca amnis präterfluit. Condecoravit illud primo S. Hemma Wilhelmi Frisacensis, & Zeltſchachenfis Comitis vidua nobili ibidem in Deiparæ honorem erēta Baſilica hodieque ſuperſtitē, cui paris magnificentiæ Monasterium pro ſacris D. Benedicti Virginibus adjunxit, & cum iisdem a Balduino Salisburgensi Antiftite an. 1060. vita functo ſacrum velum Reichardo teſte fuſcepit; ſed iis alio trans-

latis ſubſtituti ſunt Regulares S. Augustini Canonici ex Congregatione Lateranensi prout fert vulgaris quorundam opinio, quamvis Reichardus velit, S. Fundatricem bina circa idem Templum domicilia excitaffe, atque in unum septuaginta Sanctimoniales, in alterum vero viginti hujusmodi Lateranenſes Religiosos induxiffe. Hæc in quilonorum mutatio, vel abjectio accidiſſe dicitur anno 1072. S. Hemma adhuc inter vivos degente. Verum vix fidem his omnibus adhiberet eruditissimus Papebrochius, (a) qui certioribus inſtructus monumen- (a) A&t. numentis in Vita S. Ubaldi Cano- SS addi- nicos eo ſeculo nondum in propri- em 16. um alicujus Ordinis cœtum coa- luſſe contendit, ubi poſtquam plura de iisdem diſſeruit, hæc tandem adducit: Quidam etiam Regulam a S. Augustino pro Sanctimoniaib[us] ſcriptam, & viris qualitercunque aptatam coperunt proſteri: quæ regula authoris potius nomine, quam ſufficientia ſua commendata, denique facta eſt communis omnibus canoniciam vitam regulariter ducentibus, ex eo maxime tempore, quo diſciplina Eccleſiarum Canonicalium denuo collabascens, iſtitutione Congregationum Regularium capit ad perpetuitatem certius ſtabiliri. Et harum quidem Congregationum präcipua inter plures nunc eſt ea, quæ primum Frigionoria, vel Frigidionaria dicta a colle hujus nominis tribus ab Urbe Lucensi milliaribus, ubi originem ſumpſit circa annum M. CCCC., & Lateranum introducta obtinuit titulum Lateranensis anno M. M.

M. CCCC XLVI. Canonicos saltem seculares juxta illius ævi morem in communi viventes, admodum verosimile est, ibi tunc fuisse collocatos, & usurpatam a Lateranenibus S. Augustini regulam deinde amplexos (quod & de reliquis Canonorum Regularium Collegiis, quorum primordia allegatum ab eo authore tempus prævertunt, statuere oportet) siquidem eo anno alterum Gurco decus, Episcopatum videlicet addidit Salisburgenfis Archiepiscopus Gebhardus, ac primum illius Ecclesiæ Præfulem inauguravit Guntherum, Albuino Brixinensi, & Ellenhardo Frisingensi solemnitatem complentibus. Ferunt S. Hemmam de condendi Templi situ deliberantem junctos plaustro boves, quod B. Dei Genitricis statua oneraverat, in agrum emisisse, eosque immota sua in hoc loco statione ancipitem Sanctæ animum ad eum eligendum inclinasse. Illud certius, sacrum fundatrixis corpus ibidem conditum magna colli veneratione, quam fundata ad illius aram missa oppido promovit Georgius de Teuffendorff an. 1348. ad Collegii Præposituram evectus. Aliam præterea missam in crypta, seu subterranea potius Ecclesia 365. columellis, uti fama fert, suffulta solemniter quotidie cantandam instituit Gottfridus Krafft de Metniz anno 1307. eadem dignitate donatus a Gunthero a Krapfenfeld ad Jacobum Maximilianum Comitem

a Thun hodiernum Græcenfis Ecclesiæ præfulem quadraginta septem Episcopi eandem obtinuere Sedem. Cathedralis hujuscemodi Ecclesiæ Canonici diverso longe ab aliis more, separato ab Episcopo, loco resident, divisis prorsus fruuntur redditibus: solet enim Episcopus in oppidulo Strasburg, mille a Gurco passibus distante, commorari atque ibidem alumnatum in quo ad normam a S. Concilio Tridentino præscriptam Clerici, animarum aliquando cura occupandi educantur, erexit: Canonicis interim Gurci sub præpositi sui cura residentibus; his tamen non ita pridem indultum ut si eorum quempiam tedium caperet vitæ inter Collegii limites transfigendæ, hos deserendi esset Facultas annuaque illi quo se alat ducendorum florenorum pensio a Collegio extolleretur.

## HOSPITALE.

**H**ospitale vulgo Spital Urbecula est a Comite Engelberto Ortenburgico ædificata, quam Dravus, ubi Lyseram amnem excipit, 8. nempe supra Clagenfurtum miliaribus præterfluit. In hac Templi decori, & spirituali popularium emolumento consulere volens Hermanus ex eadem Ortenburgicorum stirpe, quæ tunc ibi rerum potiebatur, annuos proventus pro certo Sacerdotum numero fundavit post annum 1183. quo uti retulimus

mus Gurcensem Episcopatum adipisci non potuit, ad quem Cleri, populique favor illum evehebat. Ab Ortenburgicis ad alios subinde Proceres ditio hæc devoluta a longo jam tempore quievit in nobilissima Portiarum prosapia, cuius sumptuosum ibidem Palatium incolæ, exterique suspiciunt.

### LANGSEENSE COENOBIUM.

**L**angseense S. Georgii Coenobium in editiori, elegantique assurgit colle, cui subiectus lacus non paucam adstruit amoenitatem. Sacris D. Benedicti Virginibus circa annum millesimum erigere id exorsi sunt B. Otwinus, ejusque conjux Wichbugis Goritiæ Comites, sed a Barbaris labefactatum munificam Udalrici, & postmodum Bernardi Carinthiæ Ducum pietatem ab anno 1184. in se convertit; hi enim amplioribus redditibus ortam ex ruinis inopiam sublevarunt. Celeberrimo huic Parthenoni ante alias ordine præfuere tres fundatoris filiae, Hildegardis, Hilburgis, & Berthigundis, quibus cæteræ successere sanguinis nobilitate, ac prosapiæ splendore plerumque fulgentes. Inter sacram hujus loci suppellectilem B. Ottini baculus, cui septendecim incisæ notæ totidem transfactæ in eremo vita annos indicant, aliæque ejusdem memoriæ religiose affervantur,

### MILLESTADIUM.

**M**illestadium vulgo Milstadt e-  
gregium est Oppidum 8. mil-  
liaribus Clagenfurto in occasum  
abscedens, amplecte adhærens  
lacui, inter Dravam, & Lyseram  
fluvios extenso, quem Rosbacus  
amnis pertransit: ejus nominis ety-  
mon anonymous author Vitæ B. Do-  
mitianiani apud Bollandum (a) ex-  
(a) A.D.  
cusæ, quem Lazius, Megiserus, SS. ad  
aliique fecuti videntur, his verbis diem 5.  
Febr. describit: *Milstadt a mille statuis no-  
men accepit, quas ibidem populus errore  
delysus antiquo coluit, quas ille felix  
(Domitianus) exemplo Bonifacii Papæ  
destruxit, & eliminata omni spurcitia dæ-  
monum Ecclesiam, quæ primitus mille  
dæmonibus fuit addicta, in honorem omni-  
um Sanctorum postmodum consecrari fecit.*  
Verum hæc non nisi arbitraria ni-  
tuntur conjectura, quæ ne tenui  
quidem veteris historiæ lumine di-  
lucidari potest; locus enim, quem  
Antoninus inter Bregitionem, &  
Arrabonam, atque alibi inter Ali-  
scam, & Lussunium ad statuas vo-  
cat, longe hinc aberat, utpote In-  
feriori Pannoniæ omnino attribu-  
endus. Neque alio instructus mo-  
numento texendæ Beati Vita se  
accinxit anonymous, quam epitaphio  
repertæ tumbae inciso, quod  
ita sonat: *IN NOMINE PATRIS,  
ET FILII, ET SPIRITUS SAN-  
CTI. HIC REQUIESCIT B. DO-  
MITIANUS DUX, PRIMUS FUN-  
DATOR HUJUS ECCLESIAE,  
QUI*

**QUI CONVERTIT ISTUM POPULUM AD CHRISTIANITATEM AB INFIDELITATE.** Quibus veris Megiferus (a) post Domitiani Car. l. 6. nomen hæc alia inserit: *Dux Noricorum & Carentanorum uxore Maria Meraniensi.* Fundatæ D. Domitiano Ecclesiæ illustre Ordinis S. Benedicti Cœnobium adjecit Erbo, sive Arbo Hartwici Palatini in Bavaria Comitis filius, non vero ipse met Beatus Dux, uti perperam sentit Megiferus contra Lazio, & anonymum, qui paulo ante finem, sacrum ejusdem Monasterii institutum se professum esse, non obscure manifestat. Piam hanc fundationem ante annum 1102. contigisse necesse est, cum Abbas Urspergenfis memorato anno conditoris obitum ita inscribat: *Erbo jam grandævus nobilis de Carinthia Princeps, & quondam Palatinus in Baioaria Comes migravit in Domino.* Unde merito corrigitur a Bollando Lazius, qui prædictum Erbonem a Lothario II. Cæsare Carinthiæ Ducem an. 1125. creatum prætendit. Aliud quoque sphalma commisisse Lazius videtur, dum ita scribit: *Albertus secundus electus in Episcopum Tridentinum ex Parochia, & prima fundatione facta a S. Domitiano Duce, Millestadiensem Abbatiam exorsus est, ac locupletavit.* Si quidem hæc luculente repugnant cum prima Cœnobii fundatione Principi Erboni ab ipsomet Lazio adscripta; quare afferendum potius esset, Albertum eandem reparasse,

aut novis proventibus auxisse. Neque hunc nodum solvit, dum alibi ait: *Erbonem in Ecclesia S. Domitianæ apud Millestadium monachos primum instituisse: quibus Abbatem postea concesserit Albertus Tridentinus Episcopus.* Cum enim Albertus secundus Ottenburgensis a Pyrrho Pincio, qui Tridentinorum Prælulum Vitas elucubravit, apud Bollandum dicatur anno 1363. eam Ecclesiam gubernasse, arduum creditu est Millestadienses D. Benedicti Religiosos 260. annis Abbatे caruisse; quin imo Vitæ author ipsa Erbonis fundatoris ætate, vel saltem non multo post Martinum quendam Abbatem diferte commemorat. Incoluit descriptum hactenus Cœnobium sacra Benedictinorum Familia usque ad annum 1463., quo iis per alia ejusdem Ordinis domicilia dispersis, & assignata iisdem ex Millestadiensibus bonis ad vitam sustentatione, Fridericus III. Imperator in sedem Generalis Magistri Ordinis S. Georgii, ad reprimendas quotidianas Turcarum incursionses tunc a se ericti, eum locum convertit, assentiente Paulo II. Summo Pontifice, & per datam eo anno Bullam Ordinem approbante, a pluribus ejus successoribus deinceps confirmatum. Insignis hujus Ordinis symmetriam eruditiois gratia non pigeat lectorem addiscere ex Pauli II. diplomate, cuius sequentem paragraphum suo inseruit Leo X., & Daniel Papebrochius,

(a) Act.  
SS. ad  
dieni 23.  
Aprilis.

chius, (a) typis evulgavit: voluisse  
nempe Fridericum quandam domum mi-  
litarem in Monasterio Milstadt Salzbur-  
gensis Diœcesis, loco ad hoc accommodo  
cum Ecclesia, clauistro, dormitorio, au-  
lis, cameris, & aliis necessariis officinis,  
de suis propriis facultatibus fundare, ac  
ædificare pro usu, & habitatione perpe-  
tuis quorundam Fratrum ipsius militaris  
Ordinis laicorum Militum, ac etiam Sa-  
cerdotum, sive Clericorum, quorum unus  
per præfatum Fridericum Imperatorem  
hac prima vice ad hoc eligendus, & de-  
putandus, Magister Generalis existat,  
& deinde eo sublato de medio per Mili-  
tes (de consensu tamen ipsius Friderici,  
aut antiquioris ejusdem Domus Austriae  
Ducis) successor eligatur. Presbyteri  
vero prædictæ Domus, quorum unus per  
alios eligendus sit Præpositus, prædicto  
Magistro Generali subesse censeantur.  
Ac prima Camera Magistro, secunda  
Præposito, tertia antiquiori Militi, quar-  
ta seniori Sacerdoti, & sic deinceps af-  
signari debeant, ita ut inter duos Mi-  
litates unus Sacerdos, & inter duos Sa-  
cerdotes unus Miles sit. In choro vero  
Magister primum habeat locum, ac de-  
mum in illo Sacerdotes Milites omnino  
præcedant. Et tam Magister & Milites,  
quam Præpositus ac Sacerdotes castita-  
tis, & obedientiæ vota sponte emittant,  
Ad paupertatis vero votum emitten-  
dum nullatenus adstringantur inviti.  
Hucusque diploma. Cæterum non  
Millestadiensi tantum dominio po-  
tiebatur Equestris hic Ordo, sed  
splendidis Carinthiæ Castris Stern-  
berga, & Landscrona, aliisque ex-

tra eam Provinciam fundis, quibus  
illum Cæsarea fundatoris munifi-  
centia dotaverat. Successu tempo-  
ris Joannes Siebenhirter Genera-  
lis Magister, accedente Alexandri  
VI. Summi Pontificis, & Maximili-  
iani I. Imperatoris autoritate, li-  
beram utriusque hominum sexus  
Sodalitatem instituit nullis aliis ob-  
strictam legibus, quam ut illius Al-  
bo inscripti, vel unius anni perio-  
do propriis sumptibus adversus  
Turcas militarent, vel eleemosy-  
nas in bellum Turicum impenden-  
das elargirentur. Equitum ac Sa-  
cerdotum Ordinem ipsum conflan-  
tium insigne fuerat crux rubea,  
quam quovis sabbatho, & festis Dei-  
paræ diebus supra vestem albam  
gestabant, sodalium vero crux au-  
rea cum corona in circulo etiam  
aureo, quam soleni ritu dextero  
novi militis brachio appendebat  
Gurcensis Episcopus, qui uti &  
Millestadiensis Magister tanquam  
Generales Vicarii præerant Soda-  
litati. Intepuit tamen brevi, nec  
ultra seculum excurrit pius hic mi-  
litantium fervor, eoque Ordine  
vel sensim evanescente, vel inter  
bella extincto, Millestadiensium  
ditionem sibi adscivere Austriae Ar-  
chiduces, ex quibus Ferdinandus  
dein Imperator, altero postquam  
Styriæ, Carinthiæque regimen sus-  
cepérat, anno, id est 1598., an-  
nuente Summo Pontifice, Socie-  
tati JESU eandem contulit, ut inde  
Collegium, Academiaque Græcen-  
sis,

sis, cuius in Styria meminimus, ale-  
retur, ejusdem etiam Societatis Re-  
sidentia ibidem instituta. Nunc ad  
B. Dominatianum, ejusque sacrum  
cultum revertamur, qui superio-  
ribus præfertim seculis ita circum-  
fitis populis cordi fuit, ut non so-  
lum e Carinthia, Carniola, & Sty-  
ria sed ab extremis etiam Istriæ fi-  
nibus, Pannoniaque ad illius tu-  
muli venertionem advolarent; nec  
inani operæ pretio, sæpe enim ob-  
tentis per miracula gratiis læti pa-  
triam repetebant. Pretiosum hu-  
jus Beati pignus, uti refert præci-  
tatus anonymous, ex priori sepul-  
chro elevatum, in alio digniori con-  
diderat Abbas Martianus Dautus,  
ne cum aliorum cadaveribus, quos  
fibi sanguine junctos ibi humari jus-  
serat Erbo, aliquando confunde-  
retur; quod paulo post annum 1102.  
evenisse sat perspicue ex his cir-  
cumstantiis arguitur. Illius porro  
inventionem, cuius ætatem divina-  
re haud præsumo, ita prosequitur  
Vitæ author: *Abbas quidam erat  
nomine Otto habens in congregatione sua  
centum, & quinquaginta homines spiritua-  
les. Hujus diebus dum fundamenta Mo-  
nasterii majoris jacerent, post combustio-  
nem prioris, tunc ex improviso reliquæ  
B. Domitianæ, & Mariæ uxoris ejus,  
& ossa cuiusdam infantuli simul inventa  
sunt, sigillum juxta habens imaginem Du-  
cis in throno sedentis, gladium in manu  
tenantis: ad hæc superscriptio: BEA-  
TUS DOMITIANUS DUX  
FUNDATOR HUJUS EC-*

CLESIÆ. Ex altera autem parte HÆ  
SUNT RELIQUE MARIAE UXO-  
RIS EJUS. Hasce reliquias hono-  
ratori loco donavit Otto, easque  
tertio ad alium transtulit an. 1441.  
Joannes Gurcensis Episcopus, cuius  
translationis cum nulla apud ano-  
nymum mentio occurrat, claro id  
argumento est, hunc ad prædictum  
tempus non pervenisse. Demum  
an. 1492. quantum illæ naætæ sunt  
tumulum ante altare scilicet de-  
center collocatae, in quo nonis Fe-  
bruarii missa de B. Domitiano quon-  
dam celerabatur, nunc autem de  
eo solum habetur illa die panegy-  
ricus, qua etiam absolutis divinis  
distribuuntur in præfentes rotundi  
ex fecali panes, stata prius preca-  
tione, invocatoque B. Domitianæ  
patrocinio benedicti. Diebus au-  
tem Nativitatis, circumcisionis, &  
Epiphaniæ certa cervisia mensura  
gratis in singulos subditos, teste  
Bollando, erogatur Præter vi-  
rorum Monasterium aliud quoque  
Sanctimonialium Millestadii flo-  
ruisse indicant miracula, quæ an-  
onymous Beati Vitæ subjecit, cum  
bis earum memoria ibidem reno-  
vetur.

## M O S B U R G U M .

**M**osburgum vulgo Mosburg  
valida Arx ab austro Dra-  
vum fluvium, & ab Arcto verden-  
sem lacum respiciens, octavum jam  
seculum sua ætate transgreditur,

si fidem Megisero habemus. Narrat quippe ad annum 840. Brynonem Principem ex Moravia oriundum cum Hezilone filio Hezelburgensem Urbem, quæ eundem hunc situm occupabat, reparasse; dein ad annum 854. Arcem, cui Mosburgum nomen, a Carolomano Ludovici Germaniæ Regis filio, quem Reichardus inter Carinthiæ Duces D. Domitianus statim subrogat, una cum Templo erectam esse, probeque munitam asseverat: sed certius Mosburgenis Arx hodie gloriatur nobiliissima Comitum de Kronegg prosapia, a qua dicitur possideri.

### OSSIACUM.

**O**Sfiacense ordinis S. Benedicti Cœnobium tum vetustate sua, tum præsenti etiam splendore celeberrimum subiecto lacui nomen indit, inter Werdensem ad Ortum, & Millestadiensem ad Occasum per magnum spatium effuso. Conjugum fundatorum nomen exponunt epitaphia sepulchrali lapidi in Ecclesiæ meditullio incisa: quod ad maritum pertinet, his versibus constat. Qui jacet hoc tumulo Comes, hanc fundaverat Ædem

Ozzius: ergo polum ocius  
Ozzi cape!

Uxor autem elogium hoc alterum perstringit distichon.

Condidi Irenburgis claustrum hoc  
Comes offa recondit

Nunc crypta hæc, condanto ani-  
mam astra meam!

Fundationis ævum densis involvitur tenebris, e quibus saltem splen, didum hoc oritur encomium, non nisi antiquissimos esse hujus Monasterii natales, quos longa seculorum series adeo procul ab hominum memoria removit, ut penitus ignorentur. Certe non solum annis, sed integris seculis a quibusdam aberratur, tantum enim scriptorum sententiæ ab invicem separantur. Maxime a nobis dissita origo, & S. Patriarchæ Benedicti ætatem pene attingens proditur a nonnullis versibus, qui in MSS Ofiaciensium documentis teste Schönleben ite leguntur.

A Christo effluxit bis tercentefimus annus,

Ozzius Irenburgis, quo fuit atque Popo.

Is Pater, hæc genitrix, amborum filius iste,

Illi pagani heu! iste fidelis, eheu!  
Conversi tandem struxere palatia Christo,

Et Benedicte tuis, stante Popone Pio.

Paulo minus remota tempora indicat annus 687. subscriptus litteris a Seichardo, & Schönleben editis, quas ab Ozzio parente, & Popone filio Slavico idiomate vicissim datas ferunt, aut comminiscuntur; siquidem Popo, ut ad eum annum narrat Reichardus, ex Tiffensi ditione, cui inter Villacum, & Feldkirchium protensa dominabatur parens, Romam peregre profectus

Chri-

Rer. Boj.

l. 4.

Christiana imbibit dogmata , & sacro aspersus latice ad Ecclesiasticam vitæ normam animum applicuerat: quo intellecto Ozzius a filio expectit , ut sibi quamprimum aperiret, cur ab avita religione descivisset, & quodnam foret illud Numen , quod adorandum susceperebat. Paruit illico Popo , a quo Catholicæ fidei mysteria edocti parentes, Christo manus, & Ossiacensi postea Cœnobio initium dedere. Hæc quidem secum optime cohærent, at non modicam patiuntur difficultatem, si cum assignato tum in carminibus, tum in literis tempore componantur ; qui enim fieri potuit, ut septimo seculo adeo eminentes Romanæ Ecclesiæ propugnaculum in iis terris excitaretur , quas sub annum 600. inundaverant Slavi , Carantani postea vocati, & Idolorum cultui per bina circiter secula ita addicti , ut in Bavariam anno 697. excurrentes S. Marinum Episcopum in Orthodoxæ fidei odium flammis confecerint , uti Velsorus (a) annotavit. Consultius itaque videtur ad Inguonis , aut Domitia ni Carinthiæ Ducum regimen , hujus Monasterii exordium differre, sub quibus , ut superius diximus, revirere sensim cœpit Evangelii semen a Salisburgensibus excutum : quæ conjectura , si secundum Bollandi chronologiam in universali Provinciæ descriptione allegatam expendatur , penitus coincidit cum Megiferi opinione sub Ca-

Topograph. Aust. P. I.

roli Magni regno , aut Imperio Ozzi conversionem statuente , quam ex fundationis literis in Cœnobio afferatis se haufisse testatur. Primus Abbas Ossiacensibus præfuisse Berinolphus dicitur a Reichardo , qui ab anno 687. eorum historiam orditur, dein excidisse, afferit reliquorum nomina usque ad annum 779. , quo a Slavorum populacionibus , & incendiis excisum Ossiacum per integrum seculum putat in suis cineribus jacuisse ; sed quis credet Slavos propriam regionem tunc primo vastasse , quam jam a longo tempore possidebant ? Hoc tamen ille minime curans, ut seculum ad unguem impleat, anno 879. Ossiacensibus Monasterium restituit sacris S. Felicitatis , septem ejus filiorum , & S. Maximiliani Confessoris lipsanis a memorato Carolomanno ea occasione donatum. Cæterum primus , cuius certa ætas innotuerit, Abbatis muneri admotus est Teucho , inter quem & nobilem matronam nomine Bertam aliquas circa quoddam prædium controversias intervenisse scribit Megiserus ab Aquileiensi Patriarcha anno 1090. decisas. A Teuchone autem quinquaginta circiter numerantur , qui hujus Cœnobii gubernaculum reixerunt: ex his peculiari laude dignos censeo S. Bernerum anno 1307 , & Christophorum Capponig anno 1656. ad eum honoris gradum promotos. Tres ille ex materia lucidissima glo-

globos diversis ægritudinum generibus divina virtute etiamnum mendentes, quos sacris operanti Dei para obtulerat, pretiosam veluti hæreditatem suis in Christo filiis transmisit, sed tertius alio sæpe aevatus, & toties cœlitus relatus tandem non sine adstantium admiratione ex ara disparuit. Comparato alter Wertenbergensi dominio, quod unico milliari a Monasterio divellitur, plerosque Religiosos eo transtulit, ut suorum valetudini consuleret, quos alias insalubre Ossiaci cœlum præmatura morte ad tumbam detruudebat. Illud adhuc memorabile istic circumfertur, videlicet Boleslaum II. Poloniæ Regem Ossiaci quiescere, quo ille appulerat, dum impiam S. Stanislai Cracoviensis Episcopi cædem expiaturus Romam peteret; cumque occulta quadam vi ultra progredi vetaretur, se alium simulans ad vilia culinæ munia regias manus demiserat, donec morti proximus suum pristinum statum Abbatii detexisset. Aliquatenus tamen adversatur huic Reichardi relationi communis Historicorum sensus, qui Longinum Polonorum gesta scribentem secuti, Boleslaum a Regno profugum, in insaniam primo versum, mox a canibus an. 1080. devoratum tradidere.

### OSTERWICIUM.

**O**Sterwicum vulgo Osterwiz magnifica Arx tribus millia-

ribus Clagenfurto in Boream remota, Schenckiorum Comitum quondam Sedes, ab Excellentissimo Domino Comite Kevenhüller hodie obtinetur. Tegit illa præaltum collem, qui patentem circumquaque planitiem despectat: insigni quoque armamentario, aliisque vetustate sua pretiosis cimelis celebratur, sed maxime commendanda, quod victoriarum cursum, quibus per reliquam Carinthiam superbiebat Maultaschia, sua fortitudine abruperit. Obsedit illa anno 1334. Osterwicum, in quod præcipua Carinthiæ Nobilitas ex aliis minus tutis Arcibus fugata confluxerat, atque explicato circa rupem exercitu a Reinhoro Schenchio loci Domino sibi Castrum quantocvus dedi iussit potius, quam postulavit; si secus faceret, extrema quæque minabatur. Verum minis & imperiis per contemptum explosis, cum nulla assultibus via pateret, producto in plures menses obsidio statuit longa inedia obseffos subjugare; & sane eo calamitatis Osterwicenses interim devenerant, ut mures & feles in deliciis haberentur, nec magis potu, quam cibo abundantarent, cum vel aqua eos jam defecisset. His tamen malis minime fractus propugnator Schenkius bovinam pellem duobus tritici modiis, quibus tota definiebatur annona, farciri jubet, ac per muros in obsidentium castra devolvi, quo viso Maultaschia multum

tum rei frumentariæ adhuc iis superesse arbitrata , quibus volupe erat eam ita prodigere , abjecta victoriæ spe ingloria decepsit.

## S T E I N A.

**S**Teina Arx est ad Dravi fluminis trajectum in editiori loco sita , & nobilissimæ Rosenbergicorum Comitum Familiæ subjecta , quam maxime illustrat D. Laurentii Templum a S. Agatha Hildegarde Pauli Hildegardi Palatini in Carinthia Comitis conjuge ibidem sepulta erectum , postquam marito adulterii falso accusata , & ab eodem ex Prosniza Arce per prærupta faxa præcepis data , divinitus tamen illæsa huc recessisset , Paulo interim in delicti sui expiationem ad Apostolorum limina , & sacra Palæstinæ loca peregrinante : hæc siquidem est tragicæ hujus historiæ substantia , in quam relationes omnes conspirant ; cætera vero , quæ illi fama , aut traditio adjunxit , aliter a Reichardo , aliter ab aliis , uti apud Bollandum (a) videre est ; enarrantur : nec mirum , cum ea ex nullis eruantur antiquis monumentis , utpote una cum Templo ab igne oblitteratis ; sed tantum per ora vulgi volent cuncta fabulis de more involventis . Aliam quoque Ecclesiam S. Margarethæ V. & M. sacram ad radicem collis extruxit , ac perpetuas fundavit

eleemosynas , quæ pane , vino , & larido plerumque constant . Hæc etiamnum S. Agathæ Hildegardis festo benedicta in egenos , aliosque poscentes distribuuntur , atque , uti certa docuit experientia , religiose sumpta plures expellunt morbos , præfertim phrenesim epilepsiam , dolores viscerum , phantasmatum , sagarumque præstigias . Ferunt insuper prædictas eleemosynas a Conrado II. Cæsare , qui ab anno 1024. usque ad annum 1029. imperavit , & a Summo Pontifice Benedicto fortassis IX. , qui ab anno 1033. Ecclesiam , rexit , per utriusque diplomata fuisse approbatas . Tot itaque meritis decora hujus Sanctæ anima e terris abiens cœlesti se stitit sponso anno , uti Bollandus notat , 1024. , vel decennio prius , uti Reichardo visum est . In eodem S. Laurentii Templo , dum S. Cantiani Parochus ad aram Deiparæ dicatam sacris operaretur , placuit Divinæ Clementiæ Sanctissimi Eucharistiæ Sacramenti veritatem circumstantium oculis subjecere ; non enim Christi corpus , & sanguis sub panis , vinique speciebus latuit , sed propriam coram omnibus formam præferebat ; sive ille de transubstantiatione ambiguus hæsit , sive alia de causa perpetuum illius mysterii miraculum , hoc insolito miraculo Deo libuit confirmare . Annum diemque , quo hæc contigere , exhibent hiulca quædam carmina in membraneo illius

(a) Act.  
SS. ad  
diem 5.  
Febr.

Ecclesiæ rituali exarata, & totam rei seriem complectentia, quorum hoc est initium:

M, duo C, tribus X, sed & annis additis VIII.

Qui manet, est & idem, natus de Virgine pridem

Dat nova carne - - - superno sancta cruxore,

Cœlica lumine, mentis acumine, unda colore

Ad LAPIDEM gentes Agathæ festo venientes

Omnes præsentes ibi talia signavidentes, &c.

## STRASBURGUM.

**S**Trasburgum antiqua, amoenaque Urbs a Gurca amne paulum infra Gurcenſe Oppidum alluitur, eique nominis claritatem parit Gurcenſium Episcoporum Sedes, pro quibus in adjacente colle, diruto priori Castro, quod jam ignis præstare cœperat, amplum suffecit Palatium Joannes Jacobus Comes a Lamberg ejusdem Ecclesiæ Antistes. Acri illud obsidione cinxerat anno 1183. Conradus Salisburgenſis Archiepiscopus, ut Dietricum Colnizium in Romani defuncti successorem a se electum Gurcenſi Cathedræ imponeret, cui Hermannus Ortemburgicus Cleri & plebis suffragiis ad eandem dignitatem electus, totis viribus obſistebat; sed secuta brevi pax, Hermanno nimis cedente, instantem avertit

procellam, atque optatam Strasbourgensibus reddidit serenitatem. Et ne hæc novo violaretur turbine Ferdinandus I. Imperator, & Salisburgenſis Præſul pactum iniere, vi cuius ille, ejusque hæredes duos Episcopos, hic vero tertium, servata deinceps hac alternandi methodo præſentarent.

## VICTORIA.

**V**ictoria, seu Victoriacum vulgo Vitrina percelebris Cistercienſium Monasterii nomen est, quod anno 1117. ut a Megisero, non vero anno ejusdem ſeculi 42., ut a Reichardo traditur, Meinhardus five Bernardus Malensteinius in Carinthia Comes cum uxore ſua Kunigunde Invictissimæ Cœlorum Reginæ consecravit in victoriæ, ut dicitur, anathema, quam in singulari certamine aduersus Rimaldum quendam e Gallia Proceribus Parifiis obtinuit; hunc enim ipfem provocaverat, ut fe ac attentati Regicidii ſcelere, cuius ille ab invido æmulo falſo insimulabatur, detestando illius ævi more purgaret. Hinc Megiferi potius, quam Reichardi chronologiæ ſubſcripsi, cum id factum ab utroque feratur ſub Rege Ludovico VI. cognomine Craſſo, quem in comperto eſt, ab anno 1106., quo Gallia ſolium adiit, non niſi 30. annis illud occupasse. Prope Clagenfurtensem Provinciæ Metropoliſ hujus Cœnobii

nobii moles prospere assurrexit, cui fundator ad ædificium lapides ex diruta Natterbergensi Arce, & ad sustentationem redditus ex ejusdem fundis obtulit: inquilinos vero, primumque Abbatem Eberhardum fundatoris nepos Henricus Metensis Episcopus, & Villariensis Abbas suppeditavit.

## V I L L A C U M .

**V**illacum vulgo Villach perversta Urbs est, 4. milliaribus Clagenfurto absens, & ad Dravum fluvium sita, cui injectus pons illam Suburbio jungit. Tot abolitis veterum Civitatum nominibus hanc illustrare contendunt scriptores, ut ejus potius originem ea vocum confusione obfuscant: namque Julium Carnicum hic agnoscit Bertius apud Schönleben, Plinii Teurniam Cluverius, & Forum Vibii Pius II. Papa apud Albertum. Ab his omnibus discrepat Lazius apud Merianum, & a Monte Vela, qui ab Antonino Beloa dicitur, vocabulum hoc Villach derivat, addita scilicet familiari Carantanis, uti de Frisaco diximus, terminatione. Sed irriti sunt conatus, & vana asequendæ veritatis spes, quando nullum veteris authoris indicium facem præfert. His itaque prætermisis ad alia properemus. Cœpit præfens Urbis nomen primo celebrari sub annum 1006., quo S. Henricus Imperator fundato a se

Bambergenſi in Fränconia Episcopatui, inter alios proventuum fundos Villacum etiam cum pluribus circumſitis Oppidis, & Pagis in dotem transcripsit. Ab eo tempore longum infortuniorum syllabum enumerat hæc Civitas, quibus crebro succubuit. Præivit omnibus, quæ fastis commissa sunt, horribilis terræ motus, qui anno 1348. concusſa ſæpius Carinthia, tandem Villacum ita prostravit, ut ad pristinum splendoris, ac magnificentiae gradum non amplius conſcenderit; ſiquidem refert Reichardus ampliſſimam ante illum lapſum fuifſe Civitatem ad Gyllam uſque amnem extenſam, & utpote celeberrimum emporium maxime frequentatam. Contremuit quidem illud iterum anno 1690. ad finem vergente, ſed multo leviora tulit detri- mента. Altero calamitatis genere hanc Urbem afflixit ignis, qui eam ſæpiſſime corripuit, anno præteritum 1523., exorto apud nuptiale epulum incendio. Haec tenus infons patiebatur Villacum, ſed tertium malorum genus, videlicet hostem propria culpa ſibimet adſcivit; quando ut Maultaschiæ gratiam au- cuparetur, legitimo Provinciæ Principi Rudolpho Austriae Archiduci fores occluſerat. Tunc enim a Friderico Colnizio Rudolphi Belliduce validiſſime obfefsum, & aſſultu ſuperatum editas ab irruente milite ſtrages, ablataque ſpolia incallum deflevit. Lætior illi

illi arrisit fortuna utpote pro meliori causa decertanti anno 1492., quo Turca in Canalis Vallem progressus, ibique barbare graffatus, in Villacenses muros impetum convertit, sed cum eos opinione sua solidiores, & pari fortitudine propugnatos offendisset, in sparsa per viciniam Oppida conceptum inde furorem effudit: Interea Nobilitas Kevenhüllerio Duce congregato exercitu furenti obviat, initoque certamine, non sine suorum sanguine, quorum 6. millia ceciderunt, gloriose tamen hostem profligat, qui decem millibus, aut vulnerum gravitate confectis, aut a Rusticorum vindictam spirantium rabie dilaniatis, ita fractus patriam repetiit, ut nunquam amplius ad invadendam Carinthiam vires, animumve resumpserit. Demum anno 1552. Carolus V. Imperator victoriis alias innutritus, & fugere nefcius, a Mauritio Saxone Oeniponte pene oppressus Villacum tanquam ad asylum magnis itineribus concessit, simulque eam Civitatem diuturna sua præsentia recreavit.

## WOLFFSBERGA.

**W**Olfsberga Lavantinæ Vallis Civitas cum Arce adjacente Clivo imposita a S. Henrico Imperatore Bambergensi Ecclesiæ una cum Villaco donata, Sedes est Praefecti, seu Vicedomini Bambergens-

ses per Carinthiam ditiones moderantis: cruentum hæc anno 1233. spectavit prælium, quod in ejus pomœriis efferbuit inter Bernardum Ducem, quem Provinciæ Proceres sequebantur, & Echenbertum Bambergensem Episcopum Franconibus, Istriani, Carniolis, & Aquileiensibus stipatum, pro dominiorum limitibus dimicantes. Anceps diu nutavit victoria, & modo uni, modo alteri confligentium parti se offerebat; jamque cum suis fugabatur Dux, sed Episcopo ob aggesta in campo cadavera ægre infrerente frontem verit, & redintegrata pugna desperatam antea palmam reportavit. Captus a Dietrichsteinio Echenbertus brevi dimittitur, recepto etiam Taryiseni Oppido, quod Bernardus illi ante conflictum ademerat, Anno autem 1361. non spectavit modo, sed experta quoque est belii casus Wolffsberga, Vicedomino Clagenfurti Comitiorum causa degente, Cives a quodam Othomaro seducti illata Cancellario nece, perduellioni præluserunt; namque eorum flagitium inaudiens Vicedominus collecto raptim milite ad Urbem advolat, crebrisque ictibus verberat; sed Civibus veniam demisse implorantibus ab ulteriori infestatione abstinuit, nonnisi seditionum paucis primipilis capite plexis, & Othomaro in 4. partes disfecto. Enormiori scelere Urbem hanc temerarunt Judæi anno 1338.

eo enim labente ternas minores hostias rite consecratas, & a Sacerdote quodam redivivo Juda sibi venditas cultris transfodiunt, nec emanente inde sanguine absterriti flammis admovent, sed his a tanto crimine abhorrentibus, in propinqua Lavanda fluenta ultimo adjiciunt. Paulo post pecudes illuc ad pascua emissæ humi repente procumbunt, quasi latens sub pane Numen adoraturæ: quod dum prætereuntes obstupecunt, & oculos quaquaversum circumferunt, vident hostias in ære supra littus pendere. Quare evocatus Henricus S. Pauli Abbas, Clero, Religiosis totaque Urbe ad hoc prodigium simul accurrentibus, reverenter patena binas ex iis sensim delapsas exceptit, tertia interim disparsa. Illæ ad Parochiale S. Marci Templum delatae multis miraculis coruscarunt, donec panis species evanuerint. In hujus Urbis territorio ferrifodinas suo tempore excutas fuisse testatur A-

(a) De agricola (a) ita scribens: *In Norico fer-  
vet. & nov. metal. 1. 2.*

*rum non minus, atque quondam durum,  
& copiosum effoditur, & perficitur ma-  
xime in Carnunto ad Volsbergum. Ubi  
author Carnuntum pro Carinthia sub-  
stituit, quod & ab aliis perpe-  
ram factum licuit interdum obser-  
vare.*

Antequam e Carinthia discedam, ne illi injurius videar ob omissum Archiducatus titulum, placuit postrimo exhibere, quæ ad eum comprobandum Megiferus congeslit,

ul lectoribus fas esset de rei veritate, prout libuerit, sententiam ferre. Atque in primis prætensam hujus dignitatis originem unde, & quo fundamento is author deducat, jam superius exposuimus; cætera vero testimonia ab eodem alibi (b) Chron. Carin. 1. 6. c. 39.

collecta usurpatum quidem aliquando Archiducatus titulum ostendunt, sed ex præsumpta Carolinæ concessionis opinione potius, quam ex novæ authoritatis, aut juris accessu id factum non obscure appetet. Inter Provinciæ igitur monumenta teste Megiseru reperire est Archiducis Ernesti Ferrei, Friderici IV., Maximiliani I., & Caroli V. Imperatorum diplomata, in quibus Carinthia Archiducatus nomine insignitur; atque insuper Ferdinandus I. indulisse Carinthiis dicitur, ut cudendæ apud eos pecuniæ hæc præfigeretur inscriptio. *Ferdinandus Dei gratia, &c. Archidux Austriae & Carinthia. Demum a Carolo Archi-  
duce, & Rudolpho II. Cæsare admissam ejusdem tituli prærogati-  
vam asseverat. Certissimum inter-  
rim est, eam hac tempestate obso-  
levisse, cum in nullo Cæsareo di-  
plomate peculiaris hic Archiducis titulus intuitu Carinthiæ usurpetur:  
quinimo autem Lazi, illum  
jam pridem (si tamen antea viguit)  
ab Ottone I. Imperatore, cum Con-  
radum ex Carinthia depulisset, ob-  
literatum omnino fuisse. Aliam in  
hujus vocis ortu sententiam pro-  
fert apud præcitatum Megiferum Jaco-*

Jacobus Spiegelius his verbis comprehensam : Archiducis appellationem primum Bruno frater Othonis Imper. ejus nominis I. insolenter assumpit teste Æmilio Veronensi, (a) id quod postea Carinthorum Principes usurparunt, quibus extinctis ad Austriacos simul cum ditione transit, quod & hodie obtinent. Verum admodum fallitur hic scriptor, dum putat Archiducatus prærogativam ex Carinthia primo in Austria transmigrasse; nam quamvis probabilius videatur, continuum illius tituli usum in Maximiliano I., antequam Imperator salutaretur, invaluisse ; prius tamen Austriae Principibus subinde datum plurimi testantur, & nominatim de Rudolpho IV. id scripsit Megiserus: quinimo antequam Augustissima Habsburgicorum profapia Austriae imperaret, eundem

(a) Hist. Franc. 1.3.  
titulum a nonnullis referri, in illius Provinciæ descriptione satis explanavimus. Unde nemini mirum accidat, si Joannes ex Habsburgica Domo, utpote Alberti I. Austriae Archiducis, dein Cæsaris ex fratre nepos, quamvis Sveviæ, non Austriae Dominus, a me tamen Archidux ibidem nuncupetur ; si enim solenne haec tenus fuit diversis hujus celeberrimæ stirpis furculis, etiamsi Styriæ, Tyroli, Belgio, aut Hispaniæ, non autem Austriae dominantibus, Archiduces inscribi, cur eum titulum mihi non licebit prædicto Joanni attribuere? præsertim tesserae gratia, qua Habsburgici Principes ab aliis familiis distinguerentur, prout paulo ante ibi spoponderam : quare neceesse omnino fuit etiam in Joanne datam fidem servare.

## TOPOGRAPHIA DUCATUS CARNIOLIÆ.

**C**Arniolia vulgo Crain usque ad proxima nobis tempora apud geographos omnes Carniola semper audiit ; quasi parvam Carniam dicecent, ut hæc a majori, cuius in Carinthiæ Topographia ex parte meminimus, & de qua suus adhuc erit differendi locus, ea diminuen-

tis vocabuli nota distingueretur. Hæc nominis sui vetustate perlungstratas haec tenus regiones, Austria scilicet, Styriam, & Carinthiam longe antecellit ; ad decimum quippe seculum, seu mille prope annos illa ascendit, cum Paulus Aquileiensis Diaconus, (b) qui floruit anno 774., jam Carniolam sub hoc c. 52. nomi-

nomine agnovisse in ejus Longobardica historia reperiatur. Amplitudinem hodiernam Carniola non nisi anno 1374 consecuta est, quo eidem Istria Austriaca cum Marchia Vinidorum & Metlica seu portione illa, Corcora & Colapi flaviis inclusa ab Alberto III., & Leopoldo itidem III. Austriae Ducibus quibus haec Provinciae post mortem Alberti Goritiensis Comitis obvenere adscripta fuit. Hodiernae Carnioliae limites, qua septentrioni obvertuntur, parte Carinthiae & Styriae, quam Celeianum Comitatum dicimus clauduntur: qua orientem respiciunt solem eisdem Styriae partem, tum Sclavoniam & Croatiam contingunt: qua meridiem spectant, parte Croatiae altera, Liburnia, finu Flanatico, & Istria Veneta circumscribuntur: demum, qua occiduo objiciuntur soli ab Istria Veneta tractu Tergestino, Mari Adriatico, Foro Julii seu Goritiensi comitatu & Carniae parte attinguntur. Terra est plurimum montosa, & ubi ad Carnicas, Juliae alpes, quae Italiam terminant, accedit, in saxosa asperatur juga, in quibus nonnisi nuda rupium dorsa, lapidumque acervi viatorum oculis objiciuntur; fertiles tamen amoenaque valles montium arduitatem alicubi leniunt, densaque nemora petras inumbrant. Nec deest in reliquis Provinciae tractibus virens speciosaque planities, quae circa Crain-

*Topogr. Austr. P. I.*

burgensem Urbem maxime dilataatur. Cæterum variarum frugum plerumque ferax est, fodinis insuper, rarisque naturæ miraculis nobilitata. In duas a Magno partes dividitur Carniola; Inferiorem nempe, & Superiorem, seu in siccam, & irriguam. In quinque vero eandem dissecat Valvasorius Superiorum nimirum, Inferiorem, Mediam, Interiorem, & Istriam, ob totidem Capitaneos militares qui militiam Provincialem, exigente necessitate in singulis partibus cogere, eique praefesse debebant, atque hic mos, utut militia Provincialis, ejusque Praefecti paucis post obitum Valvasorii sublati fuerint, fere ad nostra usque tempora perduravit; verum ubi in novoteras Austriae administrandi ordine, ab Augusta nostra Maria Theresia suscepto anno 1748. tres Praefides, seu Capitanei Circulares constituti fuissent, una & Ducatus Carnioliae in totidem circulos superiorem Inferiorem & Interiorem separatus fuit. Non defueri qui Carnioliam æri incisam publico exhibuere quos tamen omnes longe superavit annis abhinc quindecim Joannes Dismas Florantschitsch de Grienfeld emeritus hodie sacer curio, in prægrandi sua Ducatus Carnioliae *Tabula Chorographica* quam decem annorum labore, Geometricis dimensionibus, trecentis fere ex eminentioribus castrorum speculis, sublimiorumque montium jugis

U

jugis

jugis institutis, concinnavit, ac Labaci in duodecim majoribus fo- liis, scilicet pro Abrahame Kaltschmidt incisis, inclytis Carnioliae Proceribus dedicavit, quorum jussu sumtibusque ea etiam confecta sunt. Ut diversae sunt originis incolae ita & diversa utuntur lingua duæ tamen præ reliquis vigent Slavica scilicet quæ peculiari dialecto ab aliis ejusdem originis discreta est & Germanica qua Nobiles præsertim delectantur.

Hodiernus Carnioliae situs, antequam hoc singulare sibi nomen adeptus in unam coalesceret Provinciam, diversarum penitus regionum, populorumque terminos Romanæ Reipublicæ ævo, ac primis Imperii seculis complectebatur: Pannonia enim, Illyricum, Noricum, & Italia in hoc terræ spatio simul concurrebant. Et in primis ad Noricum mediterraneum, quod Vaurisci aliquando infederant, ex iis, quæ in Austriae, Styriaeque descriptione attulimus, liquido constat, modicum saltem eorum montium tractum spectasse, qui partim Carinthiae, partim Styriae adhærent; cum hucusque Australem Cetii montis extremitatem protenderimus. Reliquam autem oram, quæ ab editoribus jugis usque ad Savum fluvium descendit, una cum Labacensi territorio, quamvis secus Meridionale, non Orientale Cetii latus, ut alias Pannonia, extendatur, huic nihil-

ominus regioni insertum fuisse ex Ptolomæo inferius demonstrabimus. Illyrici portionem eatenus includit Carnolia, quatenus Japidiā Illyrico nonnulli annexunt, & abunde patet magnam Japidiæ partem in Carniolico solo a veteribus circumscribi: primum ex obscuro Strabonis textu colligit Schönleben, (a) pluribus refra-  
(a) Carn. gantibus, quibus Strabone anti-  
quior Dionysius Halicarnasseus pa-  
trocinatur his verbis: *Japodes na-  
tio Celtica prope Illyricum*, ubi perspi-  
cue Japides Illyrico excluduntur.  
Permixtam tamen ibi utramque gentem innuit alio in loco Strabo,  
(b) dum ait: *Japodes circa hæc habi-  
tant loca, gens Illyricis, Celtisque com-  
mixta*. Alterum, quod probandum adhuc est, nempe Carnioliae par-  
tem fuisse a Japidibus olim habita-  
tam, declarat Plinius, dum illos Carnis, & Istris tanquam contermi-  
nis admoveat. Illud ita exprimit:  
(c) *Carnorum hæc regio, junctaque re-  
gioni Japidum*. Hoc vero alibi sic  
tradit: (d) *Nonnulli in Flaniticum si-  
num Japidum promovere a tergo Istriæ*.  
(c) Lib. 3. (d) Lib. 3. c. 18. c. 19.  
Incolebant porro Japides ipsas al-  
pes non tantum, qua istæ in Bo-  
realem, seu Celtarum plagam, sed  
etiam, qua in Australem, seu Ita-  
licam se demittunt; quod a Stra-  
bone rursus edocemur præcitatis  
paulo ante verbis hæc statim sub-  
dente: *Et penes ijtos est sublimitas*. Ja-  
pides igitur virorum floentes robore an-  
tea, & utroque ex montis latere domicia-  
lia

(a) Lib. 7. lia habentes, &c. Et alibi: (a) *Japodes* in *Albio* monte siti sunt, qui alpium postremus est excelsus admodum, hinc quidem ad *Pannonios* pertinentes, hinc autem ad *Adriaticum* mare. Quintimo Plinius absque ullo discrimine *Japides* Italiae adjudicat ita scribens: *Brutium*, quo longissime in *Merediem* ab *Alpium* pene lunatis jugis in *maria* excurrit *Italia*: Ab eo *Græciae* ora: mox *Salentini*, & *Hetrusci*, *Veneti*, *Carni*, *Japides*, *Istri*. Demum ex *Italia* Carnioliae id accrevit, quod trans alpium verticem, utpote *Italiae* terminum a potioribus veterum, & recentiorum suffragiis, imo a natura ipsa statutum, Carniolia hodie sibi vendicat, aut arrogat.

Dum hæc memorati hactenus autores fastis committerent, Romanis suberat Carniola; de *Pannonia* quippe, & *Norico* id jam alias ostendimus, de *Japidia* autem, tum ex medio inter *Pannoniam*, & *Italiam* situ congrue infertur, tum sæpe allegatus Strabo id ipsum diserte recenset: *Japodes*, inquit, ab *Augusto* tandem *Cæsare* summo cum labore debellati sunt, cum late latrociniis invalescerent. Et alibi: *Japodes* pugnaees quidem, ceterum ab *Augusto Cæsare* tandem expugnati ad unum. A barbaris autem sensim deformato Romanæ gloriæ, majestatisque splendore, variis sibi succedentes populi, nec dum exuta per Christi legem feritate, Carniolicam oram, uti & cæteras adfitas regiones, aut prætreunentes devastarunt, aut immorati

subjecerunt. Hujusmodi fuere *Vandalii*, priusquam in Gallias transmigrarent, *Heruli*, *Gothi*, & *Longobardi*, dum in *Italianam* proficiserentur Post quos secuti *Slavi* interdum etiam *Vendi*, aut *Vindi* appellati, constantem istic sedem fixerunt, suamque gentem, & idiomam late propagarunt, de quorum origine, nomine, & certissima a *Vandalis* distinctione contra *Krantzium*, ejusque sequaces, quibus annumerandus *Schönleben*, magnus aperietur disputandi campus, si de *Slavonia* aliquando agemus. Interim eorum in Carnioliam adventum post annum 548. differre necesse est, cum teste synchrono auctore Procopio (b) *Slavini*, seu *Slavi* primum eo anno in *Illyricum* se effuderint, unde ad *Noricum*, & *Carnos* deinde penetrarunt; quod jam alibi a me assertum nunc ipsiusmet Procopii verbis stabilio. Per id tempus, inquit ille sub *Justiniano Imperatore* ad annum 13. belli *Gothici*, qui cum 548. secundum unanimem chronologorum sententiam coincidit, *Slavinorum* exercitus flumine *Istro* trajecto *Illyrios* omnes ad usque *Epidamnum* malis ingentibus affecere, partimque sine ullo atatis discriminatione in servitatem, quos licuit, abigendo, & eorum bonis direptis desævient. Ad hæc præsidia illis in locis non pauca, & quidem prævalida occuparunt. Denique quæ de *Hunnorum* jugo *Slavis* injecto, & *Samonis* virtute exculso in *Carinthia* descriptione al-

(b) De  
bello Goth  
lib. 3.

lata sunt, ad Slavos quoque Carniola potitos videntur extendenda, & communem Carantanis, ac Carniolis fuisse Regem aut Ducem verosimile est, cum Fredegarius apud Henschenium alibi citatum Slavos illos Carantanos, & Winidos nuncupet, & Aimoinus, qui nono seculo florebat, eos peculari pariter Winidorum nomine discernat, quorum Marchiam in Carnioliae latere Croatis contermino geographi agnoscunt; sic quippe scribit is author apud Schönleben: *Anno quadragesimo principatus Clotharii, homo quidam nomine Samo natione Francus, multos negotiatorum mercandi causa in Slavorum patriam, qui etiam Winidi dicuntur, secum adjunxit. Slavi jam dudum Hunnis, qui & Avares dicuntur, subiecti, dominationis eorum jugum detrahere tentabant. Ad quos Samo cum sociis adjumento Winidis futurus forte profectus est, factaque congreSSIONe Winidi Hunnos superant.* Slavi itaque licet his terris diu dominati, evincere tamen nequiverunt, ut Carniolae nomine obliterate, suum illi inducerent; nam ante eorundem ingressum jam illud viguisse inde mihi persuadeo, quod vix ambigu possit, id a vicinis Carnis hucusque sese ampliantibus emanasse, hocque illi ægre attentassent, imo nec obtinere appetiissent, dum Slavi inculta tunc gens, & a veri Dei cultu aliena regionem opprimebant. Neque diutius eam Carnorum migrationem protrahi sinit

Paulus Diaconus supra citatus octavi seculi scriptor, dum veluti de Provincia jam diu a Slavis infessa, hæc de Carniola exprimit: *Rachis denique apud Forum Julii Dux, ut dixeramus, effectus in Carniolam, non Carnioliam, uti Schönleben (a) (a) Anna. impressit, Slavorum patriam cum suis Car. ad an. ingressus, magnam multitudinem Slavo-735. rum interficiens eorum omnia devastavit. Ubi cum Slavi subito irruissent, & ipse adhuc lanceam suam ab armigero non abstulisset, eum, qui primus ei occurrit, Clava, quam manu gestabat, percutiens ejus vitam extinxit.* Erat Rachis Longobardorum Dux, qui in Italia præter Regnum Ducatus aliquot, & inter hos unum apud Forum Julii fundaverant. Fortius in Slavos non modo Albis fluvii, sed & Adriatici maris accolas movit Carolus Magnus Francorum Rex, postea Imperator, protenso sub annum 788. usque in Dalmatiam imperio, quod ut a finitimis hostibus tutaretur, limitaneos Praefectos per extimas Provincias distribuit, ex quibus Ericus Foro Julienses, & Carniolos usque ad annum 799. moderatus, post multa prælia feliciter confecta, & victorias gloriose partas apud Tarsaticam Liburniæ ab Oppidanis per insidias misere trucidatur. Imperante post Carolum Ludovico, & Cadolaco Erici Praefecturam administrante, Lindewitus Slavorum in Pannonia Savia Dux anno 819. a Cæsaris, ejusque Praefecti obedientia deficiens

ciens Carniolia occupata ad Carantanos jam castra promoverat, sed Baldrichus Cadolaco intra eundem annum febri extincto subrogatus, cum exigua militum manu illi obviam processit, aggressusque ad Dravum fluvium hostes pluribus cæsis e Carantanorum finibus fugavit. Parum tamen attritas hac clade Liudewiti vires experta est paulo post Dalmatia, quam is revocatis illuc copiis ferro & igne depopulabatur. Tunc Ludovicus Imperator terna armatorum agmina ex Saxonia, Franconia, Bavaria, atque Italia conscripta diuturnis itineribus in perduellem progredi jussit, cumque hæc in unum convenissent exercitum, totam pene Liudewiti regionem eodem, quo ille Dalmatiam, modo salutarunt, & munitioribus Oppidis, in quæ Dux se fuosque receperat, minime attentatis, in Germaniam reversi sunt. Interea autem Carniolenses, qui Carcasavum fluvium habitant, & Forojuliensibus pene contigui sunt, Baldricho se dediderunt. Idem tamen pars Carantanorum, quæ ad Liudewiti partes a nobis defecerant facere curavit. Prout referunt annales rerum Francicarum sub Pipino, Carolo, & Ludovico gestarum ab anonymo, & ut videtur, coævo Ordinis S. Benedicti scriptore contexti, quem ipsum Eginhardum esse Caroli magni vitæ auctorem Lambecius, Schönleben, aliique erudit firmiter existimant. Carniola ergo Imperio redditæ,

diu Forojuliensibus præfectis, seu Ducibus, diu etiam Carantanorum, dein Carinthiæ Ducibus ab illis pridem sejunctis morem geslit, donec in singularem erecta Marchionatum proprium quoque Principem impetraverit: quæ, quomodo, & quando evenerint, divinari potius potest, quam enarrari, nec nisi obscure, confuseque hanc rem pertractant Valvasorius, & Schönleben, ad quos utpote annualium seriem fusius deducentes, topographiam ego potissimum intendens lectorem remitto. Aliquod tamen lumen præbet Ottonis II. Imperatoris diploma datum an 974., quo ille Abrahamo Frisingensi Episcoipo Locopolitanam ditionem transcribit: ejus fragmentum ad rem nostram plurimum faciens ita se habet. *Per interventum matris nostræ Adelheit, & fidelis nostri videlicet Hainrici Duci, quasdam partes nostræ proprietatis sitas in Ducatu præfati Duci, & in Comitatu Poponis Comitis quod Carniola vocatur, & quod vulgo Creina Marcha appellatur. Est enim in ipso Comitatu rivulus, qui vocabulo Slavorum Subniza vocatur, &c.* Ubi nullus dubito, quin Schönleben, (a) qui illius diplomatis partem typis vulgavit, Carniola pro Carniola subfti-<sup>(a) Annal. Car. ad an. 973.</sup> tuerit, uti eundem alias egisse deprehendimus. Munus hoc Frisingensi Ecclesiæ oblatum censet idem author fuisse totum ipsum Poponis Comitatum, quem propterea ultra Locopolitanum dominium non ex-  
U 3 tendit

tendit: verum bona illius venia, cum Cæsar clare ibi asserat, se elargiri terras in Popponis Comitatu sitas, procul dubio iis verbis innuit se non totum Comitatum, sed peculiare tantum aliquod ejus territorium complecti. Unde ego Popponis Comitatum, seu Creinan Marcham interpreter, eorum Comitum, seu Marchionum ditionem (nil enim aliud erat Marchio, quam Marchiæ alicujus Comes, uti ex Germanica voce Marchgraff, ex qua Latina derivatur, luculente colligitur) qui Crainburgi resedisse concordi scriptorum sententia feruntur, totique Carnioliae inde vulgo Crain dictæ dominabantur, licet non ad eam, qua modo patet, amplitudinem dilatatae. Sane miror, eruditum eum authorem, qui hanc suam Provinciam totis viribus amplificare alias nititur, ad solum Locopolis districtum hic eandem coarctasse. Ex his itaque certo inferre fas est, Ottouis II. ævo Carniolæ Provinciam pro singulare Marchia jam fuisse habitam, ab Ottone I. fortassis instituta, qui a Palladio dicitur quatuor decim hujusmodi Marchias in Italia definitivisse. Utrum autem Poppo potestate tantum usus sit Henrico Carinthiæ Duci subordinata, quamvis ex præmisso diplomatis textu id apparere autemet Schönleben, in dubio ibidem relinquí potius pronunciarem: quid enim prohibet, quo minus per quasdam partes

sitas in Ducatu præfati Ducis, & in Comitatu Poponis intelligentur fundi partem in Carinthiæ Ducatu tunc ampliori, partim in prædicto Comitatu comprehensi? Megiferus, & cum eo Fuggerus, ac Buccelius subtractam a Carinthiaci Ducis imperio Carnioliam, & Engelberto Crainburgensi Marchioni omnimode subjectam putant sub anno 1165., cum id a Friderico I. Imperatore peractum scribant eo penitus tempore, quo ille Styriam Ducatus titulo decoravit. Deficiente porro Crainburgensium Marchionum prosapia in Engelberto ultimo, Provinciæ Status bellicosæ Principis Friderici II. Austriæ, & Styriæ Ducis virtute, vicinique allecti Carnioliae dominium illi detulere, quam ultroneam donationem Cæsar Fridericus II. ratam habuit, eumque seu Comitatum, seu Marchionatum ad Ducatus prærogativam evexit, dato anno 1231. diplomate apud Fuggerum excuso, cuius hoc initium: Fridericus II. divina favente clementia Romanorum Imperator semper Augustus, Hierusalem & Siciliæ Rex Friderico II. Duci Austriae, & Styriæ suo dilecto Principi & Comiti Carniolæ gratiam suam, & omne bonum. verba autem; quæ magis ad rem nostram spectant, ita circa finem subsequuntur: Ad decus præterea Regni tui præsentis privilegii autoritate permittimus, ut de Provincia Carniolæ Ducatum facias immediate tibi subiectum, parte (forsan per te) nobis, & successoribus.

<sup>(a) Specul.</sup>  
<sup>hon. l. 2.</sup>  
<sup>c. 3.</sup> soribus nostris, & imperio responsum; & in Ducatu ipso C. cognatum tuum fidem nostrum in Duce valeas promovere plenam tibi concedimus potestatem. Rediit postmodum ad Carinthiam Carniola ab Alberto I. Austriæ Archiduce dein Cæsare Meinhardo illius Duci, Fuggero (a) teste, concessa, sed cum eadem rursus anno 1335. ad Austriae devoluta est, quam magna in Principem fidelitate, nec minore sui felicitate hodieque adorat. Hactenus in universam Carniolici Ducatus faciem oculos, mentemque, quasi eminus defiximus, nunc vero singulas Urbes, Arces aut Oppida obeamus, collata eis a natura, vel arte decora, quorum haud sfernendum thesaurum primo pandet Metropolis, cominus inspecturi.

## L A B A C U M.

**L**Abacum vulgo indigenis Lubiana, Germanis Laybach, Italisch Lubianna præclara, venustaque Urbs subest latitudinis gradui 46, min. 2. longitudine vero gradui 32. min. 5. & 27. milliarium itinere Græcio in Meridiem abest. Muro cingitur 6. portis aperto, si etiam aquatica in calculum veniat, quarum ternæ totidem respiciunt. Suburbia nautis, & pescatoribus plurimum repleta. Principem lo, cum has inter hodie obtinet aulica, ita ab adsita aula Ducali nominata, ad quam Labacensis Civi-

tas Carolo VI. Cæsari elegans se-  
cto e lapide struxit monumentum.  
cujus supremam partem ejusdem  
Augusti effigies, Carrariensi e mar-  
more gnave efficta occupat hac ad-  
jecta Epigraphe: *Carolo VI. Roma-  
norum Monarchæ, German. Hispan. Hun-  
gar. Bohem. Regi, Archiduci Austriæ  
&c. hanc urbem ad accipendum a  
Ducatu Carniolæ homagium ingredienti  
S. P. Q. Labac anno 1728. Bifarium  
illam fecat cognominis fluvius, qui  
adeo lentis progrederit aquis, ut  
in quam partem defluat ægre ab  
oculo discernatur, donec declivem  
naëtus alveum velocius in Savum  
irrumpit. Hunc, prout infra cla-  
re patebit, Nauportum vocavit Plinius,  
& Strabo, sed hic alibi Cor-  
coram dixit, ubi a Lazio erroris  
arguitur non sine ratione suspicante  
in Gurca Carniolæ amne anti-  
quorum Corcoram perennare, non  
autem in Labaco duobus milliari-  
bus inde diffito. Interim fluminis  
Corcoræ nomen cum Savo junctum  
fuisse videtur ab annalium Franci-  
corum authore, dum Carniolenses  
retulit ad Carcasavum habitare. Ita  
Labacus pluvia, aut solutis nivi-  
bus auctus interdum intumuit, an-  
scilicet 1190., & 1537., ejusdem-  
que seculi 89., ut cuncta Oppidi,  
vel Civitatis compita pervadens  
ubique navigia pateretur. Civi-  
tatis enim formam primo induit  
Labacum anno 1416., quo fer-  
vente incolarum industria non mo-  
do accumulari ædes, sed & te-  
nues*

nues muri circa eandem duci cœperant, hoc Civium molimine dein a Friderico III. Cæsare sub annum 1475. ita promoto, ut Turcarum deprædantium insultus ut cunque arcerentur. Tandem ab anno 1520. usque ad ejusdem seculi 53. dejecto priore opere utpote ad Urbis tutelam minus idoneo, aliud validius aggressi Labacenses, valla, & muros hodieque extantes intra excavatas fossas erexerunt, Ferdinand I. Romanorum Rege magnam sumptuum partem illis supeditante. Penes Urbem attollitur collis denso virescens nemore, e quo in apice assurgit Ducalis, amplaque Arx antiquos indicans natales, & ad ortum solidis mœniis ad reliquias vero Orbis plagas, aut triplici, sed veteri pariete, aut nullo fere munimento vallata: Seculis superioribus supremi Provinciæ Præfides, quos Capitaneos dicimus, eam inhabitabant dein eorundem Burggravii; jam ab anno 1752. Augustæ voluntate, recipiens militibus, dum stativa hic agunt ea inservit.

Præsentis duntaxat Civitatis oratum, progressusque haec tenus deduxi, at si ad vetustiorem ætatem regredi lubet, & veterum monumenta revolvere, in aliam longe antiquissimam, ac celeberrimam incidemus Urbem Æmonam videlicet, five Hemonam, vel Hæmoniam, quam in hoc eodem solo quondam floruisse, sed a Barbaris Romanum Im-

perium dilacerantibus postmodum deletam, tot, tantaque firmant argumentorum pondera, ut inter Urbes, quæ prisci nominis jacturam fecere, iis adnumeranda sit, quarum antiquatam sedem certissima alia indicia posteritati manifestarunt, quidquid contra oggianiant alienæ gloriae invidi, aut geographiæ, historiæque ignari. Hanc sententiam maxime tuetur, atque uberrimis veterum testimoniis studiose collectis dilucidat pereruditus Carniolicorum annalium author Schönleben, quem præiverunt duo illustres geographi Ortelius, & Cluverius, aliquie complures, & novissime subsequitur non minus clarus scriptor Cellarius: sed ad rem proprius accedamus. Ptolomæus postquam Superiorum Pannoniam ad Orientale Norici latus fecus Cetium montem jam sæpius memoratum descripsit, ejusque Urbes recensuit, hæc postremo subjunxit: *In limite Italæ sub Norico iterum Pannoniæ Civitas Hemona*, ubi luculente docet Æmonam licet in Pannonia comprehensam non ad Ortivam Norici plagam, uti reliqua illius loca, sed ad Australem extitisse, sicut Italia, inter quam & Noricum ea Civitas interjicitur, aliqua scilicet Pannoniæ portione eousque protensa. Quibus rite perpenitus vix aptiorem Æmonæ reperies campum, quam Labacensem districtum, utpote inter Istriam Italæ Provinciam, & eam Norici partem

tem Styriacam scilicet, quæ Pannonia adhærebat, inclusum. Certe hic unus Ptolomæi textus Aemonam saltem Carnioliae vendicat, si suis momentis sedulo expendatur.

(a) Lib. 3. Unde audiendus modo Plinius, (a)  
c. 25.

qui verum ejusdem situm propius monstrabit: Quæ pars, inquit ille, ad mare Hadriaticum spectat, appellatur Dalmatia, & Illyricum supra dictum. Ad Septentriones Pannonia vergit, finitur inde Danubio. In ea Colonia Aemona, Siscia. Amnes clari, & navigabiles in Danubium fluunt, Dravus & Noricus violentior, Savus ex alpibus Carnicis placi-

(b) Lib. 3. dior. Alibi vero clarissimus: (b) Argonavis flumine in mare Hadriaticum de-

scendit non procul Tergeste: nec jam constat, quo flumine. Humeris travectam Alpes diligentiores tradunt. Subiisse autem Istro, dein Sao, dein Nauperto cui nomen ex ea causa est, inter Aemonam, Alpesque exorienti. Sermo igitur hic Plinio fuit de alpibus Tergestum, seu Istriam a Pannonia separantibus, inter quas, ac Aemonam fluere Nauportum afferit, & in Savum effundi. Consule nunc Mappas, & pro libitu contemplare, an non Nauportus sit ipse Labacus amnis, qui ex iisdem alpibus emanans Labacensem Urbem præterfluit, & tandem Savo notissimo etiamnum flumini miscetur. Sane aliud flumen, qui Plinianæ descriptioni exactius respondeat, ægre deprehendes. Verum clarissime hujus rei veritas elucebit, quando de Nauporto Oppido, seu Hyperlab-

*Topograph. Aust. P. I.*

co inferius agemus. Observandum hic autem est, aliam quidem Urbem sub Aemonia nomine a Plinio in Noricis censeri, sed geographorum pene omnium sensus errasse hunc authorem pronunciat, eadem scilicet Urbe in Pannonia, & Norico perperam collocata, cum nullus alius scriptor Aemonia in Norico meminerit, & primum fuerit in hujusmodi spalma labi, siquidem in Pannonia, & Norici confinio Ptolomæus, ut vidimus, aliquique eam Civitatem descripsere. Interim non modo in Carniola Aemonam reperimus, sed & apud Labacum fluvium aliquo post Nauportum Oppidum intervallo, uti suo loco dicetur, qui uni Labacensi Civitati quam optime convenient.

Veterum geographorum Principibus primas dedimus; nunc autem Itineraria a tredecim circiter seculis ad nostram usque ætatem transmissa percurramus; Favet enim imprimis sententia nostræ Antonianum, cuius itineris ductus cum suis miliaribus hoc ordine procedit, additis ex adversa parte recentibus nominibus, quæ cum antiquis coincidere, aut manifesto patet, aut ex situ, & distantia eruditæ opinantur.

Concordia Civi- M P Concordia.  
tas

Aquileia Civi- XXXI. Aquileia.  
tas

Frigido fluvio XXXVI. Vipach.

Longatico mansio XXII. Logatez.

X

Hemo.

Hemona	XVIII.	Laybach
Adrante mansio	XXV.	Dranberg.
Celeia Civitas	XXIV.	Celeia.
Nec minus suffragatur Peutingeriana Tabula, ex qua apud Vellerum edita hoc itineris fragmentum ad rem nostram excerpsti.		
Savo fl.	M. P.	Savus
Emona	VIII.	Laybach
Naupporto	XII.	Oberlabach
Longatico	VI.	Logatez.
In Alpe Julia	V.	Alben, seu Planina
Fl. Frigido	desunt	Vipach
Ponte Sonti	desunt	Lisonzo
Aquileia.	XIII.	Aquileia
Demum Labacensi vetustati patrocinatur aliud Itinerarium mihi ignotum, quod Hierosolymitanum Schönleben vocat, ejusque partem hoc modo subdit.		
Aquileia	M. P.	Aquileia.
Ad Undecimum	XI.	Undecimo.
Ad fornulas	XII.	Sanpass
Castra	XII.	Prat, five Poderai.
Ad pinum sum- mas Alpes	IX.	Alben
Longatico	X.	Logatez
Ad Nonum	IX.	Billiechgratz
Emona	IX.	Laybach
* Concordant hæc antiqua cum hodiernis intervallis, si juxta geographorum regulam 4. passuum millia communi Germanico millari adjudicentur, communi inquam; non enim me latet, plura intercurere majora, & aliquando minora ob enormem Germanicorum mil-		

liarium inæqualitatem: ubi illud quoque præ oculis habendum, diversa scilicet ad eorundem terminum patere vias, nec ubique nobis innotuissæ, qualem Romani triverint; unde si alicui nonnulla ex enumeratis distantiis a præsenti discrepare videatur, ejusmodi viarum mutationi id adscribi potest, vel etiam amanuensibus; quid enim facilius, quam in ea exemplaria adeo longa temporis intercapedine toties descripta mendum aliquod circa numeros irrepisse. Tres præterea inscriptiones Labaci effossas, & Æmonæ nomine insignitas profert Schönleben, quarum unam hic subjicio, quia Legiones in hac Urbe aliquando degentes colligi ex illa possunt; *M. TITIO M. F. CL. TI. BARBIO TITIANO DECURIONI EMONE T. LEG. II. AD FUTRIC. ITEM LEG. X. FRETENS. HASTATO. IN COH. LEG. II. TRAFAN. EX CORNICULAR. PR. PRO. LARCIA VERA FILIO PISSIMO L. D. D. D. Æmonam Labaci supereresse, vel saltem in ejusdem vicinia secus Labacum amnem extitisse, haud punto posse nunc ab eruditis in dubium revocari. Parum econtra itinerariis, aliisque relationibus hucusque allegatis respondet Iggi- um duobus milliaribus Labaco dis- situm, & a fluvio pariter remotum, quod Æmonæ successisse autumat Lazijs; procul autem ab iisdem aberrat Blondi, & ejus sequacium fen-*

fententia, qui Aemonam in Istria, ubi modo Civitas nova extat, agnoverunt. Historicos igitur adeamus, ut quæ de Aemona illi fastis commiserunt tanquam ad hodiernam Carnioliae Metropolim spectantia, perscrutemur. Antiquissimam imprimis originem Sozomenus, qui anno 440. florebat, his verbis exhibet ex Basileensi anni 1562. editione desumptis: *Argonautæ cum Aemona fugerent, non eadem sunt in redditu usi navigatione, sed trajecto mari Scytharum per hosce fluvios ad Italæ terminos pervenerunt, ubi & hybernantes Civitatem condiderunt, dictam Aemonam. Ingruente vero æstate ope incolarum Argonautem circiter quadringenta stadia arte mechanica per terram ad Aquilam fluvium traxerunt: qui Eridano miscetur. Consonat Zosimus, qui claruit anno 362., Aemonæ quippe ortum Argonautis pariter adscribit, circa translatam ad mare navem solummodo discors, de quo etiam antea Plinium, qua via, aut flumine ea transvecta fuerit, audivimus dubitatem.* Aemonæ porro nomen huic Urbi a Jasone Argonautarum Duce inditum fuisse omnino videtur, ut patriæ suæ Aemonæ (postea Thessaliæ appellatae) illustre in alienis terris erigeret monumentum, sicuti postremis duobus seculis familiare fuit Europæ gentibus, detectas in novo Orbe regiones, aut excitatas ibidem Colonias sumptis ex Europa nominibus distinguere, & dulci ea patriæ me-

moria partum ab ejusdem absentia mœrorem delinire. Argonautarum expeditionem anno mundi 2821., ante Christum 1232. juxta statutam a se chronologiam collocat Salianus, non decennio post, uti Schönleben perperam annotavit. Ricciolius 22. annos ex Saliani calculo demit, & anno ante Christum 1210. eandem adscribit, Aemonæ ætas plus quam 450. annis ipsius Romæ natales antecedit.

Si exorientem suspeximus Aemonam, non minus eam admirabimur proficien tem: Romanorum imprimis Coloniam huc deductam esse a supra citato Plinii textu, edocemur, quod sub Octaviani Augusti Imperio accidisse verosimile est. Ab eo tempore historicorum primus Aemonæ meminit Herodianus, Maximini ab a. 235. Imperantis iter e Pannonia in Italiam suscep tum describens: *Maximinus, inquit ille, postquam ad Italæ fines pervenit, præmissis speculatoribus, qui explorarent, annullæ in Alpium convallibus, atque densissimis sylvis insidiæ delitescerent, ipse in planum deductis militibus, jubet armatorum acies quadrato agmine incedere, ubi autem totam planitiem servatis rite ordinibus transmiserunt, ad primam Italæ urbem perventum est; quæ Hemona ab incolis vacatur. Ea sita est in extrema planicie ad Alpium radices. Hic speculatores, atque exploratores exercitus narrant Maximino, vacuum relictam Urbem, a fugisse omnes incolas, templorum etiam, a domorum januis incendio consumptis, at-*

que omnibus, quæ vel in urbe, vel in agris fuerant asportatis, --- Milites indigne tulerunt, quod ab initio statim fame laborarent; cumque noctem exegissent, partim intra patentes domos, partim in planicie ipsa, statim sole oriente ad Alpes accesserunt. Observatione dignum hic est, quod Herodianus, et si Aemonam Italæ Urbem nuncupet, eam tamen Labacensibus non surripiat, imo iisdem confirmet, cum in planicie, quæ ex Pannonia profici-scentibus paulo ante alpes occurrit, clarissime circumscrivat; quare vel dicendus est is author errasse, Aemonam Italæ includens, vel admittendum est ea tempestate Italiam ultra alpium juga se extendisse. Gloriosiorem hujus Urbis mentionem facit in Theodosii senioris Panegyrico Pacatus, dum aurea sua facundia solemnem exornat pompam, qua anno 388. Aemonenses Potentissimum illum Cæfarem de Maximo tyranno ad Sisciam, & Marcellino ejus fratre ad Petovium paulo ante cæso triumphantem exceperere. Post condigna ergo utriusque victoriæ encomia ita prosequitur Orator, cuius pereleganti dicendi stylo placuit nostrum quibusdam minus sapidum scribendi genus tantisper condire. Nec pia Hæmonia, ajebat ille, cunctantius, ubi te affore nunciatum, impulsis effusa portis, obviam provolavit, & ut est omne desiderium post spem impatientius, parum credens patere venienti, festinavit occursum venturo. Fingit quidem, ut scimus, timor gaudium:

sed ita intimos mentis affectus proditor vultus emunciat, ut in speculo frontium imago extet animorum. Velut illa Civitas a longa obsidione respirans, quod eam tyrannus alpibus objacentem tanquam bellum limen attriverat, tanta se, & tam simplici exultatione jactabat, ut inesse vera letitia nimia videretur. Ferebant se obviae tripudiantium catervæ, cuncta cantu, & crotalis personabant. Hic tibi triumphum chorus ille: contra tyramo funebres nenia, & carmen exequiale dicebat. Hic perpetuum victimis abitum, ille victoribus crebrum optabat adventum. Jam quacunque tulisses gradum, sequi, circumcur sare, præcedere, vias denique, quibus ferebaris obstruere; nullus cuique sui, tuique respectus blandam tibi faciebat injuriam. Quid ergo referam pro mænibus suis festum liberæ nobilitatis occursum? conspicuos vestes nivea Senatores? reverendos municipali purpura flamines? insignes apicibus Sacerdotes? Quid portas videntibus sertis coronatas, quid aulæs undantes plateas, accensisque finalibus auctum diem? Quid effusam in publicum turbam domorum? gratulantes annis senes, pueros sibi longam servitutem voruentes? matres letas, virginesque securas? Nondum confeceras bellum; jam agebas triumphum. Hæc pacatus, qui bus & frustra obseßam indicat a Maximo Aemonam, cum ex Italia in Pannoniam adversus Theodosium properaret, & quem splendoris gradum ea Civitas ascenderit, ob oculos ponit, dum magnificum Senatorum, Flaminum, & Sacerdotum explicat apparatum. Neque his

his fidem derogant quædam mendosæ illius panegyrici editiones ex male descripto codice exortæ, in quo cum pro *Hæmona* quidam legifserent *hac mora*, sive typis mandasent; sciolus aliquis videns sensum non apte cohærere, ineptius ipse substituit Naronam veteris quidem Illyrici Urbem, sed a Juliis alpibus remotissimam, per quas Aquileiam versus fugientem Maximum inde infuscatus a Pacato dicitur Theodosius, & ab Historicis omnibus confirmatur. Cæterum expresse Hæmonia legitur in pervetusta editione anno 1513. Viennæ Austriae peracta, ex qua præmissum orationis fragmentum decerpfi, & Hæmonam, seu Æmonam in suis exemplaribus extare, Schönleben, Cellarius, aliique complures attestantur. Par quoque error in easdem irrepsit editiones, dum pro *Siscia*, *Fisia* nusquam audita Civitas perperam supponitur. Secundo venerata est Æmona Theodosium anno 364., quo is Eugenio & Arbogasti ad alpes Julias obviam factus, famosissimam retulit victoriæ infra uberioris enarrandam. Post Theodosium Æmonam accese-

(a) Lib. 5. fuisse fertur a Zofimo (a) Gothorum Rex Alaricus ex Pannonia in Italiam anno 400. cum exercitu contendens, nullo tamen damno affectam Urbem memorat, sed tantum Regum apud Hæmonam castra locasse.

Episcopalem Cathedram jam ab anno 70. Æmonæ erectam con-

jicit Schönleben, quando nimirum a D. Hermagoræ Aquileiensis Præfusilis discipulis Christiana lex per circumfitas oras propagabatur. Primus tamen, qui posteris innotuit, ab eodem authore memoratur S. Maximus anno 254. sub Decii persecutione martyrii laurea coronatus in Urbe Assesia, quam Ptolomæus (b) Liburniæ Mediterra- (b) Lib. 2. neis inferit, & diversa martyrolo- c. 17. gia, ac Sancti acta apud Henschenium congesta in Civitatem Asiam perperam commutarunt. Ibi igitur generofus hic athleta, cum a Christi labaro nec munerum spe, nec minarum terrore avelli posset, Proconsulis jussu flagellis primum cæsus, dein equuleo tortus, tandem extra Urbem lapidibus obrutus vicitricem animam cœlo transmisit. Sacræ ejus exuviae Æmonam delatæ sunt, postea Romam, hinc vero ad novam Istriæ Civitatem, quæ, ut diximus, vetus Æmona nonnullis videbatur. Demum hinc quoque Venetas avectæ in S. Cantiani Ecclesia etiamnum quiescunt. Alterum Emonensem Episcopum nomine Maximum præfixum reperi Actis (c) Concilii Provin- (c) Tom. cialis anno 381. Aquileiæ celebra- 3. Concil. edit. Par. ti, in quo a triginta duobus Italis, Gallis, & Pannonicis Episcopis, præsentibus Gallorum, & Afrorum Legatis, Palladius, & Secundianus Episcopi Ariani cum Attalo quodam Presbytero damnantur; aditque in notis Binius, omnes, quot

quot interfuerunt, viros sanctos, & eruditos, famaque celebres, anniversaria commemoratione votis fidelium redivivos in Ecclesia vige. His adjicit Inchoffer (a) Castum in Damasi decretis laudatum & tres alios Valvasorius nempe S Florium, Gennadium, & Joannem. Tertium, de quo constat, Aemonensis Infulæ decus fuit Patriarchi Episcopus S. Ecclesiae Emonensis, prout subscriptus legitur in Actis Gradenfis Synodi an. 581. ab Aquileiensi Patriarcha Elia convocatae, idemque penitus est, qui in Barberino eorundem Actorum codice, quæ cum prioribus Schönleben allegat, Petrus Episcopus Emonensis nuncupatur. Ex his manifesto apparet, revixisse post excidium Aemiam quo eam anno 452. ab Attila Hunnorum Rege prostratam conciunt scriptores, unde non nisi Glavorum, aut Longobardorum tempestate deletum dici potest primævum hujus Urbis nomen; horum enim Duces in Foro Julii de-

(b) Hist. Long. 1.4. colligitur, non modico tempore Carnioliae imperitarunt. Abolito nomine perennat nihilominus Labaci Civitas Episcopali dignitate non minus illustris, quam anno 1461. Fridericus III. Imperator, annuente summo Pontifice erexit, & primum instituendum praesentavit Sigismundum a Lamberg, adjunctis Praeposito, Decano, decemque Canonicis, qui Praefuli decori

effent, & adjumento. Etsi vero horum numerus temporum vitio sex capitibus imminutus fuisset hodie tamen a totidem gentilitibus Familiarum Kirchberg Wolwitz, Codelli, Lamberg, Flachenfeldt & Schifferer se restitutum gaudet. Altero anno Pius II. Papa dato 5. idus Septembris diplomate Labacensem Diœcesim ex Aquileiensis, & Salisburgensis partibus conflamat ab omni tum Patriarchæ, tum Archiepiscopi Jurisdictione immunem declaravit Octodecim haecenus illa numeravit Antiftites a Ferdinandō Cæfare, Friderici III. Pronepote, etiam S. R. S. Principis dignitate exornatos, en singulorum nomina: Sigismundus a Lamberg, Christophorus Rauber, Franciscus Kezianer, Urbanus Textor, Petrus Seepacher, Conradus Gluflitsch, Balthasar Radlitius, Johannes Taufsch, Thomas Chrön, Reinoldus Scharlichius, Fridericus Otto Comes a Puechaim, Josephus Comes a Rabatta, Sigismundus Christophorus Comes ab Herberstein, Ferdinandus Comes a Khiensburg, Franciscus Carolus Comes a Kaunitz, Guilielmus Comes a Leslie, Sigismundus Felix Comes a Schrattenbach, & Ernestus Amadeus Comes ab Attems, anno 1757.

5. Decembris Viennæ vita functus. Eluctati tandem ex veteris historiæ tenebris ad meridianam evasimus lucem, praesentem nimirum Labaci statum, quem modo lecto-  
rum

rum oculis subjiciam , sacras Aedes de more præmittens. Hæ si ex Urbe , & Suburbiis ad calculum reducuntur , sexdecim universim colligentur . Cathedralis Ecclesia ad S. Nicolaum a nautis , & pescatoribus longe ante annum 1386. condita dicitur , quo scilicet fiammis correpta concidit , sed in majorem amplitudinem inde a Friderico III. Imper. ac Eleonora ejus conjugœ enecta , a Thoma Chrön , nono Antistite pluribus partibus decorata ; vetustate ipsa jam ruinam minitante anno primo sæculi labentis diruta , atque ad majestatem quam quisque in illa suspicit , inter annos quinque e fundamentis restituta Joannis Antonii Thalnitscher de Thalberg , Decani ac Vicarii Generalis öpe collectitia ac incredibili cura . Post hanc , amplissimum occurrit ædificium , Divi Caroli honoribus sacram in duas partes distributum , quarum una a Nobili , altera ab Ecclesiastica juventute , aut etiam ætate jam fractis clericis inhabitatur : complectitur hoc etiam elegantem Bibliothecam , quæ publicis patet usibus . Omnia hac post excitatam Cathedralem Basilicam , jam laudati Thalnitscheri munificentia , aut certe sollicitudine surrexere . B. Virginis Sacrarium Theutonicorum Equitum , olim Templariorum domui seu commendæ annexum , & ad instar crucis efformatum , nova sua mole Magni nostra ætatis Herois Guidonis Stah-

renbergii & trium Augustarum Eleonoræ , Amaliæ & Elisabethæ munificentiam atque pietatum de prædicat , in antiquis Aemonæ ruderibus exstructum , cuius originem prolixa annorum series a viuentium memoria removit ; Commendatorum tamen ibi residentium syllabum jam ab anno 1295. in Ortolino Hertenbergico orditur Valvasorius . Gloriofa ejusdem B. Virginis assumptio in Minorum Sancti Francisci Templo primario colitur , quod an. 1403. affurgere cœpit ex alterius ruinis anno 1073. D. Philippi honoribus a mercatore quodam Petro Baldaviz dedicati : invalesce Labaci hæresi abscesserant quidem eleemosynarum defectu Religiosi incolæ , sed restituta pristinæ integritati religione huc denuo remearunt nostra que ætate non solum ædem sacram , sed & amplum monasterium suum celebri Bibliotheca instructum ad omnem elegantiam & nitorem restituerunt . Societatis Jesu tempulum , quod maxima sui parte anno quarto sæculi labentis instauratum elegantibus aris marmoreis plurimum a cæteris se distinguit , nactum est eximiū suæ fundationis scriptorem , nempe Thomam Chrön hujus Urbis Episcopum ; cuius verba , prout ea Valvasorius refert , omisis tantum minus necessariis , hic subjiciam , ut ex ipso fonte totam rei seriem purius hau riamus ; sic itaque exorditur Cum

anno Domini 1596. singulari Dei beneficio, & Serenissimi Archiducis Austriae Ferdinandi zelo, ac destinatione, ad maiorem Dei laudem, & gloriam, animarumque Lutherana hæresi ab annis 50., vel amplius misere seductarum, reductiōnem, & salutem, in Adventu D. N. Iesu Christi, sub Reverendissimo in Christo P. D. Joanne Episcopo Labacensi, --- Labacum, & Diocesim ejus inclyta Societas Iesu fuisse ingressa, --- & primum in Monasterio Franciscanorum (tunc vacuo) perpetuum locum habitura, moxque propter loci angustias, aliasque difficultates ad S. Jacobum (ubi Xenodochium erat Cæsareum) Summo Pontifice, ac Principe Ferdinando consentientibus, transmigratura esset, cepta est Collegii illic ædificatio, manente veteri S. Jacobi Templo tenebroso, angusto, parumque commodo. --- Machina interim Collegii Archiducalis permagnifice construta, visum est Deo, Serenissimo Principi Ferdinando Fundatori, ac Reverendis Patribus dictæ Societatis Ecclesiam Collegio conformem fabricare, ac veterem dirue-re, ut sequitur. In nomine Iesu & Mariæ ego idem Thomas, qui supra, nonus Episcopus Labacensis, in festo Sanctissimorum Philippi & Jacobi Apostolorum, qui sunt feria IV. & prima dies mensis Maii (anno 1613.) posui primum lapidem pro Ecclesia nova in honorem Dei omnipotentis, ejusque magnæ Matris Virginis Mariæ, sub invocatione, ac titulo S. Jacobi Apostoli, S. Wolfgangi Episcopi, & S. Ignatii Lojolæ inclytae Societatis Iesu Fundatoris tunc canonizandi patronorum, Labaci in Collegio Archidu-

cali ædificanda. Ante Templi faciem speciosa expanditur area, cuius unum latus occupat Collegii stru-ctura, alterum vero frequentissimum Gymnasium, centum abhinc annis Carnioliae Procerum bene-ficio extructum, quod fronti ejusdem inscripta Epigraphe, grata etiamnum ita loquitur, æDes no-Væ gyMnasII LabaCensIs : ære orDInVM CarnIoLIæ. Tradeban-tur in hoc usque ad annum quar-tum saeculi quod vivimus, solum humaniores musæ & Moralis Theo-logia divisis per septem classes di-scipulis, inde liberali & perpetua munificentia, Procerum eorundem, accessere Professores quatuor, qui hodie Scholafticam juventutem etiam in Disciplinis Mathematicis, Philosophicis, & jure Pontificio ex mente Augustæ Mariæ There-siæ informant. Latus plateæ ob-versum Auditorium, nobili thea-tro instructum, in quo annis fere singulis de re litteraria bene me-rita juventus eorundem ordinum munificentia præmiis donatur, oc-cupat. Ex adverso Templi surgit ex ære constans Deiparae fine labe conceptæ colossus marmoreæ ins-istens columnæ, cuius basim San-ctorum Josephi, Achatii, Ignatii, ac Francisci Xaverii Statuæ per quatuor distributæ angulos exornant totius colossi stylobata binis suis inscriptionibus authores ope-ris & pietatem eorum ita posteri-tati prodit. Prima: D. O. M. Ma-riæ

riæ Deiparæ V. quæ conceptæ sine macula originis, suppedaneæ Lunæ Triumphatrix anno M. D. C. LXIV. Ottomannicam Lunam a finibus Patriæ averuncavit, voti rea Provincia Carniolæ jurata ejusdem Puræ conceptionis Propugnatrix M. P. Anno M. DC. LXXXII. altera: DeI, MatrI VIrgInI statVs CarnIoLIæ pos. eX Voto. D. Jacobi Ecclesiæ quantum magnitudine cedit, tantum vetustate eam superat S. Elisabethæ Tempellum, Civico Hosptiali adhærens, quod anno 1386. eandem cum D. Nicolai Æde expertum est Vulcani sœvitiam: profanaverant illud anno 1564. Lutericolæ, sed altero ineunte seculo Urbis Episcopus Thomas Chrön consuetis ritibus expiavit. Exiguæ pariter sunt quatuor aliæ Ecclesiæ, seu Sacella, quæ intra muros superfunt, videlicet una D. Fridelino sacra, quam vulgus a D. Laurentio denominat; quia festo hujus die illius dedicationem solenniter celebrat: altera D. Floriani ex piorum liberalitate post annum 1660., quo Urbem atrox affixit incendium, ædificata; clariorem hanc annis posterioribus reddidit Virginis doloribus percitæ effigies, piorum clientium cultu & gratiis impetratis clarissima; tertia centum inde passibus in ipso monte occurrit, & præsente primum sæculo honoribus Divæ Rosaliæ surrexit; quarta ad D. Georgium arci inclusa eo etiam titulo advenas invitat, quod in parietibus suis non  
Topogr. Austr. P. I.

solum Principum Carnioliæ, sed & Provinciarum ex quibus illa per vices coaluit, quin & supremorum omnium Provinciæ Capitaneorum nomina, ætatem & gentilitia scuta ab anno 1261. ad nos usque deducta eleganter depicta exhibeat. Non minus splendidas, & plures Dei Domos exhibit suburbia, inter has eminent Parochialis, Divo Petro Apostolorum Principi dicata, viginti quinque sibi subditas, seu filiales, ut vocant, Ecclesiæ numerans. Veteri quæ pluribūs sæculis supererat, cum ab anno 1385. ejusdem Pastorum nomina scriptis commissa reperiantur, nova ampla & magnifica, Vaticanam imitans, viginti abhinc annis est surrogata. Proximum locum tenet Eremitarum S. Augustini templum, in cuius medio stat Lauretana Domus anno 1669. consecrata. Ternas hi Religiosi successu temporis obtinuere stationes: primam iis una cum S. Martini Templo extra Urbem erexerat Cileensis Comes; at quia Cœnobium crebris Turcarum insultibus patebat, eosque a Civium & muris ejaculantium ictibus tuebatur, an. 1494. solo æquatum est, Religiosis ad D. Jacobi Ecclesiæ introductis, ad secundam nimirum stationem, quam an. 1553. deseruerunt. Tertia denique ab iis an. 1628. reversis in præfenti situ collocata altero mox anno in cineres quidem abiit, sed ope munifici Baronis Conradi a Russenstein

stein ab an. 1640. renovata speciofiores induit formam, quam hodie que ostentat. Cum Eremitarum Ecclesia venustate certat alia D. Josepho devota & ab Eggenbergicis Principibus an. 1657. ejusdem pene Ordinis Religiosis, quos discalceatos vocant, una cum Cœnobio extructa. Capucinorum Asceterium cum sacra ejus Æde opus est pi-entissimi Principis Ferdinandi Archiducis, postea Imperatoris hujus nominis Secundi; in cujus fundamentis anno 1607. primum posuit lapidem Thomas Chrön Labacensis Antistes, absolutoque sequenti æstate ædificio, celebrata est magna solenitate consecratio, ad quam viginti Hominum millia sub quingentis circiter vexillis ex Carnolia, Styria, & Carinthia supplicationem instituerunt. Pauciores re- censem annos sacrarum Divæ Claræ Virginum Cœnobium ex Michaëlis Hilleri, ad id relicta hæreditate anno 1648. inchoatum. Eodem locorum, ubi ante hor- torum deliciæ Principum Aursperg & Eggenberg cernebantur, nostra æstate Fundatore Jacobo a Schellenburg amplissimum surrexit alterum Virginum D. Ursulæ Collegium cum templo parvis & majestatis & elegantiæ Sanctissimæ Triadi dicato. Templorum seriem claudit omnium novissimum Divi Joannis Baptistæ, extra Teutonicam portam tribus ab hinc annis ære Jancitschiano excitatum.

Non modo sacris, sed etiam aliis tum publicis ædificiis, tum privatis quorundam Nobilium ædibus maxime post annum vigesimum saeculi labentis eleganter constructis, aut certe prioribus ad optimæ architectonices leges instauratis, Labacensis Civitas illustratur: in aula Ducali ante Vicedominali dicta, hodie multis accessionibus aucta, non solum ærarium & tabularium Principis conservatur, consilia coguntur, sed & ampla regiis administratoribus sufficitur habitatio. In Domo Provinciali, præterquam quod Litigantibus jura dicantur, suum etiam Provinciæ ministris domicilium patet, optimatum coguntur concilia ex quartuor ordinibus conflata, quorum primus constat sa- crorum ministris: Episcopis nimirum Frisingensi, Brixineni, La- bacensi & Petinensi: tum tribus Religiosorum Præsidibus: fitticen- si, Landstrasseni & vallis jocosæ; Præpositis binis Labacensi & Rudolphswertenzi: Commendatori- bus ternis Labacensi ac Metlicen- si ordinis Teutonici & ad S. Petrum Melitenzi; Decano item & Canonicis exemptæ Cathedralis Eccle- siæ Labacensis: secundus ex Princi- bus Marchionibus, Comitibus & Baronibus: tertius ex Equiti- bus: quartus demum ex Consule Labacensi & undecim Ducalium ur- bium judicibus. Est & sua Civibus Curia anno 1484. ædificata, & alteri susfecta, quæ anno 1297. ere- cta

Et in veteri foro spectabatur. Pone hanc surrexit in foro publico anno 1751. fons elegans patrio e marmore a celebri statuario Francisco Roba effectus: e medio vas, quod adfluentes undas sinu suo excipit præalta exsurgit trigona Pyramis, ad cujus basim singula latera stipant totidem fluvii Labacus, Savus & Corcora Carrariensi e marmore justa viri magnitudine efficti, ex urnis & pilibus quibus insident, copiosam aquam deponentes Terna præterea adsunt armamentaria, ex quibus Cæfareum, & Provinciale Arcis colli insident, ab aliis domiciliis sejuncta; tertium vero Civicum intra Urbem continetur. Res Provinciæ hujus militares non modicam subivere mutationem anno enim 1746. auctore Principe Saxonie ab Hilburgshausen. Militia Croatica Præfecturæ Carlostadiensis, quæ ad hoc usque tempus Carnioliae Ducatus stipendiis vixerat, & ad arcenos a Patria Turcarum insultus vigilare debuerat, cæteris quibuscunque militum Germanicorum officiis exsequendis adaptata fuit: uarto Reipublicæ totius incremento generosa loquuntur facinora, quibus hoc bello grassanti in clyta hæc gens suum Patriæ amorem constanter probat. Labacum saepius sed irrito semper conatu, tentarunt Turcae, præfertim anno 172., & ejusdem seculi 84., quibus in re-

pellenda barbarorum audacia singuliter enituit generosa Labacensis fortitudo: pari quoque virtute, & submissio ex Austria milite roborata anno 1441. non modo elusa est Alberti Archiducis obsidio, qui medium Austriacarum Provinciarum partem a Cæsare Friderico II. armorum vi expetet, verum etiam ipse cum exercitu fugatus, castra cum toto bellico apparatu victorum prædæ reliquit. Has omnes obsidiones præcesserat alia ab Ottocaro Bohemiæ Rege anno 1299, Labaco admota, sed non tam felici obsecris exitu terminata; obtenta enim Urbe Rex Philippum Salisburgensem Episcopum, qui post fratri sui Udalrici Carinthiæ Ducis obitum Carnioliam occupaverat, ad eam protinus deferendam coegit. Habent non pauca etiam elegantia ædificia ipsa suburbia, quin & agri iis contigui: Principem ea inter locum tenet, illud amplissimum & ad omnes delicias adaptatum, quod octo abhinc annis Excellentissimus Dominus Leopoldus Comes a Lamberg Carnioliae locum tenens & supremus viarum Director, ab imis fundamentis excitavit, maxima sui parte perfecit & Lepoldi quietem compellavit. Hæc de illustris hujus Ducatus Metropoli, ex qua digredientes confutum per Provinciam iter auspicemur.

## ADLERSBERGA.

**A**dlersberga Carniolis Postoina Oppidum est cum Arce in adfita rupe eminente, Labaco 6. miliaribus Flumen versus recedens, ubi Lazius Strabonis Vendum, seu Avendonem perennare putat, sed quam procul a veritate deviet, demonstrat Antonini Itinerarium, cum 18. tantum passuum millibus Avendonem Senia, nota etiamnum apud mare Adriaticum Urbe, removeat ita enim itineris enumerat intervalla: *Senia Avendone MP. XVIII., Arupium X., Bilbili X., Romula X., Quadrata XIV., ad Fines XIV., Siscia XIV.*, alibi XXI. Arcis hujus ditio modo Cileiensibus Comitibus modo Carniolae Ducibus parebat, sed fuscitata inter Maximilianum Cæfarem, & Rempublicam Venetam belli flamma, ab hujus Patritio Antonio Contareno expugnatur, brevi tamen laboris fructu; gloriosior enim Aquila ex Leonis unguibus suum hunc montem quantocvus avulsit. Multo atrociorem experta est hostem Adlersberga, quando ab an. 1559. ad ejusdem seculi 64. Turcarum rabies ter in eam crudelissime defœvit. Non procul hinc grandis patet per rupem hiatus, quem Valvasorius ipse discussa facibus caligine per duo circiter germanica millaria se penetrasse testatur, nec tamen ejus terminum attigisse; quinimo nemo adhuc quamvis lon-

gius processerit, eum dicitur assecutus. Subeuntium oculos partim recreat ludibundæ naturæ scalpro efformata figurarum varietas, quas scilicet defluens ex petrarum rimulis aqua, sensimque in lapidem conversa fortuito repræsentat; partim terrent dehiscentes in profundum voragini, in quas demissus lapis non nisi post sat longam moram se in aquas prolapsum edito strepitum manifestat. Tres aliæ sub montibus cavernæ unico millari Adlersberga absunt apud Cobenzellorum Comitum Arcem hiantes, quæ vulgo Germanis Lueg, Carniolis Jama nuncupatur: harum altissima occurrit in superiori rupis parte, quæ Arcem ipsam tegit; ad quatuor millaria ea descendere fertur, & ad oppositum montis latus pertransire, sed ob fures, qui ad expoliandam Arcem illac irreperant, obturatus uterque introitus hactenus nemini patuit. Per infimam ad montis radices fitam subterraneus decurrit fluvius, in quem experimenti causa projecta aliquando anas e Vipau fontibus tandem prodiit: Tertia his duabus celebrior paulo infra Arcem aperta, post unius milliaris intercapedinem terminatur, in quam Valvasorius jam angusta, sed longa ambulacula, jam ampla interdum conclavia lapideis columnis fulta, & elegantiores, quam in Adlersbergensi specu effigiantis naturæ lufus obstupescet. Alias quoque

cry-

cryptas apud S. Cantiani Templum pari ferme itinere Adlersberga remotum mirantur incolæ; in iis quippe lapideæ hominum formæ, sedilia, textoris instrumenta, aliaque domestica suppellex ab illudente pariter natura ita affabre elaboratur, ut quidam etiam ex minus rudibus sibi persuaserint, veros ibi homines quondam extitisse, sed anno 1348, quo horrendus terræmotus Carnioliam concussit, ab inclinatis ad se invicem montibus inclusos tandem in saxum induruuisse. Per unam ex his S. Cantiani cryptis editiori coopertam arcu illabens amnis ad longum spatium piscatorias cymbas tuto deportat, quibus studiosus harum rerum scrutator Valvasorius aliquando vehebatur. Hujusmodi specubus tota pene abundat Provincia, sed cum nil aliud peculiari memoria dignum suppeditent, ne tedium lectors afficiam, eas singillatim describere prætermitto.

### A I N E D A.

**A** Ineda vulgo Germanis Ainödt, Carniolis Soteska sumptuosa Gallenbergorum hodie Liechtenbergorum Comitum Arx inter splendidissima totius Provinciæ ædificia jure merito computatur. Attollitur illa supra Gurcæ amnis ripam 7. milliaribus Labaco distans: quatuor constat lateribus, quorum angulos totidem solidæ turres exornant simul, & muniunt;

ex harum unâ, si quis per fenestram clariorem emittat vocem, a mira confessim echone ea sexies iteratur. Cæterum quidquid ad loci amoenitatem, animique relaxationem expeti potest, hic præsto est; hortus rara florum varietate oculos oblectans, & peregrinis fructibus gulam irritans: fluvius multo pisce refertus, sylva feris, avibusque frequentata. Recens est opus a Comite Georgio Sigismundo a Gallenberg primo excitatum, deleto scilicet prioi domicilio, quod Domini a Scheyr quondam erexerant, postquam Hermannus Cileiensis Comes veterem Ainedam in propinquu sitam funditus everisset.

### AUERSBERGA.

**A** Uersberga vulgo Germanis Aursberg Carniolis Tryakh magnifica Arx 3. milliaribus Labaco distans, & ex præalta, cui insidet, rupe latissimo fruens per Carnioliam prospectu, nobilissimæ Auersbergicorum Principum, ac Comitum profapiæ nomen dedit. De hujus primordiis conjectans, iterum a scopo aberrat Lazius, dum Aurupium notam Straboni, (a) & Antonino Urbem istic collocat; ex allegato enim superius itinere, quod Senia Sisciam hodie Siseghum Croatiæ locum dicit, manifeste apparet, eam longe ab Auersbergensi Castro removeri: qua-

propter haud opus hic erit Octavianus Augusti sua, suorumque militum virtute Aurupium occupantis victoriam ex Appiano memorare. Antiquissimam tamen illius originem indicat Schönleben, dum refert anno circiter 1060. Conradum I., Adolphum II., & Pilgrinum I. Auersbergicos fratres, cum in veteri Auersberga, cujus rudera in demissiori montis latere supersunt, angustius habitarent, novum Castrum vulgo Ober-Auersberg a fundamentis exorsos condidisse. Stetit illud ab omni hostium insultu immune, usque ad an. 1140., quo Otto Ortenburgicus in Carinthia Comes Henrici, & agnetis Auersbergicæ filius, maternam prætendens dotem adversus Pilgrinum III. avunculum suum infestis progressus signis, superata montis arduitate arcem obtinuit, & vastavit. Vix eam Adolphus ad pristinum reduxerat splendorem, cum novum cietur bellum, quo anno 1200. acrius fervente, Goritiensis Comes Aquileiensi Patriarchæ Volchero, & Ortenburgicis fecdere junctus, non minori, quam Otto, clade Auersbergam affecit. Verum rursus instaurata hodiernam, quam spectantibus offert, majestatem sensim consecuta est, & interim parta in repellendis a se Turcis gloria, antiquum, ob quod bis victa erubuerat, dedecus felicius abstersit. Innumera per Arcis conclavia pendent Turcarum,

aliorumque hostium spolia, quæ militarem Auersbergicorum Procerum virtutem, quamvis muta, deprehendunt: extra Arcem vero notatu digna sunt crystalli, & candissimi marmoris frusta, quibus teste Valvasorio subjecta rupes datur.

## CIRCK NICIUM.

**C**Ircknicum vulgo Circkniz Oppidum quinque, vel sex milliaribus Labaco distitum ab anno 1522. usque ad ejusdem seculi 60. quatuor Turcarum insultibus, ac direptionibus succubuit: ab uno latere præaltis clauditur montibus, ab altero mirum aperitur spatium, quod nunc ager, nunc pratum fruticosum, modo lacus triplici a natura sibi concredito munere fungitur. Innotuit jam olim hic locus Straboni his eum verbis indicanti:

(a) *A Tergesta transmisso est per promontorium ad paludem nomine Lugeam, quem textum alii ita latine redunt. A tergeste transitus per Oram ad Lugeam paludem, vel, Lugeum lacum, uti nonnullis arridet, quibus mox subjicit Cluverius: Lacum Circconensem hic intelligi nemo haclenus dubitavit. Altissimis unlique coronatur alpium jugis, inter quæ maxime eminet, quod ab Austro surgit Javernig vulgo appellatum. Lacus ab Ortu ad Occasum uno ex majoribus Germanicis milliaribus in longum extenditur, dimidium latitu-*

título occupat a Borea ad Meridiem expansa, maxima vero profunditas ultra 24. pedes non descendit; tresque semper emergunt insulae, quarum una habitatur, reliquæ non nisi arboribus implentur. Triginta circiter in eo patent cavernæ, ex quibus Septembri, vel Octobri mense adeo veloci cursu erumpit aqua, ut intra 24. horarum intervallum, & interdum cito præscriptos a natura limites assequatur; & quod magis mirere, ingentem vim piscium secum attrahit, præfertim luciorum, qui duos saepe cubitos longitudine excedunt, quin imo implumes, cæcasque anates simul evehit, quæ intra 14. dies pennas, oculosque acquirunt. Lentius circa finem Junii recedere solet aqua per eosdem subterraneos meatus, e quibus prodierat, nam 25. dies plerumque elabuntur, antequam penitus exsiccatur: aliquando autem toto anno non abit, imo etiam, sed rarius, duabus, tribus, quatuor, aut quinque annis in sua statione jugiter perseverat, uti accidisse ferunt anno 1655. interdum econtra intra unius anni periodum saepius visa est discedere, ac rursus reverti; nunquam tamen integro anno eam abfuisse incolæ memorerunt: senviente atrocius hyeme, ita gelu constringitur, ut onusta plastra sustentet. Dilapsis de more aquis, 24. dierum spatio adeo alte exrescit gramen, ut optimum inde fœnum eo tempore sece-

tur: dein millium seritur, metiturque, pinguis enim, opimaque illius gleba largo, celerique fœnore segetem offert. Peracta messe, multiplici stirpium, fruticumque germinatione sylvescens tellus leporibus, apris, lupisque campum stabulationi aptissimum præbet, unde & frequens instituitur venatio, donec regressa cum piscibus aqua ad horum capturam invitet. Hæc ex uberiori Valvatorii descriptione excerpti, qui iteratis observationibus longe melius, quam Schönleben in pluribus aberans, hujus lacus naturam exploravit.

## CRAINBURGUM.

**C**rainburgum vulgo Crain, seu Crainburg venusta Civitas, & Carniolæ Marchionum olim sedes Savo fluvio adjacet, ubi hic a Cancckera amne augetur, & ab hodierna Provincia Metropoli 4. milliaribus abscedit. Quinque intra Urbem numerantur Tempa, Parochiale scilicet D. Cantiano sacrum, duo B. Virginis devota, & totidem alia S. Sebastiano, & SS. Florentiano, & Valentino dicata; extra Urbis vero ambitum Venerabilis Capucinorum Ordo Templum, Cœnobiumque incolit anno 1640. exstructum. Præter Tempa memorabilis est Crainburgi Arx vulgo Kieselstein dicta. & ab Henrico II. Comite Ortenburgico, annuente Udal.

Udalrico Carinthiæ Duce an. 1262. ædificata: nomen hæc a filice sumpsit, ex quo non modo ipsa, sed & universa Civitas constat. Ardentem ab anno 1435. inter Austriacos, & Cileienses bello Joannes Witovicius qui his militabat, aucta a ruente e cœlo imbre nocte, Crainburgen- ses nil minus præstolantes oppri- mit, Urbemque expugnat: verum non diu illi licuit victoria perfrui, nam paulo post Friderici III. Cæ- faris copiæ occupata nocturno pa- riter tempore Civitate Cileienses expulerunt. In opere aquarum quas non nisi magno labore ex alterutro ad labentium fluviorum adpor- tare opus erat, multum adhuc la- borabat hæc Civitas unde non so- lum de ea dictum plus in una civis do- mo vini, quam in Urbe tota reperiri aquæ, sed & sæpe exerto forte incendio, tota ideo in cineres abiit. Par de- cem abhinc annis subierat fatum, quod cum Augusta Maria There- sia, Princeps clementissima intel- lexisset, anno eodem suis sumptu- bus aquam copiosam per subter- neos canales deduci curavit, qui- bus jam non solum vetus illa parœ- mia abolita, sed & civibus magnum & immortale beneficium præstitum coronandum abs dubio toties ac de undis illis degustarint. Exiguo ab Urbe hac intervallo occurrit mons sesqui alterum milliare acclivitate sua complectens, quem celebrio- rem reddit in ejusdem vertice ante hominum memoriam constructa sa-

cra ædes, Divo Judoco dedicata, plurimis noo solum accolarum, sed & aliunde etiam ex externis Pro- vinciis adventantium supplicatio- nibus clara: gratiæ enim quas Deus Optimus ab annis potissimum octo & viginti sancti hujus precibus lar- gitur, cultores pios ad potens ejus invocandum patrocinium undequa- que invitat.

## DOBRAVA.

**D**obrava Pagus est uno millia- ri a Carniolia Metropoli dis- junctus, quem maxime nobilitat B. Dei Genitricis miraculis claræ Sacrarium inter antiquissima to- tius Provinciæ Tempora recensitum, & plurimis accolarum supplica- tionibus frequentatum; beneficia enim, quæ Misericordiæ Mater suis clientibus istic liberaliter elar- gitur, circumiacentium attrahunt populorum accussum. Inter col- latas gratias ea memorari præ re- liquis meretur, quam Labacensis Civitas huic Thaumaturgæ in ac- ceptis refert, & sequenti inscrip- tione in hoc Templo affixa jugiter deprædicat: *Quod hic sibi locum gra- tia elegerit, miraculis clareat, totamque Carniolicæ Provinciam a peste in quartum annum ad confinia usque grassante miracu- lose salvaverit; se, & suos in perpetuum gratitudinis mnemosynon Æmona devovet anno 1682.* Uno abhinc lapide ob- viat Stroblhoviensis Arx, apud quam plures parvos achates, & ja- spi.

spides, interdum etiam ovi magnitudinem æquantes se collegisse affirmat Valvasorius.

## GOOTSCHACHIUM.

**G**ootschachium, Germanis Gootschach, Slavis Gotzhaine, amplissimum hodie & splendidissimum totius Carnioliae castrum, ad viam regiam medio Labacum inter & Craineburgum itinere situm vetus, cuius rudera etiamnum in monte proximo spectantur, ante quina saecula spectabat ad ejusdem nominis equestrem familiam; huic successere Comites Sternbergici, Ortenburgici ac demum Celeiani, Ulrico III. ultimo ex horum stirpe Belgradi anno 1456. fatis erepto, id obvenit Friderico III. Caesar, qui illud Episcopatui Labacensi a se instaurato adscriptis. Temporum injuria abalienatum Thomæ IX. Antistitis, ære rursus vindicatum, paulo post fulmine iustum conflagravit Nobilius in subjecto clivo e fundamentis excitavit Otto Fridericus e Comitibus Buchaim & perfecit Josephus Comes a Rabatta, Princeps uterque & Episcopus Labacensis. Novissime multis partibus id auxit apparatu magnificentissimo Regio etiam Principe non indigno, exornavit manuque fere ultimam præmeditatas hortorum delicias si excepcris imposuit nuper omnium dolore erexit Princeps & Episcopus Laba-

*Topograph. Austr. P. I.*

censis Ernestus Amadeus e Comiti bus ab Attembs.

## GOTTSCHEVIA.

**G**ottscavia vulgo Gottschee 8. milliaribus Labaco in Euro notum recedens Urbs est peculia ris, & cognominis Districtus primaria, qui a nonnullis Vinidorum Marchia nuncupatur. Ingens de nominis etymo, Urbisque exordio fervet inter authores disceptatio; quidam enim a Germanica voce *Gott segen*, alii ab alia, *Guet see*, alii vero ab antiquis Gothis illud derivari, paribus argumentis, id est arbitraria ubique assertione contendunt: speciosior saltem est de origine, quam de nomine quæstio, cui singularem ansam præbuit Theutonicum idioma, quod inter nationes Slavico utentes, apud Gottscavienses etiamnum viget; id enim eos a Germanis ortum du cere manifeste prodit. Hinc Val vasorius (a) Gothorum his terris dominantium, Lazius vero apud Merianum Svevorum reliquias in iisdem supereresse opinantur; prior sententia in vera de Gothis istic olim degentibus historia, & aliqua vocabuli affinitate, posterior autem in obscuro quodam Jornandis textu fundatur; siquid emin Gothorum gestis juxta Augustanam anni 1515. editionem ita scriptum reliquit: *Quiescente eadem Hunorum gente Dux, dum ad prædandas Dalmatias tran sit,*

Z

(a) De  
script.

Carn. I.

fit, armenta Gothorum in campis errantia deprædavit, quia Dalmatiis Svevia vicina erat, nec a Pannoniis multum distabat; præsertim ubi tunc Goths residebant. Verum paulo post longe alios Svevis fines circumscribit, dum ait: Regio illa Svevorum ab Oriente Bojabaros habet, ab Occidente Francos, & a Meridie Burgundiones, a Septentrione Thuringos: quibus Svevis tunc juncti Alemanni etiam aderant. In diversa horum textuum editione cum Schönleben non Svevos, sed Svavos, nec Sveviam sed Svaviam legeret, hallucinatum Jornandem conjectit, & Svaviam, seu Saviam Pannoniæ Provinciam cum Svevia confusisse. Cæterum utriusque opinioni adversatur recentior Gothscheviensium origo, quam Labacensis Præfus Thomas Chrön in Locopolitano Archivo anno 1609, teste Valvasorio offendit his verbis expressam: *Carolus IV. Imperator, Rex Bohemiæ devictis Franconibus, & Thuringis, ad petitionem Friderici Comitis ab Ortenburg, dedit ei trecentos viros cum conjugibus, & liberis in servitutem, qui alias debebant puniri propter rebellionem, quos transmisit ad sylvas, ubi nunc Gottsevia est, qui processu temporis excisis arboribus septem Ecclesiastis Parochiales erexerunt.* Huic ego libentius, quam reliquis subscribebam, quia difficile creditu est, Gothos, vel Svevos in adeo exiguo terræ spatio a tot aliis nationibus, & præsertim Slavis deinceps occupato, & hactenus circumdato, per 32. secula ita ab iis sejunctos perse-

verasse, ut in alienos mores, & linguam haud tandem transirent; at me nonnihil moratur asserta ibi Caroli IV. contra Francones, & Thuringos victoria, cum tamen nusquam alias historiographi tradiderint, Cæsarem hunc cum iis populis bellum aliquando gessisse; quod totius relationis fidem reddit eruditis ad minimum suspectam. Interim a veritate non abeit, septem Parœcias in Gottscheviensi Districtu contineri, quarum vernacula nomina profert Valvasorius, nempe Nesselthal, Rieg, Mösel, Tschermoschniz, Ossianiz, & Alten-Laag; septimam autem D. Bartholomæo sacram Urbs ipsa complectitur forti muro, & quatuor in totidem angulis turribus utcunque munita, cuius magnam partem implet miræ amplitudinis Arx ab Auerspergico Principe Joanne Weichardo præterito nuper seculo ædificata. Ortenburgicos Comites ditione hac olim potitos concedit quidem prædictus Valvasorius, sed Fridericum ex ea stirpe oriundum primo illam ab Aquileiensi Patriarcha in feudum accepisse subjicit, quod expromptum ex Locopolitano Archivo Gottscheviæ originem rursus labefactat. Ab Ortenburgicis postmodum anno 1420. ad Cileienses Comites, & ab his ad Austriae Archiduces transit, qui, servato sibi alto, ut vocant, dominio, Turrianis primo, dein Ursinis, & Khyfeliis concessere, sub quibus anno 1623.

Gott-

Gottschavia novo Comitatus titulo insignita est, ac demum ad Aueraspergam decidit familiam, cui etiamnum paret. Interea saepius Turcarum experta est feritatem, qui in eam octies irruentes, direpta suppelleatile, incensis domibus, largeque effuso Civium sanguine cuncta barbare devastarunt: prima hujusmodi irruptio incidit in annum 1469., cæteræ sequenti seculo evenere.

## GURCKFELDA.

**G**urckfeda vulgo Germanis Gurckfeld, Carniolis Kersko tredecim milliaribus Labaco in Orientem distans a Savo fluvio aluitur, in quem post unum milliare fluens Gurca explicatam in eo tractu planitem, Urbemque denominat. Huic imminet in colle Arx plus quam terna ætatis secula enumerans; reliquus vero circumjacentis ager amœnitatem undique spirat, etiam vitibus alicubi consitus. Quadratam, claram apud Antoninum Urbem istic statuit apud Merianum Lazius, sed ea huc minime quadrat, si descriptas ab illo itineris distantias accurate metiamur; namque 88. passuum millibus Æmona, & nonnisi 28. Siscia Quadratam removet; quare longe aptius Gurckfeldæ conveniet celebrior Civitas Noviodunum etiam a Ptolomæo in Pannonia memoratum, & ab Antonino 60. passuum

millibus Æmona disjunctum, quæcum præsenti inter Labacum, & Gurckfeldam intervallo oppido coincidunt; ita enim se habet iter ab eo authore descriptum, cujus termini certi videntur, reliqua vero loca a Schönleben non contemenda probabilitate divinantur: nimirum

Æmona	MP	Labacum
Prætorium La-	XXXIV.	Ratschach
tovicorum		

Noviodunum	XXVI.	Gurckfeda
Quadratam	XXVIII.	Zagrabia
Sisciam	XXVIII.	Sissiegk.

Certe vix alia præter Noviodunum Civitas Gurckfeldensi situi melius aptatur, & tamen aliquam splendidiorem Coloniam ibi floruisse necesse est, cum plurima antiquitatum vestigia, quæ passim eruuntur, id luculente demonstrent. Inter inscriptiones maxime sententiam nostram confirmat illa, quæ in proximo Pago Wiher an. 1678. inventa medium Novioduni nomen reliqua parte longo ævo exesa præfert, ideoque hic eruditio lectori exhibenda C. A. P. S. T. *ÆLI. ADRIANI ANTONINI AUG. PII OS. FIL. II, D. T. III.---ODUNI M. III.* Nummi præterea ex auro, argento, aliove metallo conflati magno numero in hoc campo effodiuntur, ita ut ultra sexcentos unicus Parochus paucis ab hinc annis collegerit plurium Cæsarum nominibus lignatos, Maximini scilicet, Hadriani, Antonini, Aure-

lii Severi, Vespasiani, Neronis, Trajani, aliorumque; item Juliæ Mammæ Augustæ nomen, atque etiam Regis Slavoniæ titulus in aliquibus spectatur. Nec longius ab est annus, quo Rusticus quidam in altero Gurcæ amnis latere supra quatuor nummorum millia ollæ inclusa reperit, in quibus nil aliud, quam *CONSTANTINUS* legebatur. Episcopali dignitate in Pannonia Savia emicuisse Noviodunum, seu Novidunum censuit Inchoffer, (a) nullum tamen illius Praesulem in medium adfert, quo assertum stabilitat. Fama insuper est sola traditione ad posteros transmissa, Constantium Imperatorem Constantini Magni filium, dum anno 353. milites contra Magnentium ducendos in Pannonia conscriberet, Novioduni hybernasse: indeque Constantiæ nomen huic Urbi aliquamdiu adhaesisse, quod quibusdam inventis nummis confirmari posse, nonnulli crediderunt. Huic fundamento aliam superstruit conjecturam Schönleben, dum S. Pelagium, cuius hæc habetur in Martyrologio memoria: *Constantiæ in Gallia S. Pelagii Martyris, qui sub Numeriano Imperatore, & Evilasio Judice Martyrii coronam accepit.* Dum, inquam S. Pelagium 25. annorum juvenem non Constantiæ ad Potamicum lacum, ubi sacra ejus lipsana hodie coluntur, sed Novioduni, id est Gurckfeldæ, gloriosum agonem confecisse suspicatur,

(a) In app.  
ad ann.  
Hung.

his ductus rationibus, quod ille Aemonæ, seu Labaci natus a Vitæ scriptoribus unanimiter dicatur, quodque ejusdem nominis Praeses Evilasius eo ipso anno, quem S. Pelagii martyrio consignant nempe 284., Cileiæ residens S. Maximilianum Episcopum simili morte ad immortalem lauream promoverit: quibus addit cum Cluverio Cisalpinam Galliam in Japidam usque primis æræ Christianæ seculis fuisse porrectam, unde bene dictum foret: *Constantia in Gallia.* Nec hodiernis Constantiensibus multum patrocinatur sacri corporis præsentia, cum hoc ab illorum Episcopo Salomone Roma anno 918. allatam esse non ignoretur. Fateor ex hisce speciosis argumentis dubium aliquod suboriri posse, sed ad rem certius definiendam majori adhuc pondere procul dubio egerent. Novioduno veteri a barbaris exciso Noviodunum novum seu Gurckfeldam revertamur, ubi anno 1639. Venerabilis Capucinorum Ordinis Asceterium in spirituale Civium solatum extrectum est, cum Parœcia Deiparæ dicata aliquo intervallo ab Urbe absit.

## H Y D R I A.

**H**Ydria vulgo Idria Oppidum mercurii fodinis celebrissimum senis majoribus milliaribus Labaco recedens, & Goritiensis Comitatus fines, ad quem alias spe-  
ctasse

etasse dicitur, proxime attingens, in profundissima jacet valle celsis undique montibus septa. Prima illarum inventio ad annum 1497. cumdam Rustico adscribitur, qui dum aquam ex fluente illac rivulo hauriret, materiam quandam sibi ignoratam in fistula offendit, quæ aurifabris ostensa ansam præbuit hujusmodi metalli ulterius perquirendi, quod & felicissime cessit, aperitis jam pluribus fodinis, e quibus mercurius eruitur ad longinquas etiam Provincias transferendus. Quæ D. Barbaræ Patrocinium agnoscit, 125. passus, seu integrum stadium ad fundum usque numerat, atque omnium optima, & maxima fœcunditate celebratur. Hujus ingressus in directum aliquamdiu protenditur, sed adeo demissus, ut stantem justæ altitudinis virum ægre patiatur: inde ad lœvam deflectitur, ubi patet descensus ab initio quidem non præceps, sed paulo post per scalas ad perpendiculum erectas perficiendus, donec tandem ad infimam cavernæ partem deveniatur, ubi lapides mercurio prægnantes effodiuntur. Descriptam hactenus viam, ac fundum, ubi excisi quidam viculi per montis viscera ulterius penetrant, abiegnæ ante muniebant fulcra, arctissime denissimeque conjuncta, jam fornices coctis e lateribus adaptati sustinent, qui & operas & scrutatores curiosos, per gradus hodie sectis e lapidibus ad omne commo-

dum paratos & manubriis ferreis instructos ad ima securos deducunt. Subterranea aqua, quæ in fossam confluit, ne operas a labore arcat 52. exhaustur antliis, quæ simul connexæ supra rotam a torrente per artem illuc deducto motam volvuntur, ipsaque, quæ evehitur, aqua per canales derivata diversis aliis usibus adaptatur. Materia effossa hydraulico pariter artificio, quod unicus homo dirigit, ab imo sursum attrahitur, dein eam in amne sœpius eluunt, & interim per decem aut duodecim semper arcta rura cribra transmittunt, donec metallum eliciant. Duplicis hoc est generis; aliud enim virgineum dicitur, quod vel sola dilutione acquiritur, vel jam purum ex ipsa rupe stillat; aliud vulgare, quod igne extorquetur. Ad nostra usque tempora tantum absumentur in annos singulos lignorum ut adstœtilvæ operi prosequendo vix jam sufficiunt crederentur; accessit ad hoc malum aliud quo non exigua hidrargiri copia, vehementis ignis calore propulsâ in auras abripiebatur. Malo utrique occurrerunt viri perspicacissimi, qui his fodinis excolendis præficiebantur & primum quidem anno 1715. illustrissimus Dominus Joannes Fridesericus Stampffer Baro de Walchenberg, furnis a se inventis, & publicis etiam typis editis, ærarium Principis multis Renenium millibus auxit anno 1750. amplius quid

præstítit Perilluſtris Dominus Antonius Hauptman homo, quod mirere, litterarum omnium ignarus, fornacibus Hispanis a ſe repertis, quas nulli advenarum abſque ſupremi fodinarum Praefidis facultate jam adire licet: ab anno quem paulo ante recensui faltem trecen-ta librarum millia metalli hujus eruuntur. Memoriam ſingularem ſui, hic meretur etiam Perilluſtris Dominus Franciſcus Antonius a Stemberg per annos complures ea-rundem hydrieniūm fodinarum Praefectus: hic an. 1728 quo Carolus VI. Imp. a Carnioliae ordinibus: Fidelitatis accepit Sacramentum, ei-dem Auguſto, a ſe confectam obtulit idnographiam Metalli fodinarum Hydricarum Mechanicam, ſeu Ma-chinam, qua non ſolum montes colles aedificia & opera Hydriensis regionis ad pedem Geometricum eleganter efficta exhibentur; ſed una etiam, ubi haec removeris, in-teriora viſcera adeo ſcite repræfentantur, ut nihil eorum defide-reſ que in fodinis iſpis aut a na-tu-ra aut ab arte advenerunt. Pre-tium machinæ metire ex magni Cæ-faris judicio, qui illam celeberrimæ Vindobonensi biliothecæ ſuæ illatam voluit.

### HYPERLABACUM.

**H**yperlabacum vulgo Germa-nis Oberlaybach, Carnolis Verhunka, amplum eſt Oppidum

3. milliaribus Labaco abſens, quod Labacus fluvius præterfluit, & Pa-rochiale S. Pauli Templum cum alio Sanctissimæ Trinitati dedica-to exornat. Nauportum celebrem Urbem a Taurifiscis aedificatam hic quondam extitile, certiffimum vi-detur; nullum enim amplius dubi-tandi locum relinquunt, tum Iti-neraria ſuperius allegata, ubi diſtantiae Longatico, nunc Logatez, & Æmona nunc Labaco Naupor-tum uſque a veteribus adſcriptæ cum hodiernis ad amuſim concili-antur, tum Strabonis deſcriptio hunc iſpum, de quo agimus, lo-cum vivis coloribus repræfentans, ſic namque ſcribit: (a) Ocra humillima (a) Lib. 4. prorsus alpium pars eſt, ubi Carnis ad-jungitur, qua ex Aquileia onera plauſtris ad Nauportum (alicubi legitur Nam-portum) devehuntur, inde per fluvios ad Iſtrum uſque veſtantur, locaque huic vi-cina. Nauportus enim annis ex Illyriis (hoc eſt Japidia Illyrico a quibus-dam attributa) navigabilis defertur. Intrat autem Savum, ut facile in Sege-flanam oram & Pannoniam delabatur. Et alibi (b) Post Promontorium ex Aquileia (b) Lib. 7. conſcendentibus Nauportum ſtadia ſunt CCCCL. ad quam rhædae perducuntur. Ea vero eſt Tauriforum Colonia: quamquam nonnulli D. eſſe dicant. Hodie quoque juxta Hyberlabacum attolli incipiunt alpes, per quas lapidofa ad-modum via in Forum Julii, ubi Aquileiae rudera viſuntur, peregrini-nos frequenter hac commeantes ducit; unde pariter onera plauſtris

stris, clitellis, & bajulorum humeris hucusque deportata, navibus committuntur Labacum, & ultra deinceps promovenda. Neque Cor-

(a) Anna. l. i. n. 20. nelium Tacitum (a) latuit Nauportus, dum Pannonicarum Legionum tumultus post Augusti Cæfaris mortem concitatos suis annalibus infereret, ubi interea, inquit, manipuli ante cæptam seditionem Nauportum missi, ob itinera & pontes, & alios usus, postquam turbatum in castris accipere, vexilia convellunt: direptisque proximis vicis, ipsoque Nauporto, quod municipii instar erat, retinentes Centuriones irrisu, & contumeliis, postremo verberibus insectantur.

## JOCOSA VALLIS.

**J**ocosa, seu Jucunda Vallis Germanis Freudenthal, Carniolis Bistra celebris, antiquaque Carthusia ad Bistræ, seu Feistriciæ amnis fontes 3. milliaribus Labaco remota, amoenissimo gaudet situ, & nomini suo quam optime respondentे. Amplum est ædificium & ævo nostro a Præfule Jacobo plurimis partibus innovatum: cætera veterum adhuc simplicitatem præ ævi præsentis elegantia ostentant. Huic erigendo initium dedit anno 1255. Bernardus Carinthiæ Dux, coronidem vero imposuit a paterna pietate minime degener Udalricus, locuplete fundatione an. 1260. in Religiosorum alimentum assignata, cuius literas ab his verbis

exorditur: *In nomine Sanctæ, & individuæ Trinitatis, Amen. Ulricus Dei Gratia, & miseratione Divina Dux Carninthiæ, & Dominus Carniolæ, nec non Istriæ, & Karſti, Prioribus Vallis Fucundæ in Wröinz, & Conventui institutis, & instituendis perpetuam salutem in vero salutari. Subscripti illis sunt hoc ordine testes, nempe Dietrichus Venerabilis Gurcensis Episcopus, Burchardus Prior Vallis S. Joannis. G. Prior de Girowe, Frater Henricus, & Frater Wittigo Prædicatores, Henricus D. Duci Capellanus, Ulricus Comes de Hovenberg, aliique plures. Lætam hanc, Jucundamque Vallem gravissima affecit trifitia anni 1382. incendium, quo correpta Carthusia tota in cineres concidit. Revixit tamen ad instar Phœnicis, & uti verosimile est, multo venuſtior, insumptis in ejus instauratiōnem quatuor circiter lustris, cum anno 1402. Conradus Patriarchæ Aquileiensis Vicarius cœmeterium inibi consecrassæ a Valvaforio (b) feratur. Nihilominus (b) De dilata per integrum seculum vide script. carnatur Templi, quod hodieque extat, consecratio, nisi credere malimus, ab alio rursus infortunio illud fuisse violatum; namque ex manuscriptis Cœnobii instrumentis verba hæc profert præcitatus author: Anno 1483. Sigismundus Episcopus Labicensis consecrat Basilicam supra valvas Ecclesiæ Domus S. Mariæ in Franz Carthusiensium, Dominica ante Festum SS.*

*SS. Primi, & Feliciani, eamque pro die anniversario dedicationis assignat, & perpetuas 40. dierum indulgentias concedit, dicens situatam in Valle Focosa, alias Franiz nostræ Labacensis Diœcesis. Prævalente in Provincia Lutheranorum hæresi, tot undique ærumnæ hanc Carthusiam obsederant, ut parum ab interitu abfuerit; sed illucescente rursus Orthodoxæ veritatis sole, sereniores duxit dies, & succollante Ciriani 18. annis Prioris munere functi industria, ad pristinum statum reiecta non inani Jucundæ Vallis nomine appellatur.*

### L A A S I U M.

**L**aasium vulgo Laas Urbecula est cum deserta in Clivo Arce 6. milliaribus Labaco in Austrum abscedens, quæ inter Oppida prius computata Civitatis demum jura anno 1477. a Friderico III. Imperatore consecuta est. Propriis quondam parebat Dominis, dein Ortenburgicis, & Cileiensibus Comitibus, cum quorum Comitatu ad Austricæ Archiduces anno 1457. pervenit, non 1435, uti Megisero videtur; hoc enim anno obfessum quidem est Laasium a Friderici tunc tantum Archiducis exercitu, sed ejus Duce Christophoro Fladnizero ab audaciore quodam Cive imperfecto, cæteri obsidentes re infecta discessere. Non procul hinc fluens amnis Laera per montis cavernam paulo post viam sibi aperit,

in qua tumulatur, qnod & pluri- bus aliis fluviis in hac regione con- tingit. Unicum D. Petri Templum, quod in Urbe visitur, S. Georgii Parœciae in Pago Altenmarckt uno lapidis jactu extra muros positæ subjicitur, apud quam mediocriter sublimis ascendit mons binis SS. Petri, ac Martini Tempellis sacra- tus, & veterum murorum rudera spinis, tribulisque contegens; unde collocari cum Schönleben hic for- san possit antiqua Japidiæ Urbs Ter- po, seu Terponus, quam ab Octa- viano Augusto captam memorat Appianus Alexandrinus, qui anno 148. florebat: *Japodes*, inquit ille juxta P. Candidi versionem anno 1472. editam, ex insidiis subito appa- ruere, multosque affecere vulneribus, ve- rum major eorum pars ab his, qui ex apicibus decurrerant imperfecti sunt. Re- liqui iterum ad sylvas revertuntur, Ur- bem relinquentes, cui Terponus nomen fuit. Eam interceptam Cæsar minime cremavit satis arbitratus, pariter illos se esse dedi- turos, ut fecere. Fundatur hæc sen- tentia in Metuliensis Urbis propin- quitate, quæ ex Appiano colligi- tur, ejusque situ in Pago, quem in- ter Laasium, & Oblacum occur- rentem Metule vulgus vocat, ve- ro similiter reponendo; cum non tam nominis similitudo, quam cæ- teræ circumstantiæ Appiani descrip- tioni ad amissim respondeant; si- quidem post allegata jam verba ita statim progreditur Appianus: De- inde ad aliam proeedit Urbem; Metulum incolæ

incolæ nuncupant, quæ Japodum primaria habetur Urbs, sita est autem in monte nemoroſo, duobus condita tumulis, quos vallis modica interfecat. Quæ omnia ibidem hodieque adesse, asseverat oculatus testis Schönleben, duos videlicet colles, quos modica dividit vallis in prædicto Pago cum S. Antonii Abbatis Sacello habitata, a collium tergo vasta denatur sylva, in fronte campi planities ingens aperitur. Aliquod tamen dubium objicit mihi exigua inter eum Pagum, & Laasium distantia, unico quippe Germanico milliari ab invicem separantur, nec adeo veritati consonum apparet, binas; ut videntur, celebriores Urbes tantillo intervallo fuisse ea tempestate disseatas. Cæterum nullus dubito, quin Metulum, seu Metulum, prout eam Civitatem inter Japides in alpibus fitos appellat Strabo, (a) per hunc Carnioliae tractum inquirendum sit, non autem in Styriæ limine, in Mednica scilicet Valle ex monte Trajanaberg, seu Dranberg se sed dimittente, ubi illud ineptissime ve-

(a) Lib. 7. lat. Strabo, (a) per hunc Carnioliae tractum inquirendum sit, non autem in Styriæ limine, in Mednica scilicet Valle ex monte Trajanaberg, seu Dranberg se sed dimittente, ubi illud ineptissime ve-  
 (b) Com. natur Lazius (b) immemor se alibi Reipub. Labacensem agrum inter Mednicam, alpesque interjacentem Pan- Rom. 1.12. noniæ adscripsisse, unde fieri non potuit, ut ad Styriam usque Japidia promoveretur. Sed Metulum, a quo nos longe abduxit Lazius, regressi celeberrimam apud Appianum hujus Urbis obsidionem ab Augusto Cæsare anno ante Chri-

Topograph. Aust. P. I.

stum 32. felici eventu terminatam contemplemur. Romani itaque, ductis circumquaque castris, muros crebris ictibus verberabant, sed illos obseffa juventus ad trium millium numerum armis, animisque præpollens facili negotio ab accessu prohibebat: extimo tamen muro interim hiante, ad alterum interius extructum Metulienſes fal tu delati ad strenuam rursus defensionem fese accingunt: deserta Mœnia adepti Romani geminos aggeres attollunt, quos quaterni pontes usque ad secundum murum protensi cum hostium propugnaculis jungebant: per hos Cæſar, qui in edita turri rei exitum opperiebat, jubet milites Urbis aditum tentare; verum uno ex Pontibus, mox altero corruente, cum tertius in ruinam laberetur, tantus Romanos incessit pavor, ut ad quartum progredi, nequidquam eos increpante Cæſare, detrectarent: tum ille arrepto clypeo e turri defiliens ad pontem properat, paucisque comitantibus jam hostes provocabat, quo viso milites rubore tandem suffusi ad Cæſarem confeſtim advolant. Sed nimio one re oppressus pons secum plurimos præcipites traxit, ex quibus non nulli periere; alii ferme contritis membris efferebantur: Imperator crus dextrum, & utrumque brachium saucius, infracto tamen animo turrim repetens, protinus mandat, ut strato quintum ponte afful-

A a

tus

tus iteretur. Invicta hæc Augusti constantia adeo Metulienses terruit, ut postridie Legatos de pace acturos ad eum miserint cum quingen- tis obsidibus, quos idem postula- verat; dein permisso Romanis editiori tumulo in humiliorem omnes descendunt, ad quorum custodiam destinati præfidiarii milites, cum arma deponere, quod pacti non fuerant, eos juberent; hi mulieribus, puerisque Senatus conclavi inclusis, & admissa, uti spon- derant custodia, Romanis annun- ciant: *Si quid insolitum erga eos moliri audeant, se locum illum incensuros, & cum desperatione pariter Romanos inva- suros.* Quibus dictis, quasi id exequi meditarentur, in unum coeunt; tunc milites ultro faces Senatui admovent, quo conflagrante plurimæ matres se, suosque filios truci- darunt, quædam etiam vivas pro- les flammis injiciebant; sicque aut igne, aut ferro Metulum, & Metulienses conciderunt, ita ut nullum, Appiani verba sunt, tam ingentis Urbis superfuerit vestigium.

## LANDSTRASSIUM.

**L** Andstrassium vulgo Germanis nunc Landstraß, olim Land- stroft, Carniolis Koftainaveza in Gurcæ fluminis insula undecim milliaribus Labaco diffita contine- tur. Urbecula hæc vilibus præter mediocrem Arcem habitatur ædi- bus, nec aliam præter Parochia-

lem D. Jacobi Ecclesiam comple- ctitur. Plurimos diversæ stirpis Dominos recenset, quibus jam a multis seculis obtemperavit; nam- que post eos, qui inde nomen sum- pferunt, modo Carinthiæ Ducibus, aut Ottocaro Bohemiæ Regi modo Cileiensibus Comitibus, aut Au- striæ Archiducibus totius Provin- ciæ fortunam secuta subdebatur. Turcarum bis viciniam depopulan- tium impetum fortiter excepit to- tidemque vicibus fortius rejecit vix uno ab hac Urbe lapide rece- dit amplum & fere totum a dignis- simo ejus hodierno Præsule Alexan- dro e Baronibus Taufferer, ab imis fundamentis ad omnem elegantiam excitatum ejusdem nominis Cœno- bium quod Bernardus Dei gratia Dux Carinthiæ anno 1234. a se fun- datum, anno M. CC. XLVIII. Indi- ctione VII. octavo idus Maji libe- ralius firmavit: *pro remedio ut ipse, ait, animæ nostræ, nec non justæ uxoris nostræ, ac Ulrici, Bernardi, Philippi, filiorum nostrorum, Margarethæ filiæ no- stræ . . . . cuius rei testes sunt, Philip- pus filius noster, qui post datum, primi Privilegii (1234.) in Salisburgensem Ar- chiepiscopum electus est, & Ulricus filius noster Senior.*

## LOCOPOLIS.

**L** Ocopolis vulgo Germanis Bi- schofflach, Carniolis Schko- fialoka amœna Civitas 3. milliari- bus Labaco remota, a duobus al- lui-

luitur amnibus, quorum unum Pol-  
lant, seu Polantschitscha, alterum  
Zayer, seu Sura vulgus appellat.  
Hanc Urbem ejusque districtum,  
qui intra decem milliarium circui-  
tum 200. circiter Pagos complecti-  
tur, Frisingensi in Bavaria Anti-  
stiti Abrahamo & ejus Episcopatu*m*  
donavit Otto II. Imperator ad pre-  
ces Matris suæ Adalhaidæ & Henri-  
ci Carinthiæ Ducis an. 974. evincen-  
tibus ita tabulis ab Gundio Gewol-  
diano & Meichelbeckio recitatis.  
Tribus abhinc seculis adhuc inter  
Oppida habebatur, sed a Bertholdo  
Frisingensi Præsule sub id tempus  
muris hodieque extantibus munita,  
evasit digna, quæ Civitatibus ac-  
cenferetur. Adjacet ei lenis cli-  
vus, supra quem eminet Arx Præ-  
fecti Frisingensis Sedes. Intra Ur-  
bem spectatur sacrarum Deo Virgi-  
num Monasterium, quod olim su-  
pra quinquaginta alebat Sanctimoni-  
ales; nunc vero paucissimas enu-  
merat, bellorum, & hæresis inju-  
riis graviter attritum. Ejus con-  
ditor hodie latet longa jam obli-  
vione sepultus; nonnulli tamen  
concordibus Austriacorum Princi-  
pum, Frisingensium Antistitum,  
& Dominorum a Purgstall subsidiis  
nobile hoc antiquæ pietatis vesti-  
gium divinando adscribunt. Tem-  
plum recentis ævi opus est anno  
1669. a Labacensi Episcopo primo  
consecratum. Parœcia D. Geor-  
gii patrocinio tradita modico spa-  
tio ab Urbe abest: ad hanc 18. aliæ

referuntur Ecclesiæ, inter quas  
clarissima est ad S. Mariam in Eh-  
rengrub crebris accolarum suppli-  
cationibus frequentata. Paulo plus  
Locopoli abscedit sumptuosissimum  
Palatum vulgo El trenau dictum in-  
ter hortorum delicias a Francisco  
Andrea Barone a Lampfrizham  
Locopolitanæ ditionis Præfecto,  
sæculo superiore exstructum, præ-  
sente a Laurentio Christophoro Ba-  
rone a Flachenfeldt multis acces-  
sionibus locupletatum, in iisque ab  
hodierno possestore Adamo Dinzl  
ab Angerburg studiosissime conser-  
vatum; in eo videlicet tractu, ad  
quem anno 1289. Ericho Frisingen-  
sis Præsul ex Tyrolensi Valle Pu-  
sterthal colonias traduxit, consti-  
tutis ibi binis Pagis Feuchting, &  
Zeym, ubi adhuc hodie Germa-  
nicam linguam callent coloni,  
tametsi depravatam.

## LYTHOPOLIS.

**L**YTHOPOLIM, seu Steinam vul-  
go Stein Germanis, Carniolis  
Kamnek Urbem a lapidum acervis,  
quorum in hac regione ingens sup-  
petit copia, suum nomen juxta  
Valvasorium adeptam, amœna tri-  
um milliarium planities a Provin-  
ciæ Metropoli divellit; ac Festri-  
cius amnis irrigat, qui per binos  
editos montes a septentrione dela-  
bitur; florebat illa olim nobilium  
ædibus ornata, qui ut a Turcarum  
in Carnioliam sæpe defævientium

acinace jugulum subtraherent, huc affluere consvererant; nec minus vigebat commercium ea de causa plurimum promotum; sed haec una cum barbarorum metu hodie defecerunt. In tria tamen adhuc populus effunditur Suburbia, in quorum uno vulgo Schiütt nuncupato Parochiale surgit Templum Beatissimae Dei Genetrici D. Elisabetham visitanti devotum: nulla autem intra muros clauditur Parœcia; non omni tamen sacra Æde Civitas destituitur, cum præsto sit D. Jacobi Ecclesia SS. Primi, & Feliciani reliquiis ex Werdenfi Carinthiæ lacu, ut Schönleben putat, advectis decorata, cui Turriani, & Hochenwærtii Comites una cum aliis nobilibus Minorum Conventualium Cœnobium sub finem decimi quinti seculi addidere; sed imminentibus aliquando Turcis, Religiosi alio remissi sunt, ut Parochia in Suburbio minus tuta ibidem collocaretur, Cœnobii redditibus cuidam Nosocomio applicatis. Antamen 1627. illi redditum obtinuerre, Parochia pristinæ stationi restituta, cui ante annos aliquot dignissimus ejusdem facer curio, Perillustris Dominus Maximilianus Raspl vir & a morum pietate, & vitae innocentia, etiam post mortem celebratissimus, amplam & elegantem suo ære adjecit Ecclesiam. De urbis insignibus, quæ mulieris formam in anguem desinentis præferunt, lepida vulga-

tur fabella apud prædictum Valvasorium cum cæteris ad scopum nostrum minime facientibus repeirienda.

## M E T L I N G A.

**M**Etlinga vulgo Germanis Mötling, Carniolis Metlika Urbs est Arce instructa 11. milliaribus Labaco remota, & ad Colapim fluvium proxime accedens, ideoque in antiqua Vinidorum Marchia olim recensita; hanc enim geographi inter Gurcam, Savum, & Colapim fluvios, atque alpes post Gottscheviam se se attollentes circumscribere consvererunt. A Goritiensibus ad Austriæ Archiduces transit Metlinga sub annum 1374. privatis deinceps Dominis ab iis in feudum concessa. Parœciam D. Nicolao sacram administrat Pastor Præpositi titulo insignis, præter hanc adeo etiam Theutonicorum Equitum Commenda, a quibus originem ducunt ternæ illæ Ecclesiæ in conspectu Urbis erectæ, & SS. Martino Rocho, & Catharinæ consecratae. Turcæ ter decimo quinto seculo, & quater ab anno 1500. Metlingensem districtum, aut Civitatem ipsam diripuerunt, sed anno 1578., quo postrema accidit eorum irruptio, fortiores experti sunt Civium animos, viresque, ut pote ab illius obsidione gravi clade repulsi.

## MICHELSTETTA.

**M**ichelstetta vulgo Michelstetten, Carniolis Velefalo noble sacrarum Virginum D. Dominici leges sectantium Monasterium, alias etiam Frauen-, aut Marienthal vocatum, quatuor milliaribus Labaco abscedit. Illius exordium ex MSS. Martini Bautschneri annalibus in suos transtulit Valvalarius, ubi ex ipsiusmet Parthenonis documentis haberi dicitur, qua ratione sub annum 1300. Sacerdos quidam secus Michelstettensem Arcem venationi vacans, claram ex contiguo saltu vocem percepit, quam subsecutus ad sylvestrem pervenit pinum, unde illa oriebatur; tanti prodigii causa ut melius exploraretur, excisa arbor cubitalem Beatissimæ Virginis puerulum Jesum gestantis statuam obtulit, quæ auro postmodum illita, Templique aræ hodieque insistens accolarum patet venerationi, & patratis saepè miraculis inclaruit. Ea de causa ercta ibidem est Deiparæ Ædes, ad quam Virgines quædam sensim accedentes collata simul dote religiosam vivendi normam amplexæ sunt. Huic origini aliam paulum diversam subnectit Valvasorius ex fide dignissimis monumentis, ut ipse affirmat, excerptam; narrat igitur anno 1257. quendam S. Margarethæ Parochum, dum animi relaxandi gratia per nemora erraret, hoc monitum audivisse: *Hic debet*

extrui Monasterium Dominicanarum, post cuius sonum pergens (ter quippe repetebatur) in proceram incidit arborem, supra quam prædicta Dei Genitricis icon cum Jesulo prominebat, idque eo penitus loco, quo nunc summa Templi ara spectatur. Hujus rei fama ab eodem Parocho divulgata Aquileiensem Patriarcham, Ottонem Austriæ Principem, & Albertum Oberburgensem Abbatem fertur permovisse, ut communī ære illius Ordinis Sanctimonialibus Parthenonem fundarent; at hæc manifesti arguuntur sphalmatis; cum nullus tunc Otto Austriæ imperaret, sed deleta jam Babenbergorum Austriæ Principum stirpe ea Provincia ab Ottocaro Rege prætenso anno obtineretur, nisi quis dicere mallet, tunc quidem miraculum accidisse, Monasterium vero altero primum seculo ab Ottone Austriæ Archiduce anno 1339. vita functo fuisse exstructum; sed mirum videri posset, tot scriptores, qui piam hujus Ottonis in aliis sacris fundationibus liberalitatem celebrarunt, Michelstettensis Cœnobii nusquam meminisse. Tertia demum opinio ex vetustissimo, uti Valvasorius loquitur, codice eruta parum absuit, quin has S. Dominici Religiosas Virgines ipso Prædicatorum Ordine ab Innocentio III. Papa anno 1215. primum confirmato fecerit antiquiores; siquidem ad annum 1221. earum primordia collocavit. Quare

re id unum certi ex his confici potest, admodum antiquam scilicet esse hujus Monasterii originem, cum ea ita lateat tot discordibus documentis involuta. Extra illius limen assurgit rupes, cui incumbit Arx Frauenstein dicta confuetum sacrarum Virginum eo ascendentium asylum, quoties Turcicus furor per has oras grastabatur.

## MINCHENDORFFIUM.

**M**inchendorfum vulgo Germanis Minchendorff, Carniolis Mekyne amplissimum D. Claræ Monasterium, & reliquorum omnium in Carniola extantium pulcherrimum 3 milliaribus Labaco abeit, & Lythopolitanæ Urbi proxime accedit. Hujus ortum, ac magnificos progressus ab accurata inscriptione dilcemus nigro marmori super hospitum conclave affixo ibidem insculpta, quæ simul nobilissimæ Gallenbergicæ Prosa piæ heroës nobis ob oculos ponet. Sic ergo ibi legitur: *Monasterium S. Clæræ in Münchendorff, quod olim D. Sigefridus Nobilis de Gallenberg, Ottonis ex Gutta de Weisseneck filius; Wilhelmi ex Anna de Sumerek nepos; Sigismundi ex uxore, cujus nomen et si vera neglexerit historia virtutem loquitur, pro nepos; Sigefridi ex Bertha de Funkenberg abnepos; Schiegii ex uxore incom perta, & Ottonis ex conjugie Anna ab Ehrifels, demum Ottolphi de Scherffen berg, qui circa annum M. primus condi-*

dit Arcem Gallenberg, trinepos, quadri nepos, & ultra; anno salutis MCCC, VII. Idus Octobris, die SS. Dionysii, Rustici, & Eleutherii MM. primus fundavit: hoc Georgius Sigismundus S. R. I. Comes, & D. de Gallenberg S. C. M. Camerarius, Ducatus Carniolie Judiciorum Provincialium Praeses, & supremi Capitaneatus Locumtenens cum germano suo Joanne Friderico, hereditarii advocati in Münchendorff, Fundatoris per XIII. generationes seri nepotes, vetustate jam cadens pene a fundamentis repararunt anno MDCLXXXII. Adfert præterea Valvasorius tum fundationis literas, tum alias, quibus Sigefridus, Fridericus, & Otto Sigefredi fundatoris filii novis munieribus patris opus cumularunt. Huic Cœnobio prima omnium præfuit Clara Gallenbergica fundatoris pariter filia anno 1301. ei officio admota, cui aliæ 35. haec tenus successere.

## PLETRIA.

**P**Letria vulgo Pletriach inter fertilissimi foli delicias, uno Landstrassio dissita milliari, præ dium olim Nobilissimæ Auerspergicæ & Zoblbergicæ gentis. Sub finem saeculi XIV. hoc & adjacens Dominium Sicherstein, cum castro gentilitio ejusdem nominis Equestris familiæ, emptione sibi vendicarunt Comites Celejani. Initio saeculi sequentis hæc & alia plura ab Hermano II. Comite conversa sunt

sunt in Carthusiam, testantibus binis fundationum tabulis etiamnum extantibus. Piores Hermannus fundator consentientibus filiis Friderico, Hermanno & Ludovico dedit Cillyæ die Dominico ante festum S. Margarethæ anno 1407. & testes nominantur Sigismundus Neühauser eques, Georgius Silberger, Conradus Verbez aulæ Præfectus, Popo a Weilestein, Fridericus Lindegker & Ludovicus Sachs. Alias dedit die veneris post Dominicam *quasi modo geniti* anno 1414. idem Hermannus Comes a Cilly & in Seger senior & Fridericus, Hermannus & Ludovicus Fratres Comites a Cilly (filii prioris) testantibus Hermanno Comite a Cilly Episcopo Frisingensi, Friderico Topplacher, aulæ Præfecto, Ludovico Sachs & Poppone a Weilenstein. Ædificium amplum & firmum Gothorum structuram loquitur. Adsita Ecclesia sanctissimæ Triadi & Dei Genitrici Virgini Mariæ dicata, religioso ritu consecrata fuit in pervigilio Sanctorum Simonis & Judæ anni 1420. a memorato Hermanno Frisingensi Episcopo, cui veniam hanc fecerat Ludovicus Aquileiensis Patriarcha. Hermannus Fundator cum Sacerdotum suum Sigismundum Imperatorem Posonii inviseret, anno 1434. inter Imperii Principes jam jam reponendus obiit 13. Octobris anni ejusdem; corpus terræ redditum est ante aram principem

Pletriacensis templi: ubi illius adhuc sepulchrum visitur. Prævalescente hac in Provincia hærefi, extinti sunt Carthusiani reditusque monasterii, a Ferdinando tum Archiduce, dein hujus nominis Imperatore secundo, anno 1595. dati sunt in sustentationem Collegii Labacensis Societatis JESU, quod & Clemens VIII. Pontifex Maximus literis Roma 23. Martii anni 1596. datis supra sua autoritate firmavit.

## RATMANSDORFFIUM

**R**Atmansdorffium vulgo Germanis Ratmansdorff, Carniolis Radovelza Urbs est cum speciosa turrianorum Comitum Arce lævo Savi fluvii littori sex supra Labacum milliaribus insidens, atque in mediocri colle, quem profunda fossa undique natura circumdedit, elevata. Per Henrici tertii Cæsaris beneficium ex Oppido in Civitatem transisse narrat Valvalorius, sed Merianus Lazio secutus Friderici IV. Imperatoris ætate inter Oppida Ratmonsdorfium recenset, negatque modo patere, quandonam consueta Urbium jura impetraverit. Post Udalrici Cileiensis Comitis necem memoratus Fridericus cum exercitu Carnioliam subiens, etiam in hanc Urbem infesta convertit arma, quam paulo post obfessam cœpit, & a Witovicio Cileiensis viduæ Belli-

Belliduce receptam, repetita ob-sidione sibi secundo subjugavit. Unius horæ spatio extra Urbem lacus est exquisitis piscibus fæcun-dus, in cuius medio modica insula, & in hac ædes Deiparæ Virgini sa-cre, a multis undique concurren-tibus piis clientibus celebrata: ad partem occidentalem lacus in ab-rupta & alta rupe castrum est Vel-des Brixinenſi Antiftiti obtem-pe-rans.

### RUDOLPHI WERTA.

**R**udolphiwerta, seu Neostadium vulgo Germanis Rudolphs-wert, seu Neustädlein, Carniolis Novomesto Urbs per amœna in le-ni asburgit clivo, unde præterflu-entem Gurcam despectat. Autho-rem sui colit Rudolphum IV. Au-striæ Archiducem, qui eam & ædibus instruxit, & Civitatum pri-vilegiis auxit dato anno 165. di-iplomate confirmatis. His Maxi-milianus I Imperator Collegiatam, ut vocant, Ecclesiam D. Nicolao Episcopo devotam anno 159. cum divite adjecit dote, qua undecim Canonici præter Præpositum, & Decanum in communi alebantur; at repetita fæpius infortunia ad quatuor tantum Canonicos præter duas dignitates priorem numerum coarctarunt. Sub nuper vita fun-cto Præposito Antonio Gotthardo Barone ab Erberg, non solum prior numerus maxima sui parte est re-

stitutus, sed & Collegiata Domus in clivi apice Urbem despiciens ab interitu vindicata atque elegantem in habitationem adaptata. Hodie Præpositi redditibus Goritiensium Archi-Præful Alumnorum complu-res in recens excitato Clericorum Seminario alit. Reliquo Canoni-corum Collegio quatuor alia sub-funt in Urbe Templa SS. Antonio Abati, Georgio, Martino, & Ca-tharinæ consecrata. Sexta intra muros Ecclesia D. Leonardo sacra potitur Minorum S. Francisci Cœ-nobium ab Elisabetha a Tscher-nembl anno 1462. fundatum. In conspectu autem Urbis stat Vene-rabilis Capucinorum Ordinis Asce-terium, anno 1660. condi cœptum; sed post 12. annos cum Templo a Joanne Scnoglypanovich Seniensi, & Modrusenſi Episcopo D. Josephi honoribus erecto tandem consum-matum. Excellebat quidem olim tum populi frequentia, tum meci-cium abundantia Rudolphiwerta; verum quinques a Turcis territa, & circumjacentibus bonis spolia-ta, dein ter ab epidemica lue, fæ-pius a flammis ad extremam homi-num, rerumque inopiam redacta, pristinum vigorem nunquam recu-peravit.

### SITTICUM.

**S**itticum vulgo Germanis Sittich, Carniolis Sitzena vetustum & percelebre Cisterciensis Ordinis Mo-

Monasterium 4. milliaribus Labaco in Orientem recedens an. 1135. erexit Peregrinus Aquileiensis Patriarcha, eique altero anno præesse jussit Vincentium ab ipso S. Bernardo ex Gallia submissum; fundationis tamen literæ non nisi anno 1156. datæ apud Valvasorium leguntur. Ejus dotem additis latifundiis deinceps ampliarunt Marchiones Istriæ, Goritienses Comites, Austriæ Archiduces, aliisque complures a citato authore recentiti, præsertim Viridis, seu Virida Barnabovii Mediolanensis Principis filia, & Leopoldi Probi Archiducis in Helvetia cæsi vidua, una cum pluribus Istriæ Marchionibus, & Agneta Udalrici Carinthiæ Ducis conjuge in hujus Cœnobii Templo tumulata. A Vincentio primo Abbatte quadraginta sex hactenus eo munere functi sunt, quorum vigesimus octavus Oswaldus nomine anno 1482 gubernaculo admotus incensum a Turcis Cœnobium e cineribus rursum excitavit, haud dispari calamitate anno sequentis seculi 29. opprimendum: Reinprectus vero Trigesimus nonus anno 1604. in Abbatem electus, amplum cuius pars etiamnum visitur ædificium a fundamentis evexit; novum annis his proximis ad elegantiam omnem constructum, excitavit Præfus hodie adhuc superstes Wilhelmus.

*Topograph. Austr. P. I.*

## V I P A C U M.

Vipacum vulgo Germanis Wipach, Carniolis Vipava Oppidum frequens olim, & amplum, modo exile ad Carnioliam quidem hodie refertur, sed in Italia tamen jacet, utpote ad Australem alpium radicem situm; harum quippe summitas, vel ipso Schönleben annente, Italiam initium est Illius tenuitatem illustrat magnificentum Comitis Lanthieri Palatum recenter ibidem excitatum. Propriis quondam suberat Dominis, seu cognomen suum ab illo loco mutuantibus, inde ad Osterwicios Carinthiæ Proceres devenit, ab his vero ad Herbersteinos, ex quibus Leonardus fertur anno 1487. a Frederico III. Cæsare hoc Oppidum dono accepisse; sequentis vero seculi annus 57. configatur a Bautschnero Nicolai Comitis Turriani funere, quem ob multas legationes in Italia, Hispania, & Belgio pro Cæsare obitas Vipacensi Castro ab eo donatum subjungit. Horrida, asperaque alpium juga Turcarum impetum frangere nequivere, quo minus an. 1478 hucusque progressi totam viciniam expilarent; post sex inde lustra alteri patuit hosti, Venetis scilicet, qui anno 1508. inopino assaultu Vipacum occuparunt. Longa hinc extenditur ora generoso amænoque vino, quod ibi legitur, celebrata. Præterea scaturit ex propinqua rupe Vipacum

B b

cus

cus fluvius in eo alpium latere, quod Nauporti alias descripti fontibus opponitur, estque procul dubio famosus ille veteribus fluvius, qui quondam Frigidus audiebat; id enim clare demonstrat Peutingeriana Mappa cum praesenti locorum situ comparata: illius iter huc pertinens in Labacensi descriptione jam exposuimus, quod nimis Aquileia ducebatur ad Pontem Sontii, ad fluvium Frigidum, ad alpem Julianam, Longaticum, Nauportum, Aemonam; hodie autem si quis Aquileia discedens, post 14. passuum millia in veteri Mappa adscripta Sontium, seu Lisonium traxicat, ad alpes, quæ ante Nauportum occurunt, profecturus, in nullum alium certe incidet fluvium, quam Vipacum, cuius in eodem pariter loco meminit Antonini Itinerarium. Inclaruit maxime hic fluvius ob celeberrimam victoriam a Theodosio Imperatore anno 394. de Eugenio tyranno prodigiose partam: dilaudant illam

- (a) De reb. Germ. ex veteribus Jornandes (a), Ruffinus (b), Theodoritus (c), Orosius (d), Socrates (e), Sozomenus (f), aliique plures, ex quibus lo-
- (c) Lib. 5. cum clare designant partim Sozo-
- c. 24. menus, dum ait: *Eugenius maximum*
- (d) Lib. 7. *paravit exercitum, & portas Italæ, quas*  
c. 35.
- (e) Lib. 6. *Romani alpes Iulias vocant, præoccupa-*  
c. 25. *tas communis. Et postmodum ita de-*
- (f) Lib. 7. *Theodosio scribit: Oratione facta mo-*  
c. 22. & 24. *vit in Italianam, & cum alpes consecutus*  
*esset, primas custodias occupat, deinde*

superato transitus vertice, cum jam descendendum esset, campum plenum equitibus, ac peditibus videt. Partim Socrates dum hæc narrat. Fit itaque conflitus ad fluvium, quem Frigidum vocant. Hic ergo Theodosius collecto militarium virium robore, certus obtinendæ victoriæ, quam Joannes Anachoreta prædixerat, in Eugenium cum Arbogaste, Flaviano, & ingenti armatorum caterva adventantem prævio crucis signo in labaro, militumque armis renidente, exercitum movit, & quidem nonnis Septembbris Gothos præire jussserat, qui ab hostibus oppressi infeliciem totius rei exitum ominabantur; at Cæsar SS. Apostolorum Joannis & Philippi aspectu, verbisque per noctem confortatus, universis postridie copiis prælium redintegrat, quo maximis utrinque animis exardescente, ubi Romanî Romanis congregabantur, æqualis erat pugna, ubi vero Goths, cæterique Barbari pro Theodosio dimicabant, ibi vincebant Eugeniani; quod ille intuitus, super editam rupem, unde ab omnibus spectaretur, in terram procumbit, Divinamque opem ferventissime invocat, nec suo voto frustratur; nam Bacurius eximiæ pietatis, virtutisque Tribunus cum primis Ducibus illuc suppetias ferens, ubi hostes superabant, rupta eorum acie, in fugam omnes convertit. Validissimus interim exortus ventus missa ab Eugenianis jacula

cula in eosdem retorquebat, & quæ  
jaciebant Cæfarei, vehementius in  
hostes ferebantur, in quorum etiam  
ora elatus pulvis oculorum usum  
præpediverat. Hac ratione Theo-  
fius victoria potitus Aquileiam per-  
rexit. Jure igitur Claudianus, post-  
quam cuncta hæc eleganti carmi-

(a) De III. ne cecinisset, ita exclamavit (a)  
Concul.  
Hono.

O nimium dilecte Deo, cui fundit  
ab antris

Æolus armatas hyemes, cui mili-  
tat æther,  
Et conjurati veniunt in classica  
venti:  
Alpinæ rubuere nives, & FRIGI-  
DUS amnis  
Mutatis fumavit aquis, turbaque  
cadentum  
Staret, ni rapidus juvisset flumina  
sanguis.

## WEICHSELBURGUM.

**W** Eichselburgum vulgo Germa-  
nis Weichselburg, Carnio-  
lis Vischnagora Urbecula est infra  
Weichselbergam Arcem sita, & 4.

milliaribus Labaco absens, quam  
Joannes Thomasich apud Schönle-  
ben 552 ante Christi nativitatē  
annis ædificatam tradit, aut fingit:  
cum enim nulla antiquorum adfe-  
rat documenta, nec priscum illius  
nomen prodat, merito iuspiciosem  
ingerit, vixque ab eruditis assen-  
sum extorquebit. Magnianam inter  
Pannoniæ Superioris Urbes a Pto-  
lomæo relatam dictum olim fuisse  
Weichselburgum divinat Schönle-  
ben, sumpto inde argumento, quod  
is author inter Æmonam, & Præ-  
torium eam recenseat, sed obser-  
vandum est Ptolomæum Urbium  
ordinem non juxta situm, sed di-  
gnitatem, aut libitum contexuisse.  
Hujus Civitatis Parœcia Sitticensi  
Cœnobio subiecta D. Ægidium ut  
Patronum suum veneratur. Cæte-  
rum illam splendidius quondam vi-  
guisse ferunt, at modo dirutis, aut  
mox ruituris ædibus inflictas sibi  
a bello, & igne plagas incolis, ex-  
terisque monstrat etiamnum obdu-  
cendas.

## COMITATUS GORITIENSIS.

**F** Orum Julium, seu Forum Julii,  
aut Forojulium Italiae Regio  
intra alpes Carnicas, sinum Adriaticum,  
& reliquam Venetorum di-  
tionem extensa a Carnis olim te-

nebatur, qui ex alpibus antiquissi-  
ma eorum sede in hanc oram ad  
mare usque descendentes etiam  
Carniæ nomen illi indiderunt, &  
quidem multo ante suscep tam in

Noricum migrationem , quam in Carinthiæ descriptione supra explanavimus. Hujus asserti testis est Plinius (a) anno Christi 80. vita functus , qui in Venetia , decima per eum Italiæ Regione , postquam Concordiam , & Aquileiam Urbes , Tilavemptum , Natisonem , & Turrum fluvios , aliaque Fori Julii loca recensuit , illico addit : Carnorum hæc Regio . Testis Strabo circa annum 25. florens , qui Tergestum usque Carniam producit , cum illud Pagum Carnicum appell.

(b) Lib. 7. let: testis demum Ptolomæus (b) an. 147. evivis sublatus , qui in sexta Europæ Tabula ita scriptum reliquit. (c) Civitates Carnorum mediterraneæ Forum Falium Colonia , Concordia Colonia , Aquileia . Ex quarum Urbium prima Provinciam totam nomen suum sumpsiisse , ulteriori demonstratione non eget. Hac potitus est an. 569. Alboinus Longobardorum Rex , qui Herulorum , Gothorumque secutus vestigia , e Pannonia in Italiam desolandam potius , quam occupandam ad volaverat , Italicas allectus fructibus a Narsete Eunicho Justiniani Cæsaris Archistratego dono missis , ut Barbaro Rege ad eos proprius decerpentes invitato , objecta sibi a Sophia Imperatrice scommata ulcisceretur : cumque ille animum intenderet , uti Paulus Diaconus narrat , quem Forojuliæ Civitati , totique Regioni præficeret , Sisulphum , seu Gisulphum , ut fertur , nepotem suum virum

per omnia idoneum tandem elegit , in Cisalpinam Calliam mox progressurus. Gisulpho dein successore alii ex Longobardica gente Duces , ex quibus Rachis anno 744. ad totius Regni solium evectus , elapso sexennio in Cassinense Cœnobium concessit , ut vitam suam religiosis virtutibus satius , quam cervicem auro coronaret. Verum exciso paulo post a Carolo Magno Longobardorum Regno Forojulienses Duces ab Imperatoribus deinceps statuebantur , quibus Carinthiæ , & Carniolæ cura videtur aliquando demandata. Ex his Baldricus , cum Magistratum segniter administrasset , Bulgaris Superiorem Pannionam impune deprædatibus , anno 828. officio motus , quatuor Marchionibus , seu Comitibus , in quos tota Forojuliensis Marchia tunc dissecta fuit , locum , dignitatemque cessit.

Eximiae , ac per amoenæ hujus Provinciae non infima portio , Comitatus Goritiensis Austrica scuptra a longo jam tempore veneratur , reliquo illius tractu Venetis obtemperante , si Gradiscam , & Aquileiae bustum excipias Eggenbergicæ prosapia cum adnexis Oppidis subjecta. Adeo procul a nostra ætate abest insignis hujus Comitatus fons , & origo , ut vix ultra spes amplius affulgeat ad eam inoffenso pede pervenireti , & fluentem inde Comitum seriem recto tramite derivandi. Megiferus (a) Chron. Car. lib. 6. an. c. 12.

antiquiora evolvere diffidens eorum syllabum ab Alberto I. auspiciatur, quem ab Ezelino Istriæ Marchione ex Andechsinis Comitibus oriundo, ac Mechtilde Ottonis III. Cæsaris filia progenitum autumat, & ab Henrico IV. Imperatore primum Goritiæ Comitem sub finem seculi undecimi creatum. Verum plures alios ea dignitate conspicuos fuggerunt passim ante prædictum tempus annales, cujusmodi fuere circa annum 926. Meinardus, ejusque filius, vel ex fratre nepos Marquardus; item Otwinus Beatorum Albo inscriptus, & circa annum millesimum e terris ad cœlos evocatus. Qua de causa non vane suspicor, Goritiensem Comitatum ab insinuata paulo ante Fori Julii in 4 Comites divisione oriri; primos enim post singulorum obitum ex Cæsaris arbitrio fuisse ad id munus promotos facile concederem; sed hæreditariæ postea successionis jura obtinuisse; quod & alibi itidem factum animadvertis. Inter posteriores Comites apud historicos celebratur Joannes, qui Udalrici Cileiensis Comitis in Hungaria imperfecti ditionem sibi deberi prætendens, quamvis nullis subsidiariis stipatus copiis, suisque tantum viribus fretus, an. 1460. ipsi Imperatori Friderico III. bellum indicere non formidavit; jamque aliquod Urbeculas, & Oppida in Carinthia invaserat; sed missus a Cæsare exercitus inconsultum Joannis animum ita repressit, ut non

modo occupata deserere, Cileiensi hæreditati valedicere, sed & proprium Comitatum tanquam feudum ab Austriae Archiducibus dependens agnoscere fit coactus. Post octo inde lustra, Leonardo postremo Goritiæ Comite absque liberis extinto, Maximilianus I. Imperator ex veteri pacto gentilitio vacuum dominium adiit, & speciosam hanc gemmam Austriaco diademati inferuit. Paulo post Ericum Brunsvicensem Principem idem Cæsar Goritiensi ditione remuneratus est, jure tamen ad posteros minime transmittendo; sed excitato inter Maximilianum, & Venetos bello, Livianus Reipublicæ Bellidux victis ad Cadurcum Germanis, captoque Lisontii ponte anno 1508. Goritiam obsidione cingit, & crebris tormentorum ictibus muros quatiens, Cives ad ditionem compellit. Arcis autem Præfctus Andreas Lichtensteinus missis ad Ericum nunciis, quo res loco forent aperuerat, sed lente eum cum subsidio adventare cernens, cum hoste paciscitur, Arcemque cum Urbe dedit. Vix annum tamen integrum Venetis licuit de hac victoria triumphum agere; altero enim vere Feltrio, & Belluno ab Erico occupatis & evulgata de Maximiliani, validique exercitus adventus fama, in Cæsaris fidem sponte rediit Goritiensis Civitas, de qua modo singulariter agemus.

Goritia vulgo Germanis Görz peramœna Urbs, & descripti ha-  
ctenus Comitatus caput, a Lison-  
tiœ fluminis aquis pene alluitur, &  
Labaco Carnioliae Metropoli 12.  
milliaribus abscedit. Hujus origi-  
nem quidam nimis alte petentes,  
Noreiam Civitatem veteribus no-  
tissimam, primum in Noritiam, de-  
mum in Goritiæ transmigrasse cre-  
diderunt; at nullus præsto est scrip-  
tor, qui eam nunquam Noritiam  
dixerit nullum indicium, quod sen-  
tentiam comprobet, præterquam  
levis vocabuli affinitas confvetus  
Lazii Achilles; quem alii parvi  
pendentes non Goritiæ, sed in pro-  
pinquo Salcanensis Vico Noreiam  
collocant, nonnullis, quæ ibi ho-  
die spectari dicuntur, ædificiorum  
ruderibus ad id afferendum indu-  
cti; plura tamen contra hanc quo-  
que opinionem militant, quam ei  
faveant desumpta ex veteri autho-  
ritate argumenta quæ veritatis in-  
dagandæ gratia libeat modo cur-  
sim trutinare. Agmen ducat Stra-  
bonis textus ita sonans: (a) Extra  
Venetiae quidem fines Aquileia est, quæ  
flumine ab alpibus descendente distin-  
natur, per quod sursum navigatur stadiis  
mille, & ad Urbem usque Noreiam, ubi  
Cn. Carbo collatis adversus Cimbros si-  
(a) Lib. 5. gnis re infecta discessit. Locus autem est  
ad purgandum aurum natura idoneus,  
nec minus ad ferri fabricas. Amnis  
ergo Noreiam præterfluens, Aquileiam  
Urbem, vel Aquileiensem  
Districtum a Venetia dirimebat,

unde Occiduam illius plagam nece-  
fario irrigasset; atqui Lisontius,  
cujus ripæ modo Salcanum infidet,  
per Orientale Aquileiæ latus in ma-  
re decurrit: minus adhuc favet Stra-  
bonis distantia, quæ 37. communia  
milliaria germanica conficeret,  
cum Salcanum, & Lisontii ostia  
nec media ejusmodi intercapedo  
disjungat. Quapropter & Strabo  
in indicando fluvii situ, & vel ipse,  
vel Amanuenses in stadiorum nu-  
mero errasse dicendi sunt, ut No-  
reia Salcani subsistat: verum si Stra-  
bo toties nos fallere creditur, unde  
ostendetur, Noreiensia rudera ibi-  
dem supereesse? secundum sphal-  
ma facilius tolerari quidem po-  
test, frequens enim est in veterum  
operibus per tot secula saepius tran-  
scriptis; & sane Cluverius (a) apud  
Schönleben (b) in quibusdam Stra-  
bonis exemplaribus non nisi quin-  
genta reperit stadia, seu sexagin-  
(a) Ital. ant.  
(b) Carn.  
ap. ant. c.  
5. §. 5.  
ta duo millia, & quingentos pas-  
sus, quos Aquileia usque ad Ven-  
zonum Oppidum metitur, unde na-  
vigabilis jam fluere incipit Tila-  
vempton, & ad Occidentalem Aqui-  
leiae partem in sinum Adriaticum  
effunditur, aptus proinde ad ter-  
minos inter Venetiam, & Aquilei-  
am definiendos. Interim ego in  
alio Cluverii (c) opere toto Coe-  
(c) Vin.  
lo diversam ejus mentem deprehen-  
do; ita enim ibi Strabonem ex  
Græco codice vertit: Ad Aquileiam  
navigatur adverso Natisone a mari pluri-  
mum LX. stadia; - - - sita autem est  
extra

l. i. c. 20.  
5. §. 5.

2.

& Nor. c.

*extra fines Venetorum, qui dirimuntur amne ab alpibus profluente, qui subvectionem habet per cccc. stadia ad Noreiam Urbem. Natiso post Gradiscam cum Lisontio confluit, videturque ea tempestate nomen suum usque ad mare conservasse, putatque Cluverius de eo Strabonem loqui, dum paulo post Venetorum fines distinguit; unde cum totus Natiso a fonte usque ad mare longe paucioribus fluat stadiis, sic textum corrigit. Dirimuntur amne, qui ab alpibus profluens, subvectionem habet ducentum stadiorum in Tauriscos ad Urbem Noreiam. Quam bene, non discutio; sed veluti certum concludo, aut perperam a Strabone Noreiae situm adumbrari, quod probabilius videtur, aut si ei fidimus, Noreiam in Australi alpium descensu, uti apparet, describenti, binas hujus nominis Urbes admittendas esse, cum in Tauriscis, seu Norico non in Carnia veteres alii scriptores Noreiam diserte statuant. Julius Cæsar in belli Gallici comentario, Bojos, inquit, qui trans Rhenum incoluerant, & in agrum Noricum transierent, Noreiamque oppugnarant, receptratos ad se socios sibi adsciscunt. Clarius adhuc Plinius (a) In hoc situ interiere ex Venetis Atina, & Cælina, Carnis Sedeste, & Ocra, Tauriscis Noreja. Restitutam tamen fuisse eam Urbem oportet; nam omnium clarissime Antoniniani Itinerarii author Plinio recentior Noreiae locum, in Superiori nempe Styria, desi-*

gnavit, cum Ovilia, id est, Welfio Cileiam peregrinantibus 27. MP. ante Virunum apud illum ea Civitas occurrat. Cum ergo Salcani incassum hactenus Noreiam quæsiverimus Goritiam tandem revertamur.

Sane non opus est Goritiam a Noreia derivare, cum luculenta illius etymologia in promptu sit, ex Slavico nimirum idiomate in hac vicinia usurpato desumenda, namque Gora montem, Goriza monticulum apud Slavos denotat, qualis omnino ille est, quem occupat Goritiensis Arx Cæsarei Capitanei, ut vocant, sedes, & vetus Civitas utcunque munita; nova autem posterioris ævi opus nullis coërcita muris per subjectam planitiem temere dilatatur. Hinc etiam clare elucet Goritiæ ortum ad Slavorum tempora referendum esse, non ad annum 456., quo Gaudentius Hilarinus ex quibusdam sublestæ fidei documentis apud Schönleben tradit, unum e Palatinis Carinthiæ castra Attilæ secutum, ab eo partem agri prope Aquileiam dono accepisse, & late per Carsum, & Poykam, constructis tribus Palatiis Rosacenfi, Fiumicellensi & Goritiensi, dominatum. Multo minoris ponderis patet esse Megiseri sententiam, qui ad annum 451. de hac Urbe tanquam jam tunc existenti loquitur, dum ex suppositiis plane annalibus refert, Alanum de Goritia sub Foresto Esten-

(a) Lib. 3.  
c. 19.

fi Principe contra Attilam militasse Magnam patriæ suæ attulit lucem Comes a Coronini in tentamine suo Genealogico-Chronologico, in quo & antiquam Comitum rerumque Goritiensium seriem elucidavit & hodiernam urbis faciem eleganter descripsit ex quo pauca in nostram rem delibare juvat. Præter complura Nobilium, eaque elegantia palatia, templa sequentia Goritiæ Religionem eloquuntur: Metropolitanum hodie olim Parochiale SS. Hilario & Tatiano sacrum. PP. Societatis Jesu in memoriam S. Ignatii eorundem fundatoris erectum. PP. Conventualium S. Francisci cum Sacello S. Catharinæ excitato ab ipso S Antonio Patavino. PP. Capucinorum, B. V. in cælos assumptæ consecratum: S. Joannis Baptiste, ædificatum ab illustrissima familia Baronum de Doremberg sub cura Sociorum Iesu: Fratrum Ordinis S. Joannis de Deo cum adjecto Nosocomio. Sacrarum Virginum bina templa, nempe Ordinis Capucinorum S. Claræ unum, alterum Virginum ab sancta Ursula nomen habentium: porro facellum S. Antonio sacrum: Sacellum S. Michaelis prope Parochiam: Sacellum Archiepiscopali Palatio adsitum a Domino Augustino Codellio P. M. excitatum: Sacellum Xenodochii ad Macellum Sacellum honoribus S. Erasmi a Comitibus de Orzon aliquot abhinc annis erectum: aliud SS. tribus

Magis dicatum, in Suburbio extra portam Italiæ. Denique non est omittendum Sacellum Arcis S. Bartholomæo Sacrum: & alterum in Urbis parte Superiore seu Arce ubi Capitanei Solemni ritu institui solebant.

Quot Religiosarum Familiarum commemoravimus templa, totidem sunt earundem asceteria. Collegio PP. Societatis Jesu, a Ferdinando II. fundato, adiectæ sunt publicæ scholæ, in quibus præter humaniores litteras, Philosophia, Matthesis, Theologia Moralis, & Jus Canonicum traduntur. Pertinet eo convictus, & nobilium adolescentum profectu, & ædificii decore illustris. Monasterium PP. Conventualium S. Francisci id memoria dignum habet, quod a S. Antonio Patavino anno 1225. fundatum fit, ubi idem primus Religioso cætui Guardiani nomine præfuit. Urbis Goritiæ extrema propemodum contigit mons, cui impositum est Cœnobium PP. Carmelitarum a S Theresia Reformatorum, cum eleganti templo, in quo sub imagine prodigiis Clara, B. Virgo Maria colitur: loco nomen est Castagnovicæ quasi Castaneorum silvam dicas. Civitas hæc & incolis & Nobilium frequentia pro amplitudine sua non mediocriter ornata est: celebritatem ejus augent tribunalia quæ pro Augustissima Principe toti huic Provinciæ præfunt: solebat olim

ea

ea regi a Capitaneo qui cum Prætore & Affessoribus sex ac e Procerum ordine duobus jus dicebat nobilibus etiam de crimine Capitali postulatis: hodie immutata paulisper regendi forma, Capitanei Goritiæ & Gradiscæ titulo & munero sublatis, senatus Provincialis Cæfareo Regius constitutus fuit, Præside seu Regio Repræsentante & consiliariis constans, a quo ad aliud Tribunal appellare non licet, nisi ad Regimen interioris Austriæ, Græcii stabilitum. Ecclesiæ quoque res, non levem hic subierunt mutationem: pruerat jam dudum Goritiensis Ecclesia Patriarchæ Aquileensi: postquam vero per Legatos Reipublicæ Venetæ id effectum est, apud Romanos Pontifices ut Patriarcha Aquileensis non alius nisi Venetus deligeretur, & viventi Patriarchæ Successor Venetus illico quocumque titulo adjungeretur: ea res, præter enata subinde bella, aliasque graves causas, Austriacam Domum permovit, ut post tentata nequidquam leviora remedia, expofitaque Romani Imperii ac Domus Austriacæ jura, Patriarchæ Aquileensi Veneto in terras Austriacas denique aditus interdiceretur. Id primo factum est anno 1621. subinde cum Romæ, iterum propositis diversis, eam controversiam componendi, mediis nihil efficere, iterata est illa Aquileensis Patriarchæ Veneti ab Austriacis terris exclusio anno 1641. sed optima

*Topograph. Aust. P. I.*

Patriæ mater Maria Theresia Augusta, cum fideles subditos suos, proprio animarum Pastore destitutos, diutius vivere non sustineret, a supremo Ecclesiarum Rectore Benedicto XIV. P. M. primum illud obtinuit, ut an. 1749. die 29. Novemb. & paulo post die 27. Jun. 1750. litteræ Apostolicæ Romæ signarentur, quibus *Vicarius Apostolicus Temporarius per Diœcēsim Aquilejensem in Austriacis terris institutus fuit Carolus Michael Comes ab Attems Pergameni Episcopi* titulo honoratus cui & Imperatrix eodem anno temporalium bonorum jura contulit: commoto hac re enatu Veneto, studiosissima Pacis Imperatrix cum eo tranfegit ut abolito Patriarchatu Aquileensi reditus & potestas illius in duos dividenter Archiepiscopos qui suam libere singuli in suo territorio exercent jurisdictionem, annuit his Summus Pontifex Benedictus XIV. edita Constitutione Romæ anno 1751 quæ incipit: *in juncta nobis a Supremo Pastorū Principe* . . . Patriarchatum Aquilejensem omnino abolet, duos Archiepiscopos *Goritiensem ac Utinensem erigit*, Augustæ Austriacæ Domui in Maria Theresia, & ejusdem Successoribus jus perpetuum nominandi Archiepiscopum Goritiensem addicit. Atque eodem anno 1751. primus Goritiensis Archiepiscopus ab Augusta Imperatrice nominatus est idem qui Vicarii Apostolici munus obiverat Comes ab Attems.

C c

Suffra-

Suffraganei Metropolitanæ Goritiensis Ecclesiæ designati sunt Episcopi: Tridentinus in Tyroli, Comensis in Mediolanensi Ducatu, Tergestinus & Petinensis in Istria Austriaca. Archiepiscopo Cano-

nicorum Collegium adjunctum est, Præposito, Decano, & Primicerio conspicuum: quorum Sustentationi abbatiæ Rofacensis, & Belinensis, aliquique Sacris Curionibus destinati redditus sunt constituti.

## COMITATUS MITTERBURGENSIS.

**I**stria, seu Histria amœna Italiam Provincia inter Flanaticum, & Tergestinum finum peninsulæ formam referens, a Septentrione alpibus cingitur, quibus a Carniola separatur. His adhæret magna Istriæ pars, quam Mitterburgensis Comitatus a primaria Urbe vulgo Germanis Mitterburg, Italis Pisinno sic dictus complectitur, Aquileiensi Patriarchæ, Leopoldo Probo Austriæ Archiduci, & Goritiensisibus Comitibus aliquando subjectus. Sed horum stirpe anno 1500., uti diximus, extincta ad Austriam sub Maximiliano I. Cæfare reversus eidem hactenus obtemperavit. Interea tamen Ferdinandus III. Imperator anno 1644. Comiti Antonio Flangino Patritio Veneto ditionem hanc in pignus tradidit, a quo ad Portianos, dein Auersbergicos Principes devolutam Græcensis Camera redemit. Beneficio Caroli VI. Cæsarlis eum obtinuere Marchiones de Prie qui il-

lum etiamnum possident. Comitatus centrum 17. Germanicis miliaribus Labaco dissitum occupat Mitterburgensis Urbs undique aperata, Arcemque amplam quidem, sed vetustam in celsa rupe suspetans, in cuius specum præterflens amnis præcipitat nunquam extiterus. Præcipuam S. Nicolai Ecclesiam anno 1266. erectam Præpositus gubernat, præter quam ad est & Minorum S. Francisci Cenobium sub Sixto IV., qui ab anno 1471. ad ejusdem seculi 84. summum Pontificatum geslit, excitatum.

Post primariam Pisinensis Comitatus Urbem memorari exigit Episcopali dignitate fulgens Petina, seu Pedena vulgo Germanis Biben, Carniolis Pitichem 16. miliaribus Labaco remota, atque in edito surgens monte, quem solum vini, oleique feracissimum circumdat. Episcopatum a Costantino Magno Imperatore anno 324. fundatum

(a) Descriptum testatur Valvasorius, (a) re-Carn. lib. fellitque Francisci Glaunichi opis. Sect. 3. nionem, qui eum antiquorem prætendit; cum tamen ante illud tempus, ne unum quidem hujus Ecclesiæ Antistitem ipsemet valeat assignare. Tota Dicecis binas Civitates cum undecim pagis continet, in quibus 14. Parœciæ, & viginti circiter animarum millia numerantur. Inter Episcopos S. Nicephorum celebriorem fecerunt mira prodigia a Manzolio descripta, quibus ante, & post mortem inclaruit.

Cæteræ Comitatus Urbes hæ sunt; Antignana in monte sita, fortique muro cincta, ad quam per unicam januam ingressus patet: magna hæc quidem est, sed magnitudini populus minime respondet: præter Parochiale SS. Simonis, & Judæ Templum terna alia recenset B. Dei Matri, Sanctisque Antonio, & Joanni Baptista consecrata Galligniana venusta Urbecula saxoso colli insistens, & uno milliari Mitterburgo distans. Berschezium parva quidem, sed populo referta Urbs in clivo mari imminente elevata, nobilique vino celebris, cuius Templum sacræ D. Aurelii M. exuviae condecorant. Laurana mari quoque adjacens, quæ una cum Berschezio genuinæ Istriæ ad-

scribenda non est, cum ab Arsia fluvio vero illius ad Orientem limite excludantur.

Bina etiam Ordinis S. Pauli primi Eremitæ Monasteria in hoc eodem Comitatu spectantur, quorum vetustius B. Mariæ Virgini sacram, fertili gaudet solo, cui amœnitatem addit propinquus Zepicensis lacus, flumenque Arsia inde exoriens: illius originem scrutatus Bautschnerus, ita in suis MSS. analibus expressam reliquit: Anno 1396 Cenobium S. Pauli primi Eremitæ in Istriâ ad lacum conditum, a duabus fratribus Nicolao, & Hermanno Guttenegker filiis quondam Phillipi Guttenegker nuncupati de Castello Wachsenstein, vulgo Kosliak in Istriâ, cui assignantur preventus, & bona, Ecclesiaque B. Virginis de Lepitsch nuncupata juxta lacum sub præfato Castro sita. Alterum SS. Apostolis Petro, & Paulo dicatum, vulgo S. Peter am Walde, fundaverat quidem jam anno 1255 sacræ, ut opinor, Benedictinorum Familiae Meinardus Goritiensis Comes; at ab iis, necio qua de causa, desertum Fredericus III. Imperator anno 1459., annuente Pio II. Papa Eremitis S. Pauli ad Lacum dono dedit, qui suorum Religiosorum Coloniam illuc submiserunt.

# TERRITORIUM FLUMINENSE.

**M**aritima ora, quæ ab Arsia fluvio versus Dalmatiam flexitur, ab antiquissimis scriptoribus Japidia inferebatur, ut diserte liquet ex allegato alias Plinii textu, in quo ait nonnullos in Flanaticum finum Japidiam a tergo Istriæ promovisse: ex his fuit Plinio vetustior Strabo (a) ita scribens. Tota Istriæ navigationis latitudo M., ac CCC. productur stadiis. Dehinc Cursus Japodicus stadi. M continetur - - - se undum Japodes in Liburnos est navigatio. Plinio autem posterior Ptolomæus

a) Lib. 7. (b) Istriæ Liburniam expresse jungens, Post Historiam, inquit, Italie sequitur ora Liburniae, aut Illiridis. Ergo ad Istriam usque extensa jam Ptolomæi tempore videtur Liburnia, seu Dalmatia, cui eam fuisse inclusam certiores nos facit Flavius Vegetius, qui anno 370. floruit, his verbis, Liburnia Dalmatiæ pars est Jadertinæ subjacens Civitati, cuius exemplo naves bellicæ fabricantur, & appellantur Liburnicæ.

In hac itaque regione antiquitus Japidia, postea Liburnia appellata jacet Flumen S. Viti vulgo Germanis S. Veit am pflaum, Italis Fiume, Dalmatis Reka, frequens Urbs, penes quam fluvius optimas alens trutas, mare Adriaticum subit, & navibus portum pandit. Promonam hic quidam collocant, quam ab Octaviano Augusto ex-

pugnatam Appianus memorat, cui sententiae favere quidem videtur cum hujus authoris descriptio de Dalmatarum a Cæsare deficientium Duce ita loquentis: Promonam Liburnorum Urbem denuo invadens, vallo, fossaque munierat, aliaque ex natura locorum munitissima occuparat. Nam regio omnis montuosa, collibus undique acutis pinarum in modum ereclis prominet: tum ea, quæ paulo post subjungit: Cæsar Urbem, duosque assistentes colles, qui ab hostibus tenebantur adhuc, per quadraginta stadia muro sepserunt. Vetustissimi enim muri rudera in proximo monte sparsa illud Augusti opus ibi extitisse fere persuadent. Verum facessit negotium omissa maris mentio, quod paucis passibus ab Urbe abest; unde minus proprie accipienda forent, quæ de collibus undique acutis, & muro, quo Promonam, collesque Cæsar sepserunt, Appianus enarrat. Illius etiam reliquus contextus procul hinc eam Civitatem removere non nullis visus est; inter quos Joannes Lucius apud Schönleben inter Titium & Tilurum amnes eandem reponit, ubi Promina mons antiquæ Promonæ nomen pene retinuit. Neque muri vestigia multum Fluminibus patrocinantur; nam creditu difficile est, tumultuari, prout in obsidionibus fieri solet, opere murum adeo solidum

b) Lib. 2.  
c. 17

dum excitari potuisse, qualem tunc fuisse rudera indicant, & superata tot seculorum intercapedo confirmat. Quinimo oculatus testis Valvasorius a maris littore plurima in longum milliaria prædicti muri rudera protendi asseverat; quare ad diuturnam potius Provinciarum divisionem, uti in Brittania quoque factum legimus, quam ad Civitatem aliquam brevi obsidionis tempore includendam eum exstricatum pronunciarem. Maxime autem a veritate declinat imperitum vulgus, quod vastissimam fingens Urbem, ab eo muro quondam fuisse vallatam inaniter jactat. Vetustum tamen Flumen esse non inficior, sed suos illud natales Tersaticæ Civibus acceptos referre suspicor. Stabat enim Tersatica celebris olim, notaque Ptolomæo Civitas in adnexo trans fluvium monte, in quo Arx, Pagusque idem fere nomen hactenus servat, nec a vero abludit, eos loci arduitatem pertæsus ad subjectum fluvium descendisse, ibique sensim domos excitaſſe, quo major situs commoditas, & facilius ad mare commercium alliciebat. Hinc non aliud Urbi nomen, quam Flumen, seu Dalmatice Reka. Sed ad certiora veniamus.

Antequam Austriae Archiducibus subderetur Civitas, Comitibus de Valsa parebat. Hodie tota muro clauditur, quem bina versus portum firmant propugnacula, to-

tidemque univerſim aperiunt portæ. Qua ad montes accedit, paucis altius ascendit Cæfarei Capitanei Aedes, quam Arcem vocant, solidioribus moenibus externe munita. Inter sacra ædificia recenseri posunt Ecclesia Collegiata, quam Archipresbyter cum septem Canonicis administrat, & venerandum D. Atarcilliani corpus illustrat; S. Hieronymi Templum cum Eremitarum S. Augustini Cœnobio a Comitibus de Valsa aliquot abhinc seculis fundato; Sanctimonialium ex Ordine D. Benedicti Monasterium a Francisco Chnesich anno 1662. erectum; & marmoreum S. Viti Urbis Patroni Templum cum Societatis JESU anno 1627. Flumen ingressæ Collegio, quod Comes Ursula a Thonhausin liberaliter dotavit, subiecta illi Castua Urbe forti muro turribusque cincta & uno milliari Flumine remota, cuius districtus, si Veprinizam, & Moschenizam Oppida junxeris, supra 8. Germanica milliaria teste Valvasorio in circuitu numerabit. In summa illius Templi ara pia totius Urbis veneratione colitur Christi e cruce pendentis effigies, in quam trecentis circiter abhinc annis in platea publice appensam, quidam cognomine Lonzarich ob adversam lufus fortunam excandescens, sacrilego ausu lapidem vibravit, sanguine miraculose ex vulnere emanante, quod superstites hodie-

que lapis, cruarisque guttæ testantur. Extra Fluminensem vero Urbem Capucinorum Cœnobium mari adjacet ad ejusdem territorium pertinens, quod angustis constrictum terminis a Terfatano monte dissecat memoratus fluvius a nonnullis Titius inepte vocatus; siquidem hic Dalmatiam a Liburnia discriminabat, quæ secus Adriaticum mare longius in Euronotum porrigebatur, cum Senia, Jadera, & Scardona Urbes a Ptolomæo Liburniæ inserantur.

Terfatanæ Arci, quæ ad Comites Frangepanes quondam spectabat, idem modo præest Capitaneus, qui Fluminensi: ejus viciniam maxime condecoravit Nazarethana Beatissimæ Virginis Domus, quæ Angelorum ministerio anno 1291. ex Palæstina huc advecta, & post triennium, anno scilicet illius seculi 94., ab iisdem sublata in Picenum Italæ Provinciam migravit. Ad perpetuam tamen hujus beneficii memoriam Comes Nicolaus de Frangepanibus Sacellum ibidem excitavit, cui Seraphici Ordinis Monasterium illius filius Martinus an. 1453. una cum ampliori Tem-

plo adjicit: sed hoc, cum anno 1644. vetustate satisceret, multo elegantius instauratum Petrus Marianus Seniensis, & Modruensis Episcopus solenni pompa consecravit. Multum Civitas hæc providæ Caroli VI. in subditos munificentiæ debet, ut enim commerciis maritimo situ opportunam, terrestri quoque & commodiore itinere redderet magis frequentatam, lapidibus viam sterni jussit flumine Caroloftadium completis vallisbus, sectis immani labore grandiorique ære montibus, ut merces & quæ uberi effundunt Hungariæ Croatiæque opes, illinc ad exteras transvehementur oras nec ad celebritatem urbis contulit minus Augusta Caroli VI. filia Maria Theresia: ejus enim auspiciis advocati undequaque negotiatores peregrinarum gentium artes & industrias, huc, positis fabricis, invexere inter quas potissimum eminet illa quæ Sacharaceam farinam nostros in usus excoquit, quæque de condimento hoc totis jam prospicit hæreditariis provinciis, atque ex in his gulæ nostræ illiciis nec exteri nec hostes ipsi nostri amplius ditescunt.

## TERITORIUM TERGESTINUM.

**T**Erustum olim Tergeste, vel Tergesta, vulgo Italis Trieste, Germanis Triest pervetusta

ad mare Adriaticum Urbs propriae finui nomen imponens, ab antiquis scriptoribus modo Carniæ,

modo Japidæ, vel Illirico, modo  
 (a) Lib. 5. Istriæ adjudicatur. Strabo (a) ait:  
*Poſt Timavum Iſtrorum uſque Polam lit-  
 tus eſt: In medio Tergeſte caſtellum eſt  
 ab Aquileia CLXXX. diſtans ſtadiis, &*  
 (b) Lib. 7. alibi (b) a Tergeſte Pago Carnico trans-  
 miffio eſt per Promontorium &c. Vicum  
 quoque, ſeu Pagum Artemidorus,  
 qui 61. ante Christum annis floruit  
 eam appellat; ſic enim de illo ſcri-  
 bit Stephanus Byzantius apud  
 Schönleben. *Tergeſta neutro genere,*  
*Oppidum Illyrii circa Aquileiam, Arte-  
 midorus vero in Epitoma undecim libro-  
 rum Tergeſtrum id vocat, vicumque ag-  
 noſcitur. At Dionyſius Periegeticus*  
 ab Octaviano Auguſto in Armeni-  
 am moturo ad deſcribendam eam  
 regionem præmiſſus Urbem nomi-  
 nat: *ubi trahitur, inquit, Adriaticum*  
*mare in ſolum finitimum Aquileienſe: ubi*  
*condita eſt Urbs Tergeſtræorum intimis*  
*in finibus maris. Romanis Aquilis*  
*primum ſe ſubjeciſſe videtur Tergeſtum ſub*  
*anno ante Virginis*

(c) Lib. 6. partum 128., quando Appiano (c)  
 ſeu in II- teste, Japides Sempronius Tudita-  
 lyrico  
 nus, & Tiberius Pandusius pugna-  
 ſuperarunt; licet tunc illos non  
 omnimode ſubjugaverint: id cla-  
 riſus expreſſit Plinius, dum inquit:  
*Tuditanus qui domuit Iſtrō in ſtatua ſua,*  
*ibi inſcripſit ab Aquileia ad Titium flu-  
 men ſtad. CC. Coloniam tamen eo*  
*deductam non arbitror ante annum*  
*Christi trigesimum, cum, ut hac-  
 tenus vidimus, ab antiquioribus*  
*authoribus Urbs, vel Vicus dun-  
 taxat nuncupetur; primus enim*

Tergeſtinæ Coloniæ meminit Pli-  
 nius, (d) a quo in Japidum regio-  
 ne hæc enuemerantur: *annis Tima-  
 vus, Caſtellum nobile vino Pucinum,*  
*Tergeſtinus ſinus, Tergeſte Colonia XXIII*  
*M. P. ab Aquileia, ultra, quam ſex mil-  
 lia paſſuum Formio annis ab Ravenna*  
*CLXXXIX. M. P. antiquus auctæ Ita-  
 lie terminus, nunc vero Iſtriæ. Unde*  
 fallitur Schönleben, (e) dum Co-  
 loniæ nomen Tergeſto primum ab  
 Carn. part  
 Appiano datum commemorat; is  
 enim author poſt Plinium vixit ad  
 annum ſcilicet 148., cum alicubi  
 afferat Romam 900. annis perdu-  
 raffe. Eodem quoque titulo hanc  
 Urbem honorat Ptolomæus (f) (f) Lib. 3.  
 Appiano coævus ita ſcribens: *Iſtriæ c. 1.*  
*ſimiliter poſt flexum intimum Adriatici*  
*ſinus Tergeſtum Colonia.*

Largo Martyrum fanguine ru-  
 buit Tergeſtinum ſolum, quamdiu  
 Ethnicorum Cæſarum jugo preme-  
 batur. Ex his glorioſi certaminis  
 famam ad noſtra uſque ſecula trans-  
 misere SS. Virgines Euphemia, &  
 Thecla forores Matre Epiphania  
 patre Demetrio nobiliflumis proge-  
 nitoribus natæ, quæ ab Alexandro,  
 cui nubere prima renuerat, Sex-  
 tilio Præſidi detectæ, poſt varia  
 tormenta anno 256. amiffum in ter-  
 ris caput, immortali in cœlis laurea  
 coronandum reperere. Has æmu-  
 latus eſt S. Servulus nobili pariter  
 genere ortus, qui duodecimum an-  
 num agens eremiticæ vitæ normam  
 in propinquuo Urbi antro ample-  
 xus, & anno 283. a Junilio Præ-  
 ſide

side in vincula conjectus, equuleo tortus, aliisque cruciatibus affectus, tandem jugulatus de Idolorum superstitione triumphavit. Annū 287. martyrii palma exornarunt S. Justina 14. annorum Virgo, & S. Zeno viro Justinæ miraculo ad Christum conversus, ambo a Fabritio Præside post tormentorum fævitiam capite plexæ. Biennio post passus est S. Justus Urbis patronus, a Monatio Judice morti addictus, & appenso ad colum plumbo in mare deturbatus, sed solutis vinculis decidit ad fundum pondus, & sacrum corpus sub occasum solis ad littus adnatans, Sebastianus Sacerdos, forsan Urbis Episcopus, a S. Martyre per noctem monitus terræ mandavit. Præcesserant hos omnes SS. Primus Presbyter, & Marcus ejus Diaconus sub Hadriano Imperatore Martyrii Palmam in hac Urbe consecuti, quorum sacras exuvias hodie Veronenses colunt. Hos paulo post comitati sunt an. 151. S. Lazarus Diaconus sub Pompejo Judice, & altero anno S. Apollinaris Diaconus sub Lucidio Præside fuso pro Christo sanguine æternum gloriosi.

Tantus hic Catholicæ religiosis amor primis Ecclesiæ seculis in Tergestinorum animis flagrans probabilem reddit Bucelini (a) opific. P. 1. nionem, qua primum hujus Civitatis Episcopum ab ipso D. Hermagora Aquileiensi Præfule initiatum refert, quamvis illius nomen

interciderit; continuam nihilominus Antistitum seriem a Taurino solum inchoat, quem Berengarius Rex fertur ad annum 911. multis muneribus ditasse. Post Taurinum quinquaginta, & amplius Episcopi Tergestinæ Diœcesi præfuere, inter quos eminet Æneas Sylvius ad summi Pontificatus apicem anno 1458. electus, & Pii II. nomine insignitus. Ab hoc jus præsentandi pro illa Ecclesia Episcopi Austriae Archiducibus collatum addit Bucelinus, cum antea ejusdem electio Canonicorum suffragiis committeretur. Maximis interim beneficiis Tergestinam Sedem a non nullis fertur prosecutus Lotharius Imperator Ludovici Pii filius; si quidem hic ipsam Tergestinam Urbem cum territorio ad tria millaria extenso Joanni illius Præfuli subjecit, jusque signandæ monetæ insuper concessit, dato anno 848. Papiae diplomate quo ea donatio confirmabatur. Unde originem quoque sumpsiſſe arbitror Tergestini Comitis titulum, quem Episcopi hodieque usurpant. Id autem uno seculo tardius ponit apud Schönleben Ughellus, ac Lothario Italiae Regi Hugonis Arelatenſis filio adscribit, annum 948. in eo diplomate exaratum afferens. Verum prioris sententiaæ patronis minus contentaneum videtur, Episcopum post sex menses Cæfareum hoc donum alienasse, cum constet, Joannem, ut illi numerant, II. Ter-

Tergestinum Præfulem, ad diffol-  
vendum æs alienum, tutandoque  
fines contra Hungarorum incurso-  
rem, qui vicina loca depopula-  
bantur, servato monetæ jure, Ur-  
bis dominium Civibus vendidisse,  
qui opportunos inter se partiti  
magistratus Rempublicam institue-  
runt. Sed cum hanc adversus Ve-  
netorum potentiam, a quibus sæ-  
pe opprimebantur, ægre tueren-  
tur, Austriacorum Archiducum  
patrocinium invocantes, iis se pro-  
tegendos, regendosque demum tra-  
diderunt.

Ex maris littore, ubi portus  
minoribus naviis aperitur, per  
acclivem montem, cuius verticem  
obtinet Arx admodum munita Cæ-  
farei Capitanei Sedes, ascendunt  
Urbis ædificia, quorum spectabi-  
liora de more subnectam. Præeat  
itaque Cathedralis Basilica, in qua  
duodecim Canonici divina pera-  
gunt, & cuius consecrationem ex-  
ponit membrana ab Antonio Ma-  
rentio Episcopo, dum ara maxi-  
ma instauraretur, anno 1653. re-  
perta, in qua ita legebatur: *Anno  
ab Incarnatione Domini millesimo ducen-  
tesimo sexagesimo quarto, Indictione VII.,  
die vero IV. mensis Novembris dedica-  
tum fuit altare hoc cum Ecclesia Deiparae  
Virgini sine macula conceptæ, a Ve-  
nerabili Patre Domino Arlongo Dei gra-  
tia Episcopo & Comite Tergestino cum  
quatuor aliis Episcopis, & fuerunt in eo  
reconditæ multæ & infinitæ reliquiae San-  
ctorum. Hodie autem cum sacra*

*Topograph. Austr. P. I.*

D. Justi lipsana istic colantur, D.  
Justi Templum apud populum au-  
dit. De hac Ecclesia loquens apud  
Irenæum de Cruce Ughellus, sic  
eam deprædicat. *Sunt in ea plurimæ  
imagines, texellis fabre compositis, ita  
expressæ, ut nihil pene Italia habeat pre-  
tiosius, si imagines, absolutius, si ar-  
tem species.* Templi hujus turris  
pervetusti arcus ruinis incumbit,  
quem Constantino Magno Impera-  
tori hac transeunti Cives erexere,  
estque etiamnum superstes inscrip-  
tio marmori incisa, quæ ita se ha-  
bet. *IMP. CÆS FL. CONSTAN-  
TINO MAXIMO P. T. AUG. R.  
P. TERG. D. N. P. F. Cœnobium,*  
Ecclesiaque Minorum Conventua-  
lium inter antiquissimas Seraphici  
Ordinis Sedes haberi potest, cum  
S. Antonius Patavinus an. 1231.  
ad Beatorum Sedem translatus eo-  
rum fundamenta posuisse dicatur.  
Ursino de Berthis in Episcopali  
Cathdra sedente, novæ Religio-  
forum coloniæ Tergestum appule-  
runt, anno nimirum 1618. sacra  
Capucinorum Familia, sequenti  
vero Societas JESU, cui Collegi-  
um dotavit Udalrici Principis Eg-  
genbergici munificentia, binis  
nunc Templis instructum, ex qui-  
bus majus Parthenio cultui devo-  
tum tam amplitudine sua, quam  
Architeconica symmetria illustre,  
non tantum Collegio, sed & Ur-  
bi toti est ornamento; alterum mi-  
nus D. Sylvestro quidem dicatum,  
sed cum a Civium sodalitate sub-

D d

Dei-

Deiparæ sine labe conceptæ patrocinio frequentetur, etiam inde nomen trahit Hujus vetustatem, & Cathedralis dignitatis decus ex sequenti inscriptione foribus praefixa colligi fas est: *SS. EUPHEMIÆ, ET THECLÆ NOBIL. VIRG. ET MM. TERGESTIN. DOMICILIUM, PRIMUM TEMPLUM ET CATHEDRALE, IMMACULATÆ VIRGINIS ORATORIUM RESTAURATUM M. DC. LXXII.* Adest præterea intra Urbem Sanctimonialium D. Benedicti legibus adstrictarum Monasterium, exterius vero Religiosorum S. Joannis Dei, seu Fratrum Misericordiæ Cœnobium.

Nulli Principum suorum tot tantaque debuit umquam Tergestum quam Augustissimæ hodie Imperanti Mariæ Theresiæ, quæ si favores suos in alias Provincias larga, hic illos prodiga manu cumulasse dicenda est & Tergesti fundatrix compellanda: situs ad mare Adriaticum, vicinarum regionum ubertas, eam movere ut per hanc opportune a natura constitutam januam, & superfluas suorum opes emittere & exterorum suscipere cum magno Austriæ lucro juxta & ornamento posset. Portum ergo quidquid meliorem commodioremque reddere posset, construi jussit, a Lazareto usque ad adsitam insulam, ducto per maris undas vallo propugnaculis instructo, & fluctuum vis fracta, & hostium amotæ insidiæ,

tantaque a ventis & vi hostili statio parata navibus est; portum ipsum ab exactorum publicanorumque severitate liberum esse jussit, mercesque mari advectas, teloniis immunes declaravit: iis tantum demptis quarum apud nos copia major quam ut aliunde allatis indigamus. Navigium ab eo tempore undequaque adventantium copia ingens, numerusque hominum deferta etiam patria tam benevole Principis beneficio vivere cupientium crevit; quibus ut de commoda prospiceretur habitatione, a parte Urbis occidentali, qua olim areolis exceptæ maris aquæ a solis radiis in salem excoquebantur, novum surrexit suburbium; magnificum illud si domuum spectes æquilitatem decorumque, amœnum simul si viarum consideres amplitudinem, Theresianopolis dicitur ab Augustissima Imperatrice sub cuius faventissimis exstructum est auspiciis; nec pulchritudo tantum ab hoc suburbio Tergesto accessit, sed & salubritas cui hactenus obfecerant stagnantes hic olim lacus halitusque pestiferi. Tum, ne ampliata Urbi deesset quidpiam, in dulcis aquæ inopia medelam attulit eadem Patriæ parens: hunc in finem duobus ab Urbe milliaribus fontes quæsiti collectique fuere & per canales in Urbem trajecti, his omnibus Principis optimæ beneficiis mirum quantum revixere commercia quibus moderandis negotiatorumque

que gubernando populo, institutum est Tribunal Regium quod geritur a viris nobilitate non minus quam scientia illustribus, atque ut iis qui mari tam infido se elemento committere cupiunt, nihil ad tam arduum vitae genus desit, instituta est in Societatis JESU Collegio Cathedra quam occupat Professor qui rei nauticæ præcepta explicet.

Ab Urbe secus Adriaticum littus ad Timavum fluvium profici-scenti, obviat Prossicum nobilissimo vino famosum, quod ex situ Pucinum videtur a Plinio (a) his verbis celebratum : *Julia Au-*

*gusta 82. Annos vite Pucino retulit acceptos, vino non alio usa. Gignitur in sinu Adriatici maris non procul a Timavo fonte saxeо colle, maritimo afflatu paucas coquente amphoras, nec aliud aptius medicamentis putatur. Hoc esse credidimus, quod Græci celebrantes miris laudibus Pyctanom appellaverunt ex Adriatico sinu. Demum Tergesto in septentrionem montosa protenditur regio, quam Karstiam vocant, ubi in loco, cui Lippiza nomen, Cæsareum spectatur equile selectissimis ex tota Europa equis ad propaginem ibi congregatis refertum.*

(a) Lib. 17.  
e. 6.

## TOPOGRAPHIA COMITATUS TYROLIS.

Tyrolensis Comitatus pluribus Ducatis tum amplitudine, tum opibus par, pluribus etiam superior, a Teriolis, hodie Tyrol, tenui ad Athesim Castro nomen mutuans, partim Rhæticis, partim Noricis veterum alpibus incumbit, per quæ non in Germaniam tantum, sed & in Italianam propagatur. A Septentrione habet Bavariam, ab Oriente Salisburgensem Dioccësim, & Carinthiam, a Meridie ditionem Venetam, & ab Occidente hodiernos Rhætos, seu Grifones & Sueviæ partem.

Tota regio altissimis montibus includitur, permultis fluviis fontibusque limpidissimis irrigua: ejus longitudo a Sueviæ finibus ad Venetos XL. milliaria Germanica æquat: latitudo a Grisonibus ad Carinthiæ fines XXX. comprehen-dit: vallibus abundat fertilitate so-li amoenissimis, populoque frequen-tibus. Præaltis licet leptæ montibus, perviae tamen & apricæ sunt lenique ipæ fastigio in theatri speciem condescendunt oculos perpen-nemorum pinis confitorum virore, atque ipsa situs diversitate mirifi-ce

ce recreant: præcipuae memorari dignæ sunt a Septentrione Oenana *Innthal* Salinis metallorumque Venis celebratissima, Urbe etiam totius Provinciae Principe gaudet: *Licathia Lechtal* a Lico qui in ea oritur nomen mutuatur; *Celerina*, *Cillerstal* a celere dicta fluvio, majorem partem Salisburgenfi Archiepiscopo paret; *Vipitina Wipthal* a Vipitno Antonini nomen accepit; ad Pyrenæi ( montis in Tyroli ) radices sita valles ad Hisareum fl. vulgo *das viertel am eisach nuncupata*, ubi Brixinum Episcopi sedes est: vallis *Puistrissa Pusterthal*, & aliis *Pusteria* quæ Dravo & Byrro fontes præbet, solis ortum *Venusta* vero quam Athesis permeat occasum respicit, a Vennonibus vel potius Venostibus populis Alpinis dicta. Versus meridiem vergunt vallis *Athesina*. Vallis Tridentina, cuius Urbs præcipua Tridentum: Vallis *Flemmarum*, in Fleims, Val di Fieme, quam Avisius fl. medium secat: Vallis *Aufugi*, nomen debet Aufugo Antonini a quibusdam *Euganea* vocata, val Sugana, agro Vicentino & Feltrensi contermina: vallis *Anaunia*, melius Anaunia a Naunibus populis, Val d'Anone auf dem Nons, vicis & nobilium castris refertissima: huic contigua est Vallis solis, V. di sole, auf dem Sulz. Camulis seu Camunis Venetis finitima. Non procul judicariarum vallis, cui adhærent Comitatus Lodroniensis ad lacum Idrinum

in finibus Brixianis, & ex altera parte Comitatus Arcensis qui ad lacum Benacum usque pertingit. Denique vallis *Lagarina* ad Athefim in ipso agri Veronensis limine, Roboretana Civitate nobilis. Convalles seu minores plurimæ valles numerantur aliæ, quas inter *Tuxiana Tux* & *Piciana Pfetsch*, quarum incolæ corporum magnitudine ac robore cæteros præstant: *Gardenensem* vero & *Enebergam*, olim vallem inianam qui habitant, idiomate utuntur proprio & singulari quod ex latino celticoque conflatum esse videtur. Fluviorum in Tyroli præcipui sunt: *Oenus* qui ad Patavium seu Passavium Danubio se submittit, *Athesis* rapidas & spumantes undas ex montium angustiis Italiæ immittit, ac ad mare Adriaticum properat; *Dravus Carnos*, *Licus Augustam* Vindelicorum, *Isara* Bavariam, *Medoacus minor*, seu *Brenta* Patavium petit: *Sarca* lacum Benacum, *Clesius* Idrinum transit: mutato inde nomine exit, mantuamque aluit *Mincius* ab accolis dictus: in Tyrolis finibus oriuntur *Julia*, *Gail*, *Plavis*, *Piave* Italij: *Asticus*, astego: *Olius*, *oglio*; *Illus ill*; *Ambra* & *Juvavus* Salza. *Hisareus*, Eifach ad Brixinum; *Byrro Rienz* & ad Bozanum, *Talvernae*, *Talfer* se junxit. e cæteris amnibus *Oenus*, *vacam* *Rosanam* *Pigrum*, *Ezium*, *Melam*, *Sillam*, *Celerem*, & *Vultepium*, ad aquilonem defluentes excipit atque in supe-

superiori Engadina natus, a Ponte alto ad fauces usque Kufsteinianas, totam vallis Annanæ longitudinem decurrens, aquarum vectigal perpetuum, irrigata Bavaria Danubio refert. Athesis Ramum, Puna-  
num Saltumnus Snallesium, Passarum, Fulzavam, Hisareum seu Atagim, No-  
sum, Avisum, Fersinam & Lemnum secum rapit deportandis in Italianam mercibus valde oportunus, longo enim primum flexu Tyrolis longitudinem proprius sequens, per Venonum Vallem nunc venustam usque ad arcem dictam Sigismundi coronam, vulgo Sigmundcron, dein verso in austrum cursu, Tridentum excurrit inde Lagarinam vallem Roboretum praeterfluit, & relictis paulo post Tyrolis finibus per Venetos in Adriæ sinum effunditur.

Inter montes eminet Arula: arlberg montis Adulæ priscis notissimi pars, hinc etiam Adlberg: Ferreus Feren: Mons Venusticus, Funster muns, ad Oenum; Pyrenæus Brenner & Juvo aufen, commenantum frequentia nobiles: Pyrenæus quoque apud veteres celebratus; montes *glaciales* Verner dicti, immenso producuntur tractu ac perpetua rigent glacie: contra alii pratis & pascuis lætissimi, & ad ipsum prope verticem mira incolarum exculti industria, ædibus etiam tuguriisque frequentes. Ex ipsis tamen iis frigore constrictis

montibus, qua in planitum desinunt, plurima hæc, queis Tyrolim irrigari diximus flumina oriuntur. Si *Pufrissam* accipias olim vallem Noricam dictam, Carinthiæ conterminam & extremam Vollis Oenanæ inferioris partem, totam Tyrolim sub Rhætia contineri, luce meridiana clarius patebit, si veterum scriptorum eas Provincias definientium testimonia in medium attulero. Strabo (a) à (a) Lib. 4.

Guarino latine redditus ita Rhætiā describit, vinumque dilaudat: *Universa deinceps montana pars in Orientem, & in Austrum vergens, à Rhætis, Vindelicisque tenetur, Bojis, Helvetiisque confinibus, nam eorum campis imminent, cæterum Rhæti ad Italianum usque pertinent, quæ supra Comum, & Veronam est. Viuum Rhaeticum inter Italica egregie commendata non sane inferius in Montanis illorum radicibus nascitur.*

Veronam, Comumque omnes noscimus, & alpes, quæ super eas Urbes præfertim Veronam attolluntur, à Tyrolensisbus insideri, neminem latet; Rhætos vero fuisse Noricis conterminos, idem alibi (b) Cluverio interprete non (b) Lib. 7. obscure indicat. Rhæti, inquit, & Norici ad alpium usque summa ad surgunt, versusque Italianam vergunt: illi Insubribus, hi Carnis contermini. Sed audiamus Plinium id apertissime docentem, dum ait: (c) *Fuxta Carnos (c) Lib. 3. quondam Taurisci appellati, nunc Norici. c. 3.* His contermini Rhæti, & Vindelici, om-

(a) Lib. 2. demum prodeat Ptolomæus , (a)  
 12. singulos Rhætiæ fines his verbis  
 circumscribens: Rhætiæ occidentale la-  
 tus terminatur monte Adula , & linea,  
 quæ est inter capita omnium Rheni , &  
 Danubii. Latus Septentrionale termina-  
 tur parte Danubii , quæ est à fontibus us-  
 que ad Aenæ fluvii scissionem. Orientale  
 latus ipso Aeno terminatur , cuius Austra-  
 lior fuis est long. 34 , lat. 45.  $\frac{1}{4}$ . Me-  
 ridionale alpium montibus supra Italiam  
 extensis. & postea: Noricum terminos  
 habet ab occasu Aenum fluvium. Ubi  
 tamen integer Oenus accipi non  
 videtur , ab ostio nimirum , usque  
 ad fontes ; alias maxima Tyrolis  
 pars , & quidem quæ supra Veronam  
 ascendit , Norico contra Stra-  
 bonem infereretur. Neque id Pto-  
 lamæum voluisse apparet , cum  
 non fluvii originem , sed alium  
 Australem finem additis gradibus  
 designet , ex quibus tamen utpote  
 erroneis is colligi nequit: explora-  
 ratum quippe est , majorem geo-  
 graphicam latitudinem ipsis Oeni  
 fontibus deberi. Rhætos Tusco-  
 rum propaginem esse consentiunt  
 quidem Livius , Plinius , & Justinus ,  
 sed non eadem omnibus de  
 transmigrationis modo , aut tem-  
 pore sententia: Justinus (b) à Gal-  
 lis , qui Roma potiti Capitolium  
 obsederunt , Tuscos pulsos se ad  
 alpes contulisse scriptum reliquit ;  
 cum igitur Roma a Gallis succen-  
 sa anno ante Christi ortum 390.  
 conflagraverit , efficeretur , Rhæ-

(b) Lib.  
 20. c. 5.

torum gentem ea ætate non multo  
 esse antiquorem. Plinius (c) quo-  
 que Gallorum Tuscos expellentium  
 meminit; attamen haud patet , num  
 posteriores hos intelligat , an prior-  
 res alios , qui Italianam ducentis an-  
 nis prius , Tarquinio Prisco reg-  
 nante , invaserunt ; unde totidem  
 etiam annis Rhætorum vetustati  
 adjicerentur. Verum Livius (d) Lib. 5.  
 adhuc altiores hujus populi radi-  
 ces ostendit ; Tuscos enim nulla  
 vi coactos , florente eorum impe-  
 rio Rhætis originem dedisse his  
 verbis declarat : Tuscorum ante Ro-  
 manum Imperium late terra , marique  
 opes patuere , mari supero , inferoque ,  
 quibus Italia insula modo cingitur , quan-  
 tum patuerint , nomina sunt argumento :  
 quod alterum Tuscum communi vocabulo  
 gentis , alterum Adriaticum ab Adria  
 Tuscorum Colonia vocavere Italicae gen-  
 tes: ii in utrumque mare vergentes -----  
 quæ post Padum omnia loca excepto Vene-  
 torum angulo usque ad alpes tenere.  
 Alpinis quoque ea gentibus haud dubie  
 origo est , maxime Rhætis , quos loca ipsa  
 efferarunt , ne quid ex antiquo præter so-  
 num linguae , nec eum incorruptum reti-  
 nerent. Nec minus certa apud ve-  
 teres nominis , quam gentis origo ,  
 omnemque operam fane perdunt  
 ii recentiores , qui eam a Reno  
 fluvio , vel a cimbrica voce Rhei-  
 ten , nescio , quas rimas aquarum  
 vi excavatas significante , aut a  
 Rhæteio Troadis Urbe imperite  
 derivant; siquidem in promptu est  
 Plinius præcitatus , qui Tuscos  
 testa.

(c) Lib. 3.  
 c. 20.

(d) Lib. 5.

Duce Rhæto alpes superasse diserte testatur; quod etiam clarissime ita scriptum reliquit præcitus Justinus. Tuscī quoque Duce Rhæto, avitis sedibus amissis, alpes occupavere, & ex nomine Duci gentes Rhætorum condiderunt.

Immanem Rhætorum feritatem, qua Gallos, Italosque infestabant, ea produnt, quæ Dio Cassius, & Strabo suos in Commentarios retulere: eos scilicet, Pago aut Urbe obtenta non modo puberes omnes jugulasse, at ne infantibus quidem masculis pepercisse; imo ne hic quidem substitit sævities, sed gravidas etiam mulieres confodiebant, quas virilem foetum utero ferre a suis vatibus didicerant. Eapropter Octavianus Augustus principio Drusum contra illos cum exercitu misit, qui Rhætos apud alpes Tridentinas sibi obviam factos haud magno certamine fudit, ejusque victoriae ergo Prætorios honores adeptus est. Deinde cum ab Italia rejecti Rhæti nihilominus Galliam urgerent, Tiburium quoque in eisdem movere jussit. Quare Drusus, ac Tiburius simul, multis locis in Rhætiam Legatorum opera irrumpentes, eaque de causa exterritos hostes aggressi, facili negotio dispersas eorum copias prostrarunt, reliquosque exinde inferiores, & animis collapsos in suam potestatem redegerunt. Binas de hac victoria odas cecinuit Horatius, in quibus est illud ad fortitudinis com-

mendationem insigne, quod Rhætos draconibus Romanæ aquilæ reluctantibus comparet, alias mox versus addens, non modo Romanorum, sed & Rhætorum gentem illustrantes.

(a) Videre Rhæti bella sub alpi-  
bus (a) Lib. 4.  
Od. 4.

Drusum gerentem, & Vindelici,  
quibus

Mos unde deductus per omne  
Tempus Amazonia securi

Dextras obarmet, quærere di-  
stuli:

Nec scire fas est omnia. Sed diu  
Lateque viætrices catervæ  
Consiliis juvenis revictæ.

Sensere, &c.

Alibi (b) vero nunc: Devota morti (b) Lib. 4.  
pectora liberæ, nunc agmina ferrata  
Rhætos vocitans palam fecit, quam  
late excelluerit Martia eorum vir-  
tus, cum vel ab hostibus præco-  
nia extorqueret. Ovidius certe  
abjectæ alias adulatioñis poëta,  
Augusti pavorem ex Rhætico bello  
conceptum haudquaquam dissimu-  
lans ait,

(c) Rhætica nunc præbent, Thra- (c) Trist.  
ciaque arma metum. Lib. 2.

Hoc quidem Rhætis laudi fuit, illud  
autem vituperio, ad quod alpinos  
hosce populos a nimio liberatis,  
patriæque amore adactos retulit

Florus. (d) Que fuerit, inquit, (d) Lib. 4.  
callidarum gentium feritas, facile vel mu-

hieres ostendere, quæ deficiens telis,  
infantes ipsos afflictos humo, in ora mi-  
litum adversa misere. Debellata de-  
mum

rum Rhætia est anno ante Christi ortum 15, & in Provinciæ formam a Romanis redacta; in hunc enim modum scripsit de Augusto Paterculus, *Rhætiam autem, & Vindelicos ac Noricos, Pannioniamque, & Scordicatos, novas Imperio nostro subjecit Provincias.*

Communem Tyrolis cum reliquis imperii Romani in Europa partibus fortem habuit, barbarorum facta Dominii, namque sæculo exeunte Quinto, Amalo Gothorum in Italia regi tota Rhætia quæ & Tyrolim comprehensam diximus paruit; cum Gothorum in Italia sub Justiniano declinassent res, Bojoarii Francorum auspiciis quæ pars Ræthiæ sibi vicinior erat, invaserunt, reliquam autem Italiæ proximiorem occuparunt Longobardi qui e Pannonia illyricoque, a Narfete evocati Italiam invaserant. Ab ea tempestate qua in septentrionem vergit Tyrolis, iisque cum Bavaria paruit Principibus; ast meridionalis pars illius quæ proprie Tyrolensem complectebatur Comitatum penes Longobardos fuit: cumque hi Alboino interfecto in varios minores Principes divisi essent & proprium suum comitem nancisci cœpit continuo, ut inter finitos fit, vel bello, vel pace infida; atque adeo limites illius modo Longobardis modo Bavaris paruisse invenimus. Quare minus recte sentire videntur ii qui Tyrolim a præfectis qui Bavariæ

Ducibus obnoxii erant, gubernatam fuisse afferunt, nullum enim in Tyroli horum vestigium: Comites quidem Andecenses aliique ex Bojoaria primates in septentrionali Tyrolis parte possiderunt bona, ast hæreditario illa, non fiduciario tenebant jure: nec minus errant qui Berchtoldo Istriæ Marchionis filio, primum tribuunt locum inter eos, qui Ducus nomine Tyrolensem Principatum tenuere: nam ex diplomatibus constat, dum antea propriis suis Dominis Comitatum hunc paruisse, iisque pluribus: tota enim regio, præter agrum Tridentinum, & Brixensem, qui suis Episcopis subjecti erant, illo ævo in plures describatur Comitatus: diversisque dynastis suberat: in Valle Oenana præter *Andecenses*, *Merania* Duces Wolfratshusani, quoque Hertenbergici, & Eschenlochii, Comites e Bojoaria obtinebant Imperium: in Tridentina Diœcesi Comites Tyrolis, de Epiano, de Ultimis, de Flaono; Dynastæ Arcenses, Castrobarcenses, aliique reguli suas tenebant terras. Episcopis Curiensibus sua etiam jura erant in Valle Venusta, uti & *Advocatis de Amacia*; in Pustrissam Comites Goritienses dominabantur: potentes quoque in finibus his erant dynastæ de Tuvers.

Defuncto absque prole mascula, Ottone II. Ducum Meranensium ultimo, anno 1248. Albertus Tyrolen-

lensis arcis Comes, Vallis Oenanæ Inferioris Hæreditatem adiit, aliaque hinc inde dispersa illius bona accepit seu jure uxorio quod, ut aliqui inquietunt, Guta illius conjux e Meranensium stirpe fuerit; seu quod in hæc bona, Ecclesiæ Brinxenensis feudali jure subdita, vivo adhuc Ottone simultaneæ collationis & advocatiæ titulo, jus ab Episcopo accepisset, potentior hinc redditus Tyrolensis Comitatus nomine, neglectis priorum titulis regionem totam complexus est.

Elapso sexennio & ipse fato concessit, postquam duas tantum genuisset filias, nempe Adelheidam quam quidam volunt Henrico primum Romanorum Regi nuptam; id certum eam hoc tempore Meinhardi II. Goritiensis Comitis uxorem: & Elisabetham Gebhardi Hirsbergensis Comitis confortem; unde disciffo inter earum maritos Comitatu, Gebhardo Oenana Vallis, Meinhardo autem reliqua cum Tyrolensis Comitis titulo Provincia obvenit: cuius post quatuor inde annos defuncti filii Meinhardus & Albertus diu quidem utriusque Comitatus, Tyrolensis scilicet, & Goritiensis proventibus indiscriminatim fruebantur: verum anno 272. instituta divisione Albertus Goriam, Meinhardus Tyrolim occupavit. Hic autem decennio post Carinthiæ Ducatu, & opibus auctus, Oenana Valle quatuor argenti marcharum millibus redem-

*Topograph. Aust. P. I.*

pta, discissam antea Tyrolensem ditionem anno 1284. ruris conjunxit. Meinhardi demum ex Henrico filio neptis Margaretha Maultaschia amissio filio unico Meinhardo, quem ex Ludovico Bavaro Brandenburgi Marchione suscepserat, anno 1363. diploma confecit a Gerardo de Roo contra eos, qui Margarethem Rudolpho Austriaco nupfisse, & ea ratione Tyrolim ad Austriacos devenisse putant, allegatum, in quo ad Rudolphum, Albertum & Leopoldum Austriaeos fratres, tanquam proximos aliunde hæredes, utpote consobrinos, cunctas suas Provincias transstulit per donationem inter vivos factam, & a Carolo IV. Cæsare confirmatam. Hinc Tyrolensis Comitatus immortali Austriae Archiducum præsapiæ jugiter subjectus proprios ex ea Principes sæpius obtinuit, quorum præsentia bearuntur. Verum post Sigismundi Francisci Oenipontani Archiducis sine prole mortui fatum, quod anno 1665. 7. cal. Junii contigerat, beatorem eum reddidit Augustissimus Cæsar Leopoldus. Atque ab eo tempore sub placido Cælarum Austriaeorum jure fuere, & hodie Augustissimæ Imperiis parent: soli quos & naturæ situs & sua fides tutos contra eos qui hocce sæculo impetrivere Austriae hostes præstitit, quique proin a militum stationibus & præfidiis fuere immunes. Bavarico bello Provinciæ ordines

E e

anno

anno 1745. ut in commune aliorum pro Austria sua pugnantium civium meritum venirent, suo ære legionem conscripsere quæ & patriæ, unde etiam nomen accepit, perpetuo sit præsidio, & aliarum more, si res ita tulerit, castra etiam extra Provinciam sequatur.

Supereft adhuc ut quod strictim superioris attigimus, hic persequamur fusius: de metalli fodinis Tyrolenis differentes: ditissimæ ac inter Germaniæ præcipuas illæ quondam fuere; hac autem ætate nostra, metalla non nisi parce admodum reddunt: plura tamen hominum millia in eis eruendis defudant quotidie, solo hoc Provinciæ & Principis lucro, eoque ingenti quod tot civibus hoc occupatis labore, vitæ ex eo proventus veniat: celebratissimæ sunt *Suacenses* ubi & supremus rei metallicæ per Tyrolim & anteriorem Austriae Magistratus Sedem habet. Argentum cupro mixtum dignunt: uti & Hoedicollenses, Clusienses & Ratenbergicæ: plumbo abundant Temstenes; plumbum argento mixtum continent Sterzinganæ: Arinenses, æris & chalybis feraces sunt: ferri Primerienes, ad Volsanam, in valle solis, Pergini, ad Pillersee & aliæ plures. Nitrum Pergini, lapis calaminaris Nazareti effuditur: neque aurum deest in valle Celerina; proventus tamen dividuntur cum Salisburgensum Archiepiscopo. Plures olim metallo-

rum fodinæ per Tyrolim fossoribus frequentes ab iisdem sensim fuere desertæ: seu quod defecerint venæ, seu quod laborem fructus non æquaverint: putei tamen cuniculi que hodiedum adhuc visuntur: ceterum æs Tyrolense omnium habetur tota præstantissimum Germania, cum & ductile sit, & facili labore malleis domari possit: ex eo, postquam lapide calaminari temperatum est, auricalchum conficitur, cuius fornaces in Achenrain, vallis Oenanæ & prope Loncium in valle Pustrissæ visuntur, cum officinis aliis ubi auricalchum varios in usus aptatur. His scatet divitiis regio montibus aspera: commercium tamen, quo Tyrolis ob mutuam Italicarum Germanicarumque mercium transvectionem, olim longe erat Florentissima, maximo nunc incolarum damno languet: Portu Tergestino ob viarum compendium omne fere commodum lucrumque ad se trahente. In Italiae confinio incolarum industria se in Bombycum cura & sericis colligendis exercet: in sola civitate Roboretana plures visuntur officinæ ducendis filis Siricis aptatae: filatoria ex eo vocantur, tam rotarum hydraulicarum certis legibus perpetuo se moventium mole, quam ingenio nobiles. Ligna larices præfertim, ac pini maxima copia ad Venetos, qui illa malis navibusque construendis destinant, aqua ut plurimum evehuntur. Assumptus nunc

nunc rerum ordo postulat ut exordio a metropoli ducto celebriora Tyrolis loca singillatim persequamur.

## OENIPONTUM.

**O**enipontum, seu Oenipons vulgo Inspruck elegans, nobilisque Urbs longo plurium dierum itinere ab Austriæ Metropoli dislita secus Oenum fluvium, qui eam ab ampio Suburbio disjungit, explicatur. Meminit quidem etiam in suo Itinerario Antoninus cujusdam Pontis Oeni, quem Bedajo, & Iisiniscæ interjicit, sed eum locum cum hac Civitate minime confundendum esse, demonstrat illius situs Juvaviæ, seu Salisburgo multo, quam Oenipontum, propinquior. Non magni nominis Oppidum hoc olim erat Wildenensi Cœnobio subjectum, quod Otto I. Meraniæ Dux promisso pretio a Meinhardo II. Tyrolensi Comite primum persoluto ad se attractum muro vallavit, & consuetis Civitatum privilegiis donatum ad altiorem ordinem evexit, prout sequentes versus in vetusta inscriptione exarati fidem faciunt.

Otto Meraniæ Princeps, cognomine Magnus  
Inspruck circumdat muris, & mœnia fundat,  
Tricesimo quarto post annos mille ducentos.

Magnis augmentis ampliabatur in-

dies Oenipontum, sed anno 1292. cum Albertus Austriæ Archidux, postea Imperator, illuc profectus cum Meinhardo locero suo confilia conferret de Styriæ Ducatu adversus Ottонem Bavaram, & Salisburgensem Præfulem propagando; exortus de nocte dolo, aut casu ignis crescentem Civitatem non parum moratus est. Revixit tamen suis e cineribus illustrior, ita, ut Provinciae totius primatum promerita, Austriacos Principes, quibus ante, vel post Maximilianum I. Cæsarem speciali jure Tyrolis obtigerat, ad figendam inibi Aulam, sua elegantia, locique amoenitate permoverit. Hinc plures admirata est nuptiarum pompas, quæ magnificentia tantis Principibus digna ibidem celebrabantur. Hujusmodi fuere anno 1494. inter prædictum Maximilianum, & Blancam Mariam Galeatii Mariae Sfortiæ Mediolanensis Ducis filiam; anno 1622 inter Ferdinandum II Imperatorem, & Eleonoram Mantuanam; anno ejusdem seculi 26. inter Archiducem Leopoldum, & Claudiam de Medicis Magni Florentiæ Ducis filiam, & tandem anno 46. inter Archiducem Ferdinandum Carolum, & Annam ejusdem Medicæ stirpis Principem. Hodie vero, et si præsenti suorum Principum aspectu huic Civitati frui minime licet, dignitatis tamen suæ jacturam fecisse dicenda non est, cum in ea etiamnum

resideant suprema Superioris Austriae, ut vocant, Tribunalia, quæ Cæsar's vices supplent, & Provincias moderantur.

Celebriora Urbis ædificia obituri occurrit primo insignis Aula, cui propinquum assurgit memorabile PP. Franciscanorum Templum ab Imperatore Ferdinando I. e quadrato lapide magnis impensis constructum, & S. Crucis honoribus dicatum, ubi anno 1655. Christina Sueciæ Regina abjurata publice hæresi, Orthodoxam, Romanamque fidem professa est. Hic præter splendidum Ferdinandi Archiducis sarcophagum in meditullio eminet Maximiliani I. Cæsar's monumentum tam materiæ pretio, quam operis elegantia eximium, vereque augustum. Ex pretioso marmore tota constat moles, uti & 24. scuta circa inferiorem ejus ambitum disposita, quibus excellenti scalpro incisa gloria tanti Imperatoris gesta intuentium oculos recreant, & erudiunt. Mirum his decus addunt per intercolumnia distributa 28. æneæ statuæ humana statura majores, habitumque, & armaturam juxta cujusvis seculi morem raro artificio ad vivum representantes, quarum syllabum, seu heroum ab iis expressorum nomina una cum anno, quo quisque decepit, ex Lambecio huc placuit, prout sequuntur, transferre. Clo-doveus I. Francorum Rex 510.;

Theodoricus Veronensis Ostrogothorum in Italia Rex 526.; Arthus Britanniæ Rex 542.; Theodebertus Austrasiæ Rex 613.; Godfredus Bullionius Lotharingiæ Dux, & Terræ Sanctæ Rex 1100.; Rudolphus I. ex Comite Habsburgico Imperator 1291.; Albertus I. Rudolphi I. filius ex Austriae Archiduce Imperator 1308.; Albertus Sapiens Alberti I. Cæsar's filius Archidux Austriae 1358.; Margaretha cognomine Maultaschia Henrici Ducis Carinthiæ, & Comitis Tyrolensis filia 1366.; Leopoldus Probus Archidux Austriae 1386.; Ernestus Ferreus Leopoldi Probi filius Archidux Austriae 1424. Cimburga Ernesti Ferrei conjux 1429.; Fridericus Leopoldi Probi filius Archidux Austriae 1439.; Albertus II. ex Archiduce Austriae Hungariæ, & Bohemiæ Rex, ac tandem Imperator 1439.; Elisabetha Sigismundi Cæsar's filia Regnum Hungariæ, & Bohemiæ unica hæres, atque Alberti II. uxor 1443.; Philippus Bonus Joannis Valesii Regis Franciæ Pronepos, Burgundiæ Dux, & Equestris aurei velleris Ordinis primus fundator 1467.; Carolus Pugnax Philippi Boni filius Burgundiæ Dux 1477.; Maria Caroli Pugnacis filia Ducatus Burgundiæ, & septendecim Belgicarum Provinciarum unica hæres Maximiliani I. Archiducis Austriae, postea Imperatoris conjux 1482.; Fridericus III. Ernesti Ferrei filius

Iius ex Archiduce Austriae Imperator 1496. Sigismundus Opulentus Archidux Austriae 1496. ; Philip-  
pus Maximiliani I. filius Archidux Austriae , Belgii Princeps , atque per uxorem Joannam primus ex Austriae vocatus Hispaniae Rex 1506. ; Blanca Maria Duci Mediolanensis filia , & secunda Maximiliani I. conjux 1511. ; Ferdinandus Catholicus Hispaniarum , Neapolis , & Siciliæ Rex 1516. ; Cunegundis Friderici III. Imperatoris filia , & Alberti IV. Bavariae Ducis conjux 1520. ; Margarita Maximiliani I. Cæsaris filia , Caroli VIII. Franciae Regis sponsa , dein Joanni Hispaniae Infanti primo nupta , secundo vero Philiberto Sabauidæ Duci , tandem Belgii Gubernatrix 1550. ; Joanna Ferdinandi Catholici Hispaniarum Regis filia , & Philippi Austriae Belgarum Principis uxor 1555. ; Carolus V. Philippi filius gloriofissimus Imperator 1558. ; Ferdinandus I. Cæsar Caroli V. frater 1564. De quibusdam tamen , ac præfertim de postremis duabus statuis valde ambiguum est , an eæ prout circumferuntur , memoratos Principes exhibeant , cum ex subscriptionibus aut nunquam affixis , aut longo abhinc tempore obliteratis id nequeat sicut in cæteris comprobari. Ipsius autem Cæsaris Maximiliani I. colossus ex ære pariter conflatus supremo monumenti apici in-  
cumbit , ubi Cæsareo nitens paluda-

mento genua flectit summam Tem-  
pli aram respiciens. Tanti operis authorem profert epitaphium his verbis contextum.

IMPERATORI CÆSARI MA-  
XIMILIANO PIO, FELICI, AU-  
GUSTO PRINCIPI TUM PACIS,  
TUM BELLI ARTIBUS OMNI-  
UM SUÆ ÆTATIS REGUM  
LONGE CLARISSIMO: SUB CU-  
JUS FELICI IMPERIO INCLY-  
TA GERMANIA, DULCISSIMA  
ILLIUS PATRIA, TAM ARMIS,  
QUAM LITTERARUM STUDIIS,  
PLUSQUAM ANTEHAC FLORE-  
RE, CAPUTQUE SUPER ALIAS  
NATIONES EXTOLLERE COE-  
PIT: CUJUS INSIGNIA FAC-  
TA TABELLIS INFERIORIBUS,  
QUAMVIS SUB COMPENDIO  
EXPRESSA CONSPICIUNTUR:  
IMPERATOR, CÆSAR FERDI-  
NANDUS, PIUS, FELIX, AU-  
GUSTUS, AVO PATERNO PER-  
QUAM COLENDΟ, AC BENE-  
MERITO, PIETATIS, ATQUE  
GRATITUDINIS ERGO POSUIT.  
NATUS EST XXII MARTII AN-  
NO DOMINI MCCCCLIX. ; OBIIT  
ANNO DOMINI MDXIX XII  
MENSIS JANUARII.

Antequam ab immortali ejusdem Cæsaris memoria digrediamur , contemplandus est famosissimus ille S. Martini paries vulgo die Martinswand in sinistra Oeni ripa tri-  
um circiter horarum itinere Oeni-

pontum a natura erectus , \* altissima quippe , & admiranda rupes eo nomine indicatur inter abruptissimos alios , & in Cœlum elatos scopulos prope quandam D. Martini Ecclesiam , & Cirellum Pagum sita , perquam Maximilianus in primo juventæ flore nimio venandi studio abreptus , usque adeo rupicapras insectatus est ut nec ulterioris progredi , nec referre pedem potuerit nisi in præcipitum . Stabant conferti inferius Aulici Principem suum non sine lacrymis suspectantes ; namque consilii prorsus inopes , qua ratione ei opitulari possent , minime cernebant , cum a tergo , & lateribus indomabiles petræ omnem viarum accessum occluderent , desuper vero nivosa cacumina , & saxorum ingentes minæ capiti impenderent . Jamque altera labebatur dies , cum pius Princeps desperata in terris salute , cœpit ad coelestem curas omnes convertere ; magna proinde voce ad suos inclamat , jubetque Venerabile Dominici Corporis Sacramentum adferri , & quam proxime fieri posset , sibi ostendi , ut eo eminus adorato , animum saltem suum ad tam diram mortem fortiter ferendam hoc religionis actu roboret , quando eodem propius refici non daretur . Satisfactum quanticus ardenti in Sacrosanctam

Eucharistiam affectui , quo Maximilianus ab avita pietate nihil recedens æstuabat , atque interim circumlatu per Provinciam universam illius discriminis rumor ad divinam clementiam ferventibus suspiriis implorandam perculfos tam acerbo nuncio populos acciverat . Neque irrita fuere vota ; Princeps enim , dum divinis contemplationibus unice vacaret , a propinquo strepitu avocatus , ignotum quendam juvenem intuetur rusticā amictū veste per tēsqua adrepere , & disjectis lapidum obicibus semitam explanare ; porrectæ itaque ab eo dextræ innixus ad patentiorē viam in columis descendit , ubi inter adgratulantum turbam sospitatorem suum amisit , nunquam amplius , licet adhibita in eo perquirendo diligentia , repertum . In perpetuam porro rei memoriam Maximilianus , aperto per lapiidas calle , in eodem periculi lui loco in quadrum exciso (non autem infra illum , sicut totius rei gestæ schema apud Fuggerum perperam exhibet) ligneam Christi e cruce pendentis iconem inter Deiparæ , & S. Joannis Evangelistæ statuas erigi jussit 40. circiter pedes altam , licet ab imo aspicientibus bipedalis tantummodo videatur . Sed tandem Oenipontum regressi cætera , præser-  
tim

\* Author id ex Lambecio desumpsit paulo aliter id narrant genuina quadam temporis monumenta : atque ita quidem , ut humano Imperatorem auxilio evasisse pateat quæ tamen non resecanda duximus : quod a viris gravibus ætate licet posterioribus referantur .

tim sacra Urbis ædificia percurramus.

Paræciæ Templum D. Jacobo sacrum in quintum jam sæculum perdurat, utpote anno 1286. excitatum: antiquitati ejus recentior devotio magnificantiam conjunxit, namque ante 40. annos piorum ci-vium ære collato, & in primis Caroli Philippi Palatini Electoris qui tunc Tyrolensem Provinciam Vicario Cæsar is nomine regebat, munificentia a fundamentis denuo est excitatum, & per ampla testudine, columnis marmoreis, elegantibus picturis aliisque ornamentis & pretiosa ad rem sacram suppellectile ad omnem instructum majestatem. Inter altaria, quæ omnia surgunt ex marmore, princeps iconem exhibet prodigiis claram Beatissimæ Virginis ab Auxiliis dictæ: hæc a Leopoldo Archiduce Ferdinandi II. Cæsar is fratre Dresdæ in Georgii Saxoniæ Electoris thesauro ex elegantioribus aliis, sed profanis pictorum, aut sculptorum laboribus, atque ex pretiosissimis cimeliis, inter quæ oblata illi fuerat optio, unice electa, pieque culta, ac tandem post Leopoldi obitum a Ferdinandῳ filio solenni pompa ad hoc Templum translata: estque hæc illa imago, ex qua Passavienne ectypon non minus miraculis celebre Marquardus de Schwendi ejus Ecclesiæ Canonicus desumpfit. Oenipontanae Virginis effigies diebus solemnioribus, remota Divo-

rum Templi Patronorum imagine in throno argenteo deaurato qui medius apparet, immensi operis ac pretii decentius collocatur: trophya etiam Barbarica Turcis erpta, virtute Caroli Lotharingiæ Ducis qui una cum conjugè Eleonora Austriaca Tyroli summa cum potestate sapientissime præfuit: tum & alia signa de Bayaris & Gallis anno 1703. a Tyrolensibus captæ ad pompam spectanda exponuntur. Simulacra etiam ex votivo argento, Josephi Lotharingiæ Ducis, qui parentibus, in moderandis Provinciae Gubernaculis succedit, triumque fratrū in fasciis adhuc latentium, uti & Serenissimi Regii Principis & Archiducis Josephi ex auro, eo pondere quo quilibet eorum fuerat, cum in lucem ederentur, sub sacra imagine appenduntur, religionis Lotharo-Austriacæ in Deum, inque ejus matrem amoris veneranda pignora. Ceterum Maximilianum Archiducem sacræ militiæ Teutonicæ supremum magistrum, geniculatum & obveria altari facie: ex altera vero parte D. Georgium Draconis victorem in ære siffit, atque simul egregium fusoriæ artis specimen præbet ejusdem principis sepulchrale monumentum quod in choro conspiceretur. Succedit huic templum SS. Trinitati decatum, & pretiosis D. Pirminii Episcopi exuviis illustre quod in augustam formam redigit, amplissima testudine ac marmoreis alta-

altaribus ornavit Leopoldus Archidux, eique Collegium a Patribus Societatis Jesu excolendum adjectit, qui & rei litterariae in proximo Gymnasio ac studiosorum adolescentum Seminario, praesunt. In crypta templi subterranea Archiducum qui ultimi Tyrolensis stirpis fuere, cadavera sita sunt Sarco-phagis Stanneis condita. Prima Societas Jesu colonia Oenipontum perducta est e Vindobonensi Collegio Ferdinando I. Imperatore, uti Sachinus ait qui ita, deinde pergit: *Oenipontanos cives ob egregiam in retinenda fide constantiam praeципue dignos auxilio Canisius depraedicabat: eos pariter ac Bavarios tribui Iude & Benjamin, quæ solæ non reliquerunt Dominum, solitus comparare.* Et Cæsar ac Reginæ (quinq[ue] erant Cæsaris filie Virgines) vehementer instabant ut quamprimum Collegii incolæ mitterentur, minor erat Sociorum cohors quam ut in præsidia carpi tam multa posset, interim missus Vienna Carolus Grim, dum sedulo domum & cetera manuando operi necessaria curat, ipsummet inter prima substructionum decora esse Deo

(a) Hist. placuit. (a) Capucinorum asceterio S. J. P. 2. adhæret rari exempli eremus, quam Maximilianus Archiduc an. 1618. vita defunctus, ut pietatis operibus solitario in secessu eo expeditius vocaret, condidit. Habent & servi servaque, ut se vocant, Beatae Virginis, sua monasteria ab Anna Juliana Gonzaga Ferdinandi Archiducis altera conjugi excitata, quibus necdum pro pietate sua sat

liberalis, novum pro viduis asceterium cui & seipsum addixit, instituit singularibusque firmavit legibus: cui postmodum accessit aliud fanætimonialium Societas S. Ursulæ. Nec defunct aliæ sacræ ædes: S. Nicolai & Sebastiani paræciae jure gaudentes: S. Spiritus ubi & nosocomium S. Joannis Nepomuceni: ad sepulchrum Christi, & illa quam Provinciæ Ordines B. Mariæ Auxiliatrici ex voto superiori saeculo, ob patriam belli tricennalis tempore servatam incolumem, excitarunt. Porro omnium oculos & vix non invidiam trahit famigeratissimum tectum quo veteris palatii quod olim principes Tyrolenses usque ad Sigismundi Archiducis ætatem incolebant postea rationum Principis Collegio commissum, propylæum superbit: est autem illud denso auro obductum ferturque Austriae Dux Fridericus anno 1425. ducenta aureorum milia in id opus profundisse, ut nempe orbi palam faceret immerito sibi Friderici cum vacua Pera cognomen a suis obtrectatoribus fuisse inditum. Aulæ, cujus pars an. 1728. incendio consumpta nondum, e cineribus surrexit, vicinum est Athenæum quod maximus litterarum fautor Leopoldus Cæsar anno 1669. ad Universitatis Studiorum decus evexit privilegiis, legibus, ædificiis ornavit. Nuper cum & hic e mandato Augustissimæ studiorum introduceretur reformatio, tribus

Ca-

Cathedris Academia aucta est, scilicet linguae Sacræ, Philosophiæ Morum, & Eloquentiæ Sacræ & Profanæ: eam ornat Museum Physicum experimentale, insigni apparatu instructum cujus commodo etiam Augustæ munificentia annuus proventus decretus est. Pluribus incrementis aliis emendata scientiarum ratione, commune cum provinciis aliis beneficium, ab Augustissima Tyrolis accepit: Bibliotheca publica quam anno 1745 Augusta Theresia omnium commodo patere jussit, ex arce Ambrasiana ubi antea premente fato, situ dum squallida, & neglecta deliteſcebat, Oenipontum translata est, plurimisque libris optimæ notæ aucta: utque aliis deinceps instruatur eadem egregie dotavit Augusta nostra, accessit Museum mineralogicum & metallicum privata industria Viri Clarissimi Ant. Roschmanni eidem Bibliotheca Præfecti.

## A M B R A S I A.

**A**mbrasia vulgo Ambras celeberrima Arx, quam Ameras, vel Umbras nonnulli vocarunt, stat in perameno quodam clivo, qui in dextra Oeni ripa ad secundum ab Urbe Oenipontana lapidem attollitur, & ab altissimis alpium jugis ad Meridiem inumbratur, qua parte amnis Sylla ex Pyrenæo monte vulgo der Prenner defluens aureisque arenulis di-

*Topograph. Aust. P. I.*

ves in Oenum illabitur. Magnifica est prorsus hujus ædificii struc̄tura, plurium Archiducum sumptibus ad delicias, & majestatem summo artificio comparata: ad longum intus spatium excurrunt conclavia sumptuosis aulæis, pietisque tabulis undique coruscantia; foris amplis cingitur latifundiis, vineis, sylvis, piscinis, ferrarumque vivariis: hinc exculti recreant horti, inde implexi fallunt labyrinthi: alibi jucunda patent spelæa, alibi perennes subfluent fontes, quorum scaturigines magno rivulorum ex vicinis montibus per subterraneos tubos ductorum multitudo affatim suppeditat. Sed hæc aliis saepe communia: illud hic singulare, spatioſſimum scilicet armamentarium vulgo die Rüſtkammer eximia omnigeni apparatus bellici copia scatens, ubi admirandum præbet spectaculum incredibilis numerus veterum armorum ex omnibus fere Orbis terrarum Provinciis magno studio, & sumptu conqueritorum, quibus diversi olim Imperatores, Reges, aliquie Principes, & clari Belli duces tam prospera, quam adversa fortuna ingentia militaris artis, roborisque ſpecimina exhibuere. Inter hæc fervatur Francisci I. Franciæ Regis armatura, quam Papiensis Francorum clades, ejusque captivitas reddidit famosiorem. Arma item Ruperti, Caroli V., Maximiliani I. & II. Imperatorum,

Ff

Ca-

Caroli IX. Franciæ, Stephani Poloniæ, Ferdinandi, & Philippi Hispaniæ Regum: denique quotquot fere bellici heroes in Germania, Italia, Francia, Belgio, aut Hungaria a tribus seculis inclaruerunt, ad vivum effigiati longo istic ordine pendent, propria, qua olim utebantur lorica, casside, cæteroque Martiali cultu singulis affixo. Ex armamentario patet transitus ad gazophylacium vulgo Kunstkammer, ubi innuera illic conservata naturæ, & artis miracula obstuپentes advenas diutissime morantur: magni ibi inter reliqua admiranda momenti sunt multa veterum numismatum millia a Romanis, Græcis, & Barbaris signata, atque ad illustrandas omnium pene gentium antiquitates mire conductentia. Demum ne quid ad absolutissimam ingeniorum culturam desideraretur, eximia ibidem Bibliotheca 5880 typis edita volumina anno 1665. continebat, quo Lambecius annuente Augustissimo Cæsare 1489. selectiora, una cum 569. manuscriptis in Viennensem Aulam inde asportavit.

### B O Z A N U M.

**B**OZANUM, quod Gerardus de Roo Pisonum, veteres Bauzanum, Germani Bozen, Itali Bolzano nuncupant, ad Atagin, seu Hisarcum amnem, paulo post in Athesim fluentem situm, aperta quidem est, sed ampla, populo-

que frequens Urbs, quem tertio quovis mense adaugent nundinæ magna tum ex Italia, tum ex Germania mercatorum affluentia cereberrimæ. Eam a multis jam seculis floruisse comprobat octavi seculi author Paulus Diaconus, dum hæc enarrat: *Alachis, cum Dux esset in Tridentina Civitate, cum Comite Bojoriorum, quem illi Gravionem dicunt, qui Bauzanum, & reliqua Castella regebat, confixit, eumque mirifice superavit.* Ejusdem quoque mentio extat in Theodosiano codice, ubi lex III. de Palatinis sacr. lariгitionum data dicitur Bauxare, quem locum Jacobum Gothofredum antiquitatum peritissimum Bauzanum interpretari, testis est Cellerius, (a) quamvis hic aberret (a)Geogra. Bozanum, seu Bauzanum infra ant 1.2.c.7. Athesim, & Atagis confluentes collocans, Endidas autem notam Antonino Urbem Bozani loco substituens. Civitatem hanc sub Tridentina ditione antiquitus comprehensam Meinhardus Carinthiæ Dux, & Tyrolis Comes armorum vi sibi vendicavit, sed sublato amica conventione dissidio, restituit, mænibus tamen suis nudatam. Tandem jus quod in hac civitate post varias temporum vices reliquum Episcopis manserat anno 1531. solemnri permutatione Ferdinando I. pro Dynastia Perzini cessit. Non solum Martem, sed bina etiam elementa sibi saepius adversa maximo suo damno sensit Bozanum: ignis

ignis quater in urbem desæviit sed præsertim anno 1223. quo præter omnes ædes centum quinquaginta insuper homines in cineres abierunt. Inundationes quoque Hisfari & Talvernæ fluminum perpeſſa est vix non exitiales: dirifſimam illi cladem intulit annus 1757. quo immensa aquarum vis, quæ mense septembri, facta quaſi conjuſratione, totam propemodum Tyrolis provinciam ingenti hominum pecudumque ſtrage & ædium agrorum æque ac vinearum ruina fædum in modum depopulata eſt, adeo civitatem omni ex latere infestabat, ut ab interitu prope abefſet. Decoris hodie ornatur ædificiis: inter ſacra eminet magnificum Parœciæ templum ab anno 1181. uſque ad ſequentis fæculi 70. una cum præalta turri magnis ſumptibus exſtructum: non minor fuit noſtra atate civium pietas, cum in excitando altari principe, quo vix alibi ſpectatur magnificentius, five molem & marmoris pretium, five artem confideres; tum in ornando novo, quod templo contiguum eſt, facello, ubi Deiparæ ſtatua in altari argenteo publicæ venerationi exposuerunt: SS. Franciſci & Dominici cœnobia non multo poſt horum religiosorum ordinum institutionem fuerunt condita: alterius ſacram ædem negotiatorum ſocietas, ſplendidissimo ornavit facello. Capucinorum domicilio quođ Engelhardus comes

a Wolkenſtein anno 1600. fundavit, adjectum modo eſt ſacrarum virginum ab Annunciatione B. V. dictarum monaſterium, extra ciuitatem. Ordinis etiam Teutonici equites ſuam hic habent ſedem admodum vetuſtam non procul ab æde S. Ioannis Baptiſtæ. Ceterum mercatores bozani magnis gaudent privilegiis, proprioque in cauſis ciuilibus judicio, quod nundinarum tempore in prætorio, magnis non ita pridem ſumptibus ad omnem artis Architectonicæ decorem ædificato exercetur. Prope Bozanum trans Talferum omnem, qui penes urbem Hisfaram ſubit, degunt Canonici Regulares S. Auguſtini quibus Sæculo XII. Arnoldus comes quem aliqui a Vallai, alii a Marit vocant cum Mechtele uxore in atheſina ripa, Augia B. V. nunc Kaifer aue vulgo dicta, annuente Salomone Tridentino Præſule, Collegium ſub Henrico primo Præpoſito fundaverat. Verum cum anno 1417. intumescens fluvius illud pene totum inundafset, in locum, quem modo occupant, & Grieſs appellant, transmigrarunt, conversa in Collegium Arce, quam undecim annis prius Leopoldus Archidux eisdem liberaliter contulerat.

## BRUNECKIUM.

B Runecium, five Brunecca,  
uti Gerardus de Roo ſcribit,  
Ff 2 vul-

vulgo Bruneck Urbs Byrro amni vulgo Rienz adjacens a Brunone Brixinenfi Episcopo ex Conrado Comite a Bullenfetten & Kirchberg, atque ex Bertha Meinhardi Goritiæ, & Tyrolis Comitis filia nato, nomen accepit; postquam ille anno 1288. hunc locum primo extruxisset; aut saltem novis ædificiis ampliasset. Quare non admodum suffragatur nominis affinitas Gulero, qui apud Brandisium opinatur, antiquam hanc fuisse Breonum, seu Breunorum Sedem: hos enim in alpium aditu habitare ex Venantio Fortunato quidem discimus; at certam illis stationem Bruneckii assignare arbitrii fuit, nulla ratione, vel authoritate suffulti; quinimo Oeni fluvio eos magis admoveere videtur ipse Venantius dum canit:

Pergis ad Augustam, quam Virdo,  
Lycusque fluentat,  
Si vacat ire viam, neque Boioarius obstat;  
Qua vicina sedent Breonum loca,  
perge per alpem  
Ingrediens, rapido qua gurgite  
vertitur Aenus.

Imo diserte sententiam nostram idem Poëta confirmat in Epistola ad Gregorium Turonensem libro primo carminum præfixa, ita suum in Galliam iter describens: *D<sup>r</sup> Ravenna progrediens, Padum, Athesim, Brintam, Plavem, Lquentiam, Tiliamentumque transiens per alpem Julianam pendulus montanis anfractibus, Dravum*

Norico, Oenum Breonio &c. transiens. Hos Breones Paulus Diaconus Brixenes vocat, dum mirum hunc evenatum de eorum regione profert: *Fuit tunc hyems frigida nimis, qualem vix aliquis prius recolebat fuisse. In regione quoque Brionum sanguis de nubibus fluxit, & intra Eni fluvii aquas rivulus cruoris emanavit.* Sed Bruneckium redeamus. Brixinenibus Episcopis hæc Civitas subest, habetque præter Parochiale templum & Nosocomium, duas alias sacras ædes, quarum una S. Catharinæ dicata est, altera ab incolis nova dicitur: accedunt Capucinorum & S. Ursulæ monasteria. Arx oppido imminet edito loco sita: nec adeo procul abest Suneburgense Sanctimonialium D. Benedicti Monasterium, quod anno 1018. Voldalus B. Otwini Goritiensis Comitis filius larga dote fundavit, flagitante id forore Berchtunda Langseenfis in Carinthia Cœnobii Antistita. Suneburgensisibus autem Virginibus Abbatissæ, ut vocant, munere præesse cœpit Wilpurgis ex Goritiæ Comitibus oriunda.

## BRIXINUM.

**B**rixinum, seu Brixina (utrumque enim a diversis usurpatur) vulgo Germanis Brixen, Italies Bressanone venusta Urbs a præterfluente Hisarco Rienzæ aquis aucto alluitur, & a præcelsis mon-

tiuum

tiū verticibus coronatur: ubi veteres Rhætiæ populos a Plinio Bri-

xantas vocatos etiamnum supereffe,

(a) Geog. non vane conjicit Cellarius. (a)

ant. lib. 2. Primarium hujus Urbis decus, Epi-

c. 7. scopalem nempe sedem, Sabiona translatum esse longe certius, quam translationis author, tempusve in-

(b) Geom. notuit: Bucelinus (b) id Hartvico facr. par. 1. adscribit anno 1039. Sabionensi Ca-

thedralæ imposito; Raderus, Hundius, aliique plures S. Albini, seu Albuini auspicii, qui Hartvicum

duobus interjectis præcesserat, peractum contendunt; verum testa-

(c) Annal. (c) Richpertum, Boic. lib. 9. qui S. Alpino Mitram reliquit, ab

Ottone II. Imperatore Brixinensem Episcopum in literis Brixinæ datis appellari, nulla Sabionæ memoria. Illud interim probabilius

videtur, Herwardum Episcopum cœpisse Brixinam muris cingere, quos successori suo Hartvico perficiendos transcripsit. Sabiona au-

tem, seu Sabio, vel Savio, quam Sublavionis nomine Antoninus suis itineribus inferuit, decem passuum millibus Brixina recedens, & vul-

go nunc Säben dicta primum obtinuit Præfulem S. Cassianum a Fortunato Aquilejensi Patriarcha anno

circiter 360. initiatum, qui ab Ethnicis ejectus, & Imolam, seu For-

um Cornelii se conferens ludum literarium aperuit, ac tandem puerorum graphis in fidei Orthodoxæ

odium enecari jussus, Martyrii lauream sub Juliano Apostata adep-

tus est, prout fert constans Imolensis, ac Brixinensis Ecclesiarum traditio, & Prudentius Cala-

guritanus anno 384. adhuc florens memoriae commendavit. Nullus

ab eo Episcopus ibi sedisse legitur usque ad S. Lucanum anno 424.

clarum, qui infestos patiens aduersarios, ut ab illorum furore se

subduceret, in Vallem Agordiam

fibi cedendum putavit, ubi voluntario exuli Avatia religiosa fœmina

victum ministrabat; mortui vero corpus Bellunum, cui Vallis

illa subest, migrare noluit, nisi capite pignoris loco Agordiæ re-

licto. Altero post S. Lucanum se-

culo Sabionæ adhuc sedidit S. Inge-

nuinus, seu Genuinus, qui Grandensi Synodo anno 581. vel se-

quenti ab Elia Aquilejensi Patriar-

cha convocatae sub nomine Inge-

nui Episcopi secundæ Ræthiæ sub-

scriptus reperitur juxta MS. Bar-

berinum apud Schönleben excu-

sum; in alio enim actorum syno-

dialium exemplari aliter, nempe:

Martianus Episcopus locum faciens viri

Beatissimi Ingenuini Episcopi S. Eccle-

siae Sedereftæ, id est secundæ Rhæ-

thiæ. Sabionensem autem Antifti-

tem, seu ingenunum de Sabione eun-

dem expresse vocat Paulus Diaconus

(a) trium Capitulorum con-

tra Romani Pontificis sententiam

propugnatores in Merianensi Pseu-

dosynodo sub annum 588 congrega-

tos recensens, de qua re diffe-

reus Bollandus (b) multis argu-

Febri-

(a) De ge-  
stis Lang. I.

3. c. 25.

(b) Acta.

SS ad Di-

em 5. Febr.

mentis ostendit, quam veritati consonum sit, hunc Sanctum Episcopum a commisso sibi errore resipuisse. Præter hactenus adductos Sabionensem Ecclesiam sanctitatis fama illustravit D. Constantinus; reliquorum enim nuda tantum nomina, atque ea sæpe incerta, teste Velsoro, supersunt. Unde ad Brixinenses Hartvici successores transfluenti primus occurrit Poppo mox ad Aquileiensem Cathedram, dein anno 1048. ad summi Pontificatus apicem electus, & Damasus II. appellatus, post quem Brixinensem Sedem tringinta & amplius annis occupavit Altuvinus, si juxta Brunneri chronologiam verum est, sub illius regimine coaluisse teterimum illud conciliabulum ab Henrico IV. Imperatore anno 1080. Brixinæ coactum, in quo a paucis Schismaticis Episcopis eximiæ Sanctitatis Vir Gregorius VII. Summus Pontifex in Cœlitum album postea translatus, tanquam Pseudomonachus, totius vesaniæ pestifer Princeps, Romanæ Sedis invasor, Ecclesiastici Ordinis subversor, inter scandala, & inter conjuges diuertia seminans, sacrilegia, ac incendia prædicans, perjuria, & homicidia defendens, Catholicam Fidem de corpore, & sanguine Domini in quæstionem ponens, divinationum, & somniorum cultor, manifestus necromanticus, pythonico spiritu laborans, & id-

circo a vera fide exorbitans impudentissimo ausu condemnatus est. Porro Guibertum hominem sceleratissimum in illius locum intrudere præsumunt, sed adversus hunc pro Gregorio apologiam edidit doctissimus æque ac Sanctissimus Episcopus Anselmus, cuius notissima virtus ab ipso Abbe Urspergenfi Henrici autore encomium elicuit; hic quippe postquam præmisla scommata enumeravit, & Anselmi epistolam ad Guibertum datam paucis contraxit, sic statim pergit: *Hæc priori sententie valde contraria scripsit Anselmus, vir literis apprime eruditus, ingenuo acutissimus, facundia præcipius, & quod omnibus majus est, in Dei timore, & sancta conversatione nominatissimus.* Inter reliquos post Altuvianum Præfules S. Hartmannus omnigena virtute illustris, prius Claustrineoburgensis in Austria Præpositus anno 1164. terris eruptus, atque insuper bini Archiduces Austriae, & quinque Cardinalia purpure micantes referuntur Cæterum quamvis Brixinenis Ecclesiæ Antistes pari modo, ac Tridentini de quibus infra, ob jus advocatiæ, atque alias quasdam rationes Tyrolis Principem respiciant, symbola sua in ærarium Provinciæ conferant, nihilominus tamen Principibus Imperii accensentur, regalia ab Imperatoribus accipiunt, sessionemque, ac suffragium in Imperialibus Comitiis obtinent. Præterea glorioissimum quid de hoc

hoc Episcopatu refert Brandisius, potentissimos nempe Principes Brixinensi Antistiti quondam servivisse, namque hæreditario Mareschalli munere Dux Bavariæ, Camerarii Dux Carinthiæ, Pincernæ Dux Meraniæ, & Dapiferi Dux Sveviæ fungebatur. Alios hujusmodi Ministros adfert Bucelinus; ait enim Dynastas de Rodnek Camerarium, de Schonek Mareschallum, de Castelruto Dapiferum, & de Seben Pinceram egisse. Hodie autem hæreditarii hujus Episcopi Mareschalli sunt Barones a Welsberg, Camerarii Barones a Vels, Pincernæ Comites de Thun, & Dapiferi Comites de Wolkenstein. Præter magnificum Episcopium exornat Brixensem Civitatem Cathedrale Templum, in quo novendecim Canonicorum Capitulum divina peragit, anno 1234. post diri incendii damna restauratum; Parochialis S. Michaëlis Ecclesia ab Hartvico prælaudato Episcopo erecta, Sacrarum D. Claræ Virginum Monasterium anno 1235. vivente adhuc fundatrice ex collectis eleemosynis constructum; Capucinorum Cenobium, & sex insuper Tempa B. Dei Genitrici, Omnibus Sanctis, D. Joanni, D. Barbaræ, D. Erhardo, & Spiritui Sancto apud Nofocomium consecrata.

## CLAUSTRUM.

**C**Laufstrum vulgo Italis Cavolo, Germanis Kofel percelebris mons est ad Venetæ ditionis fines, & qua Africum respicit, ad instar erecti muri per 50. & amplius orlias ascendens. In hujus lateris medio vasta hiat caverna, in qua erecta Arx, & copiosa semper annona, perennique fonte instructa, licet a quatuordecim tantum militibus cum suo Duce inhabitata, frequentem tamen infra se passum egregie tuetur; angustus enim est, & binos juxta se positos currus ægerrime admittens; cum hinc obstet rupes, inde terreat dehiscens ad præterlabentem Medoacum, seu Brentam præcipitum: ubi vero prædictæ Arci transitus subjacet, forti clauditur munimento, ex quo ad eam homines per funes attrahuntur, aut inde demittuntur; nulla quippe alia ad specum via, aut accessus patet.

## CLUSIUM.

**C**Lusium, seu Clusam vulgo Clauen exiguam Urbem inter Brixinam, & Bozanum Hisarcus amnis præterfluit: in proximis rupibus arx eminet Säben vulgo dicta ab hujus sæculi initio in Virginum quæ D. Dominici institutum sequuntur, monasterium mutata: antiquæ hic Sabionæ sunt rudera quam ab Attila Hunnorum rege everfam S. Ingenii-

genuinus Episcopus restauravit & de qua Anonymus Poeta quidam qui saeculo IX. floruit apud Mabilionum canit:

Hæc sedes Vallis Noricanæ dicta  
Sabana

Ingenuinus habens primus quam rexerat almus,  
Templa duo Sabionæ Deiparæ, &  
S. Crucis sacra, totidem Clufii,  
nempe Parochiale D. Andreæ, &  
aliud SS. Apostolis dedicatum.

### S. GEORGII MONS.

**S.** Georgii Mons paucis infra Oenipontum milliaribus attollitur, cui anno 1112., uti Brunnerus notat, potius quam an. 1000, ut Brandisius mavult, sanctitatem intulit Ratholdus vir nobilis, & Aiblingæ perveteris ad Mangaldam flumen Oppidi Dominus sacris initatus, sociosque noctus nec sanguine, nec virtute impares, ex quibus Freundsbergeri, Selneri, & ii praesertim, qui de Sliters cognomentum gerunt, hodieque memorantur: hi enim in hanc præaltam, & undique abscissam rupem a duabus columbis divinitus, ut fama fert, invitati, ac rudibus pri-  
mum mapalibus, vel antris verius abditi, ædem illic D. Georgio moliri coeperunt, cui paulo post, id est anno 1138. cultum & opes, instituto juxta D. Benedicti leges Cœnobio, Reginbertus ex S. Petri apud Salisburgenses Abbatे Epi-

scopus Brixinenis adjecit, idemque Eberhardum loco præfecit. Monasterium incendiis saepe vastatum, denuo hoc saeculo ignis in vicinis nemoribus casu ortus & sub terra per arborum radices mire propagatus, erumpente tandem flamma in cineres redigit, e quibus nondum surrexit, præter templum e ruinis excitatum venustius. Monachi e monte profugi, ad ejus pedem fixerunt stabilem sedem in loco Viacht dicto, e regione Suacii, ibique novum Cœnobium ædificarunt, eleganti nunc templo ornatum. Ex vetustis cellis per montem sparsis unica B. Virgini dicata & S. Georgii Sacello pene coæva, etiamnum perstat ab adsita tilia non men habens, in qua Virginis statua filium genibus exceptum lugens, cum antiquitate, tum miraculis celebratur. Addit hic Brunnerus in eadem Oeni ora, eademque fere tempestate Cœnobium aliud D. Petri honori in vertice Matronæ montis ab Andechiensibus Toparchis positum, sed bellorum postea injuriis oppressum solo Templo superstite interiisse.

### H A L A.

**H**ala vulgo Hal clara, amœnaque Urbs ad Oenum fluviū parum infra Oenipontum sita propriis olim obtemperabat Dominis, ex quibus Barbundus anno 1010. mundi pompis valedixit in reli-

religiosa claustra recedens. \* Hunc æmulatus anno 1163. Gebhardus ejusdem territorii Dynasta in flore ævi, medio propitiæ fortunæ cursu recta a Babenbergensibus Comitiis, qubus inter reliquos Imperii Proceres adfuit, in Reichsbergense se abdidit Cœnobium, Hedwige matre in ejusdem loci Parthenonem, cui binas paulo ante filias consecraverat, concedente. Civitatum jura, & privilegia obtinuit Hala anno 1102. ab Ottoni I. Meraniae Duce, \*\* magnaue fecit incrementa, postquam ibi salis invaluit commercium ante tria, & amplius secula inchoatum; unum enim ab Urbe milliare absunt salisfodinæ, ubi consenso altissimo monte, in alpium viscera inter faxorum, & salis fossilis permixtos parietes, arte, ac industria humana fabrefactos penetratur. In harum fodinarum ad hoc effossas faveas immittitur certis temporibus aqua dulcis, quæ cum aliquot mensium spatio justam attraxit salfedinem, ex monte per ligneos canales supra Urbem derivatur in ferreas incredibilis magnitudinis fartagines, in quibus adminiculo ignis, & follium aquaria rota motorum inflammatis ex-

*Topograph. Austr. P. I.*

coquitur; unde exsiccata materia, atque in niveum candorem redacta in oblongis, & acuminatis vasis in conum confitipatur. Adeo feliciter hoc opus processit, ut anno 1448. detractis proventibus, qui in 80. operas impendebantur, 150. florenorum millia in Archiducis Sigismundi ærarium intulerit Sua etiam Halam sacra ornant ædificia: Parochiale templum an 1352. condi cœptum: illustre sacrarum Virginum Collegium quod Regium nuncupatur, a tribus Ferdinandi I. Cæsaribus Magdalena, Margarita & Helena, quæ & ipsæ anno 1568. idem ingressæ sunt erectum, & virtutum omnium exemplis a Magdalena præcipue, quæ prima illi præfuit illustratum est. adjecto non multo post Societatis Jesu Collegio. Adiunt præterea SS. Francisci & Claræ Cœnobiae cum binis templis, quorum unum Christo Redemptori, alterum Spiritui Paraclito sacrum est. Notabilis quoque in hac Urbe habetur monetaria fabrica, in qua aureis, argenteis, æreisque nummis non alio labore, quam machinæ ferreae rota per aquam mota, circumactæ impetu debiti singulis characteres magno temporis lucro expeditissime im-

G g

pri-

\* Autor hic deceptus videtur: Comites enim illi Hallenses seu de Hallis suum Comitatum in Bavaria obtinebant *Hals* dictum. Nam sœculo XIII. Hala nostra ad Oenum vix extitit: Sal enim tunc temporis excoquebatur non eo loco, quo nunc Hala sita est.

\*\* Brandisius autorem decepit: non Ottoni Meranensi, sed Ottoni Duci Carinthiæ C. Tyrolensi Meinhardi filio qui anno 1310. e vivis sublatus est, jus civitatis in acceptis referit. Ut ex diplomatica liquet.

primuntur. Funestis Halæ memoriis insertus est ingens anni 1572. terræ motus, quem præcesserat fames, subsecutæ lues; cœptus hic pridie nonas Januarias ad secundam noctis horam, jam ante Solis ortum Urbem, cunctamque viciniam magno omnium pavore quadragies concusserat; neque tunc desit, sed ad quadraginta dies, interjectis subinde modicis intervallis vim suam prostravit: annus etiam 1703. Civitati prope excidium attulit, ob Bavarios & Gallos, qui præsidio impositi fuerant, internecione deletos; quorum Stragem ulturus Maximilianus Elektor, collectis suorum copiis jam imminebat a magistratu supplici ægre placatus.

## INTICA.

**I**ntica vulgo Innichen oppidum ad Dravum fluvium non procul ab ejus fontibus situm, veteris Agunti ruderibus infidere, Lambecius cum pluribus autumat, licet Cluverius in Oppido Doblaco unius horæ itinere hinc dissito Aguntum flatuat, quorum opinionibus indicia suggerit sequens Antonini iter:

Aquileja	M. P.
Ad Tricesimum	XXX.
Julium Carnicum	XXX.
Loncium	XXII.
Aguntum	XVIII.
Littatum	XXIII.
Sebatum	XXIII.

Vipitenum	XXXIII.
Veldidenam	XXXVI.
Et sane cum sub Veldidenæ nomine Wiltinenis Monasterii situm latere, solidis nixi rationibus infra explicandis plerique arbitrentur, & Loncium ipsam esse Urbem, quæ nunc Luenz dicitur, ex itineris ductu omnino pateat, nullus dubitandi locus supereft, quin circa Inticam, aut Doblacum florerit Aguntum: Lambecio tamen contra Cluverium libentius adstipulor; namque ex Paulo Diacono, & Fortunato aperte colligitur, prope Dravi fluente hanc Urbem stetisse, quod Doblaco minime convenit: primus quippe ita ait: (a) Per alpem Julianam, per quam Aguntum Castrum, Dravumque, & Byrrum Lang. l. 2. fluvios. Alter vero in metrica S. c. 13. Martini Vita sic clarus ad rem nostram canit.	(a) De gest. (a) Lib. 3. (b) Lib. 2. (c) 24. (d) Lib. 2. (e) 14.
Per Dravum itur iter, qua se castella supinant.	
Heic montana sedens in colle superbit Aguntus.	
Unde longe a scopo declinant, qui Styram usque Austriæ Urbem Aguntum promoverunt: cumque hoc a Plinio (a), & Ptolomæo (b) No- (a) Lib. 3. ricis adjudicetur, manifestius elu- (b) Lib. 2. cent, quæ de Tyrolensi regione, (c) 14. Rhætiæ, & Norici partem occu- pante alibi differimus. Demum Agunti Aulam suam Carinthiæ Du- ces, & nominatim Chotimerum ante mille circiter annos posuisse, scribit Megiserus. Inticæ nostra ad-	

adhuc ætate supereft Collegiata Ecclesia ad 4. Canonicos redacta , licet quondam viginti complectetur , & S. Candidi Archiepiscopi , ac Martyris istic sepulti honoribus excitavit Otto \* I. Imperator , consentiente Leone VI. Summo Pontifice , quod in annum 925. incidisse tradit Brandisius , sed ei adversatur recta chronologiæ ratio , cum anno 936. Germaniæ Regnum post Henrici Aucupis parentis mortem primo adiverit Otto , & Leo VI. non nisi 6. mensibus anni 929 D. Petri Cathedram obtinuerit.

## KUFSTEINIUM.

**K**Ufsteinium vulgo Kufstein parvum quidem sed probe munatum oppidum ad Oeni ripam in Tyrolis , & Bavariæ finibus positum superimminentem habet ex solida rupe excisam Arcem , præterquam unico calle undique inaccessam , nec minus arte , quam natura communitam . Hanc anno 1504. cum præsidio tenebat sub Ruperti Palatini auspiciis Penzenavius e familia nobilium a Pienzenau militari virtute clarus , qui etiam post illatam a Maximiliano Cæsare suo Principi cladem , loci arduitate fretus contempta victoris potentia

arroganter se gerebat . Quare irritatus Cæsar Arcis oppugnationem magno animo aggressus , majori quoque constantia urgere decrevit . Interim adversum quandam montem observat obfessorum situm non nihil excedentem , & collocandis machinis idoneum : in hunc igitur locum tormenta aliquod majora magno sudore attrahi curat , quorum iætibus non modo mœnia , & excubantes in illis milites sed etiam intimi Arcis recessus patebant . Perculsius hoc malo Præfectus ditionem fecit , veniamque cum Phrygibus petiit , incautam suam audaciam capite luens . Cæsar Arcem cum Urbe Tyrolensi Comitatu addixit , illumque montis verticem , ex quo illius muros , domosque verberaverat , ita decutijussit , ut nulla inde labes Arci deinceps timeretur . Funestus oppido annus fuit hujus sæculi tertius , quo illud vix a Bavario exercitu cinctum , incendium consumpsit ; mox in arcem serpens , turrim corripuit , ubi pulvis pyrius asservabatur , ea in ærem vibrata , & præfidiariis fuga dilapsis , in Electoris Maximiliani potestatem venit , qui inspecta loci natura , & situ , eum cuivis in munitionibus Europæ arcibus parem censuit : anno sequenti post Hoch-

Gg 2

ftadia-

\* Adiunt diplomata , sed valde sublestæ Fidei , quæ Ottonis donationem insignem huic Collegio factam referunt : nulla tamen ibi fundationis fit mentio . Imo constat Ecclesiam hanc ab Hattonे Frisingensem Episcopo anno 787. suisse institutam : Locus ahdic Frisingenſi Pontifici paret .

ftadianam victoriam vi conventio-  
nis Monacensis sub Cæsaris impe-  
rium rediit.

## L O N C I U M .

**L**Onicum vulgo Lienz , vel Luenz Urbs cum Arce ad Dravi , isolæque confluxum sita , grandæva sua ætate merito gloria-  
tur; Antoninus enim in itinere Aquileia Veldidenam directo post 82. passuum millia illud expresse col-  
locavit. Goritiensibus olim Comitibus suberat una cum tota Val-  
le , quam Pyrustarum Aventinus ,  
Pufterthal vulgus appellat , verius autem Pustrissa dicitur. Goritiæ comites per duo sæcula stabilem hic habuere sedem , sed Leonardo eorum postremo vita functo , ad Maximilianum I. Cæsarem, Austriæque Archiducem universa ditio devoluta , Tyrolenses fines latius produxit. Sanctimonialium Cœnobium D. Dominici regulis ob-  
strictum anno 1286. exortum est , cui postea Euphemia Goritiæ comes , ordinis Carmelitarum cœnobium addidit: ante 30. circiter annos Loncium furente incendio in cineres resedit ; sed pristino jam dudum decori est restituta.

## MARIAE MONS.

**M**ariæ Mons , vulgo Marien-  
berg elegans in Valle Venu-  
sta Ordinis S. Benedicti Cœnobium

in edito stat monte inter Oenum , & Athesim , ubi hi maxime ad in-  
vicem accedunt , eminente , quod advoca-  
ti de Amatia vulgo Metfch liberaliter dotatum excitarunt ; Albertus primus Abbas usque ad annum 152. rexit ; S. Algotus Curiensis Episcopus largis mune-  
ribus ditavit , & tandem Matthias Langius trigesimus quintus Abbas anno 1640. e vivis sublatus mag-  
nis sumptibus a fundamentis resti-  
tuit. Templum nostra ætate denuo instauratum nunc elegantiori for-  
ma gaudet.

## M E R A N I A .

**M**erania vulgo Meran Urbs olim Ducalis , & totius regionis caput in rara per Tyrolim planicie ad Passarum amnem mox Athesi illabentem jacet , a pluribus Arcibus in proximis clivis erectis corronata. Anno 1406. Leopoldus Archidux Austriae , & secundus hu-  
jus nominis Tyrolis Comes muros circa Urbem duxit , quibus septem includuntur Templa , Parochiale nimirum ad S. Nicolaum , terna alia minora S. Barbaræ , S. Catharinæ , & S. Leonardo dicata , Ve-  
nerabile Capucinorum Asceterium , & Sacrarum D. Claræ Virginum Cœnobium ab Euphemia Comitis Ottonis & Carinthiæ ducis uxore anno 1300. fundatum & paulo post ab Henrico Ottonis fratre peculia-  
ri patrocinio protectum , edito ea de

de re diplomate, cuius hoc initium: *Nos Henr cus Dei gratia, Bohemiæ, & Poloniæ Rex, Marchio Moraviæ, Dux Carinthiæ, Comes Tyrolis, & Goritiæ, & Ecclesiæ Aquileiensis, Trid. & Brix. advocatus profitemur, & universi presentium inspectoriibus declaramus.* Quod dum Fr. noster charissimus quondam Otto Illustris Dux Carinthiæ pia devotione, ac sincero affectu fundationi, & structuræ novæ Clauſtri Sanctimonialium Ordinis S. Claræ in Merano per dilectam sororem nostram Ofniam Ducifam Carinthiæ reiitam dicti nostri Germani inchoatæ, & fundatæ suum consensum voluntarium præbuerit, &c. finis vero erat hujusmodi: *Actum & datum in Gries anno Domini millesimo, trecentesimo, undecimo, Kal. Martii, in dictione nona. Anno 1312.* Accessit tardius Virginum ut vocant Anglicarum asceterium, & Gymnasiūm quod a Monachis Benedictinīs regitur. Spectavit Merania solennem nuptiarum pompam, quæ inter Ludovicum Marchionem Brandenburgicum, & Margaretham Carinthiæ Ducis filiam coram Ludovico Bavarо Imperatore sponsi Parente, & frequenti Principum conventu habebantur: sed non tantum inde hauserat lætitiae, quantum mœroris sensit anno 1419. ferale intuens spectaculum, quod fluvius Passarus Urbem inundans in 400 Civium cadaveribus eidem objicit. Inter circumfitas Arces vetustate præstat, quæ nunc vulgo Tyrol dicitur, totique Comitatui

nomen dedit, olim vero Terioli in plurali numero vocabatur; In antiqua enim Imperii Occidentalis Notitia sub Duce Rhætiarum fuisse legitur; Præfectus Legionis tertie Italicæ trævectioni specierum deputatæ Teriolis, & mox Tribunus Gentis per Rhætias deputatæ Teriolis.

## NOVA CELLA.

**N**OVA Cella vulgo Neustift Ca- nonicorum Regularium non procul Brixina remotum, fundatorem suum agnoscit Rambertum Sabionensem Dynastam, ejusque conjugem Christinam, qui hor- tante S. Hartmanno Brixinenſi Antiftite pio huic operi anno 1141. animum applicuere; primum vero Præpositum Henricum, qui anno 1164. communi mortalium sorti succubuit. Ex hujus successoribus Conradus Rodneckiana ortus stirpe, & Berchtoldus Friderici Archiducis antea Cancellarius ad Bri- xinensem Cathedram gradum fece- runt, post quos vigesimus secun- dus Præpositus Nicolaus Scheuber anno 1449. gestandæ Infulæ præ- rogativam a Nicolao V. Papa fibi, ac posteris impetravit. Collegii ædificium bis Vulcani crudelitatem passum, tandem anno 1477. non modo reparatum, sed et am 20. circiter abhinc annos in magnifi- centiorem formam erectum est, utpote in quod ornandum nec sum- ptibus nec industriæ parcitum est:

locus arcis instar, muris septus, anno tamen 1725. direptionem a tumultuantibus agricolis ut alia plura monasteria passus est.

### RATENBERGA.

**R**Atenberga, vulgo Ratenberg Urbs est cum Arce validissima ad Oenum fluvium Kuffsteinio & Suacio interjecta, quam Rotenberg potius dicendam existimat apud Brandisum Bruschius, eo quod circumferti montes copioso fæti cupro quondam rubuerint \*, unde apertis, Sigismundo Archiduce, frequenti operarum labore fodinis, erutum inde metallum non modo per Germaniam, & Italiam, sed per Galliam, & Hispaniam distractahebatur. Hæc Urbs modo Tyrolensi Comiti, modo Bavariæ Duci quondam parebat; sed an. 1505. a Maximiliano Cæfare una cum Kuffsteinio recuperata Tyroli deinceps adhæsit.

### R I P A.

**R**Ipa, vulgo Italij Riva, Germanis Reiff amoenissimo gaudet solo, cui partim Benacus lacus, vulgo di Garda appellatus, partim citreæ aureæque mali in littoreis clivis perpetuo virentes copiosas instruunt delicias. Adne-

xa illi Arx, quam Rocca Itali vocant anno 1124. a Civibus excitata, ingentibus dissidiis ancam, & fermentum præbuit: nam Meinhardus Tyrolensium Comes Ripense Oppidum, Ecclesiæ Tridentinæ eripuit, & licet ejus restitutionem anno 1290. promisisset, usque ad mortem tamen suam retinuit, nec nisi ab ipsius postmodum filiis redditum antiquo Domino redivit; sed Joannes Tridentinus Episcopus Ripam anno 1349. Mastino Scaligero Veronæ Domino, pignori obligavit; unde Scaligeri occasionem arripuerunt, oppidum cum adsita regione sibi afferendi: verum non multo post eam Mediolanensium Duci Joanni Galeatio relinquere coacti sunt; post cujus mortem Ripa cum suo agro ab Episcopis Tridentinis recepta sed anno 1440. a Venetis occupata est: hos inter, & Sigismundum Archiducem anno 1488. propter limitum controversiam inter Arcuanos Proceres, & Ripenses incolas exortam acre effebuit bellum, his Republica, illis vero Archiduce patrocinante: sopita tamen eodem anno flamma, intercedentibus Summi Pontificis, & Imperatoris Legatis, sed anno 1506. atrocius eruptura; & & quamvis post biennium Ripam convenienter Cæfaris Maximiliani nomine Tridentinus Præful, & Cy-  
pria-

\* Ineptam hanc etiologiae rationem esse vel inde evinces, quod metallorum venæ sub Sigismundo Archiduce detectæ primum fuerint; diu autem antea jam nomen idem locus tenuerit.

prianus Serentinus ab epistolis; ex Republicæ autem parte Zacharias Contarenus, quibus accesserant Jacobus Triultius, & Carolus Jufredus Mediolanensis Senatus Princeps, ibique inducias pepigissent; inito tamen mox Cameraci celeberrimo illo fœdere, in quo Summus Pontifex, Imperator, Galliæ. & Hispaniæ Reges in Venetos conspiraverant, sequenti anno ejus seculi nono Cæsareus miles Ripam expugnavit, quam Carolus V. anno 1521. Episcopo Tridentino restituit. Speciosum extra urbis moenia Templum tum forma, ac magnitudine præcellit, tum auro, & picturis renidet, cuius erigendi occasionem Cardinali Madrucio præbuit B. Dei Genitricis effigies, in columna, quæ inter marmoreos aræ summæ ornatus hodieque spectatur, expressa, multisque ab anno 1603. illustrata prodigiis cuius jam nimium cultus deferuit: D. Hieronymi Religiosis templi illius cura serius commissa est. Parochiale in urbe templum mole & marmore conspicuum præ reliquis eminet, e quibus illud, quod cives S. Rocho posuere, elegans est. S. Francisci quoque familia monasterium Ripæ habet, in ipso portu statua pulcherrima surgit D. Joannis Nepomuceni quam supremus Cæsareæ militiae Praefectus Antonius de Lindesheim anno 1735. erigi curavit.

## ROBORETUM.

**R**oboretum vulgo Italis Rovaredo, Germanis Rotfreit, ampla populo frequens & opulenta urbs, Athesi fluvio tribus infra Tridentum milliaribus alluitur, ab antiqua quercuum sylva nomen sumens, per quam Proceres de Castel Barco, angustum antea locum ampliarunt: anno 1416. Veneti Roboretum cum valle Lagarina cuius caput est, suæ ditioni adjecerunt, impositaque arce muniverunt: dum Sigismundum Archiducem, Comitem Tyrolis inter, & Venetos bellum anno 1488. ferueret, Austraci oppidum arcemque in suam potestatem redegere, paulo post tamen a Venetis recuperata. Rursus Tyroli junxit Roboretum Maximilianus I. Imperator, cui Noviodunense fœdus an. 1516. in perpetuum adjudicavit, inter urbis templo Parochiale D. Marco sacrum est, amplum satis venustisque altaribus e nitidissimo marmore, cuius venæ non procul Roboreto varii coloris reperiuntur, egregie ornatum. Monasterium a Guilielmo de Castrobarco anno 1319. fundatum, cum eleganti B. V. templo a Carmelitis incolitur: nec desunt aliæ Religiosorum hominum familiæ: observantium S. Francisci, & Capucinorum sanctimonialium D. Claræ, & quæ D. Francisci Salesii instituto vivunt, a visitatione B. V. dictæ: tum,

tum, & sacræ ædes Christi Redemptoris D. Thomæ Cantuariensis, suffragii pro animabus defunctorum S. Mariæ in monte, piorum hominum cultu frequens aliaque Literatorum quoque Societas M. Theresiæ Augustæ auspiciis recens hic instituta, non parum decoris urbi affert. Porro Roboretum incolas habet valde industrios, qui serica omnis generis conficiendi, & coloribus tingendi artem plerumque exercent, cui urbs incrementum suum debet. Arcem Præfectus cum Præsidio militum tenet. Prætoris qui urbi & adsitæ regio- ni jus dicit, magna est auctontas.

## SALURNUM.

**S**Alurnum oppidum ad Athesim Tridentum Bozanumque interjacet? inclaruit ob victoriam ab Euino Longobardo Tridenti Duce sub annum 576. adversus Francos partam, quod a mox addenis Pauli Diaconi (a) verbis diserte expri-  
(a) De  
Gest. Lang  
l. 3. c. 9  
 mitur, unde etiam de hujus oppidi vetustate solidum judicium ferri potest; sic enim ille scribit: *Dux Francorum Crannichis non multum post tempus Tridentum veniens, devastabat. Quem subsequens Euin Tridentinus Dux, in loco, qui Salurnis dicitur, suis cum sociis interfecit, prædamque omnem, quam ceperat, excusit, expulsiisque Francis Tridentinum Territorium recepit. Salurnensem Parœciam Ludovicus Tyrolis Comes, consentiente In-*

nocentio IV. Summo Pontifice, anno 1360 contulit Regularibus S. Augustini Canonicis, in propinquuo D. Michaelis Collegio, quod Welsch Michael apud Germanos audit, anno 1145. ab Udalrico, & Henrico Comitibus ab Eppan liberaliter fundato.

## STAMBSENSE COENOBLUM.

**S**Tambensi Cisterciensis Ordinis Cœnobio, & ad Oeni fluvii ripam quaternis supra Oenipontum milliaribus magnifice assurgent, initium dedit anno 1272. Meinhardus Carinthiæ Dux & Tyrolis Comes, Henrico ab Honstetten primi Abbatis muneri admoto; amplioribus autem donis illud cumularunt Austriæ Archiduces, ita ut inter præclara hujus eximiæ Religionis Domicilia merito celebretur. In insigni sacrarum reliquiarum, quæ hic coluntur, gazophylacio maximi aestimatur Caput S. Zachariæ Patris S. Joannis Baptistæ, quod an. 1360. ab Orientis Imperatore Joanne Palæologo transmissum fertur, Carolo V. Augusto, ab hoc Stambensi Cœnobia traditum est. Templi magnitudo ex altarium numero quorum XVIII. sunt, pro ipsius dignitate ad omnem elegantium insigniter ornata, argue re licet Solenne hic præterea fuit veteres Tyrolis Principes in exstructa a Meinhardo Crypta recon di,

di, in quam etiam Fridericus Austriæ Archidux illiusque filius pluresque alii illati fuere.

## STERCINGUM.

**S**tercingum, seu Stiriacum vulgo Sterzingen parva, sed comoda Urbs ad Hisarcum amnem, Oeniponto 7. milliaribus Brixinam versus recedit. Circumfita regio nis vulgare nomen Wipthal anfam præbuit Cluverio, antiquum Vipitenum in Antonini Itinerarii fragmento superius memoratum, istic agnoscendi, cui non tam vocabuli affinitas, quam itineris ibi descripti ratio suffragatur. Prostratos hic aliquando ab hostibus Romanos nonnullis argumento fuit lapis cum hac inscriptione: OSSA LEGIONIS DECIMÆ in Parochialis novi templi fundamentis effossus, quæ an. 1494 jaciebantur. Ordinis quoque Teutonici equites hic sedem habent & Capucini monasterium.

## SUACIUM.

**S**uacium vulgo Swaz trium horarum itinere infra Halam secus Oenum descendit, Oppidum ditissimis metallorum fodinis celeberrimum, nec solum propter amplitudinem, sed ob formam viarum, ac ædificiorum pulchritudinem, populique frequentiam conspicuis quibuique Urbibus merito annumerandum. In hoc Lambe-

*Topograph. Aust. P. I.*

cius Lazio secutus, vetus statuit Sebatum, quod in allegato jam alibi Itinerario Antonini Aquileia Veldidenam euntibus ante Vipitenum occurrebat; verum cuvis Tabulas consulenti patebit, nimis distorte, & per inutiles flexus sic institui iter, etiam si, prout suspicatur Lambecius, per Amanuensium lapsum Sebatum Vipiteno præponeretur, cui postponi debuisset; quare satius fuerit cum Cluverio fateri, certa Sebati vestigia evanuisse, cum solis milliarum numeris fidendum non sit, quos iterata toties descriptio non parum vitiavit. Interim nos invitant Suacienses thesauri in indicatis paulo ante fodinis reconditi. Detectæ hæ sunt anno 1448. sub Sigismundo Archiduce, cui Opulentis cognomen idcirco adhæsit, tantaque ibi multiplicis metalli, auri scilicet, argenti, æris, stanni, plumbique aliquando erat ubertas, ut anno 1560. triginta ferme operarum millia in iis laboribus occuparentur. Pereleganti descriptum stylo totum hoc metallicum opus ob oculos ponit Stephanus Vinandus Pighius, qui anno 1574. Carolum Fridericum Cliviæ, Juiliæ, & Montium Ducem per illustiores Europæ Povincias comitatus, illud curiose perlustravit. Unde a prolixiore ejusdem relatione hanc synopsim excerpam. In præruptis itaque, ac præcelisis circa Oppidum montibus permul-

H h

ta

ta hiant fodinarum antra, e quibus quidquid metallici exscindunt, carris evehunt, superfluaque in tumulos egerunt, & veluti montes montibus imponunt: nec procul inde absunt officinæ, ubi rivi ingentes per tubos in diversas partes deducti non modo folles elevant, flamasque in fornacibus excitant, plura alia simul ministria promptissimi peragunt. Antequam tamen metallica materia per has fornaces excoquatur, confleturque, diversimode paranda est; purarum enim venarum fragmina in capsulas conjiciunt, atque præferratis pistillis tundunt ab aquaria rota versatis, ac tenui mox cribro transmeantem pulverem secernunt, non transmeantem rursus pistillis subjiciunt, atque amplius tundunt. Lapides vero quibus metalla sunt mixta, primum malleis minui tradit, dein in lacunulis lavari, pallisque in alveo agitari, ac demum per cribrum transmitti. Sed ut aliquid etiam de fodinarum structura dicamus, ante earum ostium teste eodem Vinando, exspectabant operarii plures trusilia habentes vehicula, in quatuor ferreis rotulis currentia, quibus singulos advenas excipiunt, atque prælumentibus tædis per montis trabibus suspensi cavernas, & cuniculos vehunt, ad tria fere millia passuum, priusquam perveniant ad puteos, & ad aquarias machinas; ubi interim strepitus ingens aquarum subful-

cris per obscuros meatus labentium horrorem sœpius incutit. Post cæcam hanc viam patent profundissimi putei, ad quadrangulas interdum orgyas excavati, e quibus metallica faxa lapicidæ malleis acutis exscindunt, omnemque materialam haustoriis vasis e machina tractoria, quam duo volvunt, pendentibus extrahunt, trusilibusque vehiculis per cuniculum evehunt. In puteorum fundum per funes descenditur, in quos etiam recens aura follibus, ac ventilabris ad hoc paratis immitti debet, ne impuro aëre oppressa lumina extinguantur, aut Metallici suffocentur. Magno econtra labore evehenda est aquarum vis per montium fissuras in fodinas, puteosque influens, quod per mirandi artificii machinas a Vinando fusius descriptas binî duntaxat operarii perficiunt. Non tantum sub Sigismundo Archiduce, sed & sub Ferdinando I. Cæfare ingentes divitiæ ex inexhausto hoc thesauro eruebantur; docent enim rationum codices ab anno 1515., usque ad ejusdem seculi 64., solius puri, ac liquati argenti 2328500. marchas prodisse; ab illius autem obitu defecit plurimum metalli affluentia, ita ut eo ipso anno 1564., non nisi 17518. marchæ, nec ullo deinceps anno ultra 20000. ad ærarium pervenerint. Cupri copiam inde conjectare licet, quod quamvis argenti marcham quadraginta ad minimum

eupri pondo comitentur. Metallicorum hominum pietas, & gratus in Deum animus pro tam uberibus donis, sui insigne monumentum reliquit in Parochiali templo maximis sumptibus exstructo, quod altissimis columnis fulcitur, venusta turri ornatum ac ære tectum: D. Francisci quoque familia templum habet per amplum, marmoreis columnis incumbens. Præter sacrarum Virginum ascetarum plures sacræ ædes numerantur.

## TRIDENTUM.

**T**ridentum, vulgo Italis Trento, Germanis Trient, speciosa Urbs in plano fertilique solo, propinquis tamen alpium cuminumibus inumbrato, ad Athesim fluvium jacet, nomenque suum apud vetustos Geographos per celebre, quod a trium torrentium confluxu, vel a Neptuni hic præcipue culti tridente ortum creditur, etiamnum servat. Mentionem illius faciunt Strabo, Plinius, Ptolomæus, Antonini Itinerarium, & Peutingeriana Tabula: justinus a Gallis conditum refert. quare conjiciunt quidam a Brenno Gallorum Duce eam initium sumpfisse; alii jam a Tuscis sub Rhæto hoc commigrantibus inceptam malunt, & a Gallis postmodum ampliatam. Post Romani imperii ruinam, Ostrogothorum primo,

dein Longobardorum jugum subivit, qui singularem istic Ducatum ab Evino primo Duce obtentum erexere. Qua autem ratione temporale quoque, ut vocant, Urbis dominium Episcopo collatum fit, nunc aperiemus: Tridentinæ Ecclesiæ initium ad quartum Ecclesiæ sæculum referri debere constans est eruditorum opinio inque eo convenient. Virgilium pro tertio illius Urbis Episcopo habendum: quidquid contra afferant Brandisius, Pincius aliique: hic Virgilius familia equestri Romana ortus, Theodosii & Maxentiæ filius cum sub Damaso Papa, patria relicta cum binis fratribus in montana hæc loca secessisset, ab Abundantio Aquileiensi Patriarcha demandatam fibi Episcopalem Tridentinorum curam suscepit. Tanto interim studio munus pastorale gesse, ut paulo post viciniam idolis purgatam ad Christum adduxerit: tandem vero cum fanum Saturni in valle Rendera evertisset, ab Ethniciis in furorem actis, lapidibus obrutus Martyrii coronam obtinuit: crevit successu temporis piorum liberalitate Principumque munificentia Episcopatus, inter quos Conradus II. Cæsar extitit, qui Ecclesiam Tridentinam primus amplissima donatione, unde temporale ejus dominium fluxit, donavit. Atque licet crebras a Tyrolis Comitibus, & qui uxorio nomine Tyroli imperabat, Ludovico Mar-

chione Brandenburgi Bavariæ Du-ce, Maultaschiæ marito, hæc Ec-clesia sustulerit quibus illius atte-rebatur potentia, Austriaci tamen Principes Tyrolensi Comitatu poti- pristino statui cuncta restitue-runt: hinc cum antiquissimis tem-poribus Comites Tyrolis advoca-ti esent Ecclesiæ Tridentinæ, Al-bertus Episcopus ex Ortenbugicis Comitibus prognatus, idem jus de-nuo in Alberto & Leopoldo Ar-chiducibus Austriæ illorumque succe ssoribus agnovit; nec solum ad opem vicissim eisdem præstan-dam se obligavit, sed alia quoque pacta iniit quibus ditionem Eccle-siæ illis aliquo modo obnoxiam fecit. Hæc obligationis mutuæque defensionis pacta cum Friderico omnibusque deinceps successoribus repetita sunt, sed salvo Jure immedietatis, ut loquitur illorum testis Wilhelmus Im Hoff, nec non sessionis, ac suffragii in Imperialibus Comitiis, quæ Tridenti Præsules tanquam Imperii Princi-pes semper obtinuerant. Constitutum præterea a Maximiliano I. Cæ-fare fertur an. 1511., ut Episcopus Tyrolensis Provinciæ Conventibus interfit, de pace publica, salute ac defensione patriæ consilium confe-rat, suam æris partem secundum exigentiam pendat, econtra vero Tyrolis Comes, ea quæ Diœcefis Imperio debet. exceptis tantum impensis Cameralibus persolvat: Officiales hæreditarii hujus Epi-

scopatus sunt, Pincernæ Comites de Thun, Mareschalli Barones de Firmian nunc Comites, Camerarii Comites ab Arsio, Dapiferi Barones de Prato. Ab Episcopali dignita-te ad reliqua Tridenti decora con-versi spectabimus præter sublime, splendidumque Principis Palatium non pauca Templa, inter quæ ex-cellit Cathedralis Basilica a S. Vi-gilio Episcopo, Martyre primum erecta & DD. Gervasio, & Protasii MM. cultui dicata, in quam cum illatum fuisset sacrum ipsius conditoris corpus, S. Vigilius Tem-plum dici cœpit, ad magnificum, quo hodie nitet, splendorem per-piam Urbis liberalitatem postea evectum: ejus structura, cum ve-tustissima sit ac ex solido lapide maiestatem spirat; in media mole testudo surgit: latera peristiliis sunt ornata: in fronte forum am-plissimum patet. Sacellum in quo Christi Crucifixi effigies antiquissi-ma colitur eo picturæ & statua-riæ artis ornatu resplendet, ut ni-hil ad ejus decorum desiderari am-plius possit. Altaris statuas cele-berrimi Pauli Strudel Tyrolensis manus e pario marmore effinxit. Inter parochialia templo primum est S. Mariæ Magdalena, Clerico-rum Congregationis de somasca di-ctæ: alterum S. Mariæ majoris e solido marmore exstructum, orga-num habet, ob singularem artis præstantiam toto orbe celebrati-fimum: tertio S. Petri Sacellum

adhæret, tumba S. Simonis Martyris Tridentini insigne, ubi pueruli hujus nondum triennis corpus, in quod Judæorum crudelitas anno 1485. Christianæ Religionis odio defæviit, reverenter asservatur. Præter Societatis Jesu Collegium & templum marmore aliisque architecturæ ornamentis auctore P. Andrea Puteo Tridentino nitidissimum 5. numerantur in Urbe Religiosorum Familia: nempe Præbyterorum Congregationis S. Philosophi Neri, Eremitarum S. Augustini Monialium S. Claræ, Congregationis S. Ursulæ & fæminarum tertii Ordinis S. Francisci. Extra mœnia degunt Prædicatores ordinis S. Dominici, Minores & Reformati S. Francisci, Carmelitæ, Capucini & alterum S. Claræ monasterium. Sunt præterea oratoria & sacræ ædes quam plures decenti cultu & quædam ad omnem elegantiam adornatae: videlicet B. Dei Genetricis a Carmelo dictæ, S. Martini, B. V. ab Angelo salutatæ, suffragii pro animabus defunctorum. Porro Urbs non minus superbit palatiis & splendidis nobilium ædibus, quas inter Galasianæ mole & decore eminent, a maximi nominis heroe Mathia Comite Galasso Tridentino Cæsareorum exercituum Duce ædificatæ. Nobilium familiarum ingens Tridenti est numerus: incolæ alacri sunt ingenio & felici, si ab otio ad artes scientiasque excitentur: cumque

inter Germaniam & Italiam sint medii, utraque lingua utuntur. Loci vetustatem plures, qui super sunt, Romani lapides testantur. Verum maximam Tridento famam, gloriampque peperit Oecumenicum Concilium a Paulo III. Summo Pontifice ibi anno 1545 convocatum, cui initium datum est idibus Decembribus, ex Sanctissimæ Tradiis Parthenone ad S. Vigilii Baflicam instituta supplicatione, procedentibus tribus S. R. E. Cardinalibus legatis, Cardinali Madruccio Episcopo Tridentino, quatuor Archiepiscopis, viginti Episcopis, quinque Religiosorum Ordinum Præsidibus, & Ferdinandi Romanorum Regis Oratoribus. Accesserunt deinceps alii quamplurimi, ita ut universim septem Cardinales, tres Patriarchæ, triginta tres Archiepiscopi, ducenti triginta quinque Episcopi, septem Abbates, totidem Religionum summi Præfides, præter diversorum Regum, Principumque Oratores, & 146. alios Theologos numerati fuerint. Interim habitæ sunt in prædicto S. Vigilii Templo octo lessiones usque ad annum 47., quo ob graffantem Tridenti epidemiacam luem translatum est Concilium Bononiam, Hispanis Præfilibus Tridenti sustinentibus; donec anno 1515. a Julio III. pristinæ stationi restitutum, & in S. Mariæ Majoris Templo deinceps congregatum, tandem anno 1563. se-

dente in Petri Cathedra Pio IV. felicem exitum fuerit sortitum, cui præfentes subscripsere sex Cardinales, tres Patriarchæ, viginti quinque Archiepiscopi, centum sexaginta octo Episcopi, triginta novem absentium Præfulum Procuratores, septem Abbates, & totidem Religiosorum Generales, nimur Ordinis Prædicatorum, Minorum Observantium, Minorum Conventualium, Eremitarum S. Austini, Servorum B. Virginis, Carmelitarum, & Societatis Jesu. Est extra urbis mænia trans Athesim mons humilius quidem sed arduus & omni ex parte præruptus, quem accolædorsum Tridentinum vocant, vulgo Dostrent; admirandum naturæ opus, saxeæ molis instar se effert, in cuius crepidine celebre apud antiquos Verrucæ castrum stetit: id Theodoricus Gothorum rex apud Cassiodorum his verbis describit (a) est in mediis campis tumulus saxeus, in rotunditate consurgens --- totus mons quasi una turris efficitur, cuius ima graciliora sunt quam cacumina, & in mollissimi fungi modo superius extenditur, cum inferiori parte tenuetur --- hunc Athesis inter fluvios honorus, amæni gurgitis puritate præterfluit, causam præstans muniminis & decoris, castrum pene in mundo singulare tenens claustra Provincie; quod ideo probatur magis esse præcipuum, quia feris gentibus constat objectum; hoc opinabile munimen mirabilem securitatem, cui desiderium, non sit habitare quam vel externos delectat invi-

(a) Lib. 4.  
ep. 48.

sere? igitur longissime a vero aberrant, qui Verrucam sive ad Rorboretum, sive in clusa Veronenfi ad Athesim sive in castro Petræ ad Calianum querunt. In dorso Tridentino adhuc rudera arcis existant, cujus etiam in medii ævi tabulis frequens memoria.

## WILTINENSE COENOBIVM.

**W**iltinense Cœnobium, vulgo Wiltan, vel ut ab aliquibus scribitur Wiltau, & Wiltheim prope Oenipontum ad Meridionalem plagam situm, per vetustam quidem jactat originem, sed etiam fabulis involutam: Tutius itaque fidem habebimus Brandisio narranti, Candidi Ordinis Canonicos a Reginberto Brixinensi Episcopo, abscedentibus, aut prius dilapsis (si tamen aliquando fuerant) Benedictinis, in hoc Monasterium fuisse inductos anno 1130., decennio scilicet postquam S. Norbertus illius Ordinis fundamenta Præmonstrati in Dicecei Laudunensi jecisset, Marquardo Bruntrutano reliquis præesse iusso. Sub hujus decimo sexto successore Dominico Leor novam, eamque magnificam Templi molem Sigismundus Alphonsus Brixinensis Antistes coram Augustissimo Cæsare Leopoldo an. 1565. consecravit, nuper etiam sacra ædes B. V. sub quatuor columnis dictæ haud inelegans magnisque sumptu-

fumptibus excitata, in locum veteris successit. Premit hoc Wiltinense Cœnobium Veldidenæ ruinæ, cuius pervetusta celebritas, ac situs ex quatuor Antonini itineribus, quorum unum jam alibi dedimus, affatim elucet; indeque peculiaris ejus dignitas arguitur, quod terna itinera Veldidenæ terminet; id enim non nisi in famosioribus Civitatibus usurpare consuevit. Deprædicant ejusdem excellentiam circumiacentes agri, in quibus saepe etiam nunc antiqua numismata Romana, aliaque varia veteris Veldidenæ indicia fortuito reperiuntur. Inter hæc maxime eruditioni servit columna millaria ex candido marmore cum hac inscriptione. *IMP. CÆS. L. SEPTIMIUS SEVERUS PIUS PERTINAX AUG. ARABICUS ADIABENICUS PARTHICUS MAX.*

*PONT. MAX. TRIB. POT. VIII.  
IMP. CÆS. M. AURELIUS ANTONIUS PIUS. AUG. TRIB. POT. IIII. PRO. COS. ET IMP. P. SEP. TIMIUS GETA ANTONINUS VIAS, ET PONTES REST. AB. AUG. MIL. PAS. CX.* Stabat itaque olim circa viam publicam hæc columna ante Cœnobii portam, signabatque viam militarem, quæ ex Italia per alpes Augustam Vindelicorum ducebat, ab Imp. L. Septimio Severo, ejusque filiis M. Aurelio Antonino Caracalla, & P. Septimio Geta per millia passuum centum & decem Augusta scilicet Veldidenam usque restauratum: verum anno 1587. Ferdinandi filius una cum tribus aliis ejusdem generis columnis milliariis in illa ad Oenum planicie hinc inde repertis in Ambrasianam Arcem transferri curavit.

## S V E V I Æ P A R S.

**S**Uevia nobilissima Regio, cui a Septentrione adjacet Franconia, ab Ortu Bavaria, a Meridie Helvetiæ, Rhætiæque pars, & ab Occasu Alsacia, olim Regnum, dein Ducatus audiebat, hodie vero in diversa prorsus dominia discriminatur. Ager illi fertilis, cuius nulla portio inculta jacet, præterquam ubi lacus, aut sylvæ terram

occupant; in quibus tamen frequens piscatio, nec minor venatio aliarum rerum defectum ubertim supplent. Cæterum alibi frumentorum abundantia, quorum magna vis. Tota Provincia salubri aere gaudet, celebratissimis Urbibus, Vicis, & Castellis referta. Arces excelsæ natura, & arte munitæ. Circa montes, ferrum, argentum, alia-

aliaque metalla procreat. Gens populosa, & bello clara, Germanorum præstantissima a Plutarcho habita, cujus paulo altius originem repetemus, postquam antiquiores hujus oræ incolas descripsierimus.

Maximam Sveviæ partem a Vindelicis quondam infessam, & ab iisdem Vindeliciam appellatam nemo veteris geographiæ peritus in dubium revocat. De eorum tamen ortu, & genere non parum disputatur. Eos Servius Liburnorum, hos Amazonum propaginem autumat. Porphirio a Thracibus, quos Amazones patria ejecerint, eosdem derivat. Servii narratio, qua Amazones attingit, avide a pluribus excipitur, quibus allegati alias Horatii verlus favere videntur; ab eruditissimo tamen

(a) Rer. Aug. 1. 2. Velsero (a) inter fabulas merito rejicitur. Ab Illyriis saltem eos

(b) Vind. provenisse credidit Cluverius. (b)

& Nor. c. 3. Sed longe magis arridet Vellerus Vindelicos Rhætorum familiam ab initio arbitratus, qui privatam nuncupationem a Vindone, & Lycoco penes Augustam confluentibus defumpserint, ubi primariam eos fixisse sedem non obscure appetet. Certe sub unius Rhætiæ nomine, non Rhætorum tantum, sed & Vindelicorum terras fuisse a Romanis interdum comprehensas plerique fatentur, quod compluribus veterum testimoniis confirmat Clu-

verius, idque ex Rhætiæ finibus quos a Ptolomæo statutos alibi vidimus, clarus elucet; quinimo in Notitia Imperii Romani, in Antonini Itinerario, & apud Paulum Diaconum Rhætiæ secundæ nomine Vindelia indicatur. Hinc de finibus, qui illam a propria, seu prima Rhætia distinguebant, haud minor, quam de origine controversia. Ly-  
cum quidem fluvium posuit Ptolomæus, sed in hoc paßim erroris arguitur, plurium veterum scrip-  
torum textibus convictus. Horum (c) Lib. 7.  
non infimus Strabo, (c) qui Vin-  
delicos ad lacum Brigantinum us-  
que pertingere non semel afferuit.  
*Cui regioni. inquit, Istri, & Rheni  
fontes proximi sunt. Inter utrumque la-  
cus, & effusæ de Reno paludes - - -  
lacus habet insulam, qua velut Arce ad  
invadendos Vindelicos commodissime usus  
in navalibus pugnis Tiberius - - - Ad  
eum lacum Rhæti paululum adsunt, am-  
plius Helvetii, & Vindelici. Unde  
certo videntur Vindelici ab Oeno  
fluvio, qua se in Danubium exo-  
nerat ad lacum Brigantinum, ex-  
tensi fuisse, atque hinc Rhætiæ  
propriæ partem, & Helvetos, in-  
de Noricum spectasse. A Germa-  
nia magna Danubio arcebantur.  
Australes in alpibus terminos, qui-  
bus a reliqua Rhætia separantur, et-  
si, uti innuimus, difficile sit definire,  
propius tamen est, extremas tan-  
tum, & humiliores coluisse, quod  
ex Strabone colligit Vellerus, ubi  
ille ait: Vindelici autem, & Norici*

*montana exteriora tenent. Hæc de Vin-*  
*delicis, à quibus ad Svevos eo-*  
*rum successores pergamus.*

(a) De ma-  
re Ger.  
 Amplissimam olim fuisse Svevo-  
 rum gentem, diserte nos docet  
 Tacitus (a) sic eos describens:

*Nunc de Svevis dicendum est, quorum*  
*non una, ut Citorum, Teutonorumque*  
*gens: majorem enim Germania partem*  
*obtinent, propriis adhuc nationibus, no-*  
*minibusque discreti, quamquam in com-*  
*mune Svevi vocentur. Insigne gentis ob-*  
*liquare crinem, nodoque substringere.*  
*Sic Svevi a cæteris Germanis; sic Sve-*  
*vorum ingenui a servis separantur. Con-*  
*sonat Tacito apud Cluverium Æthi-*  
*cus: Germania, inquit, ubi plurimam*  
*partem Svevi tenent, quorum omnium*  
*gentes sunt LIV. Verum uno atque*  
*altero seculo post Taciti ætatem,*  
*cum Alemanni, Franci, ac Saxo-*  
*nes, Svevorumque trans Salam,*  
*atque Albim nationes, Gothi, Bur-*  
*gundiones, Vandali, Quadi, Mar-*  
*comanni, propriis, ac distinctis*  
*ab invicem nominibus clari habe-*  
*rentur, solos eos a Romanis dictos*  
*fuisse Svevos Cluverius censet,*  
*qui Borealem Danubii plagam No-*  
*rimbergam versus extensam incolebant,*  
*favetque utcunque illi Jor-*  
*nandes conterminos Svevis popu-*  
*los enumerans, quos in secundo*  
*ejus authoris textu videre est, a*  
*nobis, dum de Gotschevia agere-*  
*mus, alias allegato. Interim cer-*  
*tum illud est, non amplius tam la-*  
*te patuisse Sveviam, sed tantum*

*Topogr. Austr. P. I.*

in aliqua vastæ illius regionis par-  
 te subsequentibus post Tacitum  
 temporibus hoc nomen perdurasse;  
 sic enim scribit Orosius, (b) qui (b) Lib. 8.  
 seculo quinto florebat; *Insurrexe-*  
*c. 15.*  
*runt gentes Marcomanni, Quadi, Van-*  
*dali, Svevi, atque omnis pene Germa-*  
*nia. Et Æthicus apud Cluverium:*  
*Oceanus Occidentalis habet gentes Gothos,*  
*Thuringos, Herulos, Marcomanos, Lon-*  
*gobardos, Svevos, Francos, Alemamos.*  
*Cum tamen ex his populis Marco-*  
*manni, Quadi, Longobardi a Ta-*  
*cito inter Svevos referantur, quo-*  
*rum alia, apud eundem mentio*  
*et si ad situs intelligentiam non*  
*pertineat, eruditioñis tamen gra-*  
*tia non prætereundam putavi, ubi*  
*nimirum de Romanorum sacris ita*  
*differit: Deorum maxime Mercurium*  
*colunt, cui certis diebus humanis quoque*  
*hostiis litare fas habent. Herculem, ac*  
*Martem concessis animalibus placant: pars*  
*Svevorum, & Isidi sacrificat. Unde*  
*causa, & origo peregrino sacro parum*  
*comperi, nisi quod signum ipsum in mo-*  
*dum Liburnæ figuratum, docet adveniam*  
*religionem. Cæterum Svevi jam a*  
*prædictis gentibus dilcreti ad Da-*  
*nubii fontem paulatim ascende-*  
*runt, Alemannis, quorum sedes*  
*inde ad Rhenum, & Mœnum usq;*  
*protendebatur, aut ex Germa-*  
*nia prorsus recedentibus, uti Clu-*  
*verio (c) visum est, aut novos ho-*  
*spites secum mixtos tolerantibus.* (c) Germ.  
*aut. l. 2.*  
*Hinc est illud Pauli Diaconi: (d) Lib. 2.*  
*Liguria usque ad Gallorum fines extendi-*  
*c. 15.*

I i

tur.

tur. Inter hanc & Sueviam, hoc est, Allemanorum patriam, quæ versus septentrionem est posita, duæ provinciæ, id est, Rhætia prima & Rhætia secunda infra alpes consistunt. Tandem traje-  
cto Danubio in Vindeliciam seu se-  
cundam Rhætiam penetrantes Sue-  
vi, hodiernum Sueviæ nomen huic  
regioni indiderunt. Ex ea autem  
non nisi, quæ Clementissimo Au-  
striacæ Domus Imperio hæreditario  
jure subjacent, modo breviter  
exponenda seligemus.

Marchionatus Burgoviensis inter  
Lycum & Ilarum fluvios comprehen-  
sus, a primaria Urbe Burgo-  
via nomen sumit, quæ vulgo Bur-  
gow dicta a Mindela amne uno, an-  
tequam in Danubium influat, mil-  
liari alluitur, & quatuor milliari-  
bus Ulma in ortum recedit. Aliam  
preterea non ignobilem Urbem  
hæc ditio complectitur, nimirum  
Guntiam seu Guntsbergam, sex mil-  
liaribus Augusta remotam, quam  
Danubius, Guntia fluvio auctus  
præterfluit, & cuius præclaram  
memoriam nobis suppeditat pane-  
gyricus Maximiano Cæsari Diocle-  
tiani collegæ ab incerto authore  
dictus, dum cladem Alemannis,  
perpetuis Rhætiæ hostibus an. 284.  
ab eo inflictam his verbis deprædi-  
cat: *Captus scilicet Rex ferocissimæ na-  
tionis inter ipsas, quas moliebatur, insi-  
dias, & a ponte Rheni usque ad Danu-  
bii transitum Gutensem devastata atque  
exhausta penitus Alemannia. Urbibus*

adjicio celebriores religiosorum  
Ædes per hunc Marchionatum di-  
spersas. Wettenhausianum Cano-  
nicorum Regularium S. Augustini  
Collegium fundarunt Conradus &  
Wernherus Comites de Rocken-  
stein, nec non Gertrudis eorum  
mater. Conditus in hoc jacet Hen-  
ricus Marchio Burgoviensis, qui  
anno 1213. fine prole mascula e  
vivis sublatus, nobilissimæ suæ  
Prosapiæ finem imposuit. Fulten-  
bachense Ordinis S. Benedicti cœ-  
nobium Augustam inter & Dilin-  
gam longam jam numerat ætatem,  
utpote an. 730. a S. Vicerpo Augu-  
stano Episcopo constructum. Ele-  
gans Virginum Ordinis S. Benedi-  
cti Monasterium vulgo Holtz nun-  
cupatum, egregium est monumen-  
tum S. R. I. Mareschallorum Pap-  
penheim, Dornsberg, & Biberach,  
qui illud primitus, incertum quo  
anno erexere. Transiit hic Mar-  
chionatus ad Habsburgicam Do-  
mum anno 1282., quo Rudolphus  
I. Imperator in Augustanis Comi-  
tiis, habito Imperii Ordinum con-  
fensu, Rudolpho filio illum con-  
tulit, etiam Sueviæ Duci renun-  
ciato, cum anno 1269. Conradi-  
nus ultimus ex veteri stirpe Sue-  
viæ Dux Neapoli in Italia a Caro-  
lo Andegavensi capite plexus orba-  
tam successoribus hæreditatem re-  
liquisset.

Hohenbergensis Comitatus, qui  
a nonnullis solo Dynastiæ titulo in-  
dica.

dicatur, in Inferiorem, & Superiorum ab Arnoldo dividitur. Hic ad Nicri vulgo Necker vocati fontes jacet; ille vero cum eodem fluvio descendit. Superioris Caput est Castrum Hohenberga; Inferioris Rotenburgensis Arx in laeo Nicri littore, uno supra Tubingam milliario assurgens; quam Carmelitarum, & Capucinorum Cœnobia nobilitant. In adversa autem Nicri ripa Rotenburgo respondet Collegiata Ecclesia a Comitibus Hohenbergicis anno 1320. fundata, in qua Præpositus, duodecim Canonici, & quatuor Vicarii,

ut in Blavii Atlante legere est opulentis redditibus fruuntur. In valle insuper Rotenburgica profilit acidus fons certissima plurium morborum medicina

Spectant præterea hæreditario jure ad Augustissimam Austriacorum Heroum Profapiam ipse Landgraviatus Sueviæ a Wenceslao Imperatore anno 379 Archiduci Leopoldo pro 40. aureorum milibus Francofurti oppignoratus. Nellenburgensis Dynastia inter Danubium, & Brigantinum lacum inclusa, aliaque minoris nominis loca.

## RHÆTIÆ PARS.

**R**HÆTIÆ propria seu prima, quatenus scilicet a Vindelia discernebatur, præter lustratum ante Tyrolis Comitatum, & Grisonum ieu Canorum Rempublicam, quos vulgo Graubündner dicimus, nonnullas alias Regiones complexa est; Austriaco Sceptro hodieque subjectas, quas sub hoc titulo conjungemus.

Brigantinus Comitatus nomen suum vel a præcipua Urbe Brigantia in littore Constantiensis, olim Brigantini lacus sita vel a Brigantio fluvio in eundem lacum

(a) Lib. 2 prope Urbem illabente mutuatur.  
c. 12. Hanc Rhætiæ expresse inferit Pto-  
(b) Lib. 4 lomæus (a); Strabo (b) autem Vin-

deliciæ eam attribuere quamplurimi visus est, dum ita ab iis latine redditur: *Estiones*, & Brigantii ad Vindelicos pertinent: eorum Oppidum est Brigantium, & Campodunum: Verum non defunt alii, inter quos Egidius Schudus apud Schardium hunc Strabonis locum sic aliter interpretantes. Ferocissimi inter Vindelicos Licatii, & Clautenacii censebantur. Rhætorum autem Rhucantii, & Corvantii. *Estiones* vero, & Brigantii Vindelicos attigunt: eorum Oppidum est Brigantium, & Campodunum. In quam lectiorem magis propendo, cum post Rhætos Strabo Brigantios jungat, eos potius additurus Vindelicis,  
112

fi ad hos illos pertinere voluifet. Brigantinæ porro Civitatis, lacusque frequens est apud alios quoque veteres Scriptores men-

(a) Lib. 9. tio. Plinius (a) postquam mu-  
ciles, aliosque pisces cæteris præ-  
tulit: ita prosequitur: *Proxima est  
his mensa generis duntaxat mustellarum,  
quas, mirum dictu, inter Alpes lacus  
Rhætiæ Brigantinus æmulas marinis gene-*

(b) Lib. 15. rat Ammianus Marcellinus (b)  
ipsum lacum Brigantiam vocat com-  
muni cum Oppido nomine: *Rele-  
gens, inquit, margines lacus Brigantie.  
Et paucis interjectis. Rhenus lacum  
invadit, quem Brigantiam accola Rhætus*

(c) Cap. 24. appellat. Solinus (c) quoque hoc il-  
lum encomio celebrat: *Si Thracia  
e Gallia petenda, excipit ager Rhæticus  
opimus, & ferax, Brigantino lacu nobilis.* Brigantius vero amnis ex ejusdem hominis sylva profluens, antequam in lacum se exoneret, valles irrigat vini, frumentique fera-  
cissimas multis Pagis quasi confitas; at statim post fontes austerioritas multa, nec aliud fere, quam nemorum horror oculis obser-  
vatur. Parum infra Brigantiam Ur-  
bem in eleganti, commodaque la-  
cus crepidine obviat Augia Ma-  
jor, alias Brigantina venustissimum  
Ordinis S. Benedicti Cœnobium a  
SS Columbano, Gallo, & Magno  
inchoatum, quod postero tempore  
præclare restituit sub annum 1097.  
Udalricus Brigantiae Comes; ex-  
mia autem vitae sanctimonia præter

tres Conditores consecrarunt SS.  
Theodorus, Attalus, Walbertus,  
Deicola, Walericus, Bebo, Wa-  
redolenus, Kilianus, & recentiori  
ævo BB. Marbotus, & Diethus.  
Cæterum Brigantinum Comitatum  
Rudolphus Comes Montfortius,  
quem sub initium decimi tertii se-  
culi vixisse tradit apud Wilhelmum  
Im Hoff Arzetus, una cum uxore  
Elisabetha Palatina Tubingenſi ex  
ea stirpe primus obtinuit, a qua  
ad Austriae tota hæc ditio tran-  
fuit, partim anno 1450. ab Elisa-  
betha Wilhelmi Montfortii, filia  
Sigismundo Archiduci, partim an-  
no 1525. ab Hugone Montfortio  
Ferdinando Archiduci vendita.

Feldkirchensem Comitatum co-  
gnominat Feldkirchia, parva, sed  
elegans Urbs juxta Illam amnem  
non multo post in Rhenum influen-  
tem sita, vino abundans, & mer-  
cimonio frequens, quam alii Val-  
curium a Latinis dictam, nescio  
quo fundamento, arbitrantur. Alii  
congruentius ab antiquis Rhætis  
Campi nomen accepisse putant, ibi-  
que postea ab iisdem Christiana sa-  
cra edoctis, erecta D. Petro Eccle-  
sia, Campi Ecclesiam, seu germa-  
nicae Feldkirch eum locum audivis-  
se. Certe a mercatoribus ex Ita-  
lia huc sæpe adventantibus Campo  
di S. Pietro etiamnum appellatur,  
& in vetustioribus Curiensis Epi-  
scopatus monumentis ita de hoc lo-  
co legitur: *De Ecclesia S. Petri ad  
Cam-*

*Campos, id est, Feldkirchæ Beneficium, &c.* Quin imo si secundæ Strabonis interpretationi paullo ante allegatæ pressius inhæreamus, sane pro Campoduno Feldkirchiam Brigantinis propiorem potius intelligemus, quam Urbem Kampten ab iis remotiorem, & antiquæ Vindelicæ certo inclusam. Comitatum hunc anno 1376. Leopoldus Archidux a Rudolpho Montfortio triginta sex aureorum millibus emit, cui adjectit Dynastias Pludenz, Sargans, & Sacrum Montem ab Alberto Comite Werdenbergico, iis tuendis impari divenditas. Anno dein 1416. cum Archidux Ernestus Feldkirchiam Comiti Friderico Tockenburgico oppignorasset, nu-

merataque jam ab hoc pecunia, Archidux Fridericus Ernesti frater Urbem tradere detrectaret, hæc a Comite obsessa, in ejus potestatem devenit, sed a Friderico III. Cæsare postmodum redempta ad Austriae reddit. Fuggero (a) tamen (a) Spec. ista docenti adverbiatur Gerardus no. Lib. 4. de Roo, (b) qui non ab Ernesto, c. 5. sed a Sigismundo Imperatore post (b) Hist. proscriptum Fridericū Archiducem oppignoratam aliis Feldkirchiam refert.

Inter has duas ditiones hactenus descriptas interjacet Montfortensis Comitatus ab Austriae Archiducibus persoluto pretio pariter comparatus.

## C O N S T A N T I E N S E T E R R I T O R I U M.

**C**Onstantia, vulgo Costanz, vel Coftniz percelebris Urbs cognomini imminet lacui, sex, vel septem milliaribus longo, qui a Mela Venetus, ab aliis Brigantinus, & Podamicus, vulgo Bodensee vocatur, quemque Rhenus non procul Roßhago ingressus interfluit, coram Constantia in inferum seu Cellensem lacum transiturus, olim a Mela Acronium, nunc vulgo Cellersee vel Untersee appellatum:

quamvis alii in Acronio superum, in Veneto autem inferum a Mela expressum autument. Antiquam esse Urbem nemo ambigit, Romanam enim in ipso nomine præfert originem, licet apud nullum veterem authorem ejus memoria habeatur; nec nisi in tenebris palpant, imo prorsus a vero aberrant, qui Ptolomæi Ganodurum, seu Gavanodurum istic stetisse pronunciant. Proferunt alii, hanc Ur-

bem a Constantio Constantini Magni parente muris circumdatam, ab eo etiam nomen fuisse adeptam, sed verosimilius conjicit apud Braunium Picus, Constantio Imperatori Constantini Magni filio nomen Urbemque deheri, dum ita de Constantiensibus canit:

Quos Constantini proles oriente subacto  
Occiduas repetens stellanti murice terras  
Concidit, & proprio signavit nomine.

Constantiam illustrat Episcopatus Vindonissæ Helvetorum Pago nunc Windisch dicto, & sex milliaribus hinc in Occasum diffitto a S. Beato, quem Apostolorum Princeps D. Petrus consecrasse fertur, inceptus, & a S. Maximino, vel Maximo Episcopo sub annum 570. in hanc Civitatem translatus; inter cujus successores sanctitatis fama præ reliquis claruere: D. Gebhardus I. ex illustri, ut quidam censem Habsburgicorum Comitum sanguine, eoque pro Christi nomine anno 885. gloriose profuso longe illustrior: B. Nottingus Veringensis Comes ex S. Galli Monasterio ad Episcopalem Cathedram, hinc ad cœlestis regni solium seculo decimo evectus: D. Conradus Rudolphi Comitis Altorenensis filius ob terna Tempa SS.

Joanni, Mauritio, & Paulo Constantiæ extructa, atque universum patrimonium Episcopati donatum de Constantiensi Ecclesia optime meritus, & anno 974. ab hac ad triumphantem translatus: S. Gebhardus II. Brigantinus Comes, & Petrusiani Cœnobii fundator anno 995. terris erexit: B. Gebhard. III. Zeringia Dux, Bertholdi Alemaniae Ducis frater ex Hirsaugensi Asceterio ad Infulam, & an. 1110. ad immarcescibilem coronam evocatus. Capitulum 24. Canonicis constat, quorum Cathedralis Basiliaca D. Stephano sacra non modicam ædificii magnificentiam ostentat. Porro Constantiensis Dicecensis omnium Germanicorum amplissima præteritis seculis habebatur, idque maxime patuit sub Friderico Præfule ex Comitibus de Zellern, qui coacta anno 1435. Dicecana Synodo, initoque Ecclesiasticorum censu, sibi iubesse reperit 350. Monasteria. 1760. Paræcias, & supra 17000. Sacerdotum: & quamvis grassante postmodum per Sueviam, ac Helvetiam hæresi complures Civitates ejus jurisdictioni se subduxerint, late tamen adhuc Episcopi in sacris potestas extenditur. Neque minus prædiis, ditionibusque datur; tenet enim præter varia in Turgoia loca, Civitates Mersburg, & Marchdorff, quarum illa Comitibus de Rordorff quondam paruit.

ruit, nunc sedem, ac domicilium Constantiensi Antifiti, & S. R. I. Principi præbet. Inscriptitur præterea hic Episcopus Reichenoviæ Dominus, quæ alias Dives Augia dicitur, estque Ordinis S. Benedicti Cœnobium olim longe potentissimum, ex quo tredecim Archiepiscopi, & triginta quatuor Episcopi prodiere, & in quo Cœnobitæ S. Marcum Evangelistam, indignantibus Venetis, sepultum prætendunt. Jacet in situ ad miraculum eleganti, in insula nempe Cellensis lacus omnibus naturæ gratiis exculta, in qua illud condidit circa annum 742. S. Pirminus Meldensis Episcopus, primusque Augiæ Abbas, liberalibus Caroli Martelli subsidiis instructus, cumque non nisi nobili orti profapia ab initio reciperentur, tot in eo aggestæ sunt opes, ut annui proventus ad sexaginta millia aureorum ascenderint. An. autem 1540. quinquagesimus nonus Abbas Marcus a Kneringen post longas cum Episcopatu Constantiensi disceptationes, Abbatiae administrationem Joanni a Welza ejus Ecclesiam Præfuli transcriptis, a quo, annuente Summo Pontifice Episcopatui inserita est, auctusque Episcopi titulus. Verum Constantiam repetamus, quæ inter liberas Imperii Urbes olim recensita, Austriae Archiducibus jam diu subjicitur, ab anno scilicet 1548., quo Carolus

V. Imperator desertæ Catholicæ Religionis causa eam proscripsit, & postea libertate multatam Ferdinandi I. fratri suo subjicit, his conditionibus a Wilhelmo in Hoff allegatis: *ut ipsum, ejusque liberos, & hæredes pro suis Dominis imposterum agnoscant, eique fidem omnem, & obedientiam præstent, nec ab eis ullo tempore deficiant, neque fædus ullum ineant: decretis, quæ Ferdinandus, ejusque Praefecti de religione facturi sunt, omnino parant: in bellicis, aliisque negotiis ipsi, ejusque hæredibus præsto sint, & imperata faciant, sicut reliqui Provinciales.*

Celebratur quoque in annalibus Constantia ob famosissimum, & Oecumenicum Concilium an. 1414. ad tollendum schisma convocatum, quod in tres partes Catholicam Ecclesiam distraxerat, cum totidem federent Summi Pontifices, nempe Gregorius XII., Joannes XXIII., & Benedictus XIII., nec, quisnam legitimus foret, discerni posset, multis Regnis, ac Provinciis cuivis illorum adhærentibus; Deo tamen favente res feliciter cessit; namque Joanne, & Gregorio sponte abdicantibus, atque Benedicto, qui licet ab omnibus derelictus, ad obitum usque Pancolæ Hispaniæ Oppido Pontificatus insignia pertinaciter gessit, ex Concilii sententia deposito, electus est in verum Pontificem a Cardinalibus Constantiæ degentibus, & triginta aliis probis, eruditisque

viris pro ea tantum occasione ad jus suffragii admissis, Otto Columna, postea Martinus V. vocatus, atque ab universa Ecclesia ingeniti solatio agnitus, & adoratus. Animadversum insuper est ab hoc Concilio in binos Hæreticorum primipilos Joannem Hufsum, & Hieronymum Pragensem, ambos in suo errore contumaces, ideoque momentaneis flammis exustos, quæ æternis præluerunt. Dissolutum tandem est Concilium anno 1418. a Summis Pontificibus, & posterioribus Conciliis non integre approbatum, cui præter Joannem XXIII. Papam, & Sigismundum Cæfarem ferventem publicæ in Ecclesia pacis promotorem, interfuerunt teste Cochlae Cardinales viginti novem, Patriarchæ quatuor, Archiepiscopi 47., Episcopi 260., & cum his Abbatum, Præpositorum, & omnis generis Clericorum ingens numerus: secularium præterea Principum, Comitum, Baronum, Nobilium, & Oratorum maxima multitudo.

Si post Constantiam cum Rheno descenderis, post longum fluminis flexum, qui Scaphusia incipit, & in Urbe Keyserstuel fere definit, in quatuor Urbes, quas sylvestres vocant, incidet Austria cum Imperium itidem agnoscentes: ex quibus prima obviabit Valdhusta, vulgo Valdhust in Klegoviae Regiuncula, quinque miliaribus Scaphusia distans: secunda Lauffenburgum in rupe erectum, atque ab arte simul, & natura munatum: tertia Seckinga, seu Sandio, aut Secconium vulgo Seckingen a Rheni undis circumdata; quarta Rheinfelda, vulgo Rheinfelden Urbs munitissima duobus supra Basileam milliaribus posita, nec procul a ruinis Augustæ Rauracorum, sive Pago Augst remota, quæ magnam bellis materiam sæpius subministravit, & elapsa nuper seculo, uti & Lauffenburgum, sæpius ab hostibus capta, ac recepta, tandem juxta Monasteriensis Pacis statuta ad legitimos suos Dominos, Austriæ nempe Archiduces remigravit.



## BRISGOIÆ PARS.

**B**RISGOIAM, vulgo Brisgow regionem frumenti, ac vini feracissimam sècus Orientale Rheni latus protensam Austriæ Archiduces, ac Badensium Marchiones

inter se quondam partiti sunt. Præclariores illius Urbes merito habentur Friburgum & Brifacum alternas bellum vices sæpius expertæ? Friburgum vulgo Freyburg totius Pro-

Provinciæ Metropolis hodie censetur. Urbs est situ amoenissima inter montes excellens, a Bertholdo IV. Conradi I. Zeringenfis Ducis filio anno 1118. ex tenui Pago in Civitatis formam redacta & magnificis postmodum ædibus, Templic ac Cœnobiis exornata; immunitatibus prærita tantis ita crevit, sui ut ipsa juris fieri tentaverit: nuptiis postea in domum Comitum a Furstenberg illata, sæpius pro immunitatibus suis, cum novis his suis Principibus lites habuit persolutisque ducentis marcharum argenti millibus ab eorum se imperio exemit; sed cum persolutam a se pecuniam Austriacis Principibus a quibus mutuam acceperat, restituere nequisset, maluit eorum se subhicere Principatui. Sub his, vallis propugnaculisque instructa inter firmissimas Germaniæ Arces olim numerabatur. Annis 1632. 1634. 1638. Suecicis armis; Gallorum autem oppugnationi annis 1677. 1713. & 1745. succubuit; ab his operibus omnibus externis exuta militaris esse statio deficit. Brisacum olim Brisgoiæ metropolis Rheni littori in rotundum collem elevato incumbens, ab Antonino in itinerario, & a Luitprando Ticinensi qui sub Otone I. Imperatore floruit, sub Brisaci montis nomine memoratur

*Topogr. Austr. P. I.*

Urbs est valde elegans, populoque frequens, ob propinquas metallorum fodinas, uti apud Blavium legitur, maxime aucta. Olim inter Imperiales recensebatur Urbes: ab Ludovico V. Bavaro Imperatore Ottoni Austriæ Duci anno 1331. pignoris loco tradita est: & a Carolo V. 1548. Principum Austriacorum Dominio in perpetuum transcripta, claustrum Rheni adjectis operibus munitissimum ab iis redditum est: alterante crebro in bellis fortuna Dominum mutare aliquoties hæc Urbs coacta est: anno 1683. a Gallis expugnata ad Austriacos 1697 rediit: parem habuit hoc sæculo fortis: anno 1703. Francis cessit: pace Rastadtienfi Austriæ redita anno 1715. Tam remota a reliquis Austriacorum Provinciis, arx cum minus defendi & servari commode posset, ne hostile deinceps receptaculum fieret, Augustissimæ Mariæ Theresiæ jussu anno 1741. Vallis operibusque nudata fuit: in ejus arce perduravit diu vetusta turris a Bertholdo III. Zeringensi Duce excitata. Nomen suum hi Duces traxerant a Castro quodam Zeringhen cuius ruderæ, medio infra Friburgum milario in excelso monte etiamnum supersunt.

K k

F I N I S.



# MATERIA TENTAMINIS PUBLICI

QUOD  
EX ANNI HUJUS SCHOLASTICI  
P R A E L E C T I O N I B U S  
QUOVIS, CUI LIBUERIT, PERICLITANTE  
S U B I B I T  
I N  
COLLEGIO REGIO THERESIANO  
SOCIETATIS JESU,  
ILLUSTRISSIMUS DOMINUS  
M A U R I T I U S  
L. B. DE BRABECK,  
PHILOSOPHIÆ IN SECUNDUM ANNUM  
A U D I T O R.  
DIE MENSE SEPTEMBRI ANNO M. DCC. LIX.

---

V I N D O B O N Æ,  
TYPIS JOANNIS THOMÆ TRATTNER, CÆS. REG.  
A U L A T Y P O G R A F M I E T B I B L I O P O L Æ.

МАТЕРИАЛЫ  
СИМИАТИК  
ПУБЛИЧНЫЕ

EX ANNIS HUIC SCHOLASTICI  
PRAELECTIONES  
GEOGRAPHICAE, PRACTICAE,  
GEOGRAPHIA, ET INSTITUTA

COLLEGIORUM THEATRIS  
SOCIETATIS IESU,

MARITIMI  
J. R. DE BRAHEON


PHYSIQUE IN SECUNDUM ANNOS  
AUDITOR.

DE MINE SARTHEENSIS ADO DE DEC

---

АКИОДИНУС

САМОДЕРЖАНИЯ МОНГОЛСКОГО  
ГИ САХАРСКАГО ТАКАНСКОГО АУДИТОР



# THESES PHYSICÆ. ASSESSIO PHYSICÆ FUNDAMENTUM.

**A**ttractio, repulsio, vis inertiae sunt tres generalissimæ omnium Corporum proprietates, in sensu Newtoni acceptæ. Ultimam qui vocare velit vim status Conservativam, id pace nostra fecerit.

## LEGES.

**I**n minimis materiæ portionibus. Si Contiguæ sint, imo attractio proportionalis est magnitudini & extensioni Contactus. 2do infinites major est atractione in modica distantiæ; imo etiam gravitatem partium, quæ punctum contactus constituunt, infinites superat. At si cætio minimæ massæ portiones contiguæ non sint, attractio non reciprocum quadraticam, sed reciprocum cubicam distantiarum sequitur rationem.

*In magnis materiæ portionibus* imo omnium corporum attractio est mutua. 2do proportionalis massæ. 3to reciproce ut quadrata distantiarum si massæ sint æquales. 4to in ratione composita ex reciproca distantiarum & directa massarum si eædem sint inæquales. 5to si massæ portio in superficie sphæræ collocata a singulis ejusdem partibus trahatur in ratione distantiarum reciproca quadraticæ, erit tota illius attractio passiva inverse proportionalis quadrato distantiæ a Centro sphæ-

ræ. 6to intra sphæram pars quæcunque massæ undique æqualiter trahitur. 7mo si corpus attrahens sphæricum fuerit, Attractionis directio erit versus centrum. In sphæroide Corpora tendent versus focum vicinorem.

*Vis inertie* Corporis quiescentis proportionalis est massæ, corporis in motu constituti æquat totam motionis quantitatem; universim actio & reactio æquales sunt.

## DE CORPORUM SOLIDORUM PROPRIETATIBUS.

1. **S**I minimæ massæ portiones, ex quibus corpora constant, se contingant 1mo in planis plurimis & sat amplis, Corpus erit *durum*; si in planis paucissimis, erit *molle*; si in minimis, & fere in solis punctis, erit *fluidum*.

2. *Si menstrua* divisionem efficiant, dicetur *solutio*; effectus majoris attractionis inter menstruum & partes corporis, quam partium inter se. Si motus intestinus accedat, vocabitur *effervescentia*, *fermentatio*; effectus auctæ continuo celeritatis ex attractione & elasticitate. Si partes a menstruo attractæ per alterius Corporis accessum separantur, erit *præcipitatio*, si mere subsidant; si leviter crescant, *coagulum*. Utrumque turbatæ attractionis effectus.

3. *Si ignis* divisionem corporis causet, partesque extra sphæram activitatis ejiciat dicetur *combustio*. Si partes separantur quidem, sed intra sphæram activitatis maneant, erit *rarefactio*. *Transpiratio* fiet paucis extra sphæram ejectis cæteris intra eandem remanentibus. Hæc in omnibus tribus regnis locum habet.

4. *Si vis quæcunque* extranea partes dividat paucis extra activitatis sphærum ejectis, Cæteris omnibus remanentibus, erit *fractio*. Si nulla ita ejecta fuerit, separatae tamen omnes extiterint, dicetur *elasticitas*. Hujus sequentes sunt leges: 1mo actio & reactio æquales sunt. 2do post impactum ad eandem altitudinem Corpus resilit. 3to si oblique impingat, vi tanto majore agit, quanto magis ad perpendicularum accedit.

5. Corpora alia *electrica* sunt originarie, alia per communicationem. Effectus omnes explicandi sunt per vorticem non nunquam simplicem; aliquando duplēm materiæ cujusdam summe fluidæ, elasticæ; intra poros corporis tanquam tubulares capillares detentæ.

## DE CORPORUM FLUIDORUM PROPRIETATIBVS.

1. **C**omponuntur ex minimis, duris, figura diversis, levissime se attrahentibus partibus. 2do gravitant in loco proprio. 3to in solidis trans eadem perpendiculariter motis quantitatem motionis imminuunt; in oblique transeuntibus

bus insuper directionem mutant a perpendiculari, si ex rariore in densius trans-eant; & econtra. Sub angulo 5. graduum æqualiter resiliunt, atque inciderunt. 4to fluidorum pressio basi in altitudinem ductæ æqualis est. 5to in tubis communicantibus quibuscumque altitudo & vires utrimque æquales sunt in homogeneis. Si heterogenea sint fluida altitudines sunt reciproce ut gravitates specificæ. 6to si solidum intra fluidum demergatur amittit pondus æquale fluido extruso, quod tamen toti fluido accrescit.

## A Q U A.

1. **N**ulla datur pura. Modi eam examinandi sunt varii. Etiam marina potabilis reddi potest. 2. Si aqua *in terræ superficie in vaporem* soluatur is intra aeris poros & meatus tanquam intra tubulos capillares ascendet. **Hic** effectus nec expansioni aeris intra bullas, nec effluviis igneis solaribus, unum cum vaporibus Corpus constituentibus, attribui potest. Si igniculi quacunque de causa abscedant, nascetur ex vaporibus intra aerem receptis pluvia, nix, grando, ros &c. 3. Si aquæ *in vaporem solutio intra terræ succedit viscera*, is varia strata pervadet, subinde igniculis recendentibus in gutas concreset: hæ hidrophilatia replebunt & perennibus dabunt originem fontibus. Unde fontes Fluviique a pluviis & nivibus ortum habere non possunt. 4. *Aqua frigida* ob ignium defectum concreset primum in fila gracilia testante Maérano; tum in angulos, ac subinde in Corpus solidum. Non est nisi attractionis effectus. 5. Pro pluviarum & nivium quantitate metienda est cubus interne vacuus; præcognita provinciæ extensione. Vaporum copia exploratur sale, funibus, hydrometris &c.

## A E R.

1. **E**st fluidum sui generis. Gravitatatem perpetuo mutat; id quod jam ventis trituendum est, jam diverso vaporum intra aerem statui. 2. *Densitas* aeris exploratur *manuscopio*, gravitas barometro. Hujus tres sunt species: Torricellii, Hugenii, Hockii usitatisimæ; nullum omnibus incommodis vacuum. 3. *Corpora sonora* præter motum oscillationum etiam tremulum singularum partium habent. Si aer ab iis motum recipiat. *Sonus* dicitur. 4. *Tonorum diversitas* efficitur a pulsuum intervallis; *densitas* autem aeris clariorem aut remissiorem causabit tonum. *Intensitas* soni in diversis distantiis ut quadrata distantiarum reciproce decrescit. *Propagatio* tonorum undarum propagationi analoga est; unde omnes toni æquali celeritate progrediuntur. Trans Solida corpora si sonus propagetur; id vel sparso aeri, vel partium elasticitatib; tribuendum est. Trans fluida propagatur non tam mediante aere sparso, quam potius ob mobilitatem ipsius fluidi, omni impulsu se facile accommodantis. 5. *Echo* dependet ab aeris & obstaculi elasticitate. Syllabæ tanto plures redibunt,

quanto saepius 6. pedes inter obstaculum & instrumentum sonorum contineantur. Alia soni reflexi genera ad ellipsis aut parabolæ proprietates referenda. 6. Argumentum soni habetur ab aeris densitate, parietum elasticitate, crebris reflexionibus. Unde explicatio petenda tubarum, fidium, vocis humanæ &c. 7. Ventus oritur a turbato aeris æquilibrio; Causæ esse possunt calor, frigus, potissimum vapores terrestres. Venti perennes intra tropicos oriri nequeunt a rotatione terræ circa axem, sed oriuntur a calore solari potentissimo. Unde etiam dependet perpetua maris malitia in tractibus æquatori proximis, ventus periodicus maris indici. 8. Atmosphæræ altitudo certo determinari nequit, licet ejus gravitas certo sit cognita. Ex stupendo suo pondere multa creat incommoda, plura tamen aliis ex Capitibus commoda adfert.

## I G N I S.

1. Sola corporum expansio verum est præsentis ignis indicium. 2. Calor & frigus sunt motiones turbatæ & celerrimæ minimarum partium humani corporis, ita ut illa intensior sit hæc remissior: has anima numquam absolute, sed semper comparative respicit, ita ut calorem dicat, si minori motioni succedat major, & econtra. 3. Ignis non est mera minimarum partium motio, sed est fluidum proprii generis, subtilissimum, summe elasticum, per Corpora omnia dura, mollia &c. æqualissime distributum & sola activitate diversum, ita ut id quod nos ignem appellamus, quodve sensus nostros diversimode afficit, non sit nisi fluidi per omnia corpora æqualissime distributi, inæqualis vis & activitas; utpote quæ attritu potissimum nascitur, præcipue partium, quæ facile oscillant. 4. Pabulum ignis est oleum & alcohol tenacitate sua oscillationes igneas facile retinens, donec potentissimæ evadant. Reliqua combustibilis corporis principia vim ignis aliquando promovent. 5. Flamma non est nisi fumus ardens; fumus sunt partes crassiores corporis combusti, vi ignis excussæ. 6. Phosphorus & Pyrophorus a tractionibus & elasticitate partium acidarum dependent, celeritate fluido igneo communicata; idem principium habet ignis fatuus, dempto, quo<sup>1</sup> parum pabuli adfit; unde vis levior vixque sensibilis evadit. Fugientem sequitur, & econtra, eleuatus in auras stellas format cadentes. 6. Fulmen oriri potest primo per *excussionem*, dum pars nubis accensa per modum globi ignei ejicitur; Secundo per *electricitatem*, torrentibus binis electrici fluidi opposita directione incurrentibus; tertio per *propagationem* halituum ex nube & objecto illo, quod fulmine feriri judicamus, promanantium, & in spatiis intermediis accensorum. 7. Ignes *artificiales* ab aeris dependent rarefactione; potissimum autem a vaporum celeriori progressu atque diffusione, quam quidem aer circumfluus possit removeri, ut adeo pro hypomoclio iis deserviat, dum in corpora agunt eademque elevant. 8. Limites caloris & frigoris certi & determinati adhuc inventi non sunt. 9. Mensura caloris sunt Thermometrum

trum pro fluidis, aut minutis corporibus, Pyrometrum pro solidis. Multa sunt, quæ ad horum instrumentorum perfectionem desiderantur. Sunt autem Trebbeli, Florentinum, Farnheitii.

## L U X.

1. **L**ucis particula à Capillo quantumcunque exili quinquies millies billiones magnitudinis diametro superatur. Diffunditur a quoque puncto luminoso versus omne punctum sphæræ mundanæ non tamen instantaneæ, sed successivæ, & ita ut a sole octo circiter minutorum tempore propagetur. Non obstante tanta celeritate vis & impactus lucis adeo est exiguus, ut ad sensum sit nullus, dempta, retina oculi ob texturæ tenuitatem. 2. Partes, quæ radium componunt, diversam habent *inflexibilitatem refrangibilitatem & reflexibilitatem*; sunt adeo partes heterogeneæ natura & magnitudine diversæ, quæ sola celeritate dempta differunt in omnibus. Inflexio & refractio explicari non possunt a minore densioris medii resistentia, in quod in utroque casu lux perveniret; utraque non nisi attractionis est effectus. Inflexio lucis non fit in immediato contactu superficie, sed in aliquantula ab eadem distantia. 3. Origo lucis requiri non potest seu in materia subtili Cartesiana, seu in Æthere quodam subtilissimo & infinitis vacuolis prædicto. Dicendum est materiam luminis non esse, nisi corporum luminosorum profluviū, ab eorundem substantia avulsum atque ad modum tenuissimæ flammæ in omnem partem sparsum & diffusum; insuper fluidum luminosum a fluido igneo distinctum non est. 4. Corporum *Diaphanorum & Opacorum* natura repeti non potest a situ pororum ordinato, aut inordinato: in causa sunt partium, quæ Corpus constituunt, natura heterogenea, major aut minor adhæsio, pororum amplitudo varia; unde tractionum, fractionum diversitas, atque inde orta lucis confusio, disjectio, absorbtio, adhæsio. 5. *Color* est heterogenearum lucis partium diverfus in retina oculi impactus atque impressio, quæ pro diversitate virium atque motus, quem causat, denominationem obtinet jam coloris rubri, aurancini &c. Omnia partium simultaneus impactus vocatur candor; Hinc autem falsum est colores dependere ab homogenei cuiusdam fluidi modificatione, ut Cartesiani sentiunt. Ex iisdem Principiis pendet *Halo, Parelium, Parafelene*. 6. *Colores permanentes* præter partium lucis heterogeneitatem, habentur ex diversa superficierum & lamellarum, ex quibus corpus constat, densitate & magnitudine; Hinc varia lucis reflexio & refractio, radiis aliis transmissis, aliis absorptis, aliis versus oculum reflexis, prout ipsarum lucis partium natura, & ad objecti superficiem proportio poposcerit. Objecta, quæ omnem lucem reflexerint, alba dicentur; quæ nullam, denominationem obtinebunt nigri. Alia Colorem illum exhibebunt, cuius naturæ reflexerint radios. Ex colorum horum combinatione infinita propemodum veritas existet. 7. Optica radium contemplatur via recta procedentem, qui ad modum coni lu-

minosi abscedit, ita ut illius intensitas in diversis distantiis sit reciproce ut quadrata earundem distantiarum; Unde objecti claritas, umbra, varius oculi status, & pupillæ perpetua mutatio dependent. Dum radii in retina oculi imaginem pingunt, ea erit primo inversa; secundo tanto major, quanto objectum est propinquius. Hinc judicium illud dependet, quo de objectorum distantia solo obtutu decerninus. Hinc porro est, quod objecta situ parallelo posita convergere, circulum occupantia in linea recta consistere, alia protendi, alia introrsum cedere apparent. 8. *Catoprica* fundamentum est, quod angulus incidentiæ semper fit æqualis angulo reflexionis in speculis quibuscumque vitreis, metallinis, planis, convexis &c. Si speculum sit planum, objectum tanto intervallo post illud apparebit, quanto extra illud abest; idque in puncto intersectio-  
nis Catheti incidentiæ & radii reflexionis. In uno speculo piano non nisi unum apparere potest objectum. In machina Catoprica objectorum numerus eo ma-  
jor exhibebitur, quo duorum speculorum minor extiterit angulus. Si speculum sit convexum radii incidentes post reflexionem divergent, Imago objecti in ea, qua extra speculum abest, distantia non exhibebitur, sed multo propinquius ad speculi existet convexitatem; minor etiam, quam re ipsa fit apparebit. In spe-  
culo concavo radii convergunt; illi qui sub minori quam 60. graduum angulo in-  
ciderint, reflectentur ad sensum versus commune punctum, quod focus dicitur.  
Pro speculis ustoriis segmenta sphæræ 18. gradus excedentia gratis adhibentur.  
Ex contemplatione viæ quam radius reflexus tenet, erit focus in aliquantum  
minore a speculo cavo distantia quam quartæ diametri partis illius sphæræ, cu-  
jus portio & speculum. In speculis Cylindricis & conicis deformatæ exhiben-  
tur imagines. 9. *Dioptrica* de radiis agit refractis, dum ex uno in aliud trans-  
eunt medium. Lentes vitræ convexæ radios in focum convergere faciunt; transCon-  
cavas radii divergunt; hinc objecta trans illas majora, trans has minora appa-  
rent. 10. *Oculus* quinque componitur membranis, tribus humoribus: singulo-  
rum insignis est usus. Ab humoris Crystallini dispositione alii dicuntur *myopes*,  
alii *Presbitæ*. *Strabonismus* non bene repetitur cum de la Hire a male af-  
fecta retina oculi in eo loco, quo axis opticus dirigi deberet; forte D. Ju-  
rin malum hoc felicius derivat a diversa binorum oculorum dispositione, quo-  
rum unus myops alter fit presbita, unde oculorum contorsio ad procurandam  
utrobique æqualem anguli visorii magnitudinem. Probabilissime refundi potest  
in brevitatem & rigorem nervorum, quibus oculus appensus est. *Cataracta* si  
humorem Crystallinum obfuscaverit nullum supereft remedium, nisi ejusdem ex-  
sectio. Homo ejusmodi, nisi firmatis supra nasum lentibus neque remota, neque  
propinquâ videbit objecta. 11. *Instrumenta dioptrica*. *Perispicilia*, seu lentes binæ,  
aliæ servient myopibus aliæ presbitis & senibus. *Cameræ obscuræ* quis usus & constru-  
ctio? quis *Polemoscopi*? Telescopii hollandici rarus est usus. cur? quomodo con-  
struendum ut terrestre evadat? telescopia ob lentes vitreas, quibus constant vi-  
tiis sunt subjecta; Gregorius Aberdeen construere cœpit *Cato-dioptrica*, que-

observationibus astronomicis accommodavit Newtonus. Quæ horum construc-  
ctio, usus, radii via? *Microscopii* simplicis augmentum æquale est quo ex  
divisione distantiae octo digitorum per distantiam foci: unde, si in *microscopio*  
*Wilsoniano* afflumatur lenticula —  $\frac{2}{15}$  pollic: erit augmentum objecti in so-  
liditate 64. millionum. *Microscopia* composita objecta sub majore campo  
exhibent, quam simplicia; sunt tamen iis longe postponenda: Augmentum eo-  
rum commodissime exploratur tentando ope scalæ & Circini, relictis calculis,  
qui sunt intricatissimi. Alius modus *Lebenhoekii*, alias *schmithii*. *Microscopium*  
solare non est nisi laterna magica, illius augmentum invenitur dividendo  
distantiam parietis per focum lentis.

## DE CORPORUM CÆLESTIUM PROPRIETATIBUS.

1. O bseruator nocturnus cur stellas alias vocabit fixas, alias erraticas &  
planetas? quid de fixarum magnitudine, constellationibus notandum?
2. qua methodo astronomi advertant planetas circa solem revolvi, & circa  
axem proprium? Via planetarum quæ sit?
3. Inæqualitas, quæ in motu pla-  
netarum advertitur, partim est apparenſ & optica, partim realis.
4. Non mo-  
ventur in orbitis circularibus sole seu in medio sicut *Ptolemaici* afferunt, seu  
extra centrum orbitæ collocato ut prætendunt *Tychonici*. Eorum orbitæ  
sunt veræ ellipses sole unum focorum occupante.
5. Si corpus quodcunque  
duabus viribus, horizontali una, altera versus punctum stabile directa agatur,  
fiet ut curvam describat virium mutuæ habitudini proportionalem, in qua radius  
vector æqualibus temporibus æqualia conficiet triangula.
6. Planetæ gravitant  
in solem, & ab eodem attrahuntur: vicissim autem sol mutuam eorum tractio-  
nem patitur. Unde
7. Planetæ non moventur in vorticibus ellipticis quos ma-  
teria quædam subtilis affectaret;
8. Revolvunt circa solem propter vires bi-  
nas, quibus aguntur, unam centripetam, alteram centrifugam; ex quibus dia-  
metrorum & celeritatis partim vera partim optica dependet mutatio.
9. Rota-  
rio planetarum circa axem peculiaribus tribuenda est tractionibus.
10. Cometæ  
non sunt corpora ex planetarum exhalationibus temere orta; sunt mundo  
coœva, quorumve motus cum illo planetarum exactissimam habet analogiam;  
Neque in alio differunt, nisi in directione, orbitæ excentricitate, quæ apud hos  
non nunquam in immensum abit: unde eorum motus in accessu ad solem non ra-  
ro rectilineus, nunquam autem spectabilis per totam revolutionem. Quod om-  
nium redditus certo prædicti non possit, plures sunt causæ.
11. In iis dignoscendis  
attentendum est ad solam orbitæ directionem & velocitatem angularem.
12. Cauda Cometarum ortum habet partim a calore & situ solis, partim ab ipso Co-  
metæ motu celerius atmosphæræ suæ parte promoto.
13. Systemata planetaria

celebriora extiterunt: Ptolemaicum, quod a nullo jam sustinetur. Tychonicum non placet. Copernicanum reliquis anteponendum; Unde terram tanquam verum planetam in orbita sua circa solem revolvi afferimns. 12. Seriem & successionem orbitalium, in quibus planetæ moventur, ostendimus ex eorum revolutionibus, dimensionibus astronomicis, & ecclipsibus, quas unus ab altero suffert. 13. Saturnus jam ansatus appetet, jam fasciatus, jam brachiatus; sunt apparentiæ ex diversa ad oculum positione. Jupiter jam pluribus zonis cinctus appetet, jam unica; id fit a maculis diversimode oppositis: revolvitur circa axem, quemadmodum & mars. venus phases patitur, Mercurius raro conspicuus. 14. Luna superficie irregulari in montes protuberante. Maria, Lacus, flumina an contineat, atmosphæra an circumdetur incerta sunt omnia. Inter tempus illius periodicum & Synodicum qualis distinctio? Illius Phases oriuntur a differenti situ respectu terræ & solis. 15. Sol maximam partem est igneus. Magnitudo & copia macularum est varia; moventur ab ortu in occasum, in limbo diutissime hærent, in averso solis hemisphærio longius morantur; sunt meræ apparantiæ opticæ, ex quibus tamen motus solis circa axem deducitur. 16. Ecclipsis solaris & lunaris qua ratione accidunt? quis limbis prior obscureatur? Quando futura centralis, totalis, partialis? 17. Terra figuræ est ellipticæ ad polos compressæ; illius motus circa axem diem & noctem efficit. At vero ex motu illius annuo in orbita sua & ex axis parallelismo dependent diversa anni tempora, & dies jam longior jam brevior.

# QUÆSTIONES EX HISTORIA,

Ab extincto Imperio Romano usque ad interitum  
Imperii Orientalis.

**Q**uis Status orbis Sæculo V. ad finem vergente, & quæ regna ex ruina Imperii Romani orta?

Qui Franci, quis genius & character Clodovei. Quo pacto Franciæ fundavit regnum. Qui Burgundiones & Visigothi ab eo victi?

Quomodo divisit regnum: Quæ causæ civilium bellorum?

Quid de Theodorico Ostrogothorum Rege? Quomodo occupavit Italiam?

Quid

Quid de Zenone & Anastasio. Qui pervenit ad coronam Justinus?

Quid de Justiniani Imperio? Unde Barbari sub illo debiliores? Quæ sua debant expeditiones contra eos? Quibus mediis suscepit? Quæ causa successum? Unde turbæ sub Justiniano? Quid de illius juris prudentia, quid de Zelo religioso sentiendum? Quid de arcibus & ædificiis ab eo exstructis? Quid de Theodora ejus conjugi? Quomodo Longobardi Italiam sub Justino II. occuparunt? Unde tot privilegia Francis concessa ab Imperatoribus Orientalibus? Quomodo se illi & Reges præsertim Austrasiæ tum gesserunt in bellis Italiæ, & quis eorum finis?

Quæ Francorum prima contra Hispaniam expeditio, & quid de Leuvigilde notandum? Quid de Vitiza, cur arces destruxit omnes, & quam imprudenti confilio? Quis character Roderici, a quo evocati eo regnante Saraceni, Quæ sors Roderici & Hispaniæ, quæ causa tam cito eversæ hujus Monarchiæ?

Quæ Saracenorum origo? Quid de Mahomet? Quis status Imperii Orientalis cum ille prodivit? Quis Heraclius. Quæ sub eo turbæ in Ecclesia?

Quomodo debilitatum Imperium? Unde Mahomet suæ sectæ ideam concepit?

Quæ illi immiscuit dogmata, & quare? Quomodo gentis suæ gerio adaptavit?

Unde tot ad eum accurrere profelyti? Quæ initia & successus? Quare Saraceni primum movere in Persas, unde hi debiliores? Unde tam rapidæ victoriæ? Quas occuparunt Provincias?

Quomodo post Dagobertum I. Merovingiorum regnum corruere in Francia cœpit? Qui Majores Domus, quale olim illorum munus fuerat? Qui creverunt? Quis hic regum defectus?

Quo prætextu Pippinus Heristallius arma in Theodoricum III. movit? Quæ initia Caroli Martelli: cur nec regium ipse nomen assumpsit, & tamen Theodorico IV. defuncto thronum tamdiu reliquit vacuum? Quibus mediis Pippinus thronum concendit? Cur Pontificis ad hoc usus est opera?

Quæ ergo Pontificis conditio & quid coëgit Zachariam ad Francorum opem recurrere? Quid de hæresi Iconoclastarum? Quis Leo Isauricus, quomodo ad imperium pervenit? Qui se gesit erga Imperatorem Gregorius II.? Quid populi Italiæ accepto de abolendis imaginibus decreto fecerunt?

Quo jure imploravit Papa subsidium Pippini? Quæ hujus in Italiam expeditiones? Quid Pontifici dedit?

Quid Carolo M. ad potentiam profuit maxime, an juste exclusis nepotibus occupavit Franciam?

Quare Hadriano I. Papæ adstitit, unde facile illi fuit vicitis Longobardis tantum fundare Imperium?

Quid de ejus bellis cum Saxonibus, Slavis, aliisque septentrionalibus populis?

Qui Imperium refuscitavit ? Quid de zelo illius pro Ecclesia ?  
Quæ eo regnante facies orbis Politica, Oeconomica, Militaris, Religiosa ?  
Quis C. M. Character ? Quæ causa coruentis tam cito Monarchiæ a

C. M. fundatæ ?

Quis Ludovici Pii successoris & filii character ?

Quid de divisione Imperii ab eo facta ? Quomodo mortuus ?

Quæ divisio Franciæ post mortem Ludovici Pii ?

Quandonam Germaniæ primum Regnum separatum a Francico ?

Quomodo stirps Lotharii I. extincta ? Quid notatu dignum in elevatio-  
ne Caroli Calvi ad Imperium ?

Quis genius Caroli Crassi ? Quæ de Arnoldo Ludovico IV. in Germa-  
nia, Carolo simplice in Francia ?

Quomodo invalescere cœpit Regimen Feudale ? Quæ prima in Histo-  
ricis Feudorum indicia ?

Qui cœpere in Franciam & Germaniam introduci ? An Regibus con-  
sentientibus ?

Qui majores & minores Vasalli, Duces, Comites, Barones, Seniores,  
Pares &c.

Quis sub hoc Regimine Reipublicæ status in Oeconomicis, Politicis,  
Militaribus ?

Unde potestas Episcoporum & Monachorum temporalis ?

Quomodo hi facti a Principibus independentes ?

Quæ origo præcipuorum Episcopatum in Germania ?

Quomodo Carolovingii excidere Throno Francico & Germanico ? Qui  
hoc in Francia sine turbis contigit ?

Quis iis extinctis status Italiæ ? Quando invaluit Regum electio in Germania ?

Qui Normanni, qui sub Arnoldo Germaniam Franciam & Galliam vastra-  
bant ? Unde a saeculo IV. usque ad hoc, ex Septentrione tanta colluvies  
hominum prodit ?

Quomodo se sub Rollone stabilierunt Normanni in Francia ?

Quomodo penetrarunt in Angliam ?

Quæ summarie Angliæ Historia ab excessu Romanorum ex hac insula ?

Quis Alfredus M. ? Quid de ejus victoriis & Politicis institutionibus ?

Quis ejus character ?

Quis genius Henrici Aucupis ? Quomodo statum in Germania ordinavit  
Civilem & Militarem ?

Unde Hunni Imperio facti erant molesti ? Quomodo domiti ?

Quid Ottonem in Italiam vocavit ? Quo successu ibidem cum Guidone  
& Berengerio pugnavit ?

Quid de Roma, & iis, quæ cum Pontificibus gesstis Otto, notandum ?

Quis Ottonis M. character ?

Quod

Quod systema politicum cedere cæpere Itali sub Ottone II ?

Quid de Henrico II. ? Quid de Periodo Imperatorum Saxonorum  
memorandum ?

Qui tituli, quæ domus præcipuae in Imperio ?

Quid de Imperio Græco & schismate Pothii ? Qui in hoc se gesserunt Pontifices ?

Quæ expeditio Normannorum in Italia ?

Quid de Henrico III. Imp. ? Quo successu in Italiam ivit ?

An recte Normannis admisit, sedem ut in Italia figerent ?

Cur Leo IX. & Nicolaus II. cum iis inivere foedus ?

Quæ jura Regibus Siciliæ in Sacra ? Unde hæc iis collata ?

Quæ origo opinionis de superioritate temporali Pontificis ? Quomodo refutatur ? Quæ causa veræ famosæ litis Gregorii VII. cum Henrico IV. ?

Quæ causæ faciebant, ut Pontifices se opponere auderent Imperatoribus ?

Quare Mathildis ita animata erat in Henricum ? Quid de donatione terrarum ab ea sedi Apostolicæ facta sentiendum ?

Quomodo mortuus Henricus IV. ? Quid de ejus filio Henerico V. ?

Quomodo finitæ cum Papa turbæ primis Concordatis ?

Quid de Lothario II. ? Quæ causæ debilitatæ sub Periodo Imperatorum Franconum Cæsareæ potentiae ?

Quid de Philippo I. & Ludovico Crasso in Francia ? Quo jure & quibus mediis Guilielmus Conquirens occupavit Angliam ?

Quid hic peccatum a Regibus Franciæ ?

Quæ origo expeditionum Cruciatarum, qui Turcæ ? Quis Petrus Heremita ? Quare Pontifices has expeditiones probarunt, unde tantus ad eas conflusus, quis primæ successus ?

Quæ origo Ordinum Militarium S. joannis & Templariorum ?

Quomodo domus Suevica ad Imperium pervenit ? Quæ origo factionum Guelphorum & Gibelinorum ?

Quid de Friderico Barbarossa ? Unde tot bella habuit cum Italis.

Quod horum systema tum Politicum invaluerat ? Quæ origo litis cum Pontificibus, cur renuit agnoscere Alexandrum II. ?

Quæ causæ, ob quas succubuerit Imperator ? Quæ revolutio in Germania, domo Guelphica terris suis ejecta ?

Quæ causa novæ expeditionis cruciatæ ? Qui capta a Saracenis Jerosolyma ? Quomodo mortuus Fridericus ?

Quæ origo Ordinis Teutonici ? Quid regimen municipale ? Quare tota Europa a Principibus & quando introduci cœpit ?

Quomodo Neapolim & Siciliam acquisivit Henricus VI. ? Quid de Philippo & Ottone IV Imperatoribus notandum ?

Quæ expeditio Ottonis contra Francos ? Quid de Philippo Augusto Joanne sine terra ?

Quomodo Anglia Pontifici facta tributaria ? Quæ origo Parlamenti Anglici ?  
quas habuit sequelas ? Quo pacto successit in Germania Ottoni IV. Fridericus II. ?  
Quæ revolutio sub eo contigit Constantinopoli ?

Quæ ratio vera , quæ prætensa dissidiorum Friderici cum Gregorio IX. ?

Quid de Concilio Lugdunensi ? Quæ turbæ in Germania ? Quomodo exstincta domus Babenbergica in Austria & Landgraviorum Thuringiae ? Quibus sequelis ? Unde tot privilegia Austriacis ab Imperatoribus Suevis concessa ?

Quomodo mortuus Fridericus II. ? Quid post ejus mortem contigit ?

Quid de S. Ludovico Franciæ Rege ? Quomodo domus Andegavensis ad thronum Neapolitanum pervenit ?

Quo pacto exstincta domus Suevica ? Quid de interregno ? Quid de Collegii Electoralis exordio , de Vicariis Imperii , de confederationibus Rhenana , Anseatica , de Ganerbinatibus , Austreguis , pactis confraternitatum & successionum ? Quidque de iis omnibus censendum ?

Quis Rudolphus Habsburgicus ? Quid de ejus stirpis origine ? Quomodo ad Imperium pervenit ?

Quæ sub eo initia domus Hohenzollerianæ ? Quomodo Austriam , Sueviam que domui suæ intulit Rudolphus ?

Quid cum Ottocaro Bohemiæ Rege actum ?

Quid de Philippo Pulchro Franciæ Rege & Bonifacio VIII. P. M. ?

Quare se fœdere conjunxit Albertus Austriacus cum Philippo pulchro ?

Quæ sub Alberto orta lis de Bohemiæ Regno ? Quomodo Domus Luxemburgica ad hunc thronum pervenit ?

Quæ origo Helveticæ libertatis ? Quæ facies Italiæ sub Henrico VII.

Quomodo & cur Pontifices Romani Avenione post Clementem V. manserunt ?

Quid de Templariorum ordinis extinctione sentiendum , hæc quomodo peracta ?

Quæ causæ odii contra eos in Philippo Pulchro ?

Quid de Ludovico Bavarо , quomodo Imperii coronam sibi afferuit ?

Quid de lite illius cum Joanne XXII.

Quid in hujus electione notandum , an accusatur merito erroris in fide ?

Quæ Austriacorum sub Ludovico incrementa , cur tam pertinaciter illi negata a Pontificibus absolutio ?

Quæ machinationes contra eum Joannis Bohemiæ Regis ?

Quomodo domui suæ intulit Hollandiæ Comitatuum ?

Quid de Philippo Valesio & Eduardo III. notandum ? Unde origo odii Gallos inter & Anglos ? Quomodo Carolus IV. pervenit ad Imperium ? quis ejus character ?

Quid de Bulla aurea ab eo edita ?

Quas habuit sequelas , redditus Pontificum Romam ?

Quis Character Wenceslai Imperatoris , cur depositus ?

Quis status Italiæ sub Roberto Bavarо ? Unde infelix illius in eam expeditio ?

Quæ

Quæ origo Circulorum in imperio? quo pacto successit Sigismundus? Quo modo Regnum Hungariæ obtinuit?

Quæ initia Hussitarum? Quid de Conciliis Pisano & Constantiensi? Quæ facies Franciæ sub Joanne?

Quæ origo Domus II. Burgundicæ, quæ incrementa? quid de factionibus Burgundorum & Aurelianensium sub Carolo VI. quæ bella & revolutiones sub Richardo II. in Anglia? Quid de Henrico IV. & V. Quæ hic in Francia fecit? Quibus mediis Carolus VII. restitutus?

Quid de Virgine Aurelianensi sentiendum?

Quæ exordia factionum Eboracensium & Lancastriorum in Anglia?

Quæ causæ expeditionis cruciatæ in Bajafethum sub Sigismundo suscepτæ?

Quid de clade ad Nicopolim? Qui periit Bajafethus? Quid de Tamarlano? Quid de Amuratho II.

Quid de Conciliis Basileensi ac Florentino?

Quomodo successit Sigismundo Albertus II. Quo Austriacorum incremento? Quid de Friderico III. & Concordatis sub eo initis?

Quæ tum Bohemiæ & Hungariæ fors?

Quæ expeditiones Amurathi in Christianos? Quid de Joanne Hunniade, Joanne Scanderbek? Quis Mahomet II. Quæ ejus expeditio in Constantinopolim?

Quomodo imperium tamdiu stare potuit?

Quomodo corruere duobus ultimis sæculis cœpit?

## A S S E R T I O N E S.

**H**Æreditarium fuit imperium restituto per Carolum Magnum occidentali imperio.

Electio introducta fuit usurpatione & scissa feudali Regimine Republica; quare non eadem semper eligendi forma fuit & ab initio magnates & populus, postea-soli magnates, iisque tam facri quam profani omnes eligebant.

Electionis jus ad septem dumtaxat restrictum, consuetudine circa Seculum XIII. introduci cœpit, nec lege ante Bullam auream scripta, stabilitum fuit.

Partim jure belli, partim libero populi Romani consensu renovatum est in Carolo Magno imperium occidentale.

Carolus Magnus verus fuit Romæ dominus.

Imperatores in diuturnis his discordiis quibus Sacerdotium & Imperium divisæ fuere, nihil egerunt unquam ex quo pars iis opposita jus sibi quodpiam natum, fuisse prætendere potuisse, atque adeo juri independentiæ derogarunt nunquam.

Dominium temporale Papæ in Italia, longa munitum præscriptione, perpetram ex Historicis prætenditur injustiæ argui posse.

# PHILOSOPHIA MORALI.

## *Quæstiones.*

- Q**uid jus naturæ affirmativum, & negativum, & quod inter hæc quo ad obligandi modum discriminem?
- Quæ juris proprietates?
- Quæ morum honestatisque regula?
- Quæ conditiones ad actus honestatem requisitæ?
- Quæ ignorantia eam turbet? cur id non faciat aut metus aut vis?
- Quid dictamen conscientiæ & cur, si hoc etiam sit erroneum, sequendum sit.
- Quomodo in dubiis formetur dictamen, quid requiratur ut opinio vere sit probabilis, cur præstet inter probabiles, adhærere probabiliori?
- Quid officium perfectum & imperfectum?
- Unde officia erga Deum deducuntur?
- Quæ erga se ipsum, officia & quibus comprehenduntur regulis?
- Quæ sui suarumque rerum præscripta cura?
- Quæ erga alias officia, quis in his ordo?
- Quid mendacium & cur semper illicitum?
- Quamdiu juramentum promissorium obligat?
- Quid communio negativa & positiva bonorum?
- Cui natura jus maris & indivisarum rerum reliquit dominium?
- Quæ sit causa cur ad restitutionem injurians obligetur, & quando?
- Quid Philosophia moralis quæ partes, quod singularum objectum, quis finis?
- Quæ sint maxima felicitatis publicæ instrumenta?
- Quomodo Religio censetur primum Reipublicæ fundamentum?
- Quam graviter noceat patriæ Supersticio?
- Cur disputationes supprimendæ? cur tamen Ecclesis Heraclii & Typus Constantis reprobata sunt?
- An in Hæreticos sœviatur justæ? cur tamen præstet moderatione cum iis uti?
- Quid de Ærario?
- An thesauri in ærario si conserventur nimii, id non sæpe Reipublicæ obfit?
- Quid de fontibus ærarii, vectigalibus præfertim, & tributis, & quæ circa hæc observationes civiles?
- Quomodo justitia est patriæ necessaria?
- Quantum commutativa profit ad veram potentiam?
- Quæ in justitia distributiva & vindicativa observanda?
- Quæ sunt media quibus Reipublicæ crescit potentia?
- Quare multitudo populi est certissimum potentiae indicium, ut ex omnibus historiis colligitur?
- Quo-

Quomodo deprehenditur huic non officere vel restituta ab Evangelio  
Monagamia, vel introductus ab Ecclesia Cælibatus facer?

Qui sunt varii in Republica civium ordines?

Qui augmentant, & qui conservant patriam, quare de primis multiplicandis, non autem secundis est laborandum?

Cur Agricolæ sunt præstantissima civium portio, & quid illis debetur?

Quid de opificibus & mercatoribus notandum, & quid vere commercium dicitur?

Quid de Legibus, Magistratibus, Militia? quæ debet hodie esse propria militum ad cives?

Quis bonus vir? Quis bonus civis?

Quæ subditorum in Principem officia?

Unde Nobilitatis origo? quæ ejus in patriam & principem officia?

Quid magnificentia? quid luxus? quid prodigalitas? quid liberalitas?

Quid amicitia, quæ in illa cautelæ?

Quid inimicitia, quomodo cum inimicis procedendum?

Quid prudentia, quæ hujus circa loquela regulæ?

## A S S E R T I O N E S.

**F**inis hominis ultimus Deus est, in cuius per actus sibi proprios possessione, suprema illius felicitas sita est: ast: cum hanc quamdiu corpori unitus vivit perfecte obtinere nequeat, summa, quam in hoc mundo assequi potest, constitit beatitudo in illa animi quiete quam sola illi virtus parit.

Jus naturæ est Dei voluntas, qua absoluta & immutabilia præscribit media, quibus ad finem suum homo dirigitur.

Ad finem hunc si actiones exploret homo, infallibiliter dirigitur in cognitione juris naturæ, cuius proin cognoscendi principium est Deus ut infinite perfectus. *Socialitatis appetitus* quod vult Puffendorff; *felicitas humana* quod *Wolffius*, *amor Dei*, *sui ipsius*, & *proximi*, quod *Heineccius*; *fines creaturarum medii*, quod recentiores alii volunt; certitudinem talem parere nunquam possunt.

Inter officia quæ Deo debet homo, jus naturæ Religionem quoque externam præscribit: & frustra cum *Thomasio* (*Juris pr. Div. 1. 2. c. 1.*) id negante, quæritur dispar inter externam & quæ præscribitur, internam Religionem ratio.

Quare contra Bailium (in opere de cometa) adstruimus, quod politica etiam societas ex Atheis formari non possit: Deiftas etiam qui cum Deo nostrum orbem hominumque mores curæ non esse asserunt, alio nomine Athei veri sunt, a conditione civium excludimus, utpote cum, quod tamen unicum se ambire jactant, veri honesti homines esse nequeant.

Sui ipsius violentam occisionem omni casu proscriptit natura.

Fama sua cuilibet cordi ut sit, natura dictat; ast eam alterius cæde conservare, omnino est illicitum.

Tantum quilibet jus in vitæ suæ conservationem accepit, ut violentum invasorem etiam illata morte repellere queat, si tamen concessa facultate usus non fuerit, legem naturæ non transgreditur.

Omnia quæ proximo debentur officia, his continentur capitibus, quod tibi non vis fieri, alteri ne feceris; omnia vero quæcunque vultis ut faciant vos homines, & vos facite illis.

Natura quidem a mundi exordio in communione, reliquerat externa corporis bona, non tamen contra eam introducta est bonorum divisio.

Tantum abest legitimam Magistratui subjectionem naturæ repugnare, ut status potius civilis illi maxime sit conformis, ad quem, hominem ipsa natura formasse videtur. Quare societatum originem qualem Hobbesius Carneadem sequutus adstruit, hominesque aliquando pecorum instar vagatos ut juris consulti quidam antiqui ad invenerunt, negamus, societatesque ab initio conditi orbis semper fuisse adstruimus, deferentes potius Historicæ narrationi quam Scriptura proponit, quam futilibus recentiorum quorundam rationibus, quorum opinio, non Religioni tantum, sed & civili tranquillitati opponitur.

Hæreditario jure firmata Monarchia regimen est humanæ felicitati, quam maxime aptum.

Obedientia Principi debita tot nobis præscripta est titulis, ut nullo unquam casu ab hac sit exemptio, nisi ubi Deo manifeste contrarium præcipiteret: atque tum nihil nisi passive inobedire licet, neque hoc vinculo cives ab humana potestate liberari queunt, neque hoc officium limitare ipsi valent, cum potestas regimini a solo Deo collata sit; adversarii qui hic nos tanquam despotismi fautores insinulant, pro licentia populari, qua inter homines pejus nihil est, se pugnare non advertunt.

Bonus vir a bono cive nihil differt, vitam ergo qui patriæ non dicit utillem, non otiosus tantum sed & malus est.

Post Deum, patriæ Principisque amor reliquis rebus omnibus præferendus est. Huic officio cedunt reliqua humana omnia: sacrilegus est, qui patriæ suæ iniquus est.

Cum e Republica sit Thesauros publicos opulentos esse, manifestum est, civem quemlibet teneri bona sua in eos conferre: patriæ ergo injurius est, qui dissipatione quacunque se huic auxilio ineptum reddit.

Militaris vita, gloriæ seges & patriæ fulcrum convenientissima est homini natalibus illustri.

Scientiæ vitæ nobilis ornamentum sunt, nec hæ ut voluit J. J. Rouffau in differt. Academ. Divione coronata 1754.) corruptelæ morum contulere quidpiam.

In divitiis conquirendis primam ponere curam ingenuum dedecet, ast moderate parandis, & conservandis vacare, est de patria bene mereri.

Cum primus nobilitatis finis sit, patriæ Principique assistere, non appareat, quomodo huic adversaretur vel nobilitate excideret, qui commerciis incumberet.